

# NDUUDU N'DÁÍ CHÍ DÍNGUŪ<sup>n</sup> APÓSTOL LUCAS

Ye<sup>n</sup>e cáávā chí idingúú<sup>n</sup> yā carta 'cūū

**1** Nééné 'yaa<sup>n</sup> 'ii<sup>n</sup>'yā<sup>n</sup> nguaa<sup>n</sup> s'uuú<sup>n</sup> ne<sup>n</sup>'é yā idingúú<sup>n</sup> yā dendú'ū chí chíi, chíí<sup>n</sup> chí s'uuú<sup>n</sup> deenu yú chí nduudu cuaacu. <sup>2</sup>Tíicā tan'dúúcā chí 'ii<sup>n</sup>'yā<sup>n</sup> s'ee<sup>n</sup> n'diichí yā tanducué<sup>n</sup>'ē ndíí taachí chí nga'ā, 'ii<sup>n</sup>'yā<sup>n</sup> s'ee<sup>n</sup> ní chí'cuee<sup>n</sup> yā s'uuú<sup>n</sup>. 'Ii<sup>n</sup>'yā<sup>n</sup> s'ee<sup>n</sup> candée yā nduudu cuaacu ye<sup>n</sup>'é Ndyuūs ní nga<sup>n</sup>'á yā nduudu mii<sup>n</sup>. <sup>3</sup>Úú, Lucas, idingúú<sup>n</sup> ye<sup>n</sup>'é díí Teófilo cáávā chí deenú chí díí ní n'dai di. 'Tiicā ntúū<sup>n</sup> 'úú ní nadicádiinúú<sup>n</sup> chí idingúú<sup>n</sup> ye<sup>n</sup>'ē di tanducué<sup>n</sup>'ē chí chíi. Díi<sup>n</sup>ncā n'diichí tanducué<sup>n</sup>'ē ndúú<sup>n</sup>cū cuidado ndíí taachí nga'ā. <sup>4</sup>Túú<sup>n</sup>cā idingúú<sup>n</sup> ní tuumicadínuu<sup>n</sup> di chεε chí nduudu cuaacu ye<sup>n</sup>'ē dendú'ū chí 'ii<sup>n</sup>'yā<sup>n</sup> chí'cuee<sup>n</sup> yā díi.

Ye<sup>n</sup>e chí ángel yaa<sup>n</sup>'vi yā  
chí ch'iindiyā<sup>n</sup> Juan

<sup>5</sup>Tiempo mii<sup>n</sup> chí 'ii<sup>n</sup>'yā<sup>n</sup> Herodes mii<sup>n</sup> chí chíi yā rey ye<sup>n</sup>'e yá<sup>n</sup>'āa Judea, canée 'áámá chiiduú chí nguuví yā Zacarías. Chiiduú mii<sup>n</sup> ní ye<sup>n</sup>'e grupo ye<sup>n</sup>'e Abías. Ní n'daataá ye<sup>n</sup>'e Zacarías ní nguuvi tá Elisabet. Ní Elisabet mii<sup>n</sup> ní ye<sup>n</sup>'e ndaata

ye<sup>n</sup>'e Aarón. <sup>6</sup>Ndúú 'uuví yā ní n'dai taaví yā nanáá<sup>n</sup> Ndyuūs. 'Ii<sup>n</sup>'yā<sup>n</sup> s'ee<sup>n</sup> nguée<sup>n</sup> de'ē vee díí<sup>n</sup> yā chí nguée<sup>n</sup> n'daacā ndúú<sup>n</sup>cū 'ii<sup>n</sup>'yā<sup>n</sup> caati s'nee<sup>n</sup> veé<sup>n</sup> yā nducué<sup>n</sup>'ē nduudu chí nga<sup>n</sup>'a 'iivú Ndyuūs. <sup>7</sup>'Ii<sup>n</sup>'yā<sup>n</sup> s'ee<sup>n</sup> nguée<sup>n</sup> daiyá yā, ti Elisabet mii<sup>n</sup> nguée<sup>n</sup> taaví yā daiyá yā. Ní nduu 'uuví yā ní 'āā ndiicú yā.

<sup>8</sup>Áámá nguuvi, taachi tune<sup>n</sup> turno ye<sup>n</sup>'e grupo ye<sup>n</sup>'e Zacarías chí díi<sup>n</sup> ntii<sup>n</sup>'nyu<sup>n</sup> ye<sup>n</sup>'e chiiduú chí dichí'íve yā na yáacū templo ye<sup>n</sup>'é Ndyuūs, 'tíicā díí<sup>n</sup> Zacarías ntii<sup>n</sup>'nyu<sup>n</sup> ye<sup>n</sup>'e chiiduú nanáá<sup>n</sup> Ndyuūs. <sup>9</sup>Ní tan'dúú<sup>n</sup>cā costumbre ye<sup>n</sup>'e chiiduú s'ee<sup>n</sup>, tune<sup>n</sup> Zacarías mii<sup>n</sup> chí cunndaa yā na yáacū templo ye<sup>n</sup>'e Ndyuūs ní 'nee<sup>n</sup> ya<sup>n</sup>'a yā incienso. <sup>10</sup>Ní nducyaaca 'ii<sup>n</sup>'yā<sup>n</sup> snée yā cuaa<sup>n</sup> chūva'āi yáacū templo ní nga<sup>n</sup>'angua'á yā ne<sup>n</sup>'e chí ngiichi incienso chεeti yaacū templo. <sup>11</sup>Zacarías mii<sup>n</sup> canee yā na yaacū. Ní che'enaā<sup>n</sup> ye<sup>n</sup>'e Zacarías mii<sup>n</sup> 'áámá ángel chí Ndyuūs dichó'o yā. Ní ángel míí<sup>n</sup> chééndii yā lado tá cuaacu ye<sup>n</sup>'ē nátaí naachi n'giichi incienso mii<sup>n</sup>. <sup>12</sup>Ní taachi Zacarías mii<sup>n</sup> n'diichí yā ángel mii<sup>n</sup> 'āā ntéé deenú yā de'ē chí díí<sup>n</sup> yā ní díi'ya

taaví yā chii. <sup>13</sup>Naati ángel mii<sup>n</sup> ní ca<sup>n</sup>a yā: N'dií Zacarías, nguéé 'va'á nī, ti Ndyuūs ní ch'iindiveé<sup>n</sup> yā chí ca<sup>n</sup>'angua'á nī. Ní 'cuundiyaā<sup>n</sup> 'áámá daiya n'daataá ye<sup>n</sup>'é nī Elisabet mii<sup>n</sup>, ní cu'neé<sup>n</sup> nī nguuvi sa Juan. <sup>14</sup>Ní cuuvi yeenu taaví nī cáávā sa<sup>n</sup>'ā 'líí<sup>n</sup>. Ní 'yaa<sup>n</sup> n'dái 'ii<sup>n</sup>'yā<sup>n</sup> cuuvi yeenu yā cáávā chí 'cuundiyaā<sup>n</sup> dacua'ā mii<sup>n</sup>. <sup>15</sup>Caati daiyá nī mii<sup>n</sup> ní cuuvi ch'eete sa nanáá<sup>n</sup> Ndyuūs. Nguéé cu'u sa vino ndíí nguéé ndúú cu'u sa de'ē vee chí cuuvi cu'v'i sa. 'Āā canee sa ndúúcu Espíritu N'dai ye<sup>n</sup>'é Ndyuūs ndíí taachi 'āā cuéé 'cuundiyaā<sup>n</sup> sa. <sup>16</sup>Sa<sup>n</sup>'ā mii<sup>n</sup> ní dii<sup>n</sup> sa chí 'yaa<sup>n</sup> taavi ca daiyā 'ii<sup>n</sup>'yā<sup>n</sup> Israel nguεεcunee yā ní i'téenu yā Ndyuūs ye<sup>n</sup>'e yú. <sup>17</sup>Daiyá nī, Juan 'cūū, ní ca<sup>n</sup>'a sa vmnaa<sup>n</sup> ye<sup>n</sup>'ē Señor Jesucristo. Ní canee sa ndúúcu espíritu ndúúcu poder tan'dúúca chí canee profeta Elías ndii cuáá<sup>n</sup> vmnaa<sup>n</sup>. Sa<sup>n</sup>'ā mii<sup>n</sup> ní dii<sup>n</sup> sa chí 'cuεetinéé n'daācā 'ii<sup>n</sup>'yā<sup>n</sup> chí n'geete ndúúcu daiya yā. Nífcú 'ii<sup>n</sup>'yā<sup>n</sup> cuuvi cu'téenu yā tan'dúúca Ndyuūs ne<sup>n</sup>'é yā chí cu'téenu yā, ní tan'dúúca taná<sup>n</sup>'ā 'ii<sup>n</sup>'yā<sup>n</sup> chí n'dai i'téenu yā. Ní 'tífcā ca<sup>n</sup>'a sa dii<sup>n</sup> sa chí 'ii<sup>n</sup>'yā<sup>n</sup> s'ee<sup>n</sup> 'cuεetinéé yaá<sup>n</sup> yā chí cuuvi cu'téenu yā Señor Jesús taachi ndaa yā.

<sup>18</sup>Tuu'mi ní Zacarías mii<sup>n</sup> ní tiinguunee<sup>n</sup> yā ángel mii<sup>n</sup>: ¿Táácā cu'teenú chí nga<sup>n</sup>'a nī? caati 'úú ní 'āā ndiicúú 'úú, 'tiicá ntúū<sup>n</sup> n'daataá ye<sup>n</sup>'é.

<sup>19</sup>Angel mii<sup>n</sup> n'guεécútá<sup>n</sup>'a yā ní ca<sup>n</sup>'á yā: 'Úú ángel chí nguuvi Gabriel chí canee chí díí<sup>n</sup> ntií<sup>n</sup>'nyu<sup>n</sup> nanáá<sup>n</sup> Ndyuūs. Dendyuūs dich'ó yā 'úú. Ní 'úú yaa'ví n'dií ní cuuvi

nduudu n'dái 'cūū n'dií. <sup>20</sup>Maa<sup>n</sup> ní cuuvi 'díí'mi nī ní 'āā ntéé cuuvi caa<sup>n</sup>'má<sup>n</sup> nī ndii chó'oo chúū taachi cunuu<sup>n</sup> ca'ā tiempo ye<sup>n</sup>'ē, ti nguéé chí'teenú nī nduudu ye<sup>n</sup>'é taachi nga<sup>n</sup>'á chí chuū chí cuuvi.

<sup>21</sup>Ne<sup>n</sup>'e chí chíi chuū, 'ii<sup>n</sup>'yā<sup>n</sup> s'ee<sup>n</sup> chí snée yā ch'ua'ai yáacū templo chí snée ngiinu yā Zacarías mii<sup>n</sup> cue<sup>n</sup>'e yíínú yā chí Zacarías mii<sup>n</sup> ní chí'naá<sup>n</sup> yā cheeti yaacū templo ye<sup>n</sup>'é Ndyuūs. <sup>22</sup>Taachi Zacarías mii<sup>n</sup> ní nan'dáa yā cheeti yaacū 'āā ntéé ngii nga<sup>n</sup>'a yā. 'Ii<sup>n</sup>'yā<sup>n</sup> s'ee<sup>n</sup> ní tuumicadiínuu<sup>n</sup> yā chí véé 'áámá visión chí n'diichí Zacarías mii<sup>n</sup> taachí canee yā cheetí yaacū templo. Zacarías mii<sup>n</sup> díta'á yā de'ē chí ne<sup>n</sup>'e caa<sup>n</sup>'má<sup>n</sup> yā ti chíi 'díí'mi yā.

<sup>23</sup>Taachí chí'inū turno chí 'áámá ndeete ye<sup>n</sup>'e servicio chí dii<sup>n</sup> yā ntií<sup>n</sup>'nyu<sup>n</sup> cheeti yaacū templo Zacarías mii<sup>n</sup> ní cuna<sup>n</sup>'á yā na vaacu yā. <sup>24</sup>Cho'ó tiempo 'cūū ní n'daataá ye<sup>n</sup>'é yā chí Elisabet mii<sup>n</sup> ní chí'indi dácu'a ye<sup>n</sup>'é yā ní 'áámá canúu<sup>n</sup> ta na vaacu ta nyu<sup>n</sup>'u 'iyyū. Ní neené nacadiínuu<sup>n</sup> ta. Ní nga<sup>n</sup>'a ta maa<sup>n</sup> ta: <sup>25</sup>Chuū chí Señor Ndyuūs mii<sup>n</sup> ní díí<sup>n</sup> yā nduucu na nguuví 'cūū ní díí<sup>n</sup> yā chí 'āā ntéé 'cuinaá<sup>n</sup> nanáá<sup>n</sup> 'ii<sup>n</sup>'yā<sup>n</sup>.

**Angel ca<sup>n</sup>'á yā chí 'cuundiyaā<sup>n</sup> Jesús**

<sup>26</sup>Cuayivi chí ch'ínú jaa<sup>n</sup> 'iyyū chí Elisabet mii<sup>n</sup> chí'indi dácu'a ye<sup>n</sup>'e tá ní Ndyuūs dich'ó yā ángel Gabriel taama vmné<sup>n</sup>'ēe. Ní cue<sup>n</sup>'é yā na 'áámá yáā<sup>n</sup> chí nguuvi Nazaret chí ye<sup>n</sup>'ē yá<sup>n</sup>'āa Galilea. <sup>27</sup>Ndyuūs dich'ó yā ángel Gabriel mii<sup>n</sup> nanáá<sup>n</sup> 'áámá n'daataá chí

cuiinú chi nguuvi tá María. María mii<sup>n</sup> ní ca<sup>n</sup>á yā chi 'caandavaacú yā ndúúcū 'aama sa<sup>n</sup>ā chi nguuvi José. Sa<sup>n</sup>á 'cuū ní ye<sup>n</sup>e ndaata ye<sup>n</sup>e rey David chi ndí tiempo chi 'āā ch'ó'ō. <sup>28</sup>Angel mii<sup>n</sup> ní sndaa yā naachi canéé María ní ca<sup>n</sup>a yā: N'diī, María, yeenú taavi nī chi Ndyuūs ne<sup>n</sup>e taavi yā n'diī. Señor Ndyuūs caneé yā ndúúcū n'diī. Ndyuūs di'viicu cá yā n'diī nguaa<sup>n</sup> nducyaaca n'daataá ye<sup>n</sup>e i<sup>n</sup>'yee<sup>n</sup>dí 'cūū.

<sup>29</sup>Taachi María mii<sup>n</sup> ch'iindiveé<sup>n</sup> yā chuū, cue<sup>n</sup>e yiinú yā ní chista<sup>n</sup>a vaadi cadíinu<sup>n</sup> ye<sup>n</sup>é yā ye<sup>n</sup>e nduudu ye<sup>n</sup>e ángel mii<sup>n</sup>. Ní nadicádiinu<sup>n</sup> yā: ¿D'é'ē ne<sup>n</sup>e caa<sup>n</sup>'ma<sup>n</sup> nduudú 'cūū? <sup>30</sup>Tuu'mí ángel mii<sup>n</sup> ní ca<sup>n</sup>a yā: N'diī, María, nguéé 'va'a nī, ti véé taavi favor ye<sup>n</sup>é nī nanáá<sup>n</sup> Ndyuūs, ti Ndyuūs dine<sup>n</sup>é yā n'diī. <sup>31</sup>Ní cuuvi daiyá nī ní 'cuūndi 'áámá sa<sup>n</sup>ā daiyá nī, ní cuuvi nguuví yā JESÚS.

<sup>32</sup>Daiyá nī cuuvi ch'ēete n'dai yā ní 'ii<sup>n</sup>'yā<sup>n</sup> s'ee<sup>n</sup> nga<sup>n</sup>á yā chi daiyá nī ní Daiyá Dendyuūs chi ch'ēete taavi ca. Ní Señor Ndyuūs ca<sup>n</sup>a yā dí<sup>n</sup> yā chi daiyá nī ní cuuví yā rey lado ye<sup>n</sup>e rey David tan'dúúcā nguuvi chí 'āā cho'ó. <sup>33</sup>Ní caa<sup>n</sup>'ma<sup>n</sup> ntii<sup>n</sup>'nyú<sup>n</sup> yā ye<sup>n</sup>e 'ii<sup>n</sup>'yā<sup>n</sup> ye<sup>n</sup>e Israel cue<sup>n</sup>e daā<sup>n</sup>'ma<sup>n</sup>. Ní naachi caa<sup>n</sup>'ma<sup>n</sup> ntii<sup>n</sup>'nyú<sup>n</sup> yā ní 'áámá cūnee.

<sup>34</sup>Tuu'mi ní María ca<sup>n</sup>á yā chii yā ángel: ¿Taaca cuuví chuū, ti 'úú ní nguéé isa<sup>n</sup>ā ye<sup>n</sup>é?

<sup>35</sup>Angel mii<sup>n</sup> ní nan'guēcúta<sup>n</sup>á yā: Ndúúcū poder ye<sup>n</sup>é Ndyuūs chi canéé na va'ai ch'ēeti nguuvi Espíritu N'dai ye<sup>n</sup>é Ndyuūs ní ndaa<sup>n</sup> yā vmnaa<sup>n</sup> ye<sup>n</sup>é n'diī. Ní cu'neé<sup>n</sup> yā

'daa<sup>n</sup>'nú<sup>n</sup> yā tan'dúúcā meēé<sup>n</sup> vmnaa<sup>n</sup> ye<sup>n</sup>é n'diī ní 'licu cuuvi ch'ó'ō ye<sup>n</sup>é nī chí dacua<sup>n</sup>'ā 'líí<sup>n</sup> chí 'cuundiyaā<sup>n</sup> mii<sup>n</sup> 'tíicā cunée yā ye<sup>n</sup>é Ndyuūs ní cuuvi nguuví yā 'ii<sup>n</sup>'yā<sup>n</sup> chí d'ēeve chí Daiya Dendyuūs 'ii<sup>n</sup>'yā<sup>n</sup>. <sup>36</sup>Ní n'diichí nī. Prima ye<sup>n</sup>e nī chí nguuví Elisabet mii<sup>n</sup>, 'cuundii ntúū<sup>n</sup> 'áámá daiyá yā maa<sup>n</sup> chí 'āā ndiicú yā. 'Áā jaa<sup>n</sup> 'iiyu daiyá yā ch'ēetí yā, n'daataa mii<sup>n</sup> chí 'ii<sup>n</sup>'yā<sup>n</sup> s'ee<sup>n</sup> nga<sup>n</sup>'a yā chí nguēe 'cuūndi daiya yā. <sup>37</sup>Tíicā dii<sup>n</sup> Ndyuūs caati 'iivú Ndyuūs cuuvi dí<sup>n</sup> yā tanducué<sup>n</sup>e chí ne<sup>n</sup>é yā dí<sup>n</sup> yā.

<sup>38</sup>Tuu'mi ní María mii<sup>n</sup> ní ca<sup>n</sup>á yā: 'Úú criada chí nga<sup>n</sup>'ā ntii<sup>n</sup>'nyu<sup>n</sup> 'iivú Ndyuūs ye<sup>n</sup>é. Maa<sup>n</sup> ní Ndyuūs dí<sup>n</sup> yā nduucú tan'dúúcā chí ca<sup>n</sup>a yā chí dí<sup>n</sup> yā. Taachi ch'iinu ca<sup>n</sup>a yā chuū, ángel mii<sup>n</sup> ní cuna<sup>n</sup>'a yā.

### María mii<sup>n</sup> che<sup>n</sup>é yā n'diichi yā Elisabet

<sup>39</sup>Nguuvi s'ee<sup>n</sup> María mii<sup>n</sup> nūu<sup>n</sup> cue<sup>n</sup>é yā na yúúní ní ndāa yā na yāā<sup>n</sup> Judá. <sup>40</sup>Ní ndāa yā na vaacu Zacarías mii<sup>n</sup> ní yaa'ví yā Elisabet. <sup>41</sup>Taachi Elisabet mii<sup>n</sup> ch'iindiveé<sup>n</sup> yā nduudu ye<sup>n</sup>e María dacua<sup>n</sup>'āá mii<sup>n</sup> ní nu<sup>n</sup>'u ch'ēeti Elisabet mii<sup>n</sup>. Ní Elisabet mí<sup>n</sup> chiitu Espíritu N'dai ye<sup>n</sup>é Ndyuūs tá<sup>n</sup>'ā. <sup>42</sup>Ní ca<sup>n</sup>'a yā ndúúcū nduudu dítuú: D'é'ē chúúcā n'dai n'diī nguaa<sup>n</sup> nducyaaca n'daataá. Ní n'dai taavi daiyá nī chí 'cuūndi yā. <sup>43</sup>¿Du'ú 'úú chí ndāa ch'ēecu Señor Ndyuūs ye<sup>n</sup>é chí yaa'ví yā 'úú? <sup>44</sup>Ti taachí ch'iindiveé<sup>n</sup> nduudu ye<sup>n</sup>e nī, dacua<sup>n</sup>'ā ye<sup>n</sup>é nu<sup>n</sup>'u ch'ēetí tan'dúúcā chí yeenu taavi ye<sup>n</sup>e. <sup>45</sup>D'é'ē chúúcā n'dai dii chí chí'téenu di caati cúúví

cuaacu tan'dúucā chi Señor Ndyuūs ca<sup>n</sup>a yā.

<sup>46</sup>Tuu'mi María ní ca<sup>n</sup>a yā:

Alma ye<sup>n</sup>é i'teenú taavi Ndyuūs ní dich'εεté Ndyuūs.

<sup>47</sup>Ní staava ye<sup>n</sup>é ní yeenú n'dai chi i'teenú Ndyuūs. Ní Ndyuūs nadinguá<sup>n</sup>ai yā 'úú ye<sup>n</sup>e nuu<sup>n</sup>ndi ye<sup>n</sup>é.

<sup>48</sup>Ti Ndyuūs n'diichí yā 'úú chi pobre 'úú ní dichii'vé Ndyuūs, ti ndíí maa<sup>n</sup> nducyáácá 'ii<sup>n</sup>yā<sup>n</sup> caa<sup>n</sup>ma<sup>n</sup> yā ye<sup>n</sup>e 'úú: Dε'ε chúucā n'dai 'úú.

<sup>49</sup>Ti Ndyuūs chi véé taaví poder ye<sup>n</sup>é yā díí<sup>n</sup> yā nduucú cosas chí ch'εεte n'dai. Ní Ndyuūs ní dεēvē taaví yā.

<sup>50</sup>Ní Ndyuūs ya'ai 'iinu taaví yā caavā nducyaaca 'ii<sup>n</sup>yā<sup>n</sup> chi i'téenu yā ye<sup>n</sup>e yā tiempo chi ch'ó'oo, 'tiicá ntúū<sup>n</sup> tiempo maa<sup>n</sup>, ní 'tiicá ntúū<sup>n</sup> tiempo chi cuchii.

<sup>51</sup>Dendyuūs 'āā dii<sup>n</sup> yā vaadi n'dai ch'εεte ndúucū poder ye<sup>n</sup>é yā, níícú díí<sup>n</sup> yā ganar ye<sup>n</sup>e staava ye<sup>n</sup>é 'ii<sup>n</sup>yā<sup>n</sup> chi dich'εεté yā maá<sup>n</sup> yā.

<sup>52</sup>Ndyuūs divíí yā 'ii<sup>n</sup>ntyé<sup>n</sup>ē chi nga<sup>n</sup>a ntii<sup>n</sup>nyu<sup>n</sup> ye<sup>n</sup>e trono ye<sup>n</sup>é yā, ní dich'εεté yā 'ii<sup>n</sup>yā<sup>n</sup> ndiicúú<sup>n</sup>.

<sup>53</sup>Ndyuūs ca'á yā cosas chi n'dai taavi 'ii<sup>n</sup>yā<sup>n</sup> chí ch'iindiveé<sup>n</sup> yā ye<sup>n</sup>e yā. Ní nguéé díí<sup>n</sup> yā dε'ē vεε cáávā 'ii<sup>n</sup>yā<sup>n</sup> s'ee<sup>n</sup> chi nguéé ne<sup>n</sup>é yā chi Ndyuūs nnee yā 'ii<sup>n</sup>yā<sup>n</sup> s'ee<sup>n</sup>.

<sup>54</sup>Ndyuūs chinnee yā s'uuú<sup>n</sup> chi 'ii<sup>n</sup>yā<sup>n</sup> ye<sup>n</sup>e Israel ti dichí'vé yú 'ii<sup>n</sup>yā<sup>n</sup>. Ní nn'gaacú yā ye<sup>n</sup>e s'uuú<sup>n</sup> ní nduuví ya'ái taaví yā ye<sup>n</sup>e s'uuú<sup>n</sup>.

<sup>55</sup>Ndyuūs cue<sup>n</sup>e daā<sup>n</sup>ma<sup>n</sup> idií<sup>n</sup> yā tan'dúucā chi ca<sup>n</sup>a yā 'ii<sup>n</sup>yā<sup>n</sup> ye<sup>n</sup>e ndaata ye<sup>n</sup>e yú, ní ndúucū chiida yú Abraham ndúucū 'ii<sup>n</sup>yā<sup>n</sup> ye<sup>n</sup>é yā ndíí cuaa<sup>n</sup> vmnaa<sup>n</sup>.

'Túucā nga<sup>n</sup>a María mii<sup>n</sup>.

<sup>56</sup>Tuu'mi ní María mii<sup>n</sup> canée yā ndúucū Elisabet tan'dúucā 'íínú 'iiyū. Cuayiivi ní cuna<sup>n</sup>á yā na vaacu yā.

### Ye<sup>n</sup>é chí ch'iindiyāā<sup>n</sup> Juan chí cheedínuū<sup>n</sup>ni<sup>n</sup>

<sup>57</sup>Taachí snuū ca'ā 'iiyū ye<sup>n</sup>e dacua'ā mii<sup>n</sup>, Elisabet mii<sup>n</sup> ch'iindiyāā<sup>n</sup> 'áámá daiya yā chí sa<sup>n</sup>ā.

<sup>58</sup>Ii<sup>n</sup>yā<sup>n</sup> na nii<sup>n</sup>nuú<sup>n</sup> va'āi ndúucū 'ii<sup>n</sup>yā<sup>n</sup> ye<sup>n</sup>é yā yeenú n'dai yā ndúucū yā taachí ch'iindiveé<sup>n</sup> yā chí Ndyuūs ní ya'ai taaví yā Elisabet mii<sup>n</sup>. <sup>59</sup>Ch'iinū dacua'ā 'líf<sup>n</sup> nii<sup>n</sup>n<sup>n</sup> nguuví, ní 'ii<sup>n</sup>yā<sup>n</sup> ndāa yā na vaacú Elisabet chí dii<sup>n</sup> yā circuncidar dacua'ā mii<sup>n</sup>. Níícú 'ii<sup>n</sup>yā<sup>n</sup> s'ee<sup>n</sup> ne<sup>n</sup>é yā cu'nee<sup>n</sup> yā chí cuuvi nguuví sá Zacarías tan'dúucā chí nguuví chiida sa Zacarías. <sup>60</sup>Naati cheecu sa míí<sup>n</sup> ca<sup>n</sup>a yā: Nguéé 'tíicā. Juan cuuvi ngúúví sá.

<sup>61</sup>Tuu'mi ca<sup>n</sup>a 'ii<sup>n</sup>yā<sup>n</sup> s'ee<sup>n</sup> chíí yā cheecu sá mii<sup>n</sup>: ¿Dε'ε cáávā? Mar 'áámá 'ii<sup>n</sup>yā<sup>n</sup> ye<sup>n</sup>e ní nguéé nguuví yā 'tíicā.

<sup>62</sup>Ndúucū chí dit'a yā ntiinguunée<sup>n</sup> yā chíida sa taacā né<sup>n</sup>e yā chí cuúví ngúúví sá.

<sup>63</sup>Zacarías mii<sup>n</sup> ní 'nee<sup>n</sup> ta'á yā naachi canee 'áámá caaca ní dingúú<sup>n</sup> yā chuū: Chí Juan duuchi sa. Tuu'mi ní nducyaaca 'ii<sup>n</sup>yā<sup>n</sup> ní cue<sup>n</sup>e yiinú yā. <sup>64</sup>Caati hora míí<sup>n</sup> nūū<sup>n</sup>, Zacarías mii<sup>n</sup> nacan'dāa nduudu ye<sup>n</sup>e yā. Níícū tuu'mi tuca'á

yā ca<sup>n</sup>a yā: De'ē chūúcā ch'ēete Dendyuūs. <sup>65</sup>Ní nducyáácá 'ii<sup>n</sup>yā<sup>n</sup> nii<sup>n</sup>nuú<sup>n</sup> va'ai 'di'iya taavi cá yā chi. Ní ye<sup>n</sup>e chi chó'oo, chuū ní ca<sup>n</sup>a nducyáácá 'ii<sup>n</sup>yā<sup>n</sup> na yāā<sup>n</sup> chi snú<sup>n</sup> cuaa<sup>n</sup> ya<sup>n</sup>'āi ye<sup>n</sup>e chi snéé na yiicū s'ee<sup>n</sup> ye<sup>n</sup>e yā<sup>n</sup>'āa Judea. <sup>66</sup>Ní nducyáácá 'ii<sup>n</sup>yā<sup>n</sup> chi cadiinuu<sup>n</sup> yā ye<sup>n</sup>e chuū ní nacádiinuu<sup>n</sup> yā na staava ye<sup>n</sup>e yā. Ní ca<sup>n</sup>a yā 'áámá yā ndúúcū taama yā: ¿De'ē cuuvi ndúúcū dacua'a líí<sup>n</sup> chi 'tíicá? Caati 'tíicā Dendyuūs mii<sup>n</sup> ní canéé ndúúcū dacua'ā mii<sup>n</sup>.

**Zacarías ca<sup>n</sup>a yā ye<sup>n</sup>e chi Dendyuūs ca<sup>n</sup>á yā dii<sup>n</sup> yā ndúúcū dacua'āa mii<sup>n</sup>**

<sup>67</sup>Zacarías, chiídāa dacua'āa mii<sup>n</sup>, chiitúú 'ii<sup>n</sup>yā<sup>n</sup> ndúúcū Espíritu N'dai ye<sup>n</sup>é Ndyuūs ní ca<sup>n</sup>a Zacarías nduudu chí ca<sup>n</sup>a Ndyuūs chí caa<sup>n</sup>'má<sup>n</sup> yā. Ní ca<sup>n</sup>a yā tan'dúúcā 'áámá profeta chi candēe nduudu ye<sup>n</sup>é Ndyuūs:

<sup>68</sup>De'ē chūúcā n'dai Señor Ndyuūs ye<sup>n</sup>e 'ii<sup>n</sup>yā<sup>n</sup> Israel chi ndāa yā nanaa<sup>n</sup> s'uuú<sup>n</sup> chi nadinguá<sup>n</sup>'ai yā s'uuú<sup>n</sup>, ní ye<sup>n</sup>é yā s'uuú<sup>n</sup>.

<sup>69</sup>Ní tee yā s'uuú<sup>n</sup> 'áámá 'ii<sup>n</sup>yā<sup>n</sup> chi néené vee poder ye<sup>n</sup>e yā chi nadinguá<sup>n</sup>'ai yā s'uuú<sup>n</sup> chi 'ii<sup>n</sup>yā<sup>n</sup> mii<sup>n</sup> ye<sup>n</sup>e ndaata ye<sup>n</sup>e rey David chi dichíí'vē Ndyuūs ndíi cuaa<sup>n</sup> vmnaa<sup>n</sup>.

<sup>70</sup>Ní Ndyuūs dií<sup>n</sup> yā chí cuaacu tan'dúúcā chi ca<sup>n</sup>a yā cáávā nduudu ye<sup>n</sup>e profetas chí ca<sup>n</sup>a yā tiempo chi 'āā 'naa<sup>n</sup> n'dai.

<sup>71</sup>Ní ca<sup>n</sup>a yā chi Ndyuūs nadinguá<sup>n</sup>'ai yā s'uuú<sup>n</sup> ye<sup>n</sup>e 'ii<sup>n</sup>yā<sup>n</sup> chi táá<sup>n</sup> yā ye<sup>n</sup>e yú. Ní nadinguá<sup>n</sup>'ai yā s'uuú<sup>n</sup> ye<sup>n</sup>e

nducyáácá 'ii<sup>n</sup>yā<sup>n</sup> chi nguée ngii n'diichí yā s'uuú<sup>n</sup>.

<sup>72</sup>Ní neene ya'ai 'iinú Ndyuūs 'ii<sup>n</sup>yā<sup>n</sup> ye<sup>n</sup>e yú ndíi cuaa<sup>n</sup> vmnaa<sup>n</sup>, ní nan'gaacú yā ye<sup>n</sup>e chí ca<sup>n</sup>a yā chí dii<sup>n</sup> yā chí n'daacā ndii cuáá<sup>n</sup> vmnaa<sup>n</sup>.

<sup>73</sup>Chuū ní compromiso chi Ndyuūs ca<sup>n</sup>'ā cuaacu yā ndúúcū chiida yú Abraham chí tee yā s'uuú<sup>n</sup>.

<sup>74</sup>Taachi Ndyuūs nadanguá<sup>n</sup>'ai yā s'uuú<sup>n</sup> ye<sup>n</sup>e 'ii<sup>n</sup>yā<sup>n</sup> chi nduuvi táá<sup>n</sup> yā ye<sup>n</sup>e yú, dií<sup>n</sup> yā 'túúcā caati dichíí'vē yú Ndyuūs ní nguée nduúcū vaadi 'va'a.

<sup>75</sup>Tanducué<sup>n</sup>'ē vida ye<sup>n</sup>e yú ní dichíí'vē yú Ndyuūs, ní dii<sup>n</sup> yú tan'dúúcā 'ii<sup>n</sup>yā<sup>n</sup> chí dēeve ní n'dai nanáá<sup>n</sup> Ndyuūs.

<sup>76</sup>Díí, sa<sup>n</sup>'ā líí<sup>n</sup> chí daiyá, cūnee chí dúúchí dí profeta ye<sup>n</sup>é Ndyuūs chí ch'ēete n'dai chí canéé na va'ai ch'ēeti nguuví caati ca<sup>n</sup>'ā di cuáá<sup>n</sup> vmnaa<sup>n</sup> ye<sup>n</sup>e Señor Jesucristo. Ní 'cuūndiyā<sup>n</sup> di 'ii<sup>n</sup>yā<sup>n</sup> s'ee<sup>n</sup> chí 'cuēetinéé ngiinu yā taachi ndaa Jesús.

<sup>77</sup>Ní dii<sup>n</sup> di chí 'ii<sup>n</sup>yā<sup>n</sup> cadiinúú<sup>n</sup> yā ye<sup>n</sup>e chí ngua<sup>n</sup>'ai yā ye<sup>n</sup>e nuu<sup>n</sup>'ndi ye<sup>n</sup>e yā ní Ndyuūs nadich'ēecú yā ye<sup>n</sup>e yā.

<sup>78</sup>Ní cucáávā Ndyuūs ye<sup>n</sup>'ē yú néené ya'ai 'iinú yā s'uuú<sup>n</sup> tee yā 'áámá dēeve ye<sup>n</sup>e yā s'uuú<sup>n</sup>, dēeve chí chiicá ye<sup>n</sup>e va'ai ch'ēeti nguuvi.

<sup>79</sup>Ní chí dēeve mii<sup>n</sup> chíí Ndyuūs ní cuuvi dēevé yā ye<sup>n</sup>e nducyaaca 'ii<sup>n</sup>yā<sup>n</sup> chí snéé yā na maāi<sup>n</sup> ndúúcū nuu<sup>n</sup>'ndi ye<sup>n</sup>é yā. Ní Ndyuūs nacandée

yā s'uuú<sup>n</sup> na yúúní ye<sup>n</sup>e vaadi  
'diií<sup>n</sup>.

<sup>80</sup>Ní sa<sup>n</sup>á 'lír<sup>n</sup> ní ch'iita sa ní 'āā  
deenū sa ní ditiinū sa na espíritu  
ye<sup>n</sup>e sa. Ní taachi 'āā ch'ēete sa,  
sa<sup>n</sup>á mii<sup>n</sup> ní cue<sup>n</sup>e sa cuēeti ní  
caneē sa mii<sup>n</sup> ndii ndaa tiempo  
taachi ca<sup>n</sup>a sa nduudu cuaacu ye<sup>n</sup>e  
Ndyuūs nanáá<sup>n</sup> 'ii<sup>n</sup>yā<sup>n</sup> ye<sup>n</sup>e Israel.

### Ye<sup>n</sup>e chi ch'iindiyáa<sup>n</sup> Jesús

(Mt. 1.18-25)

**2** Nguuvi s'ee<sup>n</sup> emperador  
Augusto César ca<sup>n</sup>a ntii<sup>n</sup>nyú<sup>n</sup>  
yā chi 'cuēetiné<sup>n</sup> nguū<sup>n</sup> nducyaaca  
'ii<sup>n</sup>yā<sup>n</sup> ye<sup>n</sup>e núú<sup>n</sup>má<sup>n</sup> yá<sup>n</sup>āa naachi  
ca<sup>n</sup>a ntii<sup>n</sup>nyú<sup>n</sup> yā. <sup>2</sup>Ní taachi  
Cirenio ní gobernador yā ye<sup>n</sup>e  
yá<sup>n</sup>āa Siria, 'āā dií<sup>n</sup> yā chuū chí  
n'gēetiné<sup>n</sup> nguū<sup>n</sup> yā. <sup>3</sup>Ní nducyaaca  
'ii<sup>n</sup>yā<sup>n</sup> sna<sup>n</sup>a yā na yāá<sup>n</sup> naachi  
ch'iindiyáa<sup>n</sup> yā ní ca'a yā chi ngúúví  
yā. <sup>4</sup>Tíicā chií José mii<sup>n</sup> ní n'dāa  
yā na yāá<sup>n</sup> Nazaret mii<sup>n</sup> ye<sup>n</sup>e yá<sup>n</sup>āa  
Galilea ní ndaá yā na yaá<sup>n</sup> Belén  
ye<sup>n</sup>e yá<sup>n</sup>āa Judea. Yáá<sup>n</sup> mii<sup>n</sup> ní  
duuchi Yáa<sup>n</sup> ye<sup>n</sup>e David caati  
José mii<sup>n</sup> ní na ndaata ye<sup>n</sup>e rey  
David mii<sup>n</sup> 'ii<sup>n</sup>yā<sup>n</sup>. <sup>5</sup>Cue<sup>n</sup>e José  
mii<sup>n</sup> ndúú<sup>n</sup>cū María ti chiida tá  
ndúú<sup>n</sup>cū chēecu tá dii<sup>n</sup> yā prometer  
chi 'caandavaacu tá ndúú<sup>n</sup>cū José  
mii<sup>n</sup>. María mii<sup>n</sup> ní véé daiya tá  
chēeti tá. Mii<sup>n</sup> ní ndaá yā ca'a  
yā ngúúví yā. <sup>6</sup>Taachi mii<sup>n</sup> snéé  
yā, snuū ca'a nguuví ye<sup>n</sup>e María  
mii<sup>n</sup> chi 'cuundiyaá<sup>n</sup> daiya yā.  
<sup>7</sup>Mii<sup>n</sup> ch'iindiyáa<sup>n</sup> sa<sup>n</sup>a 'lír<sup>n</sup>, daiya  
tá chi vmnáá<sup>n</sup> vmnaa<sup>n</sup>, ní chēecú  
yā tíínūu sa<sup>n</sup>a 'lír<sup>n</sup>, ní sn'diití yā  
sa<sup>n</sup>á 'lír<sup>n</sup> mii<sup>n</sup> naachi snúú<sup>n</sup> 'iiti.  
Ní ch'ēetinee yā mii<sup>n</sup> caati nguéé  
ndaacá yā va'āi chi n'dai.

### Angeles ndeé yā ndúú<sup>n</sup>cū 'ii<sup>n</sup>yā<sup>n</sup> chí idií<sup>n</sup> cuidado 'iiti cuūchí

<sup>8</sup>Ná campo ye<sup>n</sup>e yáá<sup>n</sup> Belén  
mii<sup>n</sup> véé 'ii<sup>n</sup>yā<sup>n</sup> chí snéé cuidado  
'iiti cuūchí. Ní n'gēetí nduuchí  
yā n'gaa<sup>n</sup> na cuēeti cucáá<sup>n</sup> 'iiti  
cuūchí mii<sup>n</sup>. <sup>9</sup>Ní n'gaa<sup>n</sup> mii<sup>n</sup> 'áámá  
ángel chí Señor Ndyuūs dichō'o yā  
che'enaá<sup>n</sup> yā nanáá<sup>n</sup> 'ii<sup>n</sup>yā<sup>n</sup> s'ee<sup>n</sup> chí  
snéé cuidado 'iiti cuūchí. Ní chí  
dēeve ch'ēete n'dai ye<sup>n</sup>e Ndyuūs  
chiiya nanáá<sup>n</sup> yā ní 'dii'yā n'dái  
yā chii. <sup>10</sup>Angel mii<sup>n</sup> ní ca<sup>n</sup>a yā  
chii yā 'ii<sup>n</sup>yā<sup>n</sup> s'ee<sup>n</sup>: Ndís'tií, nguēe  
'va'á nī tí 'úú nindeé 'áámá nduudu  
chí n'dai níicú cuuvi yeenu taavi  
ndís'tií ndúú<sup>n</sup>cū nducyaaca 'ii<sup>n</sup>yā<sup>n</sup>.  
<sup>11</sup>Tí maa<sup>n</sup> ní na yáá<sup>n</sup> ye<sup>n</sup>e David  
ch'iindiyáa<sup>n</sup> cáava ndís'tií 'áámá  
sa<sup>n</sup>a 'lír<sup>n</sup> chí nadanguá<sup>n</sup>'ai yā 'ii<sup>n</sup>yā<sup>n</sup>  
ye<sup>n</sup>e nuu<sup>n</sup>ndi ye<sup>n</sup>e yā. Sa<sup>n</sup>á 'lír<sup>n</sup> míí<sup>n</sup>  
ní CRISTO chí Señor chí Ndyuūs  
dichō'ó yā. <sup>12</sup>Ní deenū nī chí  
cuaacu ndúú<sup>n</sup>cū señal 'cūū. Ndís'tií  
ní nndaaca nī dacua'a míí<sup>n</sup> ndēecu  
tíínūu ní candiiti sa na lugar naachi  
snúú<sup>n</sup> 'iiti.

<sup>13</sup>Hora míí<sup>n</sup> nūu<sup>n</sup> n'dee n'dái  
ángeles ye<sup>n</sup>e va'ai chēeti nguuvi  
che'enaá<sup>n</sup> yā naachi canéé ángel  
mii<sup>n</sup>. Angeles ní nga<sup>n</sup>a yā chí  
ch'ēete n'dai Ndyuūs mii<sup>n</sup>. 'Tíicā  
nga<sup>n</sup>a yā:

<sup>14</sup>Ch'ēete n'dái Ndyuūs chí canéé  
na va'ai chēeti nguuvi. Ní véé  
vaadi 'diií<sup>n</sup> na yá<sup>n</sup>āa nguaa<sup>n</sup>  
'ii<sup>n</sup>yā<sup>n</sup> chí cunéé n'daacā n'dai  
ti snéé yā ndúú<sup>n</sup>cū favor ye<sup>n</sup>e  
Ndyuūs.

<sup>15</sup>Cho'oo chúu ní ángeles s'ee<sup>n</sup>  
cuna<sup>n</sup>'á yā va'ai chēeti nguuvi. Sa<sup>n</sup>a  
chí snéé cuidado 'iiti cuūchí mii<sup>n</sup>

ca<sup>n</sup>a sa chii sa vi'i: Cú'u yú maa<sup>n</sup> na yáa<sup>n</sup> Belén ní n'diichi yú chuū chi Señor Ndyuūs mii<sup>n</sup> chii yā s'uūú<sup>n</sup>.

<sup>16</sup>Maa<sup>n</sup>nch'εεté nūu<sup>n</sup> cue<sup>n</sup>e yā. Ní ndaacá yā María ndúúcu José, ndúúcu sa<sup>n</sup>á líí<sup>n</sup> dacua'a mii<sup>n</sup> cándiiti sa na lugar naachi snúú<sup>n</sup> 'iiti. <sup>17</sup>Ní taachi n'diichí yā sa<sup>n</sup>á líí<sup>n</sup> míí<sup>n</sup>, ca<sup>n</sup>a yā chii yā 'ii<sup>n</sup>yā<sup>n</sup> tan'dúúca ángel ca<sup>n</sup>a yā chii yā maá<sup>n</sup> yā ye<sup>n</sup>é dacua'a mii<sup>n</sup>. <sup>18</sup>Nducyáácá 'ii<sup>n</sup>yā<sup>n</sup> chi ch'iindiveé<sup>n</sup> yā chuu chí ca<sup>n</sup>a 'ii<sup>n</sup>yā<sup>n</sup> chi snéé cuidado 'iiti cuūchí cue<sup>n</sup>é yiinu taaví yā ye<sup>n</sup>e chuū. <sup>19</sup>Naati María mii<sup>n</sup> ní nguain'dai yā nducué<sup>n</sup>e chuū na staava ye<sup>n</sup>e tá. Ní nacadífnuu<sup>n</sup> yā dε'ε cuuvi. <sup>20</sup>Ii<sup>n</sup>yā<sup>n</sup> chi snéé cuidado 'iiti cuūchí cuína<sup>n</sup>a yā ní nga<sup>n</sup>a yā chi ch'εete n'dai Dendyuūs. Ní s'téenu yā Ndyuūs ye<sup>n</sup>e tanducué<sup>n</sup>e chi ch'iindiveé<sup>n</sup> yā ní n'diichi yā ti tan'dúúca chi ángel mii<sup>n</sup> ca<sup>n</sup>á yā chii yā 'ii<sup>n</sup>yā<sup>n</sup>.

**Ye<sup>n</sup>e sa<sup>n</sup>á chi nguuvi Simeón ní ye<sup>n</sup>e 'áámá n'daataá chi nguuvi tá Ana**

<sup>21</sup>Ch'iinu dacua<sup>n</sup>á mii<sup>n</sup> níí<sup>n</sup>ní<sup>n</sup> nguuvi ní ndaa nguuvi chi díí<sup>n</sup> yā circuncidar dacua<sup>n</sup>á mii<sup>n</sup>. Ní s'née<sup>n</sup> yā chi nguuvi JESÚS, tan'dúúca chi ca<sup>n</sup>a ángel mii<sup>n</sup> cuáá<sup>n</sup> vmnaa<sup>n</sup> ndíi taachi 'áá cuéε sa cheeti María.

<sup>22</sup>Taachí snuū ca'a nii<sup>n</sup>ni<sup>n</sup> nguuvi chi 'aama n'daataá ní canéé dεeve taachi véé dacua'a líí<sup>n</sup> ye<sup>n</sup>e tá tan'dúúca chi canéé nguū<sup>n</sup> na ley ye<sup>n</sup>e Moisés, tuu'mi ní José ndúúcu María candéε yā dacua<sup>n</sup>á mii<sup>n</sup> na yáa<sup>n</sup> Jerusalén. Candéε yā chi díí<sup>n</sup> yā presentar dacua<sup>n</sup>á mii<sup>n</sup> nanáá<sup>n</sup> Señor 'iivú Ndyuūs. <sup>23</sup>Tífcā ca<sup>n</sup>a

yā díí<sup>n</sup> yā ti canéé nguū<sup>n</sup> na ley ye<sup>n</sup>e 'iiví Ndyuūs chi tanducué<sup>n</sup>e dacua<sup>n</sup>á, chi vmnáá<sup>n</sup> vmnaa<sup>n</sup> chi 'cuundiyaá<sup>n</sup> ye<sup>n</sup>e chéécūu chi sá<sup>n</sup>á canéé lado ye<sup>n</sup>e Ndyuūs. 'Tífcā chii<sup>n</sup> chi díí<sup>n</sup> yā chuū. <sup>24</sup>Ní che<sup>n</sup>e yā ca'a yā ofrenda ye<sup>n</sup>e 'áámá n'daataá chi 'cuundiyaá<sup>n</sup> daiya tá tan'dúúca chi nga<sup>n</sup>a ley ye<sup>n</sup>e Señor 'iivú Ndyuūs. Ofrenda mii<sup>n</sup> ní ná 'uūvi 'yaada palomas o na 'uūvi 'yaada pichones.

<sup>25</sup>Na yáa<sup>n</sup> Jerusalén mii<sup>n</sup> canee 'aama sa<sup>n</sup>á chi nguuvi sa Simeón. Sá<sup>n</sup>a 'cūū ní nééne n'dai sa ní chi<sup>n</sup>i sá chi i'téenu sa Ndyuūs, ní ye<sup>n</sup>é Ndyuūs sa<sup>n</sup>á. Canéé Espíritu N'dai ye<sup>n</sup>é Ndyuūs ndúúcu sa. Ní cánéé ngiinu sa 'áámá 'ii<sup>n</sup>yā<sup>n</sup> chi nadanguá<sup>n</sup>á 'ii<sup>n</sup>yā<sup>n</sup> ye<sup>n</sup>e ndaata Israel. <sup>26</sup>Espíritu N'dai ye<sup>n</sup>é Ndyuūs chii yā sa<sup>n</sup>á 'cūū chi nguéé canéé chi 'cuūvi sa ne<sup>n</sup>e chí 'áá cuéé n'diichi sá Cristo chi Señor Ndyuūs dich'ó yā í<sup>n</sup>yeé<sup>n</sup>dí 'cūū. <sup>27</sup>Ní Espíritu N'dai ye<sup>n</sup>é Ndyuūs canéé ndúúcu Simeón mii<sup>n</sup>. Ní dii<sup>n</sup> guiar Simeón mii<sup>n</sup>. Ní cue<sup>n</sup>é yā na yaacū templo taachi José mii<sup>n</sup> ndúúcu María ndaa yā na yaacū templo ndúúcu sa<sup>n</sup>a líí<sup>n</sup> Jesús mii<sup>n</sup>. Ní 'ífcū cuuvi díí<sup>n</sup> yā presentar dacua'a mii<sup>n</sup> nanáá<sup>n</sup> Ndyuūs tan'dúúca chi nga<sup>n</sup>a ley mii<sup>n</sup>. <sup>28</sup>Tuu'mi ní Simeón mii<sup>n</sup> ca'nuú<sup>n</sup> yā Jesús ní ca<sup>n</sup>a yā chi ch'εete n'dai Dendyuūs. 'Túúca ca<sup>n</sup>a yā:

<sup>29</sup>Maa<sup>n</sup> ní ndii Señor Ndyuūs, díí<sup>n</sup> ní chi cuaacu tan'dúúca chi nga<sup>n</sup>á nduudu ye<sup>n</sup>e ní. Maa<sup>n</sup> ní díí<sup>n</sup> ní chí cuuví 'cuūví nduucu n'dai, 'úú chí dichii've n'dii.

<sup>30</sup>Caati 'áá n'diichí ndúúcu nduutinaá<sup>n</sup> 'ii<sup>n</sup>yā<sup>n</sup> chi dich'ó ní chi inadanguá<sup>n</sup>á nús'uu.

<sup>31</sup> 'Ii<sup>n</sup>yā<sup>n</sup> mii<sup>n</sup> chí<sup>n</sup> chí s'née<sup>n</sup>yaá<sup>n</sup>  
nī chi cáávā nducyaaca 'ii<sup>n</sup>yā<sup>n</sup>  
chí nadanguá<sup>n</sup>ai yā 'ii<sup>n</sup>yā<sup>n</sup>  
ye<sup>n</sup>e nuu<sup>n</sup>ndí ye<sup>n</sup>e yā.

<sup>32</sup> 'Ii<sup>n</sup>yā<sup>n</sup> mii<sup>n</sup> chí deeve ní cuuví  
deeve ye<sup>n</sup>e nducyaaca 'ii<sup>n</sup>yā<sup>n</sup>  
chi nguéé ye<sup>n</sup>e ndaata Israel.  
Ní ca'a yā honor 'ii<sup>n</sup>yā<sup>n</sup> ye<sup>n</sup>e  
nī chi 'ii<sup>n</sup>yā<sup>n</sup> Israel yā.

<sup>33</sup> José ndúúcū María nge<sup>n</sup>e yiinu  
yā ye<sup>n</sup>e chi Simeón nga<sup>n</sup>a yā ye<sup>n</sup>e  
sa<sup>n</sup>ā 'líl<sup>n</sup> Jesús mii<sup>n</sup>. <sup>34</sup> Simeón mii<sup>n</sup>  
di'viicú yā María ndúúcū José. Ní  
ca<sup>n</sup>a yā chii yā chεecu sa María:  
'Caandivee<sup>n</sup> nī. Sa<sup>n</sup>ā 'líl<sup>n</sup> 'cūū ndaā  
sa chi neené 'yaa<sup>n</sup> 'ii<sup>n</sup>yā<sup>n</sup> na yā<sup>n</sup>āa  
nguéé i'téenu yā ní 'tiicá ntúú<sup>n</sup>  
'yaa<sup>n</sup> 'ii<sup>n</sup>yā<sup>n</sup> cu'téenu yā. Ní sa<sup>n</sup>a  
'líl<sup>n</sup> 'cūū 'áámá seña ti néené 'yaa<sup>n</sup>  
'ii<sup>n</sup>yā<sup>n</sup> caa<sup>n</sup>ma<sup>n</sup> yā contra ye<sup>n</sup>e sa.  
<sup>35</sup> Chuū ní dii<sup>n</sup> chi 'ii<sup>n</sup>yā<sup>n</sup> cuuvi  
cádiinuu<sup>n</sup> yā ye<sup>n</sup>e ca'áámá cā'aama  
'ii<sup>n</sup>yā<sup>n</sup> taacā nadicádiinuu<sup>n</sup> yā na  
staava ye<sup>n</sup>e yā. Chuū ní tan'dúúcā  
'áámá machete 'uūví lados 'caāi<sup>n</sup> chi  
cho'ōo alma ye<sup>n</sup>e n'dii María.

<sup>36</sup> Ná yaacú templo 'cūū, mí<sup>n</sup>  
ntúú<sup>n</sup> canee 'áámá n'daataá n'dai chi  
nguuví Ana. Ní nga<sup>n</sup>a tá dendu'ū  
chi cuchii. N'daataá mii<sup>n</sup> ní daiya  
Fanuel, chí ye<sup>n</sup>e ndaataá ye<sup>n</sup>e  
Aser. Ní Ana mii<sup>n</sup> 'āā neené ndiicúú  
ta. Ch'iindivaacu tá taachi 'líl<sup>n</sup> tá  
ní ndēēchē ndúuyū nū<sup>n</sup> cánee  
tá ndúúcū isa<sup>n</sup>ā ye<sup>n</sup>e tá. Maa<sup>n</sup> ní  
'āā n'daataá nguá'á tá. <sup>37</sup> 'Āā cuū<sup>n</sup>  
ngeecú cuū<sup>n</sup> nduuyūú chi nduuví  
tá n'daataá nguá'āa. 'Áámá canee  
tá na yáacū templo ye<sup>n</sup>e Ndyuūs  
ní canéé tá ndí nguuví ndii n'gaa<sup>n</sup>  
ní dichí'í've tá Ndyuūs. Ní ndii  
ngueε nga'diinú tá ti dámaa<sup>n</sup> chí  
nga<sup>n</sup>āngua'a tá. <sup>38</sup> Hora mí<sup>n</sup> nū<sup>n</sup>

Ana mii<sup>n</sup> che<sup>n</sup>e tá yaacū templo  
ní ndee tá nduucú Dendyuūs,  
'tíicā nga<sup>n</sup>a ta: N'dii, Ndyuūs teé  
gracias n'dii cáávā dacua'a 'líl<sup>n</sup>  
mii<sup>n</sup>. Cuayiivi ní ca<sup>n</sup>a ta chi ta  
nducyáácá 'ii<sup>n</sup>yā<sup>n</sup> chí canéé ngiinu  
'áámá 'ii<sup>n</sup>yā<sup>n</sup> chí nadinguá<sup>n</sup>ai yā  
'ii<sup>n</sup>yā<sup>n</sup> Israel yā ye<sup>n</sup>e sa<sup>n</sup>ā 'líl<sup>n</sup> mii<sup>n</sup>.

**José ndúúcū María ndúúcū dacua'a  
'líl<sup>n</sup> nandaá yā na yāā<sup>n</sup> Nazaret**

<sup>39</sup> Taachi José ndúúcū María  
ch'iinu di<sup>n</sup> yā nducué<sup>n</sup>e chí nga<sup>n</sup>a  
ley ye<sup>n</sup>e Señor Dendyuūs, tuu'mi ní  
cue<sup>n</sup>e ntuú<sup>n</sup> yā ndúúcū sa<sup>n</sup>ā 'líl<sup>n</sup> na  
yāā<sup>n</sup> vaacú yā chí nguuví Nazaret  
ye<sup>n</sup>e yā<sup>n</sup>āa Galilea. <sup>40</sup> Sa<sup>n</sup>ā 'líl<sup>n</sup>  
Jesús mii<sup>n</sup> ngiita sa ní ngii ditiinu  
sa. Néené deenu sa. Ní Ndyuūs  
di'viicú taavi cá yā sa<sup>n</sup>ā 'líl<sup>n</sup> mii<sup>n</sup>.

**Sa<sup>n</sup>ā 'líl<sup>n</sup> Jesús cheeti yáacū ye<sup>n</sup>e  
Ndyuūs ndúúcū maestros**

<sup>41</sup> Nduuyu nduuyu taachi ndaā  
tiempo ye<sup>n</sup>e 'viicu ye<sup>n</sup>e pascua, tuu'mi  
ní chiida Jesús ndúúcū chεecu sa  
nge<sup>n</sup>e yā yāā<sup>n</sup> Jerusalén. <sup>42</sup> Ní taachi  
Jesús chii yā ndiichúúví nduūyū,  
'ii<sup>n</sup>yā<sup>n</sup> s'ee<sup>n</sup> cue<sup>n</sup>e ntúú<sup>n</sup> yā na yāā<sup>n</sup>  
Jerusalén ndúúcū Jesús mii<sup>n</sup> tan'dúúcā  
chí 'āā nge<sup>n</sup>e yā nduuyu nduuyu cáávā  
'viicú mí<sup>n</sup>. <sup>43</sup> Cho'ōo 'viicú mii<sup>n</sup>, ní  
José ndúúcū María mii<sup>n</sup> ní cuna<sup>n</sup>a yā.  
Nguéé tuumicadíinuu<sup>n</sup> yā chí sa<sup>n</sup>ā 'líl<sup>n</sup>  
Jesús mii<sup>n</sup> canee sá na yāā<sup>n</sup> Jerusalén.  
<sup>44</sup> 'Ii<sup>n</sup>yā<sup>n</sup> s'ee<sup>n</sup> ní nadicadíinuu<sup>n</sup> yā  
chí Jesús mii<sup>n</sup> ní cuna<sup>n</sup>a sa ndúúcū  
'ii<sup>n</sup>yā<sup>n</sup> parientes ye<sup>n</sup>e yā. 'Ii<sup>n</sup>yā<sup>n</sup> s'ee<sup>n</sup>  
núú<sup>n</sup>má<sup>n</sup> nguuví ní chíca yā. Tuu'mi  
nan'nú<sup>n</sup> yā Jesús nguua<sup>n</sup> 'ii<sup>n</sup>yā<sup>n</sup> ye<sup>n</sup>e  
yā ndúúcū 'ii<sup>n</sup>yā<sup>n</sup> chí n'dai nduucú  
yā, <sup>45</sup> naati nguéé ndaacá yā sa<sup>n</sup>ā 'líl<sup>n</sup>  
Jesús mii<sup>n</sup>. Ní nguεecunéé yā sna<sup>n</sup>a yā

na yāā<sup>n</sup> Jerusalén mii<sup>n</sup> chi n'nuú<sup>n</sup> yā Jesús mii<sup>n</sup>.

<sup>46</sup>Ndíí ch'iinu 'iinū nguuvi ní ndaacá yā Jesús na yáacū templo. Véé sá ndúucū maestros chí ng'icuéé<sup>n</sup> yā ley. Jesús mii<sup>n</sup> ní í'nee<sup>n</sup> vee<sup>n</sup> sa chí nga<sup>n</sup>a yā ní tiinguunee<sup>n</sup> sá maestros ye<sup>n</sup>e chí nga<sup>n</sup>a yā. <sup>47</sup>Nducyáácá 'ii<sup>n</sup>yā<sup>n</sup> chí n'giindiveé<sup>n</sup> yā chí nga<sup>n</sup>a sa<sup>n</sup>a 'lín Jesús mii<sup>n</sup> nge<sup>n</sup>e yínú yā ye<sup>n</sup>e sa chí déénu sa ní nan'guεεcúta<sup>n</sup> sa chí ítiingúúnee<sup>n</sup> yā sa<sup>n</sup>a 'lín mii<sup>n</sup>. <sup>48</sup>Taachí chíídá sá ndúucū chεεcu sa n'diichí yā Jesús mii<sup>n</sup> cue<sup>n</sup>e yiinú yā ye<sup>n</sup>e sa. Tuu<sup>n</sup>mi ní chεεcu sa ní ca<sup>n</sup>á yā chíi yā sa<sup>n</sup>a 'lín: Díí, daiyá, ¿de'ē cuuvi chí 'tíicá díi<sup>n</sup> di nduucú 'nū? Cuin'díichí dí. Chíida di ndúucū 'úú yā'āi n'dai staava ye<sup>n</sup>e 'nū 'lícú chíicá 'nū in'nuú<sup>n</sup> 'nū dii.

<sup>49</sup>Tuu<sup>n</sup>mi ní nan'guεεcúta<sup>n</sup> sa ye<sup>n</sup>e yā: ¿Dé'ē vee? ¿Dé'ē cúuví chí in'nuú<sup>n</sup> ní 'úú? ¿Áá nguéé deenu ndís'tií chí 'úú ní canéé chí cūnéé ndúucū dendu'ū ye<sup>n</sup>e Chíidá?

<sup>50</sup>Ii<sup>n</sup>yā<sup>n</sup> s'ee<sup>n</sup> ní nguéé tuūmicadiinúú<sup>n</sup> yā nduudu chí ca<sup>n</sup>a daiyá yā Jesús mii<sup>n</sup> chíi sá 'ii<sup>n</sup>yā<sup>n</sup>.

<sup>51</sup>Tuu<sup>n</sup>mi ní cuna<sup>n</sup>a Jesús nduucú yā na yāā<sup>n</sup> Nazaret mii<sup>n</sup> ní 'nee<sup>n</sup> vee<sup>n</sup> sa ye<sup>n</sup>e yā. Chεεcu sa mii<sup>n</sup> ní nadacadiinúú<sup>n</sup> yā tanducué<sup>n</sup>e na staava ye<sup>n</sup>e yā. <sup>52</sup>Jesús mii<sup>n</sup> ní n'giita sa ndúucū n'dee n'dái vaadi deenu, níicú véé favor ye<sup>n</sup>e sa nanáá<sup>n</sup> Ndyuūs ní nanáá<sup>n</sup> 'ii<sup>n</sup>yā<sup>n</sup> na i<sup>n</sup>yee<sup>n</sup>dí 'cūú. Níicú 'āā ngéénū nduuyu ye<sup>n</sup>e sa.

**Juan chí ngεεdínúú<sup>n</sup>nī<sup>n</sup> sa nga<sup>n</sup>a sa chí ndaacadaamí 'ii<sup>n</sup>yā<sup>n</sup> ye<sup>n</sup>e nuu<sup>n</sup>ndi ye<sup>n</sup>e yā**

(Mt. 3.1-12; Mr. 1.1-8; Jn. 1.19-28)

**3** Sa<sup>n</sup>a chí nguuvi Tiberio César, 'āā ndíitii<sup>n</sup>yu<sup>n</sup> nduuyū chí

nga<sup>n</sup>a nti<sup>n</sup>nyú<sup>n</sup> yā chí emperador yā. Ní sa<sup>n</sup>a chí nguuvi Poncio Pilato, ní gobernador yā ye<sup>n</sup>e yá<sup>n</sup>āa Judea. Sa<sup>n</sup>a chí nguuvi Herodes ní rey yā ye<sup>n</sup>e yá<sup>n</sup>āa Galilea. 'Íicú 'dīinū Herodes mii<sup>n</sup> chí nguuvi Felipe ní rey yā ye<sup>n</sup>e yá<sup>n</sup>āa Iturea ndúucū yá<sup>n</sup>āa Trachonite Ní sa<sup>n</sup>a chí nguuvi Lisaniás ní rey yā ye<sup>n</sup>e yá<sup>n</sup>āa Abilinia. <sup>2</sup>Ní sa<sup>n</sup>a Anás ndúucū Caifás, sa<sup>n</sup>a 's'uu<sup>n</sup> ní chíiduú n'gεεε ca ye<sup>n</sup>e yaacū ye<sup>n</sup>e 'ii<sup>n</sup>yā<sup>n</sup> Israel. Tiempo mii<sup>n</sup> ní Ndyuūs ní ca'á yā 'áámá nduudu n'dai Juan, chí daiya Zacarías. Juan mii<sup>n</sup> canee sa na yá<sup>n</sup>āa cuū<sup>n</sup>mán<sup>n</sup> naachi nguéé ch'εetinéé 'ii<sup>n</sup>yā<sup>n</sup>. <sup>3</sup>Juan mii<sup>n</sup> ní cachii ca sa nducué<sup>n</sup>e yá<sup>n</sup>āa chí snéé nii<sup>n</sup>nuú<sup>n</sup> ná yíicú Jordán. Ní Juan mii<sup>n</sup> chíi sá 'ii<sup>n</sup>yā<sup>n</sup> chí canéé chí cuεedínúú<sup>n</sup>nī<sup>n</sup> yā níicú ndaacadaamí yā ye<sup>n</sup>e nuu<sup>n</sup>ndi ye<sup>n</sup>e yā, níicú Ndyuūs nadich'εεcú yā nuu<sup>n</sup>ndi ye<sup>n</sup>e yā. <sup>4</sup>Chuū ní chíi tandúucā chí profeta Isaías dingúú<sup>n</sup> yā ndii cuaa<sup>n</sup> vmnaa<sup>n</sup> na libro ye<sup>n</sup>e Ndyuūs ye<sup>n</sup>e:

'Caandivee<sup>n</sup> yú nduudu ye<sup>n</sup>e 'áámá 'ii<sup>n</sup>yā<sup>n</sup> chí caa<sup>n</sup>mán<sup>n</sup> yā yuudū na yá<sup>n</sup>āa cuū<sup>n</sup>mán<sup>n</sup> naachi nguéé ch'εetinéé 'ii<sup>n</sup>yā<sup>n</sup> ní ca<sup>n</sup>a yā 'tuuca: Cuundiyaá<sup>n</sup> ní yúúni ye<sup>n</sup>e Señor Ndyuūs caati cuchii yā; nan'guáa<sup>n</sup> ní 'aama yúúni cuaacu caavá yā. Dideevé ní staava ye<sup>n</sup>e ní ní cuuvi 'cuaá<sup>n</sup> ní 'ii<sup>n</sup>yā<sup>n</sup> mii<sup>n</sup> taachi ndaa yā.

<sup>5</sup>Naachi yaanúú ní nduūtī, núú<sup>n</sup>mán<sup>n</sup> icya<sup>n</sup>ā ndúucū nducyaaca yíicú nduuví ne<sup>n</sup>e, yúúni 'cuéé nduuví cuaacu, yúúni chí nguéé ne<sup>n</sup>e ní nduuví ne<sup>n</sup>e.

<sup>6</sup> Nducyaaca 'ii<sup>n</sup>yā<sup>n</sup> snaa<sup>n</sup> yā  
'ii<sup>n</sup>yā<sup>n</sup> ye<sup>n</sup>e Ndyuūs, 'ii<sup>n</sup>yā<sup>n</sup>  
chí nadinguá<sup>n</sup>ai yā nducyaaca  
'ii<sup>n</sup>yā<sup>n</sup>.

<sup>7</sup> Juan mi<sup>n</sup> ní nga<sup>n</sup>a sá ngii sa  
'ii<sup>n</sup>yā<sup>n</sup> chí ndaá yā chí cuēédínuū<sup>n</sup>nī<sup>n</sup>  
sa 'ii<sup>n</sup>yā<sup>n</sup>: Ndís'tiī ní tan'dúúcā cúú  
'tíicā ndís'tiī. ¿Du'ú chi 'cuee<sup>n</sup> ndís'tiī  
chi cuuvi cáanu nī ye<sup>n</sup>e castigo  
taa<sup>n</sup> chí cúchiī? <sup>8</sup> Díi<sup>n</sup> nī dendu'ū  
chí n'dáacā maa<sup>n</sup> níicú 'cuu<sup>n</sup>mí  
nī 'ii<sup>n</sup>yā<sup>n</sup> chí 'āā ndaacadaamí nī  
ye<sup>n</sup>e nuu<sup>n</sup>ndi ye<sup>n</sup>'é nī. Nguēε tucáa  
nī caa<sup>n</sup>ma<sup>n</sup> nī nguaa<sup>n</sup> maa<sup>n</sup> nī chi  
Abraham mi<sup>n</sup> ní chiidá nī caati  
'úú nga<sup>n</sup>'á ngii ndís'tiī chi Ndyuūs  
ní cuuvi díi<sup>n</sup> yā chí tuūu s'ee<sup>n</sup> ní  
chi cuuvi daiya Abraham. <sup>9</sup> Ní  
cutiīi<sup>n</sup> míi<sup>n</sup> ní 'āā canéé na dii'yu  
yá<sup>n</sup>'á. Nducyaaca yá<sup>n</sup>'á chi nguéé  
ngii n'gui'í n'daacā ye<sup>n</sup>'ē canee chi  
'caaca yá<sup>n</sup>'á míi<sup>n</sup> ní cūnuu<sup>n</sup> na ya<sup>n</sup>'ā.  
'Tiicá ntúū<sup>n</sup> Ndyuūs díi<sup>n</sup> yā juzgar  
nducyaaca 'ii<sup>n</sup>yā<sup>n</sup>.

<sup>10</sup> 'Ii<sup>n</sup>yā<sup>n</sup> s'uu<sup>n</sup> ntiinguunee<sup>n</sup> yā  
Juan mi<sup>n</sup>: ¿De'ē cuuví díi<sup>n</sup> 'nū?

<sup>11</sup> Juan mi<sup>n</sup> ní nan'guēēcúta<sup>n</sup>'ā sa:  
'Ii<sup>n</sup>yā<sup>n</sup> chí 'uuví catecai yā, canéé  
chi ca'a yā 'áámá catecai 'ii<sup>n</sup>yā<sup>n</sup> chí  
nguéé ye<sup>n</sup>'e yā. 'Ii<sup>n</sup>yā<sup>n</sup> chí véé chi  
nge'e yā, canéé chí ca'a yā 'ii<sup>n</sup>yā<sup>n</sup>  
chí nguéé ye<sup>n</sup>'é yā.

<sup>12</sup> Ndaá ntúū<sup>n</sup> 'ii<sup>n</sup>yā<sup>n</sup> chí  
inn'guēε ye<sup>n</sup>'e yá<sup>n</sup>'āā chí Juan mi<sup>n</sup>  
cuēédínuū<sup>n</sup>nī<sup>n</sup> sa 'ii<sup>n</sup>yā<sup>n</sup>. Ní 'ii<sup>n</sup>yā<sup>n</sup>  
s'ee<sup>n</sup> ca<sup>n</sup>'a yā chíi yā Juan: N'díi,  
maestro, ¿de'ē cuuví díi<sup>n</sup> 'nū?

<sup>13</sup> Juan mi<sup>n</sup> ní ca<sup>n</sup>'a sa chíi sa  
'ii<sup>n</sup>yā<sup>n</sup>: Nguéé caaca nī chí mar  
'aama ndo'o tan'dúúcā chí nga<sup>n</sup>'a na  
ley.

<sup>14</sup> Tuu'mi ní soldados tiinguunéé<sup>n</sup>  
sá Juan: Nús'uu, ¿de'ē cuuví díi<sup>n</sup>

'nū? Ní Juan ca<sup>n</sup>'a sa chíi sa 'ii<sup>n</sup>yā<sup>n</sup>:  
Nguéé diduucú nī ye<sup>n</sup>'ē mar 'áámá  
'ii<sup>n</sup>yā<sup>n</sup>. Nguéé cunncáā caa<sup>n</sup>'ma<sup>n</sup> nī  
ye<sup>n</sup>'ē taná<sup>n</sup>'ā 'ii<sup>n</sup>yā<sup>n</sup>. Níicú 'cuēetinéé  
nī ndúúcū vaadi yeenú ndúúcū chí  
inadí've yā ndís'tiī.

<sup>15</sup> 'Ii<sup>n</sup>yā<sup>n</sup> s'uu<sup>n</sup> snee yiinu yā Juan  
ní nducyaaca yā ní nadicádíinuū<sup>n</sup>  
yā na staava ye<sup>n</sup>'e yā chí 'ááá  
nguéé Juan chí Cristo? <sup>16</sup> Tuu'mi  
ní Juan mi<sup>n</sup> ní ca<sup>n</sup>'a sa chíi sa  
nducyaacá yā: Cuaacu níi<sup>n</sup>nyu<sup>n</sup> 'úú  
ní ngeédínuū<sup>n</sup>ní<sup>n</sup> ndúúcū nuū<sup>n</sup>nī<sup>n</sup>;  
naati cuayiivi cuchii taamá yā chí  
n'dáacā n'dai ca ndúúcū poder ye<sup>n</sup>'é  
yā chí ch'εete taavi nguéé ti 'úú. Ní  
'úú ní nguéé n'daacā ca chí cuuvi díi<sup>n</sup>  
n'daatií yíi<sup>n</sup>má<sup>n</sup> ye<sup>n</sup>'e ndaacuú ye<sup>n</sup>'é  
yā. 'Ii<sup>n</sup>yā<sup>n</sup> mi<sup>n</sup> ní cuēédínuū<sup>n</sup>nī<sup>n</sup> yā  
ndúúcū Espíritu N'dai ye<sup>n</sup>'é Ndyuūs  
ndúúcū ya<sup>n</sup>'ā. <sup>17</sup> 'Ii<sup>n</sup>yā<sup>n</sup> mi<sup>n</sup> ndéε  
yā ní dii<sup>n</sup> yā tan'dúúcā 'ii<sup>n</sup>yā<sup>n</sup> chí  
dideεvé yā trigo. 'Tíicā díi<sup>n</sup> yā  
ndúúcū 'ii<sup>n</sup>yā<sup>n</sup>. Ndáa yā ndúúcū  
zaranda na ta'a yā. Naachí nadεεvé  
yā trigo mi<sup>n</sup>, divíi yā trigo mi<sup>n</sup> ní  
nguain'dai yā ch'εeti dínūu<sup>n</sup>. Ní 'nee<sup>n</sup>  
yá<sup>n</sup>'a yā dεécú mi<sup>n</sup> na nguuchí ya<sup>n</sup>'ā  
chí 'āā ntée n'tuūvi. Dεécú mi<sup>n</sup> ní  
tan'dúúcā 'ii<sup>n</sup>yā<sup>n</sup> chí nguéé i'téenu  
yā Ndyuūs.

<sup>18</sup> 'Túúcā ní ndúúcū n'dee n'dái  
ca chí ca<sup>n</sup>'ā Juan mi<sup>n</sup>, ca<sup>n</sup>'a sá chí  
'cuee<sup>n</sup> sa nduudu n'dai chí ngai  
'ii<sup>n</sup>yā<sup>n</sup> s'ee<sup>n</sup>. <sup>19</sup> Tiempo mi<sup>n</sup> Juan  
mi<sup>n</sup> ní yaa'vi nee<sup>n</sup> sa rey Herodes  
mi<sup>n</sup> chí canéé sá ndúúcū n'daataá  
ye<sup>n</sup>'ē d'íinū sa ní ye<sup>n</sup>'e tanducue<sup>n</sup>'ē  
chí nguēε n'daacā chí díi<sup>n</sup> yā.  
N'daataá mi<sup>n</sup> ní nguuvi tá Herodías.  
<sup>20</sup> Tuu'mi ní rey Herodes mi<sup>n</sup> ní díi<sup>n</sup>  
yā táámá nuu<sup>n</sup>ndi chí ch'εete ca ní  
s'nuū<sup>n</sup> chíichí yā Juan vácū.

**Juan mii<sup>n</sup> cheedinúu<sup>n</sup>ni<sup>n</sup> yā Jesús**

(Mt. 3.13-17; Mr. 1.9-11)

<sup>21</sup> Cuayiiivi taachí Juan ngeedinúu<sup>n</sup>ni<sup>n</sup> yā n'dee n'dái 'ii<sup>n</sup>yā<sup>n</sup>, cheedinúu<sup>n</sup>ni<sup>n</sup> ntúu<sup>n</sup> yā Jesús mii<sup>n</sup>. Ní taachi Jesús mii<sup>n</sup> nga<sup>n</sup>'angua'á yā nánguuvu ní nánguua<sup>n</sup>. <sup>22</sup> Ní ndaā Espíritu N'dai ye<sup>n</sup>'é Ndyuūs vmnaa<sup>n</sup> ye<sup>n</sup>'é yā tan'dúucā 'áámá paloma. Ní 'ii<sup>n</sup>yā<sup>n</sup> s'ee<sup>n</sup> ch'iindivée<sup>n</sup> yā 'áámá nduudu ye<sup>n</sup>'é va'ai ch'æti nguuví chí nga<sup>n</sup>'á: Díí, daiyá chí ne<sup>n</sup>'e taaví ní yeenú taavi cáávā dii.

**'Ii<sup>n</sup>yā<sup>n</sup> vmnáá<sup>n</sup> vmnaa<sup>n</sup> ye<sup>n</sup>'e ndaata ye<sup>n</sup>'é Jesús**

(Mt. 1.1-17)

<sup>23</sup> Jesús mii<sup>n</sup> ní chíí yā ndíicú ndiichi ndúuyū taachí tucá'a yā ntíin'nyú<sup>n</sup> ye<sup>n</sup>'é yā. Ndaata ye<sup>n</sup>'e Jesús ní 'tíicā: 'Ii<sup>n</sup>yā<sup>n</sup> nadicádíinuu<sup>n</sup> yā chí Jesús mii<sup>n</sup> ní daiya José. José mii<sup>n</sup> ní daiya Elí. <sup>24</sup> Elí mii<sup>n</sup> ní daiya Matat. Matat mii<sup>n</sup> ní daiya Leví. Leví mii<sup>n</sup> ní daiya Melqui. Melqui mii<sup>n</sup> ní daiya Jana. Jana mii<sup>n</sup> ní daiya José. <sup>25</sup> José mii<sup>n</sup> ní daiya Matatías. Matatías mii<sup>n</sup> ní daiya Amós. Amós mii<sup>n</sup> ní daiya Nahum. Nahum mii<sup>n</sup> ní daiya Esli. Esli mii<sup>n</sup> ní daiya Nagai. <sup>26</sup> Nagai mii<sup>n</sup> ní daiya Maat. Maat mii<sup>n</sup> ní daiya Matatías. Matatías mii<sup>n</sup> ní daiya Semei. Semei mii<sup>n</sup> ní daiya José. José mii<sup>n</sup> ní daiya Judá. <sup>27</sup> Judá mii<sup>n</sup> ní daiya Joana. Joana mii<sup>n</sup> ní daiya Resa. Resa mii<sup>n</sup> ní daiya Zorobabel. Zorobabel mii<sup>n</sup> ní daiya Salatiel. Salatiel mii<sup>n</sup> ní daiya Neri. <sup>28</sup> Neri mii<sup>n</sup> ní daiya Melqui. Melqui mii<sup>n</sup> ní daiya Adí. Adí mii<sup>n</sup> ní daiya Cosam. Cosam mii<sup>n</sup> ní daiya Elmodam. Elmodam mii<sup>n</sup> ní daiya Er. <sup>29</sup> Er mii<sup>n</sup> ní daiya Josué. Josué mii<sup>n</sup> ní daiya Eliezar. Eliezar mii<sup>n</sup> ní

daiya Jorim. Jorim mii<sup>n</sup> ní daiya Matat. <sup>30</sup> Matat mii<sup>n</sup> ní daiya Leví. Leví mii<sup>n</sup> ní daiya Simeón. Simeón mii<sup>n</sup> ní daiya Judá. Judá mii<sup>n</sup> ní daiya José. José mii<sup>n</sup> ní daiya Jonán. Jonán mii<sup>n</sup> ní daiya Eliaquim. <sup>31</sup> Eliaquim mii<sup>n</sup> ní daiya Melea. Melea mii<sup>n</sup> ní daiya Mainán. Mainán mii<sup>n</sup> ní daiya Matata. Matata mii<sup>n</sup> ní daiya Natán. <sup>32</sup> Natán mii<sup>n</sup> ní daiya David. David mii<sup>n</sup> ní daiya Isaí. Isaí mii<sup>n</sup> ní daiya Obed. Obed mii<sup>n</sup> ní daiya Booz. Booz mii<sup>n</sup> ní daiya Salmón. Salmón mii<sup>n</sup> ní daiya Naasón. <sup>33</sup> Naasón mii<sup>n</sup> ní daiya Aminadab. Aminadab mii<sup>n</sup> ní daiya Aram. Aram mii<sup>n</sup> ní daiya Esrom. Esrom mii<sup>n</sup> ní daiya Fares. Fares mii<sup>n</sup> ní daiya Fares. Fares mii<sup>n</sup> ní daiya Judá. <sup>34</sup> Judá mii<sup>n</sup> ní daiya Jacob. Jacob mii<sup>n</sup> ní daiya Isaac. Isaac mii<sup>n</sup> ní daiya Abraham. Abraham mii<sup>n</sup> ní daiya Taré. Taré mii<sup>n</sup> ní daiya Nacor. <sup>35</sup> Nacor mii<sup>n</sup> ní daiya Serug. Serug mii<sup>n</sup> ní daiya Ragau. Ragau mii<sup>n</sup> ní daiya Peleg. Peleg mii<sup>n</sup> ní daiya Heber. Heber mii<sup>n</sup> ní daiya Sala. <sup>36</sup> Sala mii<sup>n</sup> ní daiya Cainán. Cainán mii<sup>n</sup> ní daiya Arfaxad. Arfaxad mii<sup>n</sup> ní daiya Sem. Sem mii<sup>n</sup> ní daiya Noé. Noé mii<sup>n</sup> ní daiya Lamec. <sup>37</sup> Lamec mii<sup>n</sup> ní daiya Matusalén. Matusalén mii<sup>n</sup> ní daiya Enoc. Enoc mii<sup>n</sup> ní daiya Jared. Jared mii<sup>n</sup> ní daiya Mahalaleel. Mahalaleel mii<sup>n</sup> ní daiya Cainán. <sup>38</sup> Cainán mii<sup>n</sup> ní daiya Enós. Enós mii<sup>n</sup> ní daiya Set. Set mii<sup>n</sup> ní daiya Adán. Adán mii<sup>n</sup> ní ye<sup>n</sup>'e Dendyuūs.

**Yáá'n'guiinūu<sup>n</sup> ne<sup>n</sup>'é sá tuu'vinee<sup>n</sup> sa Jesús**

(Mt. 4.1-11; Mr. 1.12-13)

**4** Jesús ní ndiitúú ye<sup>n</sup>'e Espíritu N'dai ye<sup>n</sup>'é Ndyuūs 'ii<sup>n</sup>yā<sup>n</sup> ní n'daa yā na yíicú Jordán. Espíritu N'dai ye<sup>n</sup>'e Ndyuūs candéé yā Jesús

na yá<sup>n</sup>āa cuū<sup>n</sup>má<sup>n</sup> naachi nguéé ch'εetinéé 'ii<sup>n</sup>yā<sup>n</sup>. <sup>2</sup>Uūvī ngεecu nguuvī caneeé yáá<sup>n</sup>'n'guiinū<sup>n</sup> nanáá<sup>n</sup> Jesús mii<sup>n</sup> chí n'diichinee<sup>n</sup> sa 'ii<sup>n</sup>yā<sup>n</sup>. Nguéé de'ē vee che'é Jesús nguuvī s'ee<sup>n</sup>. Cuayivi míí<sup>n</sup> chii cuiicú yā. <sup>3</sup>Tuu'mi ní yáá<sup>n</sup>'n'guiinū<sup>n</sup> ca<sup>n</sup>'a sa chii sa Jesús: Dii Jesús, ndúú<sup>tí</sup> chí dii chí Daiya Dendyuūs dii caa<sup>n</sup>'ma<sup>n</sup> dí cuuvi dí tuūu 'cúú chí nduuví pan. Ní nduuví pan ní cuuvi che'e di.

<sup>4</sup>Jesús nan'guεεcú<sup>tá</sup>'a yā: 'Túúcā cánéé nguū<sup>n</sup> ná libro ye<sup>n</sup>'é Dendyuūs: Nguéé dámaā<sup>n</sup> pan che'é 'ii<sup>n</sup>yā<sup>n</sup> ní cunduūchí yā caati ndúú<sup>cū</sup> tanducué<sup>n</sup>'ē nduudu chí nga<sup>n</sup>'á Ndyuūs cunduuchí yā nduuti chí cu'téenu yā.

<sup>5</sup>Yáá<sup>n</sup>'n'guiinū<sup>n</sup> candée sa Jesús na 'áámá yiicū yáácú. Maa<sup>n</sup> nch'εeté nū<sup>n</sup> ch'i<sup>n</sup>'i sa Jesús tanducué<sup>n</sup>'ē naciones ye<sup>n</sup>'é í<sup>n</sup>'yee<sup>n</sup>dí 'cūū.

<sup>6</sup>Tuu'mi ní yáá<sup>n</sup>'n'guiinū<sup>n</sup> ca<sup>n</sup>'a sa chii sa Jesús. 'Úú ní teé dii nuu<sup>n</sup>'ma<sup>n</sup> i<sup>n</sup>'yee<sup>n</sup>dí 'cuú chí cuuví ye<sup>n</sup>'ē di chí caa<sup>n</sup>'ma<sup>n</sup> ntíí<sup>n</sup>nyu<sup>n</sup> dí ye<sup>n</sup>'ē ndúú<sup>cū</sup> nuu<sup>n</sup>má<sup>n</sup> ch'εete naciones 'cūū ndúú<sup>cū</sup> chí nga<sup>n</sup>'a ntii<sup>n</sup>nyu<sup>n</sup> ye<sup>n</sup>'ē caati poder 'cūū ye<sup>n</sup>'é. 'Áā du'ú nū<sup>n</sup> chí ne<sup>n</sup>'é chíí<sup>n</sup> chí ca'á. <sup>7</sup>Ndúú<sup>tí</sup> chí caantii<sup>n</sup>'ya di nanaá<sup>n</sup> níícú cu'téenu di 'úú cuuví ye<sup>n</sup>'ē di tanducué<sup>n</sup>'ē chuū.

<sup>8</sup>Jesús ca<sup>n</sup>'a yā chii yā sa<sup>n</sup>'ā mii<sup>n</sup>: Dii yáá<sup>n</sup>'n'guiinū<sup>n</sup> cuví di nanaá<sup>n</sup> caati 'túúcā caneeé nguū<sup>n</sup> na libro ye<sup>n</sup>'e Dendyuūs: Cu'téenu di Señor Ndyuūs ye<sup>n</sup>'ē di, ní dámaā<sup>n</sup> 'caandivee<sup>n</sup> di ye<sup>n</sup>'é 'ii<sup>n</sup>yā<sup>n</sup> míí<sup>n</sup> nū<sup>n</sup>.

<sup>9</sup>Cuayivi candée yáá<sup>n</sup>'n'guiinū<sup>n</sup> Jesús mii<sup>n</sup> na yáā<sup>n</sup> Jerusalén ní cuheε sá ndúú<sup>cū</sup> yā na yáácú ye<sup>n</sup>'ē

yáacū templo. Ní ca<sup>n</sup>'a sa: Nduuti chí dii chí Daiya Dendyuūs dii, cáávā di ndii 'múú<sup>n</sup> ndii na yá<sup>n</sup>'āa.

<sup>10</sup>Caati 'túúcā caneeé nguū<sup>n</sup> cuáá<sup>n</sup> vmmaa<sup>n</sup> na libro ye<sup>n</sup>'é Ndyuūs:

Ndyuūs dich'ó yā ángeles ye<sup>n</sup>'e yā chí díí<sup>n</sup> yā cuidado ye<sup>n</sup>'ē di.

<sup>11</sup>Ní ángeles cundéε yā dii ndúú<sup>cū</sup> ta'á yā, ní nguéé cuuvi ya'ai ca'a di na tuūu.

<sup>12</sup>Jesús mii<sup>n</sup> nán'guεεcú<sup>tá</sup>'a yā: 'Tuucá ntúú<sup>n</sup> caneeé nguū<sup>n</sup> na libro ye<sup>n</sup>'é Ndyuūs: Nguéé dii<sup>n</sup> di mar 'áámá cosa chí n'diichinee<sup>n</sup> di Señor Ndyuūs ye<sup>n</sup>'ē di.

<sup>13</sup>Taachí ch'iinu chí dii<sup>n</sup> yáá<sup>n</sup>'n'guiinū<sup>n</sup> chí n'diichinee<sup>n</sup> sa Jesús divíi sa ye<sup>n</sup>'é yā 'áámá tiempo.

**Jesús tucá'a yā ntii<sup>n</sup>nyu<sup>n</sup> ye<sup>n</sup>'é yā na yá<sup>n</sup>'āa Galilea**

(Mt. 4.12-17; Mr. 1.14-15)

<sup>14</sup>Jesús mii<sup>n</sup> nngueεcúnée yā na yá<sup>n</sup>'āa Galilea ní caneeé poder ye<sup>n</sup>'e Espíritu N'dai ye<sup>n</sup>'e Ndyuūs ndúú<sup>cū</sup> yā. Nducyáácá 'ii<sup>n</sup>yā<sup>n</sup> chicadíínuu<sup>n</sup> yā na nuu<sup>n</sup>má<sup>n</sup> na yá<sup>n</sup>'āa cuaa<sup>n</sup> 'diituú ye<sup>n</sup>'e chí n'daācā n'dai idií<sup>n</sup> Jesús. <sup>15</sup>Ní Jesús ngi'cuee<sup>n</sup> yā na yaācū sinagogas ye<sup>n</sup>'e 'ii<sup>n</sup>yā<sup>n</sup> Israel ye<sup>n</sup>'e nducué<sup>n</sup>'ē yáā<sup>n</sup> ní nducyaaca 'ii<sup>n</sup>yā<sup>n</sup> idich'εeté yā Jesús.

**Jesús canee yā na yáā<sup>n</sup> Nazaret**

(Mt. 13.53-58; Mr. 6.1-6)

<sup>16</sup>Ndaá Jesús na yáā<sup>n</sup> Nazaret naachí ch'iita yā. Ní tan'dúú<sup>cā</sup> chí costumbre ye<sup>n</sup>'é yā, nguuvī sábadó chí ntaavi'tuunúú<sup>n</sup> 'ii<sup>n</sup>yā<sup>n</sup> ye<sup>n</sup>'e ndaata Israel ndáa yā na yaācū sinagoga mii<sup>n</sup> ní Jesús chééndii yā ní ch'ee<sup>n</sup> yā ye<sup>n</sup>'e libro ye<sup>n</sup>'e Ndyuūs. <sup>17</sup>Ní nan'guáá<sup>n</sup> yā libro mii<sup>n</sup> naachi

nga<sup>n</sup>a ye<sup>n</sup>ē profeta Isafás. Taachí nan'guaa<sup>n</sup> yā libro mii<sup>n</sup>, ndaacá yā naachi canéé nguū<sup>n</sup> chúu:

<sup>18</sup> Espíritu ye<sup>n</sup>é Ndyuūs canée yā nduucú, tí Espíritu N'dai ye<sup>n</sup>é Ndyuūs ndeévé yā 'úú chi 'úú ní caa<sup>n</sup> má<sup>n</sup> nduudu chí ngai ye<sup>n</sup>é Ndyuūs nanáá<sup>n</sup> 'ii<sup>n</sup> yā<sup>n</sup> chí ndaachí snee<sup>n</sup> ndúúcū nuu<sup>n</sup>ndi ye<sup>n</sup>e yā. Dicho'ó yā 'úú chí dí<sup>n</sup> chí nduūvā ye<sup>n</sup>e 'ii<sup>n</sup> yā<sup>n</sup> chí ya<sup>n</sup>'ai staava ye<sup>n</sup>e yā, ní caa<sup>n</sup> má<sup>n</sup> chí nángua<sup>n</sup>'ai 'ii<sup>n</sup> yā<sup>n</sup> ye<sup>n</sup>e nuu<sup>n</sup>ndi ye<sup>n</sup>é yā chí tan'duucā chí ca'á libertad 'ii<sup>n</sup> yā<sup>n</sup> chí snúú<sup>n</sup> vácū, ní dí<sup>n</sup> chí inaa<sup>n</sup> 'ii<sup>n</sup> yā<sup>n</sup> cosa chí n'daacā chí nguéé déénu yā ye<sup>n</sup>ē caati maa<sup>n</sup> canee yā tan'dúúcā 'ii<sup>n</sup> yā<sup>n</sup> chí ngeenáá<sup>n</sup>, 'tiicá yā. Ní nadan'guaí 'ii<sup>n</sup> yā<sup>n</sup> chí nguéé n'daacā idii<sup>n</sup> ndúúcu yā caati cuuvi n'daacā idii<sup>n</sup> ndúúcu yā.

<sup>19</sup> Ní caa<sup>n</sup> má<sup>n</sup> ye<sup>n</sup>e tiempo chí n'dai taavi chí Ndyuūs ndeévé yā chí caa<sup>n</sup> má<sup>n</sup>, ye<sup>n</sup>ē vaadi n'dai taavi ye<sup>n</sup>é yā.

<sup>20</sup> Tuu'mi ní Jesús nan'gaadi yā libro ye<sup>n</sup>é Ndyuūs ní nanca'a yā 'ii<sup>n</sup> yā<sup>n</sup> chí dí<sup>n</sup> yā nti<sup>n</sup>nyu<sup>n</sup> ye<sup>n</sup>e yaacū sinagoga mii<sup>n</sup>. Ní cuayiivi Jesús chí'indí yā. Nducyaaca 'ii<sup>n</sup> yā<sup>n</sup> snee yā n'gíinu yā ye<sup>n</sup>e Jesús.

<sup>21</sup> Jesús tucá'a yā ca<sup>n</sup>'a yā 'ii<sup>n</sup> yā<sup>n</sup> s'ee<sup>n</sup>: Maa<sup>n</sup> cunu<sup>n</sup> ca'a chuū chí canee nguū<sup>n</sup> cuáá<sup>n</sup> vmnaa<sup>n</sup> chí ye<sup>n</sup>e ndís'ti, chuū chí chí'inu chí'iindiveé<sup>n</sup> ní.

<sup>22</sup> Nducyáácá 'ii<sup>n</sup> yā<sup>n</sup> n'dáácā nga<sup>n</sup>'a yā ye<sup>n</sup>e Jesús. Nge<sup>n</sup>e yíínú yā ye<sup>n</sup>ē nduudu chí n'dai chí nga<sup>n</sup>'a Jesús mii<sup>n</sup> ní nga<sup>n</sup>'a yā: ¿Áá nguéé sá<sup>n</sup>'a 'cūú daiya José?

<sup>23</sup> Ní ca<sup>n</sup>'a Jesús mii<sup>n</sup>: Ndís'tii ní cuuví ní nduudu 'cūú 'úú. N'dii 'ii<sup>n</sup> yā<sup>n</sup> chí déénu ní dí<sup>n</sup> yíicú ní 'ii<sup>n</sup> yā<sup>n</sup>, dí<sup>n</sup> yíicú maá<sup>n</sup> ní n'dii. Tanducue<sup>n</sup>é chí chí'iindiveé<sup>n</sup> 'nū chí dí<sup>n</sup> ní na yáá<sup>n</sup> Capernaum, 'tiicá ntúú<sup>n</sup> dí<sup>n</sup> ní 'muu<sup>n</sup> yáá<sup>n</sup> vaacú ní.

<sup>24</sup> Naati 'uu ní ca<sup>n</sup>'a chíi ndís'tii: Cuaacu ní<sup>n</sup>nyú<sup>n</sup> mar 'áámá profeta ní nguéé ngíi inee yā na yáá<sup>n</sup> vaacú yā. <sup>25</sup> Cuaacu ní<sup>n</sup>nyú<sup>n</sup> nga<sup>n</sup>'á ngíi ndís'tii: Tiempo chí chó'oo neené 'yaa<sup>n</sup> n'daataá nguá'aa vεε tá nguaa<sup>n</sup> 'ii<sup>n</sup> yā<sup>n</sup> Israel taachi profeta Elías cāneé yā i<sup>n</sup>'yee<sup>n</sup>dí 'cūú ní 'āā ntéé chee<sup>n</sup> cuuvi 'iinu ndúuyū canéé ma<sup>n</sup>'a tiempo mii<sup>n</sup>. Ní chí'iidí cuiicu nuu<sup>n</sup>má<sup>n</sup> yá<sup>n</sup>'āa ye<sup>n</sup>e 'ii<sup>n</sup> yā<sup>n</sup> Israel. <sup>26</sup> Ní Ndyuūs nguéé dich'óo yā Elías mii<sup>n</sup> nanáá<sup>n</sup> nducyaaca n'daataá nguá'āa, dámaā<sup>n</sup> 'áámá n'daataá nguá'āa ye<sup>n</sup>e táámá nación. Ní canee tá na yáá<sup>n</sup> Sarepta chí nii<sup>n</sup>nuú<sup>n</sup> na yá<sup>n</sup>'āa Sidón. <sup>27</sup> Ní tiempo taachi canéé profeta Eliseo na i<sup>n</sup>'yee<sup>n</sup>dí 'cūú, 'tiicá ntúú<sup>n</sup> neéneé 'yaa<sup>n</sup> 'ii<sup>n</sup> yā<sup>n</sup> ndúúcū ca'ai chí lepra chí in'duuti yúutē ye<sup>n</sup>e yā naati nguéé nducyaaca 'ii<sup>n</sup> yā<sup>n</sup> s'ee<sup>n</sup> nduuva ye<sup>n</sup>e yā, dámaā<sup>n</sup> sa<sup>n</sup>'ā Naamán ye<sup>n</sup>e táámá nación chí ye<sup>n</sup>e yá<sup>n</sup>'āa Siria.

<sup>28</sup> Taachí 'ii<sup>n</sup> yā<sup>n</sup> chí'iindiveé<sup>n</sup> yā chuū nducyaaca yā na yaacū sinagoga mii<sup>n</sup> neené nduuvi taa<sup>n</sup> yā. <sup>29</sup> Ní chí'eti ndii yā tí ne<sup>n</sup>é yā tun'daa yā Jesús cuaa<sup>n</sup> chuva'āi yáá<sup>n</sup> mii<sup>n</sup> ní candéε yā Jesús mii<sup>n</sup> ndii na yaacu n'dai ye<sup>n</sup>e yíicū chí yaacú ca ye<sup>n</sup>e yáá<sup>n</sup> mii<sup>n</sup>. Ní 'iicu cuuví cun'dáa yā Jesús mii<sup>n</sup>. <sup>30</sup> Naati nguéé cuuví dí<sup>n</sup> yā ti Jesús mii<sup>n</sup> ní chó'ó yā náávta<sup>n</sup>'ā ye<sup>n</sup>e 'ii<sup>n</sup> yā<sup>n</sup> s'ee<sup>n</sup> ní cuna<sup>n</sup>'a yā na vaacu yā.

**'Áámá sa<sup>n</sup>ā chi canéé sa ndúúcū  
espíritu chi nguεε n'daācā ye<sup>n</sup>e  
yáá<sup>n</sup>'n'guiinū<sup>n</sup>**

(Mr. 1.21-28)

<sup>31</sup> Cuayivi Jesús nangua'ái yā na yāā<sup>n</sup> Capernaum ye<sup>n</sup>e yá<sup>n</sup>'āa Galilea ní mii<sup>n</sup> ngi'cuee<sup>n</sup> yā 'ii<sup>n</sup>'yā<sup>n</sup> nguuvu sábado chi nguuvu chí ntaavi'tuunúú<sup>n</sup> yā. <sup>32</sup> Ní 'ii<sup>n</sup>'yā<sup>n</sup> na yāā<sup>n</sup> mii<sup>n</sup> nge<sup>n</sup>e yiinú yā ye<sup>n</sup>e chi ngi'cuee<sup>n</sup> Jesús, ti ngi'cuee<sup>n</sup> yā ndúúcū poder tan'dúúcā 'áámá 'ii<sup>n</sup>'yā<sup>n</sup> chí nga<sup>n</sup>'ā nti<sup>n</sup>'nyú<sup>n</sup> yā.

<sup>33</sup> Ní taachi snee Jesús na yaacu sinagoga mí<sup>n</sup> canee 'áámá sa<sup>n</sup>ā ndúúcū espíritu ye<sup>n</sup>e yáá<sup>n</sup>'n'guiinū<sup>n</sup>. Espíritu mii<sup>n</sup> dii<sup>n</sup> chí sa<sup>n</sup>'ā mii<sup>n</sup> neené yuudu 'caí sa. <sup>34</sup> Ní espíritu mii<sup>n</sup> ní ca<sup>n</sup>'ā: N'dií, Jesús, ye<sup>n</sup>e yāā<sup>n</sup> Nazaret, cu'née<sup>n</sup> nī nús'uu. ¿D'éε canee ye<sup>n</sup>'é nū nduucú ní? ¿'Áá ndāa nī chí di'cuiinú nī nús'uu? 'Úú n'diichí du'ú n'dií. N'dií ní 'ii<sup>n</sup>'yā<sup>n</sup> chí N'dai chí Daiya Dendyuūs n'dií.

<sup>35</sup> Jesús ní yaa'vinee<sup>n</sup> yā ní ca<sup>n</sup>'a yā: Dii espíritu n'gáádí dí cheendi di ní nan'dáa di ye<sup>n</sup>e sá 'tíi. Tuu'mi ní espíritu ye<sup>n</sup>e yáá<sup>n</sup>'n'guiinū<sup>n</sup> chíndeεve sa sá<sup>n</sup>'a 'cūū náávta<sup>n</sup>'ā ye<sup>n</sup>e 'ii<sup>n</sup>'yā<sup>n</sup> s'ee<sup>n</sup> ní nan'daā sa ye<sup>n</sup>'e sá<sup>n</sup>'a 'cūū. Nguéé de'ε vεε dii<sup>n</sup> sa ndúúcū sá<sup>n</sup>'a 'cūū. <sup>36</sup> Nducyaaca yā ní nge<sup>n</sup>e yiinú yā ní nga<sup>n</sup>'a yā ngii yā vi'i: ¿D'éε nduudu chí 'túuca? 'Ii<sup>n</sup>'yā<sup>n</sup> 'cūū nga<sup>n</sup>'a nti<sup>n</sup>'nyú<sup>n</sup> yā espíritu ye<sup>n</sup>e yáá<sup>n</sup>'n'guiinū<sup>n</sup> ndúúcū poder tan'dúúcā 'áámá 'ii<sup>n</sup>'ntyé<sup>n</sup>'ē. Nga<sup>n</sup>'á yā chí nan'daā espíritu ye<sup>n</sup>e yáá<sup>n</sup>'n'guiinū<sup>n</sup> ní nacan'daā.

<sup>37</sup> Ní nducyaaca 'ii<sup>n</sup>'yā<sup>n</sup> nga<sup>n</sup>'a yā ye<sup>n</sup>e Jesús mii<sup>n</sup> nducué<sup>n</sup>'ē cuaa<sup>n</sup> nducué<sup>n</sup>'ē yāā<sup>n</sup> cuáá<sup>n</sup> 'diituú.

**Jesús dí<sup>n</sup> yā chi nduūvā ye<sup>n</sup>e indá<sup>n</sup>'a  
Simon Pedro**

(Mt. 8.14-15; Mr. 1.29-31)

<sup>38</sup> Tuu'mi ní Jesús mii<sup>n</sup> nan'dáa yā yaācū sinagoga mii<sup>n</sup> ní ndaa yā va'ai ye<sup>n</sup>'ē Simón Pedro. Ní indá<sup>n</sup>'ā Simón Pedro mii<sup>n</sup> ndéε 'aama 'ii<sup>n</sup>'nū<sup>n</sup> taa<sup>n</sup> n'daataá ní 'ii<sup>n</sup>'yā<sup>n</sup> ye<sup>n</sup>'e vacu tá di'cuíitu yā Jesús mii<sup>n</sup> chí cunee yā ní nanduūvā ye<sup>n</sup>'ē tá. <sup>39</sup> Jesús can'dii yā naachi canéé n'daataa mii<sup>n</sup> ní ca<sup>n</sup>'a yā chí cuavii 'ii<sup>n</sup>'nū<sup>n</sup> mii<sup>n</sup>. Hora mii<sup>n</sup> 'ii<sup>n</sup>'nū<sup>n</sup> mii<sup>n</sup> chivii ye<sup>n</sup>'ē tá. N'daataa mii<sup>n</sup> ní hora mii<sup>n</sup> ncuue<sup>n</sup> nuu<sup>n</sup> tá ní dii<sup>n</sup> tá mandados ye<sup>n</sup>'é 'ii<sup>n</sup>'yā<sup>n</sup> s'ee<sup>n</sup> ní ca'a tá chí che'e yā.

**Jesús dí<sup>n</sup> yā chi nduūvā ye<sup>n</sup>e 'yaa<sup>n</sup>  
n'dái 'ii<sup>n</sup>'yā<sup>n</sup> chí ngiitā**

(Mt. 8.16-17; Mr. 1.32-34)

<sup>40</sup> Taachí chiiya 'yá<sup>n</sup>'ā, 'yáá<sup>n</sup> n'dái 'ii<sup>n</sup>'yā<sup>n</sup> ndéε yā 'ii<sup>n</sup>'yā<sup>n</sup> chí ngiitā nanáá<sup>n</sup> Jesús. Nééne n'dee naa<sup>n</sup> ca'ai ndii yā. Jesús mii<sup>n</sup> ní yiin'duu tá'a yā vmnaa<sup>n</sup> ca'áámá ca'áámá 'ii<sup>n</sup>'yā<sup>n</sup> ní 'tíicā nduuvā ye<sup>n</sup>'e yā. <sup>41</sup> Ní ye<sup>n</sup>'ē 'yaa<sup>n</sup> 'ii<sup>n</sup>'yā<sup>n</sup> chí ngiíta yā yinan'dáa espíritus ye<sup>n</sup>'e yáá<sup>n</sup>'n'guiinū<sup>n</sup> chí 'caí yā ní nga<sup>n</sup>'a yā: N'dií ní Daiya Dendyuūs n'dií. Tuu'mi ní Jesús mii<sup>n</sup> ní yaa'vinee<sup>n</sup> yā espíritus ye<sup>n</sup>'e yáá<sup>n</sup>'n'guiinū<sup>n</sup> ní nguéé 'cuú<sup>n</sup> yā chí caa<sup>n</sup>'ma<sup>n</sup> sa ti espíritus ye<sup>n</sup>'e yáá<sup>n</sup>'n'guiinū<sup>n</sup> ní deenu sá chí Jesús mii<sup>n</sup> chí Cristo.

**Jesús ní ca<sup>n</sup>'a yā nduudu ye<sup>n</sup>'é  
Ndyuūs na yá<sup>n</sup>'āa Judea**

(Mr. 1.35-39)

<sup>42</sup> Chidεeve táámá nguuvu Jesús mii<sup>n</sup> ní cue<sup>n</sup>'e yā chuva'ai yāā<sup>n</sup> mii<sup>n</sup> na 'áámá lugar naachi nguéé

ch'ëetinéé 'ii<sup>n</sup>yā<sup>n</sup>. Ní 'ii<sup>n</sup>yā<sup>n</sup> s'ee<sup>n</sup> ye<sup>n</sup>e yáá<sup>n</sup> mii<sup>n</sup>ya in'nuú<sup>n</sup> yā Jesús ní ndaa yā naachi canéé Jesús mii<sup>n</sup>. Ní dí'cuuitú yā chi nguéé cuvii Jesús ye<sup>n</sup>e yā. <sup>43</sup>Naati Jesús mii<sup>n</sup> ní nga<sup>n</sup>a yā ngii yā 'ii<sup>n</sup>yā<sup>n</sup> s'ee<sup>n</sup>: Canéé chí<sup>n</sup> chi 'úú ní caa<sup>n</sup>má<sup>n</sup> ye<sup>n</sup>e nduudu ngai ye<sup>n</sup>e naachi Ndyuūs nga<sup>n</sup>a nti<sup>n</sup>nyú<sup>n</sup> yā, nanáá<sup>n</sup> 'ii<sup>n</sup>yā<sup>n</sup> ye<sup>n</sup>e taná<sup>n</sup>ā yáá<sup>n</sup> ti ye<sup>n</sup>e chúú chí Dendyuūs dichoó yā 'úú.

<sup>44</sup>Ní Jesús mii<sup>n</sup> cue<sup>n</sup>é yā yáá<sup>n</sup> ndíí yáá<sup>n</sup> ye<sup>n</sup>e yá<sup>n</sup>āa Galilea ní nga<sup>n</sup>á yā nduudu ye<sup>n</sup>e Ndyuūs na yaacū sinagogas naachi cue<sup>n</sup>é yā.

#### Ndúúcu vaadí n'giinu ye<sup>n</sup>e chi itungaa<sup>n</sup> yā 'yaacā

(Mt. 4.18-22; Mr. 1.16-20)

**5** 'Áamá tiempo taachi Jesús canéé yā nii<sup>n</sup>nuú<sup>n</sup> ná nuū<sup>n</sup>nī<sup>n</sup>yá<sup>n</sup>ā chi nguuvi Genesaret, néénéé 'yaa<sup>n</sup> 'ii<sup>n</sup>yā<sup>n</sup> ndaa yā nanáá<sup>n</sup> yā ní chiitu yā chi cuuvi 'caandiveé<sup>n</sup> yā nduudu ye<sup>n</sup>e Dendyuūs. <sup>2</sup>Jesús n'diichi yā ná 'uūvi barcos chi snéé ní<sup>n</sup>nuú<sup>n</sup> na nuū<sup>n</sup>nī<sup>n</sup>yá<sup>n</sup>ā. 'Ii<sup>n</sup>yā<sup>n</sup> chi itungaa<sup>n</sup> 'yaacā mii<sup>n</sup> 'āā nan'daá yā na barco s'ee<sup>n</sup> ní cue<sup>n</sup>é yā naa<sup>n</sup>nú yā yáaná ye<sup>n</sup>e 'yaacā na nuū<sup>n</sup>nī<sup>n</sup>yá<sup>n</sup>ā. <sup>3</sup>Tuu'mi Jesús sndaa yā na 'áamá barco chi ye<sup>n</sup>e Simón Pedro mii<sup>n</sup> ní chii yā Simón Pedro chí 'āā ca<sup>n</sup>a rá barco mii<sup>n</sup> ndíí nii<sup>n</sup>nuú<sup>n</sup> 'diituú nuū<sup>n</sup>nī<sup>n</sup> mii<sup>n</sup>. Tuu'mi ní Jesús ch'iindii yā na barco mii<sup>n</sup> ní chí'cuee<sup>n</sup> yā 'ii<sup>n</sup>yā<sup>n</sup>. <sup>4</sup>Taachi Jesús ch'iinu chí'cuee<sup>n</sup> yā 'ii<sup>n</sup>yā<sup>n</sup>, tuu'mi ní ca<sup>n</sup>a yā chii yā Simón: Cue<sup>n</sup>e di ndúúcu barco ndíí ná yáanuū<sup>n</sup> ní 'caanuū<sup>n</sup> dí yaaná ye<sup>n</sup>e di nguaa<sup>n</sup> nuū<sup>n</sup>nī<sup>n</sup> ní tungaa<sup>n</sup> dí 'yaacā.

<sup>5</sup>Simón mii<sup>n</sup> ní nan'guεεcúta<sup>n</sup>a yā ní ca<sup>n</sup>a yā chii yā Jesús: N'dii Maestro, 'āā núú<sup>n</sup>má<sup>n</sup> yaa<sup>n</sup> ch'ëeti nduuchí 'nū ní dí<sup>n</sup> nti<sup>n</sup>nyú<sup>n</sup> 'nū ní nguéé de'ε vεε ndaāca 'nū; naati ndúúcu nduudu ye<sup>n</sup>e ní 'caanuú<sup>n</sup> 'nū yaāná ye<sup>n</sup>e 'nū chëeti nuū<sup>n</sup>nī<sup>n</sup> mii<sup>n</sup>.

<sup>6</sup>Taachi 'caanuú<sup>n</sup> yā yaāná mii<sup>n</sup> chiitu 'yaacā chëeti yaāná mii<sup>n</sup> chí yaāná mii<sup>n</sup> ndiituú nuū<sup>n</sup> chíítee<sup>n</sup>. <sup>7</sup>Tuu'mi ní dita'a yā ye<sup>n</sup>e taná<sup>n</sup>a 'ii<sup>n</sup>yā<sup>n</sup> chi snúú<sup>n</sup> yā chëeti taamá barco mii<sup>n</sup> chí ca<sup>n</sup>a yā ní cunneé yā Simón. 'Ii<sup>n</sup>yā<sup>n</sup> s'ee<sup>n</sup> ní ndaa yā ní chiitu 'yaacā nduu 'uuvi barcos chí nduu 'uuvi barcos ne<sup>n</sup>e 'cuεechi ndii máá<sup>n</sup> nuū<sup>n</sup>nī<sup>n</sup>. <sup>8</sup>Taachi Simón Pedro n'diichi yā chuū chíntii'yā yā nanáá<sup>n</sup> Jesús mii<sup>n</sup> ní ca<sup>n</sup>a yā chii yā Jesús mii<sup>n</sup>: N'dii Señor, 'úú nguéé n'daācā 'úú chí cuchíí nanáá<sup>n</sup> n'dii, ti 'úú ní 'ii<sup>n</sup>yā<sup>n</sup> nuū<sup>n</sup>ndí 'úú.

<sup>9</sup>Simón Pedro mii<sup>n</sup> ní néénéé nge<sup>n</sup>e yiinú yā. 'Tiicá ntúū<sup>n</sup> 'ii<sup>n</sup>yā<sup>n</sup> chí snéé yā ndúúcu sa nge<sup>n</sup>e yiinú yā cáávā ye<sup>n</sup>e chí dí<sup>n</sup> Jesús chí 'ii<sup>n</sup>yā<sup>n</sup> s'ee<sup>n</sup> itungaa<sup>n</sup> yā 'yaacā chí 'yaa<sup>n</sup> taaví ti. <sup>10</sup>'Tiicá ntúū<sup>n</sup> Jacobo ndúúcu Juan, chí daiya Zebedeo, chí dáámá dí<sup>n</sup> yā nti<sup>n</sup>nyu<sup>n</sup> ndúúcu Simón, dí<sup>n</sup>yā yā chíí. Ní Jesús ca<sup>n</sup>a yā chíí yā Simón: Díí, Simón, nguéé 'va'a dí; ndii maa<sup>n</sup> ní tan'dúúcu chí ituungaa<sup>n</sup> di 'yaacā ye<sup>n</sup>e nuū<sup>n</sup>nī<sup>n</sup>, 'tíicā maa<sup>n</sup> ní 'úú idí<sup>n</sup> chí in'nuu<sup>n</sup> dí 'ii<sup>n</sup>yā<sup>n</sup> chí cuuvi ca<sup>n</sup>á yā nduucú.

<sup>11</sup>Taachi ndaa yā ndúúcu barco mii<sup>n</sup> nii<sup>n</sup>nuú<sup>n</sup> 'diitú nuū<sup>n</sup>nī<sup>n</sup>, tuu'mi ní 'ii<sup>n</sup>yā<sup>n</sup> s'ee<sup>n</sup> s'nee<sup>n</sup> yā nti<sup>n</sup>nyu<sup>n</sup> ye<sup>n</sup>e yā ndúúcu barco mii<sup>n</sup> ndúúcu nducué<sup>n</sup>e chí snúú<sup>n</sup> chëeti barco mii<sup>n</sup> ní cue<sup>n</sup>e yā ndúúcu Jesús.

**Jesús dii<sup>n</sup> yā chi nduūvā ye<sup>n</sup>e 'áámá sa<sup>n</sup>ā ndúúcū ca'ai lepra**

(Mt. 8.1-4; Mr. 1.40-45)

<sup>12</sup>Taachi Jesús mii<sup>n</sup> ndaa yā na 'áámá yāā<sup>n</sup> ní canée yā mii<sup>n</sup>, ndaa nanáá<sup>n</sup> Jesús 'áámá sa<sup>n</sup>ā chi ndii sa 'áámá ca'ai chi nguuvī lepra chi ín'duuti yuūtē ye<sup>n</sup>ē sa. Taachí sa<sup>n</sup>ā mii<sup>n</sup> n'diichi sa Jesús mii<sup>n</sup>, chííntii'ya sa can'diī sa ndii na yā<sup>n</sup>āa nanáá<sup>n</sup> Jesús mii<sup>n</sup>. Ní chiica sa Jesús: N'díí Señor, ndúúti chi n'diī ne<sup>n</sup>e nī, ní díí<sup>n</sup> nī chí nduūvā ye<sup>n</sup>é.

<sup>13</sup>Tuu'mi ní Jesús mii<sup>n</sup> n'doo ta'á yā ní tuu'ví yā sa<sup>n</sup>ā ní ca<sup>n</sup>a yā: 'Úú ní ne<sup>n</sup>é chi nduūvā ye<sup>n</sup>ē di. Tuu'mí nūu<sup>n</sup> ndúuvā ye<sup>n</sup>ē sa ní nduūvī dēeve sá. <sup>14</sup>Ní Jesús ca<sup>n</sup>a yā chíi yā sa<sup>n</sup>ā mii<sup>n</sup>: Nguéé cuuvi dí mar 'áámá 'ii<sup>n</sup>yā<sup>n</sup> chi nduuva ye<sup>n</sup>ē di. Cue<sup>n</sup>e di ní 'cuu<sup>n</sup>mi<sup>n</sup> di maa<sup>n</sup> cuerpo ye<sup>n</sup>e di nanáá<sup>n</sup> chiiduú. Ní ca'a di nanáá<sup>n</sup> Ndyuūs ofrenda ye<sup>n</sup>ē di ye<sup>n</sup>e chi nanduuva ye<sup>n</sup>ē di tan'dúúcā chi nga<sup>n</sup>a ley ye<sup>n</sup>e Moisés. Ní 'iicu cadíínuu<sup>n</sup> nducyaaca 'ii<sup>n</sup>yā<sup>n</sup> chi nduūvā ye<sup>n</sup>e di.

<sup>15</sup>Ye<sup>n</sup>e chí díí<sup>n</sup> Jesús mii<sup>n</sup> dāndoō ca, ní neené 'yaa<sup>n</sup> 'ii<sup>n</sup>yā<sup>n</sup> ndaa yā chi 'caandiveé<sup>n</sup> yā nduudu ye<sup>n</sup>e Jesús mii<sup>n</sup>. Ní Jesús díí<sup>n</sup> yā chi nduūvā ye<sup>n</sup>e 'ii<sup>n</sup>yā<sup>n</sup>. <sup>16</sup>Jesús cue<sup>n</sup>e yā na lugar naachi nguéé ch'ētínéé 'ii<sup>n</sup>yā<sup>n</sup> chí caa<sup>n</sup>ma<sup>n</sup>ngua'á yā.

**Jesús dii<sup>n</sup> yā chi nduūvā ye<sup>n</sup>e 'áámá sa<sup>n</sup>ā chi in'dúuví cuerpo ye<sup>n</sup>e sa**

(Mt. 9.1-8; Mr. 2.1-12)

<sup>17</sup>Áámá nguuvī Jesús ní ngi'cuee<sup>n</sup> yā 'ii<sup>n</sup>yā<sup>n</sup> ní mii<sup>n</sup> vēē 'ii<sup>n</sup>yā<sup>n</sup> fariseos

chi dingúu<sup>n</sup> leyes ndúúcū maestros chí ngi'cuee<sup>n</sup> ley. 'Ii<sup>n</sup>yā<sup>n</sup> s'ee<sup>n</sup> ní ngiicá yā ye<sup>n</sup>e táámá yāā<sup>n</sup> ní ye<sup>n</sup>ē nducyáácá yaā<sup>n</sup> ye<sup>n</sup>e yá<sup>n</sup>āa Galilea ndúúcū yá<sup>n</sup>āa Judea, nífcú ye<sup>n</sup>e yāā<sup>n</sup> Jerusalén. Jesús mii<sup>n</sup> cuuvi díí<sup>n</sup> yā chí nduūvā 'ii<sup>n</sup>yā<sup>n</sup> s'ee<sup>n</sup> ti poder ye<sup>n</sup>e Ndyuūs canée nduucú yā.

<sup>18</sup>Tuu'mi ní ndaa ntúū<sup>n</sup> n'duuvī sa<sup>n</sup>ā chí n'diichí yā Jesús. Ní sa<sup>n</sup>ā s'ee<sup>n</sup> ní ndeε yā 'áámá sa<sup>n</sup>ā ndúúcū ca'āi chí in'dúuví cuerpo ye<sup>n</sup>e sa na 'áámá camilla. Ní n'dií<sup>n</sup> yā chí ndaa sa<sup>n</sup>ā mii<sup>n</sup> chēeti va'āi nanáá<sup>n</sup> Jesús mii<sup>n</sup>. <sup>19</sup>Nguéé ndaāca yā taacā cundāa yā ndúúcū sa<sup>n</sup>a mii<sup>n</sup> ti neené n'deéé 'ii<sup>n</sup>yā<sup>n</sup> snuu<sup>n</sup> yā. Tuu'mi ní 'ii<sup>n</sup>yā<sup>n</sup> s'ee<sup>n</sup> ní chεε yā tíí<sup>n</sup> va'āi ní divíi yā n'duuvī táátá tíí<sup>n</sup> va'āi. Ní di'cua'ái yā sa<sup>n</sup>ā na yiive naachi candííti sa<sup>n</sup>ā mii<sup>n</sup> nanáá<sup>n</sup> Jesús. <sup>20</sup>Taachí Jesús mii<sup>n</sup> tuumicadíínuu<sup>n</sup> yā chí véé vaadi i'teenu ye<sup>n</sup>é sa<sup>n</sup>ā s'ee<sup>n</sup> ca<sup>n</sup>a yā chíi yā sa<sup>n</sup>ā: Díí sa<sup>n</sup>ā, 'úú nadach'εecú nuu<sup>n</sup>ndí ye<sup>n</sup>e di.

<sup>21</sup>Tuu'mi ní 'ii<sup>n</sup>yā<sup>n</sup> chí ngi'cuee<sup>n</sup> ley ndúúcū 'ii<sup>n</sup>yā<sup>n</sup> fariseos tuca'a yā nadicadíínuu<sup>n</sup> yā ní ca<sup>n</sup>a yā: ¿Du'u sá<sup>n</sup>a 'cūū chí duuchinee<sup>n</sup> yā ye<sup>n</sup>e Ndyuūs? ¿Du'ū nadich'εecu nuu<sup>n</sup>ndi ye<sup>n</sup>ē yú? Dámaa<sup>n</sup> Ndyuūs cuuvi díí<sup>n</sup> yā 'tíicā.

<sup>22</sup>Jesús tuūmicadiinúú<sup>n</sup> yā chí nadicadíínuu<sup>n</sup> 'ii<sup>n</sup>yā<sup>n</sup> s'ee<sup>n</sup>. Tuu'mi ní ca<sup>n</sup>a yā chíi yā 'ii<sup>n</sup>yā<sup>n</sup> s'ee<sup>n</sup>: Ndís'tiī, ¿d'éē cúúví chí 'tíicā inadicadíínuu<sup>n</sup> ndís'tiī na staava ye<sup>n</sup>é ní? <sup>23</sup>¿Chεε cá nguéé ngi'íi chí caa<sup>n</sup>má<sup>n</sup>: 'Āā nuu<sup>n</sup>ndi ye<sup>n</sup>e di ní nch'εēcū o ndúúncuée<sup>n</sup> dí ní caaca dí? <sup>24</sup>Túúicā ca<sup>n</sup>á chíí sa<sup>n</sup>ā chí ndís'tiī cuuvi déenu nī ti 'úú ní Sa<sup>n</sup>a chí Daiyá Dendyuūs 'úú. Ní véé poder i<sup>n</sup>'yee<sup>n</sup>dí

'cūū chi inadach'eēcū nuu<sup>n</sup>ndi.  
Tuu'mi ní Jesús ca<sup>n</sup>'a yā chí yā sa<sup>n</sup>'a  
mii<sup>n</sup>: Ncuee<sup>n</sup> di, nta'a di yiive ye<sup>n</sup>'ē  
di ní cuna<sup>n</sup>'ā di na vaacu di.

<sup>25</sup>Tuu'mi ní sa<sup>n</sup>'ā mii<sup>n</sup> chí ndii chí  
ca'āi sa 'āā ndúúvā ye<sup>n</sup>'ē sa ní sta'ā  
sa yiive ye<sup>n</sup>'ē sa naachi cándiiti sa  
ní nga<sup>n</sup>'a sa: Dē'e chúúcā ch'ēete  
Dendyuūs. Ní cuna<sup>n</sup>'ā sa naavta<sup>n</sup>'ā  
ye<sup>n</sup>'ē 'ii<sup>n</sup>'yā<sup>n</sup> s'ee<sup>n</sup>. <sup>26</sup>Nducyáácá  
'ii<sup>n</sup>'yā<sup>n</sup> che<sup>n</sup>'e yiinú yā ní neene  
d'i'váá yā ní ca<sup>n</sup>'a yā: Dē'ē chúúcā  
ch'ēete Dendyuūs. Ní ca<sup>n</sup>'a yā: Maa<sup>n</sup>  
ní n'diichi yú dendu'ū chí nguéé ta  
nn'diichi yú chí ca<sup>n</sup>'a yiinu yú.

**Jesús yaa'ví yā sa<sup>n</sup>'ā chí nguuvi Leví**

(Mt. 9.9-13; Mr. 2.13-17)

<sup>27</sup>Cho'ōo chúū, ní Jesús mii<sup>n</sup>  
can'daa yā cachiicá yā ní n'diichi  
yā 'áámá sa<sup>n</sup>'ā chí inn'guee ye<sup>n</sup>'ē  
impuestos ye<sup>n</sup>'e yá<sup>n</sup>'āa chí nguuvi  
sa Leví. Sa<sup>n</sup>'ā mii<sup>n</sup> ní vee sa naachi  
n'gēeteé sa<sup>n</sup>'ā chí inn'guee ye<sup>n</sup>'ē  
impuestos. Jesús mii<sup>n</sup> ní yaa'ví yā:  
Dii, sá<sup>n</sup>'ā, cuchii di ca<sup>n</sup>'a di nduucú.

<sup>28</sup>Tuu'mi ní s'nee<sup>n</sup> sá ntii<sup>n</sup>'nyu<sup>n</sup>  
ye<sup>n</sup>'ē sa ndúúcū nducué<sup>n</sup>'ē dendu'ū  
ní ndúcuee<sup>n</sup> sá ní cue<sup>n</sup>'ē sa ndúúcū  
Jesús.

<sup>29</sup>Sa<sup>n</sup>'a Leví mii<sup>n</sup> ca<sup>n</sup>'a ntii<sup>n</sup>'nyu<sup>n</sup> sá  
chí in'nuū<sup>n</sup> 'áámá comida ch'ēete  
n'dai na vaacu sa. Na vaacu sa  
mii<sup>n</sup> véé 'yáá<sup>n</sup> sa<sup>n</sup>'ā chí inn'guee  
ye<sup>n</sup>'e impuestos ndúúcū taná<sup>n</sup>'ā  
sa<sup>n</sup>'ā. Nducyaaca yā ní veētē yā  
ndúúcū Leví na mesa mii<sup>n</sup>. <sup>30</sup>Tuu'mí  
maestros chí ngi'cuee<sup>n</sup> ley mii<sup>n</sup>  
ndúúcū 'ii<sup>n</sup>'yā<sup>n</sup> fariseos chí díí<sup>n</sup> yā  
ley cunncaá ca<sup>n</sup>'a yā ye<sup>n</sup>'e discípulos  
ye<sup>n</sup>'e Jesús ní ca<sup>n</sup>'a yā: ¿DÉ'ē cúúví  
chí ndís'tii ndúúcū Jesús nge'é ní ní  
ngi'i ní ndúúcū 'ii<sup>n</sup>'yā<sup>n</sup> chí inn'guee

ye<sup>n</sup>'e impuestos ndúúcū 'ii<sup>n</sup>'yā<sup>n</sup>  
nuu<sup>n</sup>ndi? Chuū nguéé n'daācā.

<sup>31</sup>Jesús ní n'güecúta<sup>n</sup>'a yā: 'ii<sup>n</sup>'yā<sup>n</sup>  
chí nguéé ngiitā nguéé ne<sup>n</sup>'e yā chí  
cuuvi yíícú yā. Dámaā<sup>n</sup> 'ii<sup>n</sup>'yā<sup>n</sup> chí  
ngiitā ne<sup>n</sup>'e yā chí cuuvi yíícú yā.

<sup>32</sup>Úú nguéé cuchif chí yaa'ví 'ii<sup>n</sup>'yā<sup>n</sup>  
chí nadacadiinú<sup>n</sup> yā chí n'dááca  
yā chí nguéé dinuu<sup>n</sup>ndí yā naati  
'ii<sup>n</sup>'yā<sup>n</sup> chí véé nuu<sup>n</sup>ndi ye<sup>n</sup>'e yā ní  
íícú ndáácadáámí yā ye<sup>n</sup>'e nuu<sup>n</sup>ndi  
ye<sup>n</sup>'e yā.

**Jesús nga<sup>n</sup>'a yā ye<sup>n</sup>'e chí nguéé  
ca'diinú 'ii<sup>n</sup>'yā<sup>n</sup>**

(Mt. 9.14-17; Mr. 2.18-22)

<sup>33</sup>Tuu'mi ní 'ii<sup>n</sup>'yā<sup>n</sup> s'ee<sup>n</sup>  
tiingūnéé<sup>n</sup> yā Jesús: ¿DÉ'ē cúúví  
chí discípulos ye<sup>n</sup>'e Juan chí  
ngēdínuū<sup>n</sup>ní<sup>n</sup> ndúúcū discípulos  
ye<sup>n</sup>'e fariseos néénē n'deēe cuúví  
ní ca'dii<sup>n</sup>'nú<sup>n</sup> yā ní nga<sup>n</sup>'angua'á yā  
ní discípulos ye<sup>n</sup>'e ní nge'e yā ní  
ngi'i yā?

<sup>34</sup>Jesús ní ca<sup>n</sup>'a yā chí yā 'ii<sup>n</sup>'yā<sup>n</sup>:  
¿Chēe ye<sup>n</sup>'ē maá<sup>n</sup> ní cuuvi díí<sup>n</sup> ní  
chí nguéé che'e 'ii<sup>n</sup>'yā<sup>n</sup> chí nandaa  
naachi n'giindivaacu sa<sup>n</sup>'ā ne<sup>n</sup>'e chí  
canéé sa<sup>n</sup>'ā chí n'giindivaacu sa mii<sup>n</sup>  
ndúúcú yā? Nguéé cuuvi ní. <sup>35</sup>Naati  
ndaá nguuvi chí 'cuúví sā ní 'āā  
ntéé sa ndúúcú yā, tuu'mi ní 'ii<sup>n</sup>'yā<sup>n</sup>  
ca'dii<sup>n</sup>'nú<sup>n</sup> yā nguuvi mii<sup>n</sup>.

<sup>36</sup>Ca<sup>n</sup>'a ntúū<sup>n</sup> Jesús chí yā 'ii<sup>n</sup>'yā<sup>n</sup>  
táámá ejemplo chí 'tēe ngee  
daama: Mar 'áámá 'ii<sup>n</sup>'yā<sup>n</sup> nguéé  
'caaca yā 'áámá 'taa<sup>n</sup> tiinū<sup>n</sup> ngai chí  
nguéé 'āā naa<sup>n</sup>'nu yā chí n'dyaatá yā  
'áámá catecaí yā ndicúú caati tiinū<sup>n</sup>  
ngai mii<sup>n</sup> ní cū'tee<sup>n</sup> tíínū<sup>n</sup> ndiicúú.  
Ní ndiicúú mii<sup>n</sup> nguéé n'daacā dináá<sup>n</sup>  
dii<sup>n</sup> naachi nn'dyaatá ndúúcū chí  
ngai mii<sup>n</sup>. <sup>37</sup>Tiicá ntúū<sup>n</sup> mar 'áámá

'ii<sup>n</sup>yā<sup>n</sup> nguéé ca'nuú<sup>n</sup> yā vino ngai cheeti bolsa díí<sup>n</sup>má<sup>n</sup> 'iiti chi ndiicúū tan'dúucā chi dii<sup>n</sup> 'ii<sup>n</sup>yā<sup>n</sup> ndiicúū ti vino ngai mii<sup>n</sup> ní chó'oo yaadi ye<sup>n</sup>ē ní dii<sup>n</sup> chi 'cááncuū yíí<sup>n</sup>má<sup>n</sup> ndiicúū. Ní vino mii<sup>n</sup> ní cungéé ndíí yíí<sup>n</sup>má<sup>n</sup> mii<sup>n</sup> tuuvíí. <sup>38</sup>Cááāvā chuū ca'nuú<sup>n</sup> yā vino ngai mii<sup>n</sup> cheeti bolsa díí<sup>n</sup>má<sup>n</sup> ngai ní nduu 'uuvi ní n'daācā canee ye<sup>n</sup>ē. <sup>39</sup>Mar 'áámá 'ii<sup>n</sup>yā<sup>n</sup> chí ngí'i yā vino ndiicúū ne<sup>n</sup>é yā cu'u yā vino ngai cuayiivi caati nga<sup>n</sup>a yā chi vino chi ndiicúū chíí<sup>n</sup> chí n'dai nguéé ti vino ngai.

**Discípulos ye<sup>n</sup>e Jesús sta'a yā trigo nguuvi chí ntaavi'tuunúú<sup>n</sup> 'ii<sup>n</sup>yā<sup>n</sup> Israel**  
(Mt. 12.1-8; Mr. 2.23-28)

**6** 'Áámá nguuvi sábadó chi ntaavi'tuunúú<sup>n</sup> 'ii<sup>n</sup>yā<sup>n</sup> Israel, Jesús cho'ó yā ndúucū discípuos ye<sup>n</sup>é yā 'áámá campo naachi véé trigo. Discípuos ye<sup>n</sup>e yā ní sta'a yā trigo ní chíi yā tiíi<sup>n</sup> ndúucū ta'á yā ní che'e yā trigo. <sup>2</sup>Tuu'mi ní n'duuvi fariseos ca<sup>n</sup>a yā chíi yā discípuos ye<sup>n</sup>e Jesús: ¿De'ē cúuví chí ndís'tií díí<sup>n</sup> nī cosas chi nguéé canee chí díí<sup>n</sup> nī ti contra ye<sup>n</sup>e ley ye<sup>n</sup>e nguuvi chí cánéé chí ntaavi'tuunúú<sup>n</sup>?

<sup>3</sup>Jesús nan'guēecúta<sup>n</sup>a yā: ¿'Áá nguéé n'geē<sup>n</sup> ndís'tií na libro ye<sup>n</sup>é Ndyuūs tan'duucā chí dii<sup>n</sup> rey David ndúucū 'ii<sup>n</sup>yā<sup>n</sup> chí snéé ndúucu yā taachi cuíicu yā? <sup>4</sup>David sndáa yā yaācū ndúucū 'ii<sup>n</sup>yā<sup>n</sup> chí snéé ndúucu yā ní David sta'a yā pan chí canéé nátaí ye<sup>n</sup>e Ndyuūs ní che'e yā ní ca'á yā chí che'e 'ii<sup>n</sup>yā<sup>n</sup> chí snéé ndúucu yā. David mii<sup>n</sup> nguéé canee chí che'e yā pan ndúucū 'ii<sup>n</sup>yā<sup>n</sup> chí snéé ndúucu yā ti dámaā<sup>n</sup> chiiduú s'ee<sup>n</sup> canee chí che'e yā pan mii<sup>n</sup>.

<sup>5</sup>Ní Jesús ca<sup>n</sup>a yā chíi yā 'ii<sup>n</sup>yā<sup>n</sup> s'ee<sup>n</sup>: 'Úú ní Sa<sup>n</sup>ā chí Daiya Dendyuūs ní 'úú ngíí nga<sup>n</sup>á ntií<sup>n</sup>nyu<sup>n</sup> ye<sup>n</sup>e nguuvi chí ntaavi'tuunúú<sup>n</sup> 'ii<sup>n</sup>yā<sup>n</sup>.

**Jesús dii<sup>n</sup> chí nduuvā ye<sup>n</sup>e sa<sup>n</sup>ā chí ndíí cheechi ta'ā sa**  
(Mt. 12.9-14; Mr. 3.1-6)

<sup>6</sup>Táámá nguuvi sábadó chí ntaavi'tuunúú<sup>n</sup> 'ii<sup>n</sup>yā<sup>n</sup> Israel, Jesús mii<sup>n</sup> ní ndaa yā na yaācū sinagoga ní chí'cuee<sup>n</sup> yā 'ii<sup>n</sup>yā<sup>n</sup>. Míí<sup>n</sup> canee 'áámá sa<sup>n</sup>ā chí ntí'i ta'a sa ta cuaācú sa. <sup>7</sup>Maestros ye<sup>n</sup>e ley ndúucū 'ii<sup>n</sup>yā<sup>n</sup> fariseos ngeenu yā Jesús mii<sup>n</sup> caati ne<sup>n</sup>e yā n'diichi yā nduuti chí idií<sup>n</sup> Jesús chí nduuva ye<sup>n</sup>e sa nguuvi chí intaavi'tuunúú<sup>n</sup> yā, ní 'tíicā cuuvi caa<sup>n</sup>má<sup>n</sup> yā nuu<sup>n</sup>ndi ye<sup>n</sup>e Jesús mii<sup>n</sup>. <sup>8</sup>Naati Jesús mii<sup>n</sup> déenu yā ye<sup>n</sup>ē chí nadicádiinuu<sup>n</sup> 'ii<sup>n</sup>yā<sup>n</sup> ní ca<sup>n</sup>a yā chíi yā sa<sup>n</sup>a chí ntí'i 'áámá ta'ā sa: Díí sa<sup>n</sup>ā, nducuee<sup>n</sup> dí ní cuééndii di náávta<sup>n</sup>ā ye<sup>n</sup>e 'ii<sup>n</sup>yā<sup>n</sup> s'ee<sup>n</sup>. Sa<sup>n</sup>ā mii<sup>n</sup> ní cuééndii sa náávta<sup>n</sup>ā ye<sup>n</sup>e 'ii<sup>n</sup>yā<sup>n</sup> s'ee<sup>n</sup>. <sup>9</sup>Tuu'mi ní Jesús mii<sup>n</sup> ca<sup>n</sup>a yā chíi yā 'ii<sup>n</sup>yā<sup>n</sup> s'ee<sup>n</sup>: 'Úú intiinguuné<sup>n</sup> ndís'tií. ¿De'ē chí cuuvi dii<sup>n</sup> yú nguuvi chí ntaavi'tuunúú<sup>n</sup> 'ii<sup>n</sup>yā<sup>n</sup>? ¿'Áá dii<sup>n</sup> yú cosas chí n'daacā o cosas chí nguéé n'daacā? ¿'Áá n'daacā chí nangua<sup>n</sup>āi yú vida ye<sup>n</sup>e 'ii<sup>n</sup>yā<sup>n</sup> o 'caa<sup>n</sup>nu<sup>n</sup> yú 'ii<sup>n</sup>yā<sup>n</sup>?

<sup>10</sup>Jesús chíinu yā nducyaaca 'ii<sup>n</sup>yā<sup>n</sup> chí snéé yā cuaa<sup>n</sup> 'diitú yā ní ca<sup>n</sup>a yā chíi yā sa<sup>n</sup>ā: N'doo di ta'ā di. Sa<sup>n</sup>ā mii<sup>n</sup> ní n'doo ta'ā sa ní ta'ā sa míí<sup>n</sup> 'āā nduuvā ye<sup>n</sup>ē sa. <sup>11</sup>'Ii<sup>n</sup>yā<sup>n</sup> s'ee<sup>n</sup> ní n'duuvi taa<sup>n</sup> n'daí yā ní yaa'vi yā v'i: ¿D'Ée dii<sup>n</sup> yú chí cuuvi tun'daa yú nuu<sup>n</sup>ndi ye<sup>n</sup>e Jesús mii<sup>n</sup>?

**Jesús ndeεve yā ndu'u chí ndiichúví  
discípulos ye<sup>n</sup>e yā**

(Mt. 10.1-4; Mr. 3.13-19)

<sup>12</sup>Nguuvi s'ee<sup>n</sup> Jesús cue<sup>n</sup>e yā 'áámá yīcū chí caa<sup>n</sup>ma<sup>n</sup>ngua'á yā ní Jesús mii<sup>n</sup> ní núú<sup>n</sup>má<sup>n</sup> yaa<sup>n</sup> ca<sup>n</sup>angua'á yā. <sup>13</sup>Ní taachí chidεεve Jesús yaa<sup>n</sup>vi yā discípulos ye<sup>n</sup>e yā ní ndeεve yā ndiichúví 'ii<sup>n</sup>yā<sup>n</sup> ye<sup>n</sup>e nguua<sup>n</sup> discípulos s'uu<sup>n</sup> ní ca<sup>n</sup>a yā chí ndiichúví 'ii<sup>n</sup>yā<sup>n</sup> s'ee<sup>n</sup> chí apóstoles. <sup>14</sup>'Ii<sup>n</sup>yā<sup>n</sup> s'ee<sup>n</sup> ní 'túúcā nguuvi yā: Simón chí nguuvi ntúú<sup>n</sup> yā Pedro; ndúúcū Andrés chí 'dīinū Simón Pedro mii<sup>n</sup>, ndúúcū Jacobo, ndúúcū Juan, ndúúcū Felipe, ndúúcū Bartolomé, <sup>15</sup>ndúúcū Mateo, ndúúcū Tomás, ndúúcū Jacobo chí sa<sup>n</sup>a daiya Alfeo, ndúúcū Simón chí nguuvi sa Zelote, <sup>16</sup>ndúúcū Judas chí 'dīinū Jacobo ndúúcū Judas Iscariote chí cuayiivi chí<sup>n</sup>i sá du'ū chí Jesús mii<sup>n</sup> chí cuuvi 'caa<sup>n</sup>nú<sup>n</sup> yā 'yā.

**Jesús chí'cué<sup>n</sup> yā 'yaa<sup>n</sup> tááví 'ii<sup>n</sup>yā<sup>n</sup>**

(Mt. 4.23-25)

<sup>17</sup>Jesús nangua'ái yā ye<sup>n</sup>e yīicū mii<sup>n</sup> ndúúcū apóstoles ye<sup>n</sup>e yā ní ndúúcū n'deēe n'dái discípulos ye<sup>n</sup>e yā ní cue<sup>n</sup>e yā 'áámá yá<sup>n</sup>āa chí yúúdūu. Ní canee ntúú<sup>n</sup> nduucú yā n'deēe n'dái 'ii<sup>n</sup>yā<sup>n</sup> ye<sup>n</sup>e yá<sup>n</sup>āa Judea ndúúcū yāā<sup>n</sup> Jerusalén ní ye<sup>n</sup>e yāā<sup>n</sup> s'ee<sup>n</sup> 'diituú nuú<sup>n</sup>nī<sup>n</sup>yá<sup>n</sup>ā ní ye<sup>n</sup>e yá<sup>n</sup>āa Tiro ndúúcū yá<sup>n</sup>āa Sidón. 'Ii<sup>n</sup>yā<sup>n</sup> s'ee<sup>n</sup> ní 'āā ndāa yā chí 'caandiveé<sup>n</sup> yā ye<sup>n</sup>e chí ngí'cuee<sup>n</sup> Jesús mii<sup>n</sup>. Ní 'ii<sup>n</sup>yā<sup>n</sup> chí ngííta yā ne<sup>n</sup>e yā chí Jesús dii<sup>n</sup> chí nduūvā ye<sup>n</sup>e yā. <sup>18</sup>Ní 'ii<sup>n</sup>yā<sup>n</sup> chí snée yā ndúúcū espíritu ye<sup>n</sup>e yáá<sup>n</sup>nguiinū<sup>n</sup>

ní Jesús dii<sup>n</sup> yā chí nacan'dáá ye<sup>n</sup>e 'ii<sup>n</sup>yā<sup>n</sup> s'ee<sup>n</sup> ní ch'eenū chíi ye<sup>n</sup>e 'ii<sup>n</sup>yā<sup>n</sup> s'ee<sup>n</sup>. Ní 'ii<sup>n</sup>yā<sup>n</sup> s'ee<sup>n</sup> nduuvā ye<sup>n</sup>e yā. <sup>19</sup>Ní nducyáácá 'ii<sup>n</sup>yā<sup>n</sup> chí ngiitā ne<sup>n</sup>e yā tuu<sup>n</sup>vi yā Jesús mii<sup>n</sup> ti véé cá poder ye<sup>n</sup>e yā chí dii<sup>n</sup> yā chí nanduūvā ye<sup>n</sup>e yā.

**Ye<sup>n</sup>e vaadi yeenú ndúúcu ye<sup>n</sup>e chí  
nguée vaadi yeenú**

(Mt. 5.1-12)

<sup>20</sup>Tuu<sup>n</sup>mi ní Jesús n'diichí yā discípulos ye<sup>n</sup>e yā ní ca<sup>n</sup>a yā chíi yā 'ii<sup>n</sup>yā<sup>n</sup> s'ee<sup>n</sup>: D'éε chúúcā n'dai ndís'tií chí nguée d'ε vεε ye<sup>n</sup>e ní ti ye<sup>n</sup>e ndís'tií cuuví naachí Ndyuūs nga<sup>n</sup>a ntii<sup>n</sup>nyú<sup>n</sup> yā na va'ai ch'eti nguuvi.

<sup>21</sup>D'ε chúúcā n'dai ndís'tií chí 'cuee<sup>n</sup> cá ní libro ye<sup>n</sup>e Ndyuūs chí n'daācā ca canee staava ye<sup>n</sup>e ní. D'ε chúúcā n'dai ndís'tií chí maa<sup>n</sup> ní nngεεcu ní nanáá<sup>n</sup> Ndyuūs ti ne<sup>n</sup>e dí<sup>n</sup> ní nducué<sup>n</sup>e chí cuaacu ti Ndyuūs ya'āi 'iinú yā ndís'tií.

<sup>22</sup>D'ε chúúcā n'dai ndís'tií taachi 'ii<sup>n</sup>yā<sup>n</sup> ye<sup>n</sup>e i<sup>n</sup>'yee<sup>n</sup>dí 'cūū nguée cuuvi snaa<sup>n</sup> yā ndís'tií ní taachi 'ii<sup>n</sup>yā<sup>n</sup> s'ee<sup>n</sup> cuví yā ye<sup>n</sup>e ndís'tií. Ní cunncaā dí<sup>n</sup> yā ndúúcū ndís'tií. Ní 'āā ntéé ne<sup>n</sup>e yā 'caandiveé<sup>n</sup> yā chí duuchí ní. Caa<sup>n</sup>má<sup>n</sup> yā chí nguée n'daaca ndís'tií cucáāvā 'úú chí Sa<sup>n</sup>ā chí Daiyá Ndyuūs. <sup>23</sup>Ndís'tií canée chí yeenú n'dai ní ní nguuvi mii<sup>n</sup> cuuví yeenú n'dai ca ní caati Ndyuūs téε yā chí cuuvi ye<sup>n</sup>e ní dendu'ū chí ch'εεtε n'dai taachi ndaa ní na va'ai ch'eti nguuvi. Ti ndii cuáá<sup>n</sup> vmnaa<sup>n</sup> 'tiicá ntúū<sup>n</sup> idií<sup>n</sup> 'ii<sup>n</sup>yā<sup>n</sup> cosas chí nguée n'daācā ndúúcū 'ii<sup>n</sup>yā<sup>n</sup> profetas chí candée yā nduudu ye<sup>n</sup>e Ndyuūs.

<sup>24</sup>De'e chúucā ndaachii ye<sup>ne</sup>ē ndís'tiī chi véé cá ye<sup>ne</sup> e nī caati 'āā yeenú nī ye<sup>ne</sup> e nducue<sup>ne</sup>ē ye<sup>ne</sup> i<sup>ni</sup>ye<sup>ne</sup>dí 'cūū.

<sup>25</sup>De'e chúucā ndaachii ye<sup>ne</sup> e ndís'tiī chi nadacádíínuu<sup>n</sup> nī chí n'daācā canee nī nanáá<sup>n</sup> Dendyuūs ní nguéé n'giindiveé<sup>n</sup> nī nduudu ye<sup>ne</sup>é Ndyuūs ti cuayiivi naachi ne<sup>ne</sup>é nī 'caandiveé<sup>n</sup> nī ní nguéé cuuví 'caandiveé<sup>n</sup> nī. De'e chúucā ndaachii ye<sup>ne</sup> e ndís'tiī chi maa<sup>n</sup> ní n'gíí<sup>n</sup>nyu<sup>n</sup> nī ti cuayiivi ní cuēcú nī ti ndaāchii nī.

<sup>26</sup>De'e chúucā ndaachii ye<sup>ne</sup> e ndís'tiī taachi nducyaaca 'ii<sup>ni</sup>yā<sup>n</sup> caa<sup>n</sup>ma<sup>n</sup> n'daācā ye<sup>ne</sup> e nī. Caati ndíí cuáá<sup>n</sup> vmaaa<sup>n</sup> 'tíicā nga<sup>n</sup>a 'ii<sup>ni</sup>yā<sup>n</sup> ye<sup>ne</sup> e 'ii<sup>ni</sup>yā<sup>n</sup> profetas chi falso yā ní nguéé profetas ye<sup>ne</sup>é Ndyuūs, ní nguéé candēe yā nduudu ye<sup>ne</sup>é Ndyuūs.

**Dine<sup>ne</sup> e yú 'ii<sup>ni</sup>yā<sup>n</sup> chi taa<sup>n</sup> yā nduucú yú**

(Mt. 5.38-48; 7.12)

<sup>27</sup>Úú, Jesús, ní nga<sup>n</sup>á ngii ndís'tiī chi n'giindiveé<sup>n</sup> nī nduudu chi nga<sup>n</sup>á: Diné<sup>ne</sup> e ntúū<sup>n</sup> nī 'ii<sup>ni</sup>yā<sup>n</sup> 'áará chi taā<sup>n</sup> yā ye<sup>ne</sup> e nī. Ní dii<sup>n</sup> n'daacá nī ntúū<sup>n</sup> ndúucú 'ii<sup>ni</sup>yā<sup>n</sup> 'áará chi nguéé ne<sup>ne</sup> e yā ndís'tiī. <sup>28</sup>Di'viicú nī 'ii<sup>ni</sup>yā<sup>n</sup> 'áará chi ca<sup>n</sup>a cuncnáa yā ndúucu nī. Ní caa<sup>n</sup>ma<sup>n</sup>ngua<sup>a</sup> nī caavā 'ii<sup>ni</sup>yā<sup>n</sup> 'áará chi nguéé n'daacā díí<sup>n</sup> yā ndúucu nī. <sup>29</sup>Nduuti chi 'áamá 'ii<sup>ni</sup>yā<sup>n</sup> duuchinee<sup>n</sup> yā ye<sup>ne</sup> e nī ní n'ge<sup>ne</sup> e yā 'áamá tiicuaa náa<sup>n</sup> nī, 'cuú<sup>n</sup> nī chí díí<sup>n</sup> yā táámá vmné<sup>ne</sup>ēe nduuti chí ne<sup>ne</sup>é yā. 'Ii<sup>ni</sup>yā<sup>n</sup> chí divíí yā cotón ye<sup>ne</sup> e nī, ca'ā ntúū<sup>n</sup> nī catecai nī. <sup>30</sup>Āā du'ú nūu<sup>n</sup> 'ii<sup>ni</sup>yā<sup>n</sup> chí caaca yā cosa ye<sup>ne</sup>é nī

caavā necesidades ye<sup>ne</sup> e yā, ca'á nī. 'Ii<sup>ni</sup>yā<sup>n</sup> chí cuta'á yā chí ye<sup>ne</sup> e nī, 'āā ntéé nguēcunéé nī ndaaca nī. <sup>31</sup>Tan'dúucā chí ndís'tiī ne<sup>ne</sup> e nī chí taná<sup>n</sup>ā sa<sup>n</sup>ā mií<sup>n</sup> n'daacā dii<sup>n</sup> sa nduucú nī, 'tiicá ntúū<sup>n</sup> dii<sup>n</sup> ndís'tiī ndúucú sa<sup>n</sup>ā s'ee<sup>n</sup>.

<sup>32</sup>Ndúúti chí ndís'tiī diné<sup>ne</sup> e nī 'ii<sup>ni</sup>yā<sup>n</sup> chí ne<sup>ne</sup> e ndís'tiī, 'dédé chí n'daacā idií<sup>n</sup> nī? Caati 'ii<sup>ni</sup>yā<sup>n</sup> chí nguéé n'daacā, 'tiicá ntúū<sup>n</sup> idií<sup>n</sup> yā. <sup>33</sup>Ndúúti chí ndís'tiī n'daacā idií<sup>n</sup> nī ndúucú 'ii<sup>ni</sup>yā<sup>n</sup> chí din'daacā nduucú nī, 'dédé chí n'daacā idií<sup>n</sup> nī? Caati 'ii<sup>ni</sup>yā<sup>n</sup> chí nguéé n'daacā, 'tiicá ntúū<sup>n</sup> idií<sup>n</sup> yā. <sup>34</sup>Tiicá ntúū<sup>n</sup>, nduuti chí díí<sup>n</sup> nī prestar chíi<sup>n</sup> chí ye<sup>ne</sup>é nī 'ii<sup>ni</sup>yā<sup>n</sup> ní cunee ngiinú nī chí 'ii<sup>ni</sup>yā<sup>n</sup> mií<sup>n</sup> ca<sup>n</sup>á yā tee yā chíi<sup>n</sup> chí ye<sup>ne</sup>é nī, 'dédé cuuvi chí 'ii<sup>ni</sup>yā<sup>n</sup> téé yā gracias ndís'tiī? 'Tiicá ntúū<sup>n</sup> idií<sup>n</sup> 'ii<sup>ni</sup>yā<sup>n</sup> chí nguēe n'daacā. <sup>35</sup>Ndís'tiī dine<sup>ne</sup> e nī 'ii<sup>ni</sup>yā<sup>n</sup> s'ee<sup>n</sup> chí taá<sup>n</sup> yā ye<sup>ne</sup> e nī. 'Tíicā din'daacá nī ndúucú 'ii<sup>ni</sup>yā<sup>n</sup> chí nguéé ngii n'diichí yā ndís'tiī. Díí<sup>n</sup> nī prestar cosa chí ye<sup>ne</sup>é nī ní nguéé de'e vee nadacadiinuu<sup>n</sup> cá nī ye<sup>ne</sup>é. Ní Ndyuūs téé yā ndís'tiī cosas chí dendu'ū chí ch'ēete ca ye<sup>ne</sup>é yā taachi ca<sup>n</sup>a nī na va'ai ch'ēeti nguuvi ní cuuví ndís'tiī daiyá Dendyuūs chí ch'ēete taavi ca. 'Tíicā Ndyuūs téé yā cosas chí n'daacā 'ii<sup>ni</sup>yā<sup>n</sup> chí cuncnáa chí nguéé caa<sup>n</sup>ma<sup>n</sup> yā: N'dii Ndyuūs gracias. <sup>36</sup>Tiicá ntúū<sup>n</sup> yá'ai 'iinú nī cáava 'ii<sup>ni</sup>yā<sup>n</sup> tan'dúucā Chiidá nī Ndyuūs ya'ái 'iinú yā ndís'tiī.

**Nguéé caa<sup>n</sup>ma<sup>n</sup> nī nuu<sup>n</sup>ndi ye<sup>ne</sup> e mar 'áámá 'ii<sup>ni</sup>yā<sup>n</sup>**

(Mt. 7.1-5)

<sup>37</sup>Nguéé caa<sup>n</sup>ma<sup>n</sup> nī nuu<sup>n</sup>ndi ye<sup>ne</sup>é 'ii<sup>ni</sup>yā<sup>n</sup> ní Ndyuūs ní nguéé

caa<sup>m</sup>ma<sup>n</sup> ntúu<sup>n</sup> yā ye<sup>n</sup>é nī. Nguéé díí<sup>n</sup> nī condenar 'ii<sup>n</sup>yā<sup>n</sup> ní Ndyuūs nguéé díí<sup>n</sup> yā condenar ndís'tiī. Nadich'εεcú nī nuu<sup>n</sup>ndi ye<sup>n</sup>e 'ii<sup>n</sup>yā<sup>n</sup> ní Ndyuūs nadich'εεcú yā nuu<sup>n</sup>ndi ye<sup>n</sup>e nī. <sup>38</sup>Ca'á n'daacá nī 'ii<sup>n</sup>yā<sup>n</sup> chí véé necesidades ye<sup>n</sup>é yā ní 'íícú Ndyuūs téé yā ndís'tiī ní dicaadi n'dááca yā chí cúúnú chíichi ndíí tuunu cungéé na morral ye<sup>n</sup>é nī, caati Ndyuūs dicaadi yā ndís'tiī ndúúcū maa<sup>n</sup> caadi chí dicaadi nī.

<sup>39</sup>Jesús ngii yā 'ii<sup>n</sup>yā<sup>n</sup> s'ee<sup>n</sup> 'áámá ejemplo ye<sup>n</sup>e 'áámá nduudu chí 'téé nguεε daama. ¿'Áá cúúví díí<sup>n</sup> 'áámá chí ngeuenáá<sup>n</sup> candēē táámá chí ngeuenáá<sup>n</sup>? ¿'Áá nguεε cun'dáá nūu<sup>n</sup> nduu 'uuví yā na yiivi yá<sup>n</sup>'áa? <sup>40</sup>'Áámá discípulo mii<sup>n</sup> ní nguéé ch'εete cá yā nguéé ti maestro ye<sup>n</sup>e yā. 'Áā du'ú nūu<sup>n</sup> chí ne<sup>n</sup>e cuuvi Maestro, canee chí 'cuiinu 'cuee<sup>n</sup> yā din'daaca yā ní cuuví yā tan'dúúca maestro ye<sup>n</sup>e yā.

<sup>41</sup>Táácā cuuví chí maa<sup>n</sup> nch'εeté nūu<sup>n</sup> n'gíínu nī nuu<sup>n</sup>ndi chí díí<sup>n</sup> taná<sup>n</sup>'ā 'ii<sup>n</sup>yā<sup>n</sup> ní nguéé inaa<sup>n</sup> nī nuu<sup>n</sup>ndi ch'εete chí díí<sup>n</sup> nī. <sup>42</sup>Nguéé n'daacā chí caa<sup>m</sup>ma<sup>n</sup> nī 'ii<sup>n</sup>yā<sup>n</sup> ye<sup>n</sup>e chí díí<sup>n</sup> yā chí nguéé n'daacā nduuti chí ndís'tiī díí<sup>n</sup> nī cosas chí nguεε n'daacā. N'daacā ca chí ndaacadaamí nī ye<sup>n</sup>e nuu<sup>n</sup>ndi chí díí<sup>n</sup> nī ní 'íícú cuuvi caa<sup>m</sup>ma<sup>n</sup> nī ye<sup>n</sup>e 'ii<sup>n</sup>yā<sup>n</sup> chí canéé chí din'daacá yā.

**'Áámá yá<sup>n</sup>'á ní ngí<sup>n</sup>'í cucáávā n'gui'i ye<sup>n</sup>é**

(Mt. 7.17-20; 12.34-35)

<sup>43</sup>N'gui'i ye<sup>n</sup>e yá<sup>n</sup>'á chí n'dai, n'daacā chí cuuví n'gui'i ye<sup>n</sup>é ní yá<sup>n</sup>'á chí nguéé n'dai ní nguéé

n'daacā n'gui'i ye<sup>n</sup>é. Naati yá<sup>n</sup>'á chí nguéé n'daacā nguéé cuuvi n'gui'i chí n'daacā ye<sup>n</sup>é. <sup>44</sup>Tíicā ti tuunu tuunu ca yá<sup>n</sup>'á n'gi<sup>n</sup>'i n'gui'i ye<sup>n</sup>é. Nguéé n'giichi yā yaa<sup>n</sup> chí 'cuúndi n'guúdíi yaa<sup>n</sup> nguuvi ye<sup>n</sup>é, ndíí nguéé ndúú tuū<sup>n</sup>má yā uvas ye<sup>n</sup>é díi'yu nduuti yaa<sup>n</sup>. <sup>45</sup>Tiicá ntúū<sup>n</sup> sa<sup>n</sup>'ā chí n'dai idii<sup>n</sup> sa dendu'ú chí n'daacā chí nadacadíínuu<sup>n</sup> sa na staava ye<sup>n</sup>é sa chí n'daacā. Sa<sup>n</sup>'ā chí cunncaā idii<sup>n</sup> sa tanducué<sup>n</sup>é chí nadacadíínuu<sup>n</sup> sa na staava ye<sup>n</sup>é sa caati staava ye<sup>n</sup>é sa nguéé n'daacā. Nduudu chí nga<sup>n</sup>'ā sa ngiica ye<sup>n</sup>e chí ndiituu na staava ye<sup>n</sup>é sa.

**Ye<sup>n</sup>é ndúú 'uúví cimientos ye<sup>n</sup>é nduu 'uuvi va'āi**

(Mt. 7.24-27)

<sup>46</sup>Ca<sup>n</sup>'a ntúū<sup>n</sup> Jesús: ¿De'e cúúví chí ndís'tiī nga<sup>n</sup>'á nī ngii<sup>n</sup> nī 'úú: N'dii, Señor ye<sup>n</sup>é, n'dii, Señor ye<sup>n</sup>é, ní nguéé 'caandiveé<sup>n</sup> nī chí nga<sup>n</sup>'á? <sup>47</sup>'Úú cuuví ndís'tiī, du'ú 'ii<sup>n</sup>yā<sup>n</sup> chí chíi nanaá<sup>n</sup> ní n'giindiveé<sup>n</sup> nduudu ye<sup>n</sup>é ní n'daacā idii<sup>n</sup> yā tan'dúúca chí nga<sup>n</sup>'á, <sup>48</sup>'ii<sup>n</sup>yā<sup>n</sup> mii<sup>n</sup> tan'dúúca 'áámá sa<sup>n</sup>'ā chí din'dái sa vaacu sá. Chiinú yáanūu<sup>n</sup> n'daacā sá ní s'nūū<sup>n</sup> sa cimientos ye<sup>n</sup>é vmnaa<sup>n</sup> 'áámá yáává. Ní taachi chíiya 'áámá cuuvi na<sup>n</sup>'ā ní ch'iita yíicú ní díitūu n'dái che<sup>n</sup>é nuū<sup>n</sup>nī<sup>n</sup> mii<sup>n</sup>. Ní nuū<sup>n</sup>nī<sup>n</sup> mii<sup>n</sup> nguéé cuuvi díi<sup>n</sup> di'nú<sup>n</sup>'u va'āi mii<sup>n</sup> tí n'daacā candúúu na yáává mii<sup>n</sup>. <sup>49</sup>Naati 'ii<sup>n</sup>yā<sup>n</sup> chí nguéé ch'iindiveé<sup>n</sup> yā nduudu ye<sup>n</sup>é ní nguéé idii<sup>n</sup> yā tan'dúúca chí nga<sup>n</sup>'á 'ii<sup>n</sup>yā<sup>n</sup> mii<sup>n</sup> tan'dúúca 'áámá sa<sup>n</sup>'ā chí din'dái sa vaacu sa na ya<sup>n</sup>'á ndúútii ní nguéé ndúúcū cimientos. Ní díitūu n'dai che<sup>n</sup>é nuū<sup>n</sup>nī<sup>n</sup> mii<sup>n</sup> ní va'āi

mii<sup>n</sup> maa<sup>n</sup> nch'eté nū<sup>n</sup> chindēve ní cunncaā ntuūvi va'āi mii<sup>n</sup>.

**Jesús idí<sup>n</sup> yā chi nduuvā ye<sup>n</sup>e 'áámá mozo ye<sup>n</sup>e capitán romano**

(Mt. 8.5-13)

**7** Taachí Jesús ch'íínú ngi'cuee<sup>n</sup> yā 'ii<sup>n</sup>yā<sup>n</sup>, tuu'mi ní cue<sup>n</sup>'é yā na yaā<sup>n</sup> Capernaum. <sup>2</sup>Ná yāā<sup>n</sup> mii<sup>n</sup>ya canéé 'áámá sa<sup>n</sup>ā capitán romano ye<sup>n</sup>e soldados. Ní na vaacu capitán mii<sup>n</sup> cánéé 'áámá sa<sup>n</sup>ā mozo chi idii<sup>n</sup> mandado ye<sup>n</sup>e sa. Néené ne<sup>n</sup>e sa mozo ye<sup>n</sup>e sa ni néené ya'āi 'iinu sa ti mozo ní neené ya'āi ngítā sa. 'Āā cháā 'cuūvi sa. <sup>3</sup>Taachi capitán mii<sup>n</sup> ch'iindivee<sup>n</sup> sa chi Jesús mii<sup>n</sup> díí<sup>n</sup> yā vaadi n'giinu, capitán mii<sup>n</sup> dicho'o sa n'dúúví 'ii<sup>n</sup>yā<sup>n</sup> Israel chi caa<sup>n</sup>ma<sup>n</sup> ntii<sup>n</sup>nyú<sup>n</sup> yā na yaacū ye<sup>n</sup>e 'ii<sup>n</sup>yā<sup>n</sup> Israel chi 'ii<sup>n</sup>yā<sup>n</sup> s'ee<sup>n</sup> di'cuíftu yā Jesús mii<sup>n</sup> chi ca<sup>n</sup>a yā na vaacu sa ní díí<sup>n</sup> yā chi nduūvā ye<sup>n</sup>e mozo ye<sup>n</sup>e sa. <sup>4</sup>'Ii<sup>n</sup>yā<sup>n</sup> s'ee<sup>n</sup> cue<sup>n</sup>'e yā nanáá<sup>n</sup> Jesús mii<sup>n</sup>. Ní di'cuíftu yā Jesús, ní ca<sup>n</sup>a yā chii yā 'ii<sup>n</sup>yā<sup>n</sup>: N'dií Jesús, 'caandivee<sup>n</sup> nī caati capitán ye<sup>n</sup>e 'nū ní neené n'dai yā chi díí<sup>n</sup> nī chí nduūvā ye<sup>n</sup>e mozo ye<sup>n</sup>e yā. <sup>5</sup>Caati capitán romano mii<sup>n</sup> ní idiné<sup>n</sup>e yā 'ii<sup>n</sup>yā<sup>n</sup> ye<sup>n</sup>e yú chi ye<sup>n</sup>e ndaata Israel, ní din'dái yā yáacū sinagoga ye<sup>n</sup>e yú.

<sup>6</sup>Tuu'mi ní Jesús mii<sup>n</sup> cue<sup>n</sup>'e yā ndúúcū 'ii<sup>n</sup>yā<sup>n</sup> s'ee<sup>n</sup>. Ní taachi 'āā cháā ndaa nii<sup>n</sup>nuú<sup>n</sup> yā ná va'ai ye<sup>n</sup>e sa, capitán mii<sup>n</sup> dicho'o sa n'duuví amigos ye<sup>n</sup>e sa chi caa<sup>n</sup>ma<sup>n</sup> yā cuuvi yā Jesús mii<sup>n</sup>: N'dií, Señor, nguéé tuuviínú<sup>n</sup> nī ti 'úú nguéé neené n'dai 'úú chi cundaa nī chēeti va'ai ye<sup>n</sup>e. <sup>7</sup>Maa<sup>n</sup> ní deenú

chi mar 'áámá 'ii<sup>n</sup>yā<sup>n</sup> ní neené n'dai chi cuuvi ndaa nanáa<sup>n</sup> nī. Dámaā<sup>n</sup> chi caa<sup>n</sup>ma<sup>n</sup> ntii<sup>n</sup>nyu<sup>n</sup> núú<sup>n</sup> nī ní nduūvā ye<sup>n</sup>e mozo chi díí<sup>n</sup> mandado ye<sup>n</sup>e. <sup>8</sup>'Āā dē'e nuū<sup>n</sup> chi caa<sup>n</sup>ma<sup>n</sup> ntii<sup>n</sup>nyú<sup>n</sup> nī ye<sup>n</sup>e tuu'mi ní cuuvi chó'oo. 'Tiicá ntúū<sup>n</sup> 'úú ní véé 'ii<sup>n</sup>yā<sup>n</sup> chí nga<sup>n</sup>a ntii<sup>n</sup>nyú<sup>n</sup> yā ye<sup>n</sup>e. 'Úú ní capitán ní nga<sup>n</sup>a ntii<sup>n</sup>nyú<sup>n</sup> ye<sup>n</sup>e soldados chi canee maa<sup>n</sup> poder ye<sup>n</sup>e. Nga<sup>n</sup>'á ngií 'áámá sa: Cuna<sup>n</sup>a di, ní ina<sup>n</sup>a sa. Ní nga<sup>n</sup>'á ngií taama sa: Cuchíi di, ní chii sa. Ní nga<sup>n</sup>'á ngií mozo chi díí<sup>n</sup> mandado ye<sup>n</sup>e: Díí<sup>n</sup> di ntii<sup>n</sup>nyú<sup>n</sup> cūū, ní díí<sup>n</sup> sa.

<sup>9</sup>Ní taachí Jesús ch'iindivee<sup>n</sup> yā nduudu ye<sup>n</sup>e sa chi nga<sup>n</sup>a amigos ye<sup>n</sup>e capitán mii<sup>n</sup> ché<sup>n</sup>'é yiinu yā ye<sup>n</sup>e capitán. Ní nguεεcundíi yā n'diichi yā 'ii<sup>n</sup>yā<sup>n</sup> chi snée yā cuaa<sup>n</sup> daami yā ní ca<sup>n</sup>a yā. 'Úú ní nga<sup>n</sup>'á ngií ndís'tií: 'Úú nguéé indaacá mar 'áámá 'ii<sup>n</sup>yā<sup>n</sup> ye<sup>n</sup>e ndaata Israel chi i'teenú n'dai cá yā Nduyūs tan'dúúca capitán mii<sup>n</sup>.

<sup>10</sup>Taachí ndaa 'ii<sup>n</sup>yā<sup>n</sup> s'ee<sup>n</sup> va'ai chi capitán mii<sup>n</sup> dicho'o sa, 'ii<sup>n</sup>yā<sup>n</sup> s'ee<sup>n</sup> n'diichí yā chí mozo mii<sup>n</sup> chí néené ngífta sa ní 'āā nduuvá ye<sup>n</sup>e sa.

**Jesús nadanduuchí yā daiya 'áámá n'daata nguá'āa chi 'āā tiná<sup>n</sup>ā sa**

<sup>11</sup>Cuayivi, Jesús mii<sup>n</sup> che<sup>n</sup>'e yā na yāā<sup>n</sup> Naín ndúúcu discípulos ye<sup>n</sup>e yā ndúúcu 'yaa<sup>n</sup> n'dái 'ii<sup>n</sup>yā<sup>n</sup> chí cue<sup>n</sup>'e ndúúcu yā. Ní chúú chíi.

<sup>12</sup>Taachí Jesús ndaa yā nii<sup>n</sup>nuú<sup>n</sup> ná cheendi va'āi ye<sup>n</sup>e yaā<sup>n</sup> mii<sup>n</sup>, n'diichí yā chí ndē' 'ii<sup>n</sup>yā<sup>n</sup> 'áámá caja tiná<sup>n</sup>ā canuú<sup>n</sup> yúúní chí cue<sup>n</sup>'e yā cuēchi yā. Tiná<sup>n</sup>ā mii<sup>n</sup> 'áámá n'dyá<sup>n</sup>ā sa ye<sup>n</sup>e chēecú sá. Ní

n'daata mii<sup>n</sup> ní n'daataá ngua'a yā. Ní neené 'yaa<sup>n</sup> 'ii<sup>n</sup>'yā<sup>n</sup> ye<sup>n</sup>e yáá<sup>n</sup> mii<sup>n</sup> snee yā ndúúcu yā. <sup>13</sup>Taachí Jesús n'diichi yā n'daataá mii<sup>n</sup>, néené ya'ai 'iinú yā n'daataá ní ca<sup>n</sup>'a yā chii yā n'daataá mii<sup>n</sup>: Nguéé cueécú di.

<sup>14</sup>Tuu'mi ní Jesús mii<sup>n</sup> ní cue<sup>n</sup>'e ndaa yā ní tuu'ví yā caja ye<sup>n</sup>e tina<sup>n</sup>'ā. Ní 'ii<sup>n</sup>'yā<sup>n</sup> chi ndéé yā caja mii<sup>n</sup> ch'εetindii yā. Ní Jesús ca<sup>n</sup>'a yā: Sa<sup>n</sup>'ā 'díí<sup>n</sup> 'úú yaa'ví dii, nducuee<sup>n</sup> di.

<sup>15</sup>Tuu'mi ní 'nuū<sup>n</sup>ndi sa<sup>n</sup>'ā 'díí<sup>n</sup> chi n'dii ní tucá'a sa ndeē sa. Ní Jesús mii<sup>n</sup> ní nca'á yā sa<sup>n</sup>'a 'díí<sup>n</sup> chεecu sa. <sup>16</sup>Nducyaaca 'ii<sup>n</sup>'yā<sup>n</sup> di'va'á yā ye<sup>n</sup>'e chi n'diichi yā ní ca<sup>n</sup>'a yā: De'ē chúúcā ch'εete Ndyuūs. Ní ca<sup>n</sup>'a yā chi 'áámá profeta ch'εete ndāa yā nguaa<sup>n</sup> nús'uu chí Ndyuūs dichó'ó yā caati ya'ai 'iinú yā ye<sup>n</sup>'e s'uuú<sup>n</sup> chi nación ye<sup>n</sup>'é yā.

<sup>17</sup>Tíicā nga<sup>n</sup>'a 'ii<sup>n</sup>'yā<sup>n</sup> s'ee<sup>n</sup> ye<sup>n</sup>'e Jesús mii<sup>n</sup>. Ní ca<sup>n</sup>'a yā chuū núú<sup>n</sup>má<sup>n</sup> na yá<sup>n</sup>'āa Judea ndúúcu nuu<sup>n</sup>má<sup>n</sup> yáá<sup>n</sup> cuaa<sup>n</sup> 'diituú.

**Juan chi ngeedínuū<sup>n</sup>ní<sup>n</sup> dichó'ó yā nduu 'uuvi 'ii<sup>n</sup>'yā<sup>n</sup> nanáá<sup>n</sup> Jesús**

(Mt. 11.2-19)

<sup>18</sup>Discípulos ye<sup>n</sup>'e Juan chi ngeedínuū<sup>n</sup>ní<sup>n</sup> ca<sup>n</sup>'a yā chii yā Juan mii<sup>n</sup> ye<sup>n</sup>'é tanducué<sup>n</sup>'ē dendu'ú chi dii<sup>n</sup> Jesús. Tuu'mí Juan mii<sup>n</sup> yaa'vi yā 'uuvi discípulos ye<sup>n</sup>'e yā nanáá<sup>n</sup> yā. <sup>19</sup>Ní dichó'ó yā discípulos s'ee<sup>n</sup> chí ntinguunee<sup>n</sup> yā Jesús mii<sup>n</sup> chuū: ¿Áá n'dií Cristo chí canéé chí ndaā o 'āā cūnee ngíínú 'nū taama yā? <sup>20</sup>Discípulos ye<sup>n</sup>'e Juan mii<sup>n</sup> cue<sup>n</sup>'e yā ní ndaá yā nanáá<sup>n</sup> Jesús mii<sup>n</sup> ní ca<sup>n</sup>'a yā chii yā Jesús: N'dií Señor, Juan chí ngeedínuū<sup>n</sup>ní<sup>n</sup>

dichó'ó yā nús'uu chí ntíngúúnee<sup>n</sup> 'nū n'dií: ¿Áá n'dií chí canéé chí ndaā o 'āā cūnee ngíínú 'nū taama yā?

<sup>21</sup>Tiempo mii<sup>n</sup> Jesús díí<sup>n</sup> yā chi nnduūvā ye<sup>n</sup>'e 'yaa<sup>n</sup> n'dai 'ii<sup>n</sup>'yā<sup>n</sup> ye<sup>n</sup>'e ca'ai chí ndíí yā ní ye<sup>n</sup>'e ca'ai chí véé espíritu ye<sup>n</sup>'e yáá<sup>n</sup>'n'guiinū<sup>n</sup> ndúúcu yā. 'Tiicá ntúū<sup>n</sup> díí<sup>n</sup> yā chí snaa<sup>n</sup> 'ii<sup>n</sup>'yā<sup>n</sup> chí ngeenaá<sup>n</sup>.

<sup>22</sup>Tuu'mi Jesús nán'ngueécúta<sup>n</sup>'a yā ye<sup>n</sup>'e nduu 'uuvi discípulos ye<sup>n</sup>'e Juan mii<sup>n</sup> ní ca<sup>n</sup>'a yā: Ndí's'tií, cuna<sup>n</sup>'a nī ní cuuvi nī Juan mii<sup>n</sup> ye<sup>n</sup>'e nducué<sup>n</sup>'ē chí n'diichi nī ndúúcu chí n'giindiveé<sup>n</sup> nī. 'Ii<sup>n</sup>'yā<sup>n</sup> chí ngeenaáá<sup>n</sup> ní inaa<sup>n</sup> yā, 'ii<sup>n</sup>'yā<sup>n</sup> chí nguéé ngii ngíicá yā ní ngiica yā, 'ii<sup>n</sup>'yā<sup>n</sup> chí ndíí ca'ai chí lepra chí in'duuti yuūtē ye<sup>n</sup>'é yā ní nduuva ye<sup>n</sup>'é yā, 'ii<sup>n</sup>'yā<sup>n</sup> chí chεetúū ní n'giindiveé<sup>n</sup> yā, 'ii<sup>n</sup>'yā<sup>n</sup> chí n'díí ní nnduuchí yā ye<sup>n</sup>'e nguaa<sup>n</sup> tiná<sup>n</sup>'ā, ní 'ii<sup>n</sup>'yā<sup>n</sup> chí ndaachí snee yā 'úú ní nga<sup>n</sup>'á nanáá<sup>n</sup> yā nduudu ye<sup>n</sup>'é Ndyuūs, nduudu ngai chí ye<sup>n</sup>'e chí nangua<sup>n</sup>'āi 'ii<sup>n</sup>'yā<sup>n</sup>. <sup>23</sup>De'ē chúúcā n'dai 'ii<sup>n</sup>'yā<sup>n</sup> chí nguéé cunncaā ch'eenú yā 'úú ndúúcu nduudu ye<sup>n</sup>'é.

<sup>24</sup>Taachi cue<sup>n</sup>'e discípulos ye<sup>n</sup>'e Juan chí dichó'ó Juan mii<sup>n</sup>, tuu'mi ní Jesús tucá'a yā ca<sup>n</sup>'a yā chii yā 'ii<sup>n</sup>'yā<sup>n</sup> chí snee yā ndúúcu yā ye<sup>n</sup>'e Juan chí ngeedínuū<sup>n</sup>ní<sup>n</sup> mii<sup>n</sup>: ¿De'ε che<sup>n</sup>'e nī n'diichi nī na yá<sup>n</sup>'āa cuu<sup>n</sup>'ma<sup>n</sup> naachi nguéé ch'εetinéé 'ii<sup>n</sup>'yā<sup>n</sup>? ¿Áá 'áámá ndúú chí idin'nú<sup>n</sup>'u yúúné? Nguée 'tíicā. <sup>25</sup>¿Du'ú che<sup>n</sup>'e nī n'diichi nī tuu'mi? ¿Áá 'aama sa<sup>n</sup>'ā chí canú<sup>n</sup>' sa catecai n'dai sa? Deenu nī chí 'ii<sup>n</sup>'yā<sup>n</sup> chí n'daācā catecai yā nguéé n'geenu yā ngii ní snée yā na va'ai

ye<sup>n</sup>ē rey. <sup>26</sup>¿Du'ú che<sup>n</sup>é nī n'diichí ni tuu'mi? ¿Áá 'áámá profeta chí nga<sup>n</sup>a nduudu cuaacu ye<sup>n</sup>é Ndyuūs? 'Úú ní nga<sup>n</sup>á ngíí ndís'tií chí 'tíicā. Che<sup>n</sup>é nī n'diichí nī 'áámá 'ii<sup>n</sup>yā<sup>n</sup> ch'ēete ca yā nguéé ti taná<sup>n</sup>ā profetas. <sup>27</sup>Chuū canéé nguū<sup>n</sup> ye<sup>n</sup>e Juan mii<sup>n</sup> na libro ye<sup>n</sup>é Ndyuūs ndii cuáá<sup>n</sup> vmaaa<sup>n</sup>:

Cun'diichí nī. 'Úú ní dicho'ó 'áámá sa<sup>n</sup>ā chi caa<sup>n</sup>ma<sup>n</sup> sā nduudu cuaacu ye<sup>n</sup>é nanáá<sup>n</sup> dii. Ní sa<sup>n</sup>ā mii<sup>n</sup> ní 'cuundiyaá<sup>n</sup> sa yúúni cáávā dii.

<sup>28</sup>'Úú ní nga<sup>n</sup>á ngíí ndís'tií chi nguaa<sup>n</sup> nducyaaca sa<sup>n</sup>ā chi ch'iindiyā<sup>n</sup> sa na i<sup>n</sup>yee<sup>n</sup>dí 'cūū nguéé táámá sa<sup>n</sup>ā chí ch'ēete ca sa ti 'āā Juan mii<sup>n</sup> chí ch'ēedínuū<sup>n</sup>nī<sup>n</sup> sa. Naati 'ii<sup>n</sup>yā<sup>n</sup> chí ndiicuú<sup>n</sup> ca yā naachí Ndyuūs nga<sup>n</sup>a nti<sup>n</sup>nyú<sup>n</sup> yā ní ch'ēete cá yā nguéé ti Juan mii<sup>n</sup>.

<sup>29</sup>Neené n'dai 'ii<sup>n</sup>yā<sup>n</sup> ndúúcu 'ii<sup>n</sup>yā<sup>n</sup> chí inn'guee ye<sup>n</sup>é yá<sup>n</sup>āa ch'iindiveé<sup>n</sup> yā nduudu chí nga<sup>n</sup>a Jesús. Ní 'ii<sup>n</sup>yā<sup>n</sup> s'ee<sup>n</sup> chí'téenu yā nduudu ye<sup>n</sup>e Juan mii<sup>n</sup> ní dí<sup>n</sup> yā tan'duucā Ndyuūs ne<sup>n</sup>e yā. Ní Juan mii<sup>n</sup> ch'ēedínuū<sup>n</sup>nī<sup>n</sup> yā 'ii<sup>n</sup>yā<sup>n</sup>. <sup>30</sup>Naati 'ii<sup>n</sup>yā<sup>n</sup> fariseos mii<sup>n</sup> ndúúcu maestros ye<sup>n</sup>e ley, 'ii<sup>n</sup>yā<sup>n</sup> s'ee<sup>n</sup> nguéé ne<sup>n</sup>e yā Juan ndíí nguéé s'téenu yā nduudu ye<sup>n</sup>e Juan mii<sup>n</sup>. Ní nguéé ch'ēedínuū<sup>n</sup>nī<sup>n</sup> yā. <sup>31</sup>Jesús mii<sup>n</sup> ca<sup>n</sup>a yā chíi yā 'ii<sup>n</sup>yā<sup>n</sup>: ¿D'ēē cuuví nadidaamá ndúucu tan'dúúca 'ii<sup>n</sup>yā<sup>n</sup> chí snéé yā na i<sup>n</sup>yee<sup>n</sup>dí 'cūū maa<sup>n</sup>? ¿D'e'ē tan'duucá yā? <sup>32</sup>'ii<sup>n</sup>yā<sup>n</sup> s'ee<sup>n</sup> tan'dúúca sa<sup>n</sup>ā ngaiyāá chí n'gēēte sa nii'vēē ní duūchí sa ndúúcu vi'i ní ngai sa compañeros ye<sup>n</sup>e sa. Ní nga<sup>n</sup>á sa ngii sa vi'i: Tiiví 'nū flauta cáávā baile ní nguéé

nde'éi nī. Ngiita 'nū canciones chí ndaachií ní nguéé ch'ēecu nī. <sup>33</sup>Ní ndaā Juan chí ngeedínuū<sup>n</sup>nī<sup>n</sup> chí 'aama 'ii<sup>n</sup>yā<sup>n</sup> chí nguéé che'e yā pan ní nguéé chí'i yā vino ní ndís'tií ní nga<sup>n</sup>a nī ye<sup>n</sup>e yā: Juan mii<sup>n</sup> ní cánée yā ndúúcu espíritu ye<sup>n</sup>e yáá<sup>n</sup>'nguiinū<sup>n</sup>. <sup>34</sup>'Úú ní ndaá, 'úú Sa<sup>n</sup>ā chí Daiya Dendyuūs 'úú. Ní nge'é ní ngí'í ní ndís'tií nga<sup>n</sup>a nī ye<sup>n</sup>e 'úú: 'Cuin'díichí nī, 'ii<sup>n</sup>yā<sup>n</sup> chí n'deēe nge'é yā ní yaā<sup>n</sup> n'dáí ngí'í taaví yā vino. Ní nga<sup>n</sup>a ntuú<sup>n</sup> nī chí 'úú 'áámá amigo ye<sup>n</sup>e 'ii<sup>n</sup>yā<sup>n</sup> chí inn'guee ye<sup>n</sup>e yá<sup>n</sup>āa ndúúcu 'ii<sup>n</sup>yā<sup>n</sup> chí dii<sup>n</sup> nuu<sup>n</sup>ndi. <sup>35</sup>Caati nducyaaca 'ii<sup>n</sup>yā<sup>n</sup> deenu yā chí vaadī deenu mii<sup>n</sup> ní ye<sup>n</sup>e Ndyuūs. Ní 'ii<sup>n</sup>yā<sup>n</sup> chí'i'í yā vaadī deenu mii<sup>n</sup> cáávā dendu'ū chí n'daācā chí dí<sup>n</sup> yā ti ye<sup>n</sup>e Ndyuūs 'ii<sup>n</sup>yā<sup>n</sup>.

**Jesús cue<sup>n</sup>e yā na vaacu**

**Simón chí sa<sup>n</sup>ā fariseo**

<sup>36</sup>'Áámá sa<sup>n</sup>ā fariseo di'cuítu sa Jesús chí ch'éé yā ná váacu sá. Tuu'mi ní Jesús sndaa yā ná va'ai ye<sup>n</sup>e sa<sup>n</sup>ā fariseo mii<sup>n</sup> ní ch'iindi yā na mesa ndúúcu sa. <sup>37</sup>Tuu'mi ní 'áámá n'daataá chí véé nuu<sup>n</sup>ndi ye<sup>n</sup>e ta chí canee tá ye<sup>n</sup>e yāā<sup>n</sup> mii<sup>n</sup>, taachí chicádíinuu<sup>n</sup> tá chí Jesús mii<sup>n</sup> canée yā na va'ái ye<sup>n</sup>e sa<sup>n</sup>ā fariseo ní vee yā na mesa, n'daataá mí<sup>n</sup> ndaa ta ní ndée ta 'áámá caja ye<sup>n</sup>ē aceite perfume. <sup>38</sup>N'daataa mí<sup>n</sup> chíintii'ya tá na ca'a Jesús ní ngeecu tá. Ní ndúúcu nuū<sup>n</sup>nī<sup>n</sup> nduutiná<sup>n</sup> tá naa<sup>n</sup>nu tá ca'a yā ní nadidēēve tá ca'a yā ndúúcu yuūdū tii<sup>n</sup> tá. Ní 'nee<sup>n</sup>cheendi ta ca'a yā ní chíi tá aceite perfume ca'a yā. <sup>39</sup>Taachí sá<sup>n</sup>ā fariseo mii<sup>n</sup> n'díichi sa chí dii<sup>n</sup>

n'daataá mii<sup>n</sup>, tuu'mi nadicádíínuu<sup>n</sup> sa ní ca<sup>n</sup>á sa nguáá<sup>n</sup> maā<sup>n</sup> sa 'tíicā: Ndúúti chí sá<sup>n</sup>a 'cūū profeta sa, tuu'mi ní deēnū sa du'ū n'daātaa 'cūū chí ituu'vī tá sa<sup>n</sup>ā ti véé nuu<sup>n</sup>ndi ye<sup>n</sup>ē tá. <sup>40</sup>Tuu'mi ní Jesús mii<sup>n</sup> ca<sup>n</sup>a yā chíi yā sa<sup>n</sup>a fariseo mii<sup>n</sup>: Dii, Simón, véé de'ē chí cuuvi dii. Simón mii<sup>n</sup> ní n'guēcúta<sup>n</sup>a sa ní ca<sup>n</sup>a sa: Maestro, caa<sup>n</sup>ma<sup>n</sup> nī.

<sup>41</sup>Jesús ca<sup>n</sup>a yā ejemplo 'cūū: 'Uūvī 'ii<sup>n</sup>yā<sup>n</sup> can'díicu yā ye<sup>n</sup>e 'áámá sa<sup>n</sup>ā. 'Áámá yā ní can'díicu yā nyu<sup>n</sup>u ciento caadi, taama yā ní 'uūvī ngeecu ndiichi caadi. <sup>42</sup>Naati 'ii<sup>n</sup>yā<sup>n</sup> s'ee<sup>n</sup> ní nguéé tuūmī mii<sup>n</sup> ye<sup>n</sup>e yā chí nadí've yā. 'Āā ntéé ndaaca yā tuūmī. Sá<sup>n</sup>ā chí chinnee mii<sup>n</sup> ní nadach'ēecú sa ye<sup>n</sup>ē ndúú 'uuvī sa. Maa<sup>n</sup> ní cuuvi di 'úú, ¿chéē cá sa<sup>n</sup>ā s'ee<sup>n</sup> ne<sup>n</sup>e cá yā 'ii<sup>n</sup>yā<sup>n</sup> mii<sup>n</sup>?

<sup>43</sup>Simón mii<sup>n</sup> nan'guēcúta<sup>n</sup>a yā: 'Úú inadacáíinúú<sup>n</sup> chí diné<sup>n</sup>e ca yā sa<sup>n</sup>ā chí n'deēe ca can'díicū mii<sup>n</sup>. Jesús nan'guaacúta<sup>n</sup>a yā: N'daācā inadacádíínuu<sup>n</sup> di.

<sup>44</sup>Tuu'mi ní nguēcundíí Jesús naachi canéé n'daataá míí<sup>n</sup> ní ca<sup>n</sup>a yā chíi yā Simón: ¿'Áá ínaa<sup>n</sup> di chí dii<sup>n</sup> n'daātā 'cūū? 'Úú indaá na vaacu di ní nguéé tee di nuū<sup>n</sup>nī<sup>n</sup> chí naa<sup>n</sup>nú ca'á tan'dúúcā costumbre ye<sup>n</sup>ē yú naati n'daātā 'cūū ní cheendáa tá nuū<sup>n</sup>nī<sup>n</sup> nduutinaa<sup>n</sup> tá ca'á ní nadidēeve tá ca'á ndúúcū 'yuūdū tii<sup>n</sup> ta. <sup>45</sup>Taachí ndaá ní nguéé 'nee<sup>n</sup>cheendi di 'úú tan'dúúcā costumbre ye<sup>n</sup>e yú naati n'daātā 'cūū 'áámá l'nee<sup>n</sup>cheendi tá ca'á, ndíí taachi sndaá. <sup>46</sup>Ndíí nguéé ndúú cheendáa di aceite perfume tíí<sup>n</sup> tan'dúúcā costumbre ye<sup>n</sup>e yú naati n'daātā 'cūū cheendaa tá aceite

perfume na ca'á chí dii<sup>n</sup> tá honrar 'úú. <sup>47</sup>Chuū nga<sup>n</sup>á ngíí, dii Simón; ti tanducué<sup>n</sup>e nuu<sup>n</sup>ndi chí n'deēe n'dáí ye<sup>n</sup>e tá nadach'ēecú ye<sup>n</sup>ē tá caati neené ne<sup>n</sup>e ta 'úú, ní dii<sup>n</sup> tá 'túúcā cáávā chí nadach'ēecú ye<sup>n</sup>ē tá. Ní 'ii<sup>n</sup>yā<sup>n</sup> chí duū'vī ne<sup>n</sup>e yā 'úú ní duū'vī nadich'ēecú ye<sup>n</sup>e yā.

<sup>48</sup>Tuu'mi Jesús ca<sup>n</sup>a yā chíi yā tá<sup>n</sup>ā: Díí n'daataá 'úú nadich'ēecú nuu<sup>n</sup>ndi ye<sup>n</sup>ē di.

<sup>49</sup>'Ii<sup>n</sup>yā<sup>n</sup> chí veēté yā na mesa mii<sup>n</sup> tucáa yā ca<sup>n</sup>a yā chíi yā vī'i: ¿Du'u sá<sup>n</sup>ā chuū chí nadicádíínuu<sup>n</sup> sa chí cuuvi nadich'ēecu sa nuu<sup>n</sup>ndi ye<sup>n</sup>e 'ii<sup>n</sup>yā<sup>n</sup>?

<sup>50</sup>Tuu'mí Jesús mii<sup>n</sup> ca<sup>n</sup>a yā chíi yā n'daataá míí: Cáávā chí i'téenu di 'úú, ndii<sup>n</sup> chí nanguá<sup>n</sup>ai di. Maa<sup>n</sup> ní cuna<sup>n</sup>ā di ndúúcū vaadi 'diií<sup>n</sup>.

### N'daataa s'ee<sup>n</sup> chí chinneé yā Jesús

**8** Cuayivi mii<sup>n</sup>, ní che<sup>n</sup>e Jesús nuu<sup>n</sup>má<sup>n</sup> yáā<sup>n</sup> n'geete ndúúcū nuu<sup>n</sup>má<sup>n</sup> yáā<sup>n</sup> líí<sup>n</sup> ní nga<sup>n</sup>a yā nduudu cuaacu ye<sup>n</sup>é Ndyuūs ye<sup>n</sup>e naachí Ndyuūs nga<sup>n</sup>a ntii<sup>n</sup>nyú<sup>n</sup> yā. Ní ndu'u ndiichúúví apóstoles ye<sup>n</sup>e Jesús mii<sup>n</sup> cue<sup>n</sup>e yā ndúúcū yā. <sup>2</sup>'Tiicá ntúū<sup>n</sup> n'duuvī n'daataá chí Jesús díí<sup>n</sup> yā chí nanduūvā ye<sup>n</sup>e ca'ai ye<sup>n</sup>e yā ní chí díí<sup>n</sup> yā chí nacan'dáá espíritu ye<sup>n</sup>e yáá<sup>n</sup>n'guiinūu<sup>n</sup> ye<sup>n</sup>e ná<sup>n</sup>ā n'daataa s'ee<sup>n</sup>. Ní nguua<sup>n</sup> n'daataa s'ee<sup>n</sup> canee María ye<sup>n</sup>e yáā<sup>n</sup> Magdala. N'daata mii<sup>n</sup> ní Jesús díí<sup>n</sup> yā chí nán'daā ndēēchē espíritus ye<sup>n</sup>e yáá<sup>n</sup>n'guiinūu<sup>n</sup> ye<sup>n</sup>ē ta. <sup>3</sup>Cue<sup>n</sup>e ntúū<sup>n</sup> Juana chí n'daataa ye<sup>n</sup>e sa<sup>n</sup>ā chí nguuvī Chuza chí nga<sup>n</sup>a ntii<sup>n</sup>nyu<sup>n</sup> sá ye<sup>n</sup>e cosas ye<sup>n</sup>e rey Herodes, ndúúcū tá<sup>n</sup>ā Susana,

ndúúcu 'yaa' n'dái ca n'daataá chí ca'a tá tuumí ye<sup>n</sup>ē tá ní cuai tá 'āā de'é nūu<sup>n</sup> chí ne<sup>n</sup>e Jesús.

**'Áámá ejemplo chi nguuvi parábola  
chi ye<sup>n</sup>e 'áámá sa<sup>n</sup>ā chí ngiīnū sa  
ndaata**

(Mt. 13.1-9; Mr. 4.1-9)

<sup>4</sup>Taachí nduuvidaama 'yaa' n'dái 'ii<sup>n</sup>yā<sup>n</sup> chí chiica yā ye<sup>n</sup>e 'yaa' n'dai yáá<sup>n</sup> tuu'mi ní ndaa yā nanáá<sup>n</sup> Jesús. Ní Jesús yaa'vi yā 'ii<sup>n</sup>yā<sup>n</sup> s'ee<sup>n</sup> ndúúcu 'áámá ejemplo tan'dúúca 'áámá dendu'ū chí véé i<sup>n</sup>yéé<sup>n</sup>di 'cūū. Ní ca<sup>n</sup>a yā 'tíicā: <sup>5</sup>'Áámá sa<sup>n</sup>ā chí cuūnū ndaata mí<sup>n</sup> cué<sup>n</sup>e sa cuūnū sa. Taachí chiīnū sa 'áámá duutu ndaata chiīya 'diitūú cyúúni ní ch'iinca'a 'ii<sup>n</sup>yā<sup>n</sup> ní 'yaada ní che'e tī. <sup>6</sup>Duutu ndaata ní chiīya naachi véé n'dee n'dái tuū. Taachí can'daā, ní tī' ti nguéé ya'ai ye<sup>n</sup>ē. <sup>7</sup>Duutu ndaata ní chiīya nguaa<sup>n</sup> yáá<sup>n</sup>. Yáá<sup>n</sup> mii<sup>n</sup> chí dáámá ch'iita ndúúcu yaatá ní di'vaachí ye<sup>n</sup>ē vi'ī. <sup>8</sup>Ná<sup>n</sup>ā duutu ndaata ní chiīya na yá<sup>n</sup>ā n'dáacā ní taachí can'daā n'dee n'dái cosecha chii ye<sup>n</sup>ē. Ní ye<sup>n</sup>ē 'áámá ndaata ní chiī 'aama ciento ndaata ye<sup>n</sup>ē. Taachí Jesús ca<sup>n</sup>a yā nduudú 'cūū, yuūdū n'dái ca<sup>n</sup>a yā, ní ca<sup>n</sup>a yā: Ndís'tī chí véé veé<sup>n</sup> nī, ní 'caandiveé<sup>n</sup> nī.

**Jesús ca<sup>n</sup>a yā ye<sup>n</sup>e chí ne<sup>n</sup>ē caā<sup>n</sup>mā<sup>n</sup>  
ejemplo mii<sup>n</sup>**

(Mt. 13.10-23; Mr. 4.10-20)

<sup>9</sup>Tuu'mi ní discípulos ye<sup>n</sup>e Jesús ca<sup>n</sup>a yā chii yā Jesús: ¿D'é né<sup>n</sup>é caa<sup>n</sup>ma<sup>n</sup> nduudú 'cūū?

<sup>10</sup>Jesús mii<sup>n</sup> ní ca<sup>n</sup>a yā: Ndís'tī ní maa<sup>n</sup> ní cuuvi déénu nī chí cánuu<sup>n</sup> n'de'ei ye<sup>n</sup>e Ndyuūs naachi

nga<sup>n</sup>a ntii<sup>n</sup>nyú<sup>n</sup> yā naati 'úú ní nga<sup>n</sup>á ndúúcu nduudu chí 'tee nguée dáámá. Ní taachi 'ii<sup>n</sup>yā<sup>n</sup> s'ee<sup>n</sup> snaa<sup>n</sup> yā nguéé cuuvi snaa<sup>n</sup> n'daaca yā, ní taachí 'caandivee<sup>n</sup> yā nguéé tuumicadíinuu<sup>n</sup> yā ye<sup>n</sup>ē.

<sup>11</sup>Chuū chí ne<sup>n</sup>e caā<sup>n</sup>mā<sup>n</sup> ejemplo mii<sup>n</sup>. Ndaata mii<sup>n</sup> ní chí<sup>n</sup> chí tan'dúúca nduudu ye<sup>n</sup>e Ndyuūs.

<sup>12</sup>Duutu ndaata chí chiīya ná 'diitūú cyúúni, chí<sup>n</sup> chí tan'dúúca nduudu cuaacu ye<sup>n</sup>é Ndyuūs chí 'ii<sup>n</sup>yā<sup>n</sup> ch'iindivee<sup>n</sup> yā. Daacá nūu<sup>n</sup> ndaa yáá<sup>n</sup>nguiinuu<sup>n</sup> mii<sup>n</sup> ní diví sa nduudu mii<sup>n</sup> na staava ye<sup>n</sup>e 'ii<sup>n</sup>yā<sup>n</sup> ti nguéé cuuvi cu'téénu yā ní nguéé ndúú cuuvi nngua<sup>n</sup>ai yā.

<sup>13</sup>Ndaata chí chiīya nguaa<sup>n</sup> tuū chí nguéé dii'yu ye<sup>n</sup>ē ní tan'dúúca nduudu cuaacu ye<sup>n</sup>é Ndyuūs chí 'ii<sup>n</sup>yā<sup>n</sup> n'giindivee<sup>n</sup> yā ní yeenú taavi yā. Cánéé yā tan'dúúca 'áámá milpa chí nguéé véé dii'yu ye<sup>n</sup>ē. 'Ii<sup>n</sup>yā<sup>n</sup> s'ee<sup>n</sup> ní 'áámá tiempo nūu<sup>n</sup> i'téénu yā ní taachí ndaa nguuvi chí chí<sup>n</sup>nyú<sup>n</sup>néé<sup>n</sup> 'ii<sup>n</sup>yā<sup>n</sup> ye<sup>n</sup>e yā chí 'cuináa<sup>n</sup> yā cáávā nduudu mii<sup>n</sup> ní 'ii<sup>n</sup>yā<sup>n</sup> s'ee<sup>n</sup> diví yā nduudu mii<sup>n</sup> na staava ye<sup>n</sup>e yā. <sup>14</sup>Dúútú ndaata chí chiīya nguaa<sup>n</sup> yáá<sup>n</sup> tan'dúúca nduudu cuaacu ye<sup>n</sup>é Ndyuūs chí 'ii<sup>n</sup>yā<sup>n</sup> ch'iindivee<sup>n</sup> yā. Ní 'ii<sup>n</sup>yā<sup>n</sup> s'ee<sup>n</sup> damáā<sup>n</sup> nadacadiinúú<sup>n</sup> yā ye<sup>n</sup>e vaadí 'cuiica ndúúcu dendu'ū chí idi'vaachí ye<sup>n</sup>e i<sup>n</sup>yee<sup>n</sup>dí 'cūū ndúúcu dendu'ū chí vicio ye<sup>n</sup>e yā. Nducué<sup>n</sup>ē di'vaachi nduudu mii<sup>n</sup> ní dii<sup>n</sup> chí nguéé dichí'vé nduudu mii<sup>n</sup> na vida 'ii<sup>n</sup>yā<sup>n</sup> s'ee<sup>n</sup>. <sup>15</sup>Duutu ndaata chí chiīya na yá<sup>n</sup>ā n'dáacā chí<sup>n</sup> chí tan'dúúca nduudu cuaacu ye<sup>n</sup>é Ndyuūs chí 'ii<sup>n</sup>yā<sup>n</sup> ch'iindivee<sup>n</sup> yā ní din'daacá yā ndúúcu 'viich'etíinū<sup>n</sup>.

Ní i'téenu yā nduudu mii<sup>n</sup> na staava ye<sup>n</sup>é yā. Ní ch'i<sup>n</sup>í yā taná<sup>n</sup>ā 'ii<sup>n</sup>yā<sup>n</sup> chi i'téenu yā nduudu cuaacu mii<sup>n</sup>.

**'Áámá ejemplo ye<sup>n</sup>e 'áámá lámpara**

(Mr. 4.21-25)

<sup>16</sup>Ní Jesús ch'i<sup>n</sup>cuee<sup>n</sup> yā 'túucā: 'Áámá 'ii<sup>n</sup>yā<sup>n</sup> nguéé ngi<sup>n</sup>i yā 'áámá lámpara ní cu'nuu<sup>n</sup> yā maa<sup>n</sup> 'áámá 'cuéé<sup>n</sup>ē o cu'nuú<sup>n</sup> yā maa<sup>n</sup> 'áámá cama ti cu'nuú<sup>n</sup> yā na 'áámá mesa ní 'ii<sup>n</sup>yā<sup>n</sup> chi cundāa yā ní snaa<sup>n</sup> yā. <sup>17</sup>Tiicā ntúū<sup>n</sup>, nducué<sup>n</sup>ē chi nguéé deenu 'ii<sup>n</sup>yā<sup>n</sup> ye<sup>n</sup>e chi cunúú<sup>n</sup> n'de'ei nguéé cunee chi nguéé snaa<sup>n</sup> yā. Ní nguéé chi cunúú<sup>n</sup> n'de'ei chi nguée cadíinu<sup>n</sup> 'ii<sup>n</sup>yā<sup>n</sup> ye<sup>n</sup>ē.

<sup>18</sup>Caandivee<sup>n</sup> n'daacā nī cáávā chi cuuvi deenu nī ti 'ii<sup>n</sup>yā<sup>n</sup> chi véé ye<sup>n</sup>e yā ní Ndyuūs ca'a cá yā ní n'deē cá cuuvi ye<sup>n</sup>e yā. Ní 'ii<sup>n</sup>yā<sup>n</sup> chi nguéé ye<sup>n</sup>e yā 'áará chi dúú'ví nū<sup>n</sup> chi nadacádiinúú<sup>n</sup> yā chi véé ye<sup>n</sup>e yā, chuū ní Ndyuūs divíi yā ye<sup>n</sup>e yā.

**Chæecu Jesús mii<sup>n</sup> ndúúcu 'díinu yā chi ndāa yā**

(Mt. 12.46-50; Mr. 3.31-35)

<sup>19</sup>Tuu'mi ní 'díinu Jesús ndúúcu chæecú yā ne<sup>n</sup>e yā ndaá yā nanáá<sup>n</sup> Jesús naati nguéé cuuvi ndaa yā caati neené 'yaa<sup>n</sup> n'dai 'ii<sup>n</sup>yā<sup>n</sup> snéé yā mii<sup>n</sup>. <sup>20</sup>Ní 'áámá 'ii<sup>n</sup>yā<sup>n</sup> cue<sup>n</sup>e yā nanáá<sup>n</sup> Jesús ní ca<sup>n</sup>a yā: N'dii Jesús, chæecú nī ndúúcu 'díinu nī snéé yā cuaa<sup>n</sup> chufa'āi ní ne<sup>n</sup>e yā snaa<sup>n</sup> yā n'dii.

<sup>21</sup>Tuu'mi ní Jesús mii<sup>n</sup> ca<sup>n</sup>a yā chii yā 'ii<sup>n</sup>yā<sup>n</sup> s'ee: 'Ii<sup>n</sup>yā<sup>n</sup> chí n'giindiveé<sup>n</sup> yā nduudu ye<sup>n</sup>e Ndyuūs ní i'téenu yā 'ii<sup>n</sup>yā<sup>n</sup>, 'ii<sup>n</sup>yā<sup>n</sup> s'ee<sup>n</sup> chí chæecú ní 'ii<sup>n</sup>yā<sup>n</sup> s'ee<sup>n</sup> chí 'diinú.

**Jesús chin'nee<sup>n</sup> 'díi<sup>n</sup> yā 'yúúné ndúúcu nuū<sup>n</sup>nī'yá<sup>n</sup>ā**

(Mt. 8.23-27; Mr. 4.35-41)

<sup>22</sup>Chúū chii. 'Áámá nguuvi Jesús mii<sup>n</sup> sndaá yā na 'áámá barco ndúúcu discípulos ye<sup>n</sup>e yā ní ca<sup>n</sup>a yā chii yā 'ii<sup>n</sup>yā<sup>n</sup> s'ee<sup>n</sup>: Cho'o yú táámá 'díituú nuū<sup>n</sup>nī'yá<sup>n</sup>ā. Ní cue<sup>n</sup>e yā. <sup>23</sup>Taachí chiica yā na barco mii<sup>n</sup>, Jesús mii<sup>n</sup> ní cyaadu yā. Chéenu 'aama 'yúúné taa<sup>n</sup> ní dii<sup>n</sup> chí chindaā nuū<sup>n</sup>nī<sup>n</sup> chæeti barco mii<sup>n</sup> ti barco mii<sup>n</sup> ne<sup>n</sup>e 'cuæchi nguáá<sup>n</sup> nuū<sup>n</sup>nī<sup>n</sup>. Ní discípulos 'va'a yā. <sup>24</sup>Tuu'mi ní discípulos s'ee<sup>n</sup> ndaa yā naachi canéé Jesús mii<sup>n</sup> ní nadin'duuchí yā 'ii<sup>n</sup>yā<sup>n</sup> ní ca<sup>n</sup>a yā: N'dii Maestro, n'dii Maestro, 'cuæchi yú nguáá<sup>n</sup> nuū<sup>n</sup>nī<sup>n</sup>. Taachi Jesús mii<sup>n</sup> nduuchi yā, tuu'mi ní ca<sup>n</sup>a yā chi cūnéé 'dii<sup>n</sup> 'yúúné mii<sup>n</sup> ndúúcu nū<sup>n</sup>nī<sup>n</sup>, ní canéé 'dii<sup>n</sup>. Tuu'mi ní 'āa ntéé chéenu 'yúúné mii<sup>n</sup> ní canéé 'dii<sup>n</sup> ní n'daacā cue<sup>n</sup>e yā ndúúcu barco mii<sup>n</sup>. <sup>25</sup>Jesús ní ca<sup>n</sup>a yā: ¿De'e cúuvi chi nguéé cu'téenu cá nī? Discípulos ní 'va'a n'daí yā ní che<sup>n</sup>e yiinú yā ní nga<sup>n</sup>a yā ngii yā v'i: ¿Du'u sá<sup>n</sup>a 'cūū chí nga<sup>n</sup>ā nti<sup>n</sup>nyu<sup>n</sup> sa ye<sup>n</sup>e 'yúúné ndúúcu nuū<sup>n</sup>nī<sup>n</sup> ní n'giindiveé<sup>n</sup> ye<sup>n</sup>e sa?

**Jesús díi<sup>n</sup> yā chi nanduūva 'áámá sa<sup>n</sup>ā ye<sup>n</sup>e yá<sup>n</sup>āa Gadara chi canéé sá ndúúcu espíritus ye<sup>n</sup>e yáá<sup>n</sup>'nguiinū<sup>n</sup>**

(Mt. 8.28-34; Mr. 5.1-20)

<sup>26</sup>Jesús ndúúcu discípulos ye<sup>n</sup>e yā cue<sup>n</sup>e yā na yá<sup>n</sup>āa Gadara. Yá<sup>n</sup>āa mii<sup>n</sup> ní canee 'diituú nuū<sup>n</sup>nī'yá<sup>n</sup>ā Galilea. <sup>27</sup>Taachí Jesús nacan'dāa yā na barco mii<sup>n</sup> ní ndaa yā na yá<sup>n</sup>āa,

ndaā nii<sup>n</sup>nuú<sup>n</sup> Jesús mii<sup>n</sup> 'áámá sa<sup>n</sup>ā ye<sup>n</sup>e yá<sup>n</sup>āa mii<sup>n</sup>. 'Āā 'naa<sup>n</sup> tiempo canéé sá ndúúcū espíritus ye<sup>n</sup>e yáá<sup>n</sup>'nguiinū<sup>n</sup>. Nguéé catecai sa ndíí nguéé ndúú canúú<sup>n</sup> rá sá va'āi ti na yiivi yáává cānuu<sup>n</sup> sa. Ní ndaā sa ní ndaāca sa Jesús mii<sup>n</sup>. <sup>28</sup>Ní taachi sá<sup>n</sup>a 'cūū n'dííchi sa Jesús mii<sup>n</sup> chiintii'ya sá nanáa<sup>n</sup> yā ní 'cai yiicū sa: N'dii Jesús, Daiya Ndyuūs chí ch'ēete n'dai poder ye<sup>n</sup>e nī, ¿de'ē díí<sup>n</sup> nī nduucú? 'Úú di'cuiitū n'dii chí nguéé díí<sup>n</sup> nī chí díí<sup>n</sup> sufrir.

<sup>29</sup>Túúcā ca<sup>n</sup>a sa ti Jesús ca<sup>n</sup>a ntii<sup>n</sup>nyú<sup>n</sup> yā chí nan'daā espíritus ye<sup>n</sup>e yáá<sup>n</sup>'nguiinū<sup>n</sup> ye<sup>n</sup>e sá<sup>n</sup>ā mii<sup>n</sup>. 'Āā néené 'naa<sup>n</sup> tiempo chí espíritus ichéé ndúúcū sa<sup>n</sup>ā mii<sup>n</sup>. 'Ii<sup>n</sup>'yā<sup>n</sup> s'ee<sup>n</sup> ye<sup>n</sup>e yáá<sup>n</sup> mii<sup>n</sup> ní ngāā chiichí yā sa<sup>n</sup>ā mii<sup>n</sup> ndúúcū cadenas naati chíica sá cadenas ní espíritu ye<sup>n</sup>e yáá<sup>n</sup>'nguiinū<sup>n</sup> candée sa sa<sup>n</sup>ā naachi nguéé 'ii<sup>n</sup>'yā<sup>n</sup>. <sup>30</sup>Tuu'mi ní Jesús tiinguunéé<sup>n</sup> yā sa<sup>n</sup>ā mii<sup>n</sup>: ¿D'ēē nguuvi di? Sa<sup>n</sup>ā mii<sup>n</sup> ní ca<sup>n</sup>a sa: Legión nguūví. 'Tíicā nga<sup>n</sup>a 'ii<sup>n</sup>'yā<sup>n</sup> ye<sup>n</sup>e sa ti neené 'yaa<sup>n</sup> espíritus ye<sup>n</sup>e yáá<sup>n</sup>'nguiinū<sup>n</sup> canee ndúúcu sa. <sup>31</sup>Ní espíritus idi'cuítū Jesús chí nguéé dich'ólo yā na abismo chí canéé cuaa<sup>n</sup> maa<sup>n</sup> yá<sup>n</sup>āa. <sup>32</sup>Ní nii<sup>n</sup>nuú<sup>n</sup> ná snée yā néené n'deēe cuuchí vεε ti 'cuēeti mii<sup>n</sup> chí in'nuú<sup>n</sup> ti chí ch'éε ti. Ní espíritus di'cuítū Jesús mii<sup>n</sup> chí ca'á yā lugar chí cundāā chεētī cuuchí s'ee<sup>n</sup>. Jesús mii<sup>n</sup> ní 'cuú<sup>n</sup> yā. <sup>33</sup>Tuu'mi ní espíritus ye<sup>n</sup>e yáá<sup>n</sup>'nguiinū<sup>n</sup> nan'dāā na cuerpo ye<sup>n</sup>e sa<sup>n</sup>ā mii<sup>n</sup> ní sndaā na cuerpo ye<sup>n</sup>e cuuchi s'ee<sup>n</sup>. Ní 'iiti s'ee<sup>n</sup> ní chéenu ti na yiivi yaavā ye<sup>n</sup>e yiicū mii<sup>n</sup> ní chingéé nuú<sup>n</sup> ti nguuaa<sup>n</sup> nuū<sup>n</sup>nī<sup>n</sup> ní ch'íi nuú<sup>n</sup> ti nguuaa<sup>n</sup> nuū<sup>n</sup>nī<sup>n</sup> mii<sup>n</sup>.

<sup>34</sup>'Ii<sup>n</sup>'yā<sup>n</sup> chí idii<sup>n</sup> cuidado cuuchí s'ee<sup>n</sup> taachí n'diichí yā chuū, cue<sup>n</sup>'é yā ngéenu yā ní cuuvi yā 'ii<sup>n</sup>'yā<sup>n</sup> na yáā<sup>n</sup> ndúúcū 'ii<sup>n</sup>'yā<sup>n</sup> chí snée na 'cuēeti nducué<sup>n</sup>'ē chí chíi. <sup>35</sup>'Ii<sup>n</sup>'yā<sup>n</sup> ye<sup>n</sup>e yáá<sup>n</sup> mii<sup>n</sup> ní che<sup>n</sup>e yā n'diichi yā chí chíi. Ndaā yā nanáá<sup>n</sup> Jesús mii<sup>n</sup> ní n'diichí yā sa<sup>n</sup>a chí nacan'daā espíritus ye<sup>n</sup>e yáá<sup>n</sup>'nguiinū<sup>n</sup>. Sa<sup>n</sup>ā mii<sup>n</sup> ní véé sa na ca'a Jesús. Canúú<sup>n</sup> sá catecai sa ní 'āā n'daāca idii<sup>n</sup> sa. 'Ii<sup>n</sup>'yā<sup>n</sup> s'ee<sup>n</sup> ní dii'yá yā chíi. <sup>36</sup>Ní 'ii<sup>n</sup>'yā<sup>n</sup> s'ee<sup>n</sup> chí n'diichí yā nducué<sup>n</sup>'ē chí ch'óō ca<sup>n</sup>a yā 'ii<sup>n</sup>'yā<sup>n</sup> chí caama ndaa yā táacā espíritus ye<sup>n</sup>e yáá<sup>n</sup>'nguiinū<sup>n</sup> nan'dāā na cuerpo ye<sup>n</sup>e sa<sup>n</sup>ā mii<sup>n</sup>. <sup>37</sup>Tuu'mi ní nducyáácá 'ii<sup>n</sup>'yā<sup>n</sup> ye<sup>n</sup>e yá<sup>n</sup>āa Gadara di'cuítū yā Jesús chí cuēvii yā ye<sup>n</sup>e 'ii<sup>n</sup>'yā<sup>n</sup> s'ee<sup>n</sup> ti neené 'va'á yā. Tuu'mi ní Jesús ndaa yā barco mii<sup>n</sup>. <sup>38</sup>Ní sa<sup>n</sup>ā chí nan'daa espíritus ye<sup>n</sup>e yáá<sup>n</sup>'nguiinū<sup>n</sup> di'cuítū sa Jesús mii<sup>n</sup> chí cundāā sa na barco mii<sup>n</sup> ndúúcu yā. Jesús yaa'vi yā sa<sup>n</sup>a mii<sup>n</sup> ní ca<sup>n</sup>a yā: <sup>39</sup>Cuna<sup>n</sup>ā di ná vaacu di ní caa<sup>n</sup>ma<sup>n</sup> di cuuvi di 'ii<sup>n</sup>'yā<sup>n</sup> dendu'ū chí ch'ēete n'dai chí Ndyuūs díí<sup>n</sup> yā ndúúcū di. Sa<sup>n</sup>ā mii<sup>n</sup> ní cuna<sup>n</sup>a sa ní ca<sup>n</sup>a sa chíi sa 'ii<sup>n</sup>'yā<sup>n</sup> núú<sup>n</sup>má<sup>n</sup> na yáā<sup>n</sup> dendú'ū chí ch'ēete n'dai chí Jesús díí<sup>n</sup> yā ndúúcū sa.

**Ye<sup>n</sup>e daiya Jairo chí ngiitā ní ye<sup>n</sup>e n'daataá chí tuu'vi tá catecai Jesús**  
(Mt. 9.18-26; Mr. 5.21-43)

<sup>40</sup>Taachí Jesús cue<sup>n</sup>'e yā cho'o yā táámá 'diitūú nuū<sup>n</sup>nī<sup>n</sup>yá<sup>n</sup>ā, ní ndaa yā yáá<sup>n</sup> mii<sup>n</sup>, 'ii<sup>n</sup>'yā<sup>n</sup> 'cuú<sup>n</sup> yā Jesús ndúúcū vaadi yeenú ti n'deeε n'daí 'ii<sup>n</sup>'yā<sup>n</sup> ní sneε ngiinu yā Jesús mii<sup>n</sup>. <sup>41</sup>Mii<sup>n</sup> cánéé 'aama sa<sup>n</sup>a chí nguuvi

sa Jairo. Sa<sup>n</sup>a mii<sup>n</sup> nga<sup>n</sup>a nti<sup>n</sup>nyu<sup>n</sup> sa ye<sup>n</sup>ē yaācū sinagoga ní ndaā sa naná<sup>n</sup> Jesús ní chiintii'ya sa na ca'a Jesús mii<sup>n</sup>. Ní di'cuítú sa 'ii<sup>n</sup>yā<sup>n</sup> chí cundáa yā na vaācū sa, <sup>42</sup>caati 'áámá n'dyá<sup>n</sup>ā daiya sa 'āā 'náá<sup>n</sup> tá tan'duu ndiichúúví nduūyū tá 'āā cháá 'cuuvi tá. Taachí cue<sup>n</sup>e Jesús mii<sup>n</sup> neenē n'deeē 'ii<sup>n</sup>yā<sup>n</sup> cue<sup>n</sup>e yā ndúúcu yā ní ndii tuunúú<sup>n</sup> ngeenúū chiichi yā.

<sup>43</sup>Nguaa<sup>n</sup> 'ii<sup>n</sup>yā<sup>n</sup> s'ee<sup>n</sup> canéē 'áámá n'daataá chí 'āā ndiichúúví nduūyū canee tá ndúúcu 'áámá ca'āi chí ngéē yuuú<sup>n</sup> ye<sup>n</sup>e cuerpo ye<sup>n</sup>ē ta. 'Āā dii<sup>n</sup> tá gastar ndúúcu médicos tanducué<sup>n</sup>ē chí vεe ye<sup>n</sup>ē tá. Mar 'áámá médico nguéé ngii diyiicú yā tá<sup>n</sup>ā mii<sup>n</sup>. <sup>44</sup>Ndaā nii<sup>n</sup>nu<sup>n</sup> tá cuaa<sup>n</sup> daami Jesús ní tuū'vi tá naachi n'dεe tíí ye<sup>n</sup>e catecai Jesús mii<sup>n</sup>. Tuu'mí nūu<sup>n</sup> canéē naa<sup>n</sup> chí ingéē yuuú<sup>n</sup> ye<sup>n</sup>e cuerpo ye<sup>n</sup>e tá.

<sup>45</sup>Tuu'mí ní Jesús mii<sup>n</sup> ca<sup>n</sup>a yā: ¿Du'u tuū'vi 'úú? Nducyáácá 'ii<sup>n</sup>yā<sup>n</sup> ní ca<sup>n</sup>a yā: Nguεε 'úú. Pedro mii<sup>n</sup> ní ca<sup>n</sup>a sa: N'dii Maestro, 'ii<sup>n</sup>yā<sup>n</sup> mii<sup>n</sup> ní i'nuu<sup>n</sup> chiichí yā n'dií ní táácā chí nga<sup>n</sup>a ní: ¿Du'ú tuū'vi 'úú?

<sup>46</sup>Jesús ca<sup>n</sup>a yā: Véé du'ū chí tuū'vi 'úú. 'Úú ní deenú chí ndúúcu poder ye<sup>n</sup>é nduūvā ye<sup>n</sup>e 'áámá 'ii<sup>n</sup>yā<sup>n</sup>.

<sup>47</sup>Taachi n'daata míí<sup>n</sup> tuumicádiinuu<sup>n</sup> tá chí Jesús deenú yā in'duuví n'dai tá ní ndaā tá nanáá<sup>n</sup> Jesús mii<sup>n</sup> ní chiintii'yā ta nanáá<sup>n</sup> yā. Ní ca<sup>n</sup>a cuaacu tá nanáá<sup>n</sup> nducyáácá 'ii<sup>n</sup>yā<sup>n</sup> dε'ē cáávā chí tuū'vi tá catecai Jesús. Ní hora míí<sup>n</sup> nūu<sup>n</sup> chí tuu'vi ta nduūvā ye<sup>n</sup>ē tá. <sup>48</sup>Jesús mii<sup>n</sup> ní ca<sup>n</sup>a yā: Díí, daiyá, cáávā chí i'teenú di 'úú, ní nduūvā

ye<sup>n</sup>ē di. Maa<sup>n</sup> ní cuna<sup>n</sup>a di na vaacu di ndúúcu vaadi 'dií<sup>n</sup>.

<sup>49</sup>Ní taachi Jesús nga<sup>n</sup>a yā chuū ndaā 'áámá sa<sup>n</sup>ā ye<sup>n</sup>e na vaacu sa<sup>n</sup>ā chí nga<sup>n</sup>a nti<sup>n</sup>nyu<sup>n</sup> ye<sup>n</sup>ē yaācū sinagoga. Ndaā sa nanáá<sup>n</sup> Jairo ní ca<sup>n</sup>a sa: 'Āā chíi daiya di. 'Āā ntéé yaa'vi di Maestro.

<sup>50</sup>Jesús mii<sup>n</sup> ch'iindiveé<sup>n</sup> yā nduudu 'cūū ní ca<sup>n</sup>a yā: Nguéé 'va'ā di. Cu'téenu di 'úú ní nanduūchi ta ye<sup>n</sup>ē nguaa<sup>n</sup> tiná<sup>n</sup>ā.

<sup>51</sup>Tuu'mí ní Jesús sndaā yā na vaacu Jairo. Nguéé 'cuu<sup>n</sup> yā chí nducyaaca 'ii<sup>n</sup>yā<sup>n</sup> sndaá yā ndúúcu yā cuaa<sup>n</sup> cheeti va'āi mii<sup>n</sup>, dámaa<sup>n</sup> Pedro ndúúcu Jacobo, ndúúcu Juan, ndúúcu cheecu n'daata 'líí<sup>n</sup>, ndúúcu chíida tá. <sup>52</sup>Nducyaaca yā cuaa<sup>n</sup> chuva'āi ch'εetinée yā ní ngeecu yā ní n'gai yā ti ya'ái yā caavā tá. Ní Jesús ca<sup>n</sup>a yā: Nguéé cuεεcú ní. Nguéé n'dií tá ti cyaadu tá.

<sup>53</sup>'Ii<sup>n</sup>yā<sup>n</sup> s'ee<sup>n</sup> ní taachi n'giindiveé<sup>n</sup> yā nduudu ye<sup>n</sup>e Jesús mii<sup>n</sup> chíí<sup>n</sup>nyu<sup>n</sup>nee<sup>n</sup> yā ye<sup>n</sup>e Jesús mii<sup>n</sup> ti 'āā deenú yā chí 'āā n'dií tá. <sup>54</sup>Tuu'mí ní Jesús ndaa yā cuaa<sup>n</sup> cheeti va'āi ní st'alá yā ta'ā tá ní ca<sup>n</sup>a yuudú yā: Dii, ta'díí<sup>n</sup>, nducuee<sup>n</sup> di.

<sup>55</sup>Hora míí<sup>n</sup> nūu<sup>n</sup> espíritu ye<sup>n</sup>ē ta'díí<sup>n</sup> míí<sup>n</sup> ngeuecunéē ndúúcu ta. Tuu'mí nūu<sup>n</sup> nducue<sup>n</sup>ē tá. Jesús ca<sup>n</sup>a nti<sup>n</sup>nyú<sup>n</sup> yā chí ca'á yā chí che'e tá. <sup>56</sup>Chiida tá ndúúcu cheecu tá neenē nge<sup>n</sup>e yiinu yā ní Jesús ca<sup>n</sup>a yā chíi yā 'ii<sup>n</sup>yā<sup>n</sup> s'ee<sup>n</sup> chí nguéé cuuvi ní chí nnduuchi tá ye<sup>n</sup>e nguaa<sup>n</sup> tiná<sup>n</sup>ā.

### Jesús dichó'o yā ndu'u ndiichúúví discípulos ye<sup>n</sup>e yā

(Mt. 10.5-15; Mr. 6.7-13)

**9** Jesús yaa'ví yā ndu'u ndiichúúví discípulos ye<sup>n</sup>é

yā ní ca'a yā poder. Ní ca<sup>n</sup>a yā chí tun'dáa yā espíritus ye<sup>n</sup>e yáá<sup>n</sup>nguiinū<sup>n</sup> ye<sup>n</sup>e 'ii<sup>n</sup>yā<sup>n</sup> ní dí<sup>n</sup> yā chí nduūvā ye<sup>n</sup>e 'ii<sup>n</sup>yā<sup>n</sup> chí ngiitā. <sup>2</sup>Ní Jesús dichó'o yā discípulos chí caa<sup>n</sup>ma<sup>n</sup> yā nduudu n'dai ye<sup>n</sup>e naachí Ndyuūs nga<sup>n</sup>a nti<sup>n</sup>nyú<sup>n</sup> yā ní dí<sup>n</sup> yā chí nduuvā ye<sup>n</sup>e 'ii<sup>n</sup>yā<sup>n</sup> chí ngiitā. <sup>3</sup>Ní ca<sup>n</sup>a yā chíi yā discípulos ye<sup>n</sup>e yā: Ndís'tii nguéé de'ē vεε candée nī cuaa<sup>n</sup> cyúúni. Nguéé ndúú in'daacuú, ndíí nguéé ndúú morral, ndíí nguéé ndúú pan ra, ndíí nguéé ndúú tuūmi ra, ndíí nguéé nduu candée nī 'uūvī catecai. <sup>4</sup>Ní 'āā tíí nū<sup>n</sup> va'ai naachi ndaa nī 'cuēetinée nī mii<sup>n</sup> ní ndíí taachi ndaa nī ndíí taachi nan'dáa nī ye<sup>n</sup>e yāā<sup>n</sup> mii<sup>n</sup>. <sup>5</sup>Ní naachi ndaa nī 'áámá yāā<sup>n</sup> ní 'ii<sup>n</sup>yā<sup>n</sup> nguéé 'cuaá<sup>n</sup> yā ndís'tii, tuu'mi ní nan'dáa nī ye<sup>n</sup>e yáā<sup>n</sup> mii<sup>n</sup> ní ndáádi nī yaācā<sup>n</sup> ye<sup>n</sup>e ca'a nī. Chuū ní 'áámá señal chí 'cuu<sup>n</sup>mi<sup>n</sup> nī chí nguéé n'daacā idi<sup>n</sup> yā ti contra ye<sup>n</sup>e nī.

<sup>6</sup>Discípulos ican'dáa yā ní che<sup>n</sup>é yā nuu<sup>n</sup>má<sup>n</sup> cuaa<sup>n</sup> yáā<sup>n</sup> s'ee<sup>n</sup> ní nduu cuáá<sup>n</sup> ní nga<sup>n</sup>a yā nduudu ngai ye<sup>n</sup>e Ndyuūs, nduudu chí nangua<sup>n</sup>āi 'ii<sup>n</sup>yā<sup>n</sup>. Ní dí<sup>n</sup> yā chí nduūvā ye<sup>n</sup>e 'ii<sup>n</sup>yā<sup>n</sup> chí ngiitā.

### Rey Herodes nguéé s'teenu yā ye<sup>n</sup>e Jesús

(Mt. 14.1-12; Mr. 6.14-29)

<sup>7</sup>Ch'iindivee<sup>n</sup> rey Herodes tanducué<sup>n</sup>e chí Jesús mii<sup>n</sup> idi<sup>n</sup> yā ní 'āā nteε déénu yā de'ē nadicadínuu<sup>n</sup> yā. Ní véé 'uūvī vandiicadíinú<sup>n</sup> yā caati ná<sup>n</sup>a 'ii<sup>n</sup>yā<sup>n</sup> ní nga<sup>n</sup>a yā chí Jesús chí Juan mii<sup>n</sup> chí nduuchi yā ye<sup>n</sup>e nguaa<sup>n</sup> tiná<sup>n</sup>ā. <sup>8</sup>Ná<sup>n</sup>a yā ní nga<sup>n</sup>a yā chí profeta

Elías mii<sup>n</sup> ní 'āā che'enaá<sup>n</sup> yā. Ná<sup>n</sup>a yā ní nga<sup>n</sup>a yā chí 'áámá profeta chí ndíi yā ndíi ye<sup>n</sup>e tiempo chí 'āā 'naa<sup>n</sup> nandúúchi yā ye<sup>n</sup>e nguaa<sup>n</sup> tiná<sup>n</sup>ā. <sup>9</sup>Ní rey Herodes mii<sup>n</sup> ní ca<sup>n</sup>a yā: 'Úú ca<sup>n</sup>ā nti<sup>n</sup>nyú<sup>n</sup> chí 'chiitā daandu sa<sup>n</sup>ā chí Juan chí cheédínuū<sup>n</sup>nī sa. ¿Dú'ū chí sa<sup>n</sup>ā mii<sup>n</sup> chí ch'iindivee<sup>n</sup> tanducué<sup>n</sup>e ye<sup>n</sup>e sa? 'Úú ne<sup>n</sup>e cadíinú<sup>n</sup> ní ne<sup>n</sup>e snaá<sup>n</sup> sá<sup>n</sup>a 'cūū.

### Jesús ca'a yā che'e nyu<sup>n</sup>u mil 'ii<sup>n</sup>yā<sup>n</sup>

(Mt. 14.13-21; Mr. 6.30-44; Jn. 6.1-14)

<sup>10</sup>Taachi discípulos ndaa yā naachí canee Jesús, tuu'mi ní ca<sup>n</sup>a yā Jesús tanducué<sup>n</sup>e chí dí<sup>n</sup> yā. Cuayivi ní Jesús cue<sup>n</sup>é yā ndúúcu discípulos ye<sup>n</sup>e yā ní<sup>n</sup>nuú<sup>n</sup> na yáā<sup>n</sup> Betsaida ní cue<sup>n</sup>é yā cuēeti ye<sup>n</sup>e yáā<sup>n</sup> mii<sup>n</sup>ya. <sup>11</sup>Taachí 'ii<sup>n</sup>yā<sup>n</sup> cadíinuu<sup>n</sup> yā ye<sup>n</sup>e Jesús mii<sup>n</sup>, cue<sup>n</sup>é yā n'dáa yā 'ii<sup>n</sup>yā<sup>n</sup>. Ní Jesús 'cuu<sup>n</sup> yā 'ii<sup>n</sup>yā<sup>n</sup> s'ee<sup>n</sup> ní ca<sup>n</sup>a yā chíi yā 'ii<sup>n</sup>yā<sup>n</sup> s'ee<sup>n</sup> ye<sup>n</sup>e naachí Ndyuūs nga<sup>n</sup>a nti<sup>n</sup>nyú<sup>n</sup> yā. Ní dí<sup>n</sup> yā chí nduūvā ye<sup>n</sup>e 'ii<sup>n</sup>yā<sup>n</sup> chí ngiita yā.

<sup>12</sup>Taachí chí chiinū, ndu'u chí ndiichúúví yā ndaa yā nanáá<sup>n</sup> Jesús ní ca<sup>n</sup>a yā chíi yā Jesús: Yaa'vi nī 'ii<sup>n</sup>yā<sup>n</sup> s'ee<sup>n</sup> chí ca<sup>n</sup>a yā cuaa<sup>n</sup> yáā<sup>n</sup> s'ee<sup>n</sup>, ní cuaa<sup>n</sup> yáā<sup>n</sup> 'líí<sup>n</sup> naachi snée 'ii<sup>n</sup>yā<sup>n</sup> ní véé naachi 'cuēetinée yā ní ndaaca yā chí che'e yā, ti nguéé de'ē vεε naachi snée yú.

<sup>13</sup>Jesús ca<sup>n</sup>a yā chíi yā discípulos: Ndís'tii ní ca'a nī chí che'e yā. Discípulos ní ca<sup>n</sup>a yā: 'Āā ntée n'deée ye<sup>n</sup>e 'nū véé ti táá nyu<sup>n</sup>u nū<sup>n</sup> pan ndúúcu 'uūvī 'yaacā. Nguéé cuuvi dí<sup>n</sup> 'nū cuái 'nū chí che'e nducyaaca 'ii<sup>n</sup>yā<sup>n</sup> s'tíi.

<sup>14</sup>Mii<sup>n</sup> ní snée taanduu nyu<sup>n</sup>u mil sa<sup>n</sup>ā. Tuu'mi ní Jesús mii<sup>n</sup> ca<sup>n</sup>á yā

chii yā discipulos ye<sup>n</sup>e yā: Caa<sup>n</sup>ma<sup>n</sup> nti<sup>n</sup>nyú<sup>n</sup> nī 'i<sup>n</sup>yā<sup>n</sup> s'ee<sup>n</sup> chí 'cueeté yā 'uüví ngeecu ndiichí yā 'aama 'áámá cuaa<sup>n</sup>.

<sup>15</sup>Tíicā dí<sup>n</sup> discipulos ní ch'eteté nducyaaca 'i<sup>n</sup>yā<sup>n</sup> s'ee<sup>n</sup>. <sup>16</sup>Tuu'mi ní Jesús mii<sup>n</sup> sta'á yā ndu'u nyu<sup>n</sup>u pan ndúú<sup>n</sup>cū nduu 'uuví 'yaacā. Ní 'iicu n'diichí yā nanguuvi ní ca'á yā gracias Dendyuūs cáávā pan ndúú<sup>n</sup>cū 'yaacā mii<sup>n</sup>. Cuayiivi ní Jesús n'deé yā pan ndúú<sup>n</sup>cū 'yaacā ní ca'a yā discipulos ye<sup>n</sup>e yā. Ch'iinu ní discipulos ca'a ntú<sup>n</sup> yā 'i<sup>n</sup>yā<sup>n</sup> s'ee<sup>n</sup> chí che'e yā. <sup>17</sup>Ch'e nducyaaca yā ní chiituú 'i<sup>n</sup>yā<sup>n</sup>. Cuayiivi ní discipulos nan'gaá<sup>n</sup> yā chí n'ingaavā ní chiituú tá ndiichuuvi 'cueētēē chí n'ingaāvā.

**Pedro mii<sup>n</sup> ní ca<sup>n</sup>ā cuaacu sa chí Jesús mii<sup>n</sup> chí Cristo yā**

(Mt. 16.13-19; Mr. 8.27-29)

<sup>18</sup>Áámá nguuvi taachí Jesús ndúú<sup>n</sup>cū discipulos ye<sup>n</sup>e yā canée yā 'aama lado ní nga<sup>n</sup>ángua'á yā, tuu'mi ní Jesús itiinguuné<sup>n</sup> yā discipulos: ¿Du'ú 'úú nga<sup>n</sup>a 'i<sup>n</sup>yā<sup>n</sup>?

<sup>19</sup>'i<sup>n</sup>yā<sup>n</sup> s'ee<sup>n</sup> ní n'gueécúta<sup>n</sup>a yā: Ná<sup>n</sup>a yā ní nga<sup>n</sup>a yā chí dí Juan chí cheédínuu<sup>n</sup>nī sa díí. Ná<sup>n</sup>a yā ní nga<sup>n</sup>a yā chí díí ní profeta Elías díí; ní ná<sup>n</sup>a yā ní nga<sup>n</sup>a ntú<sup>n</sup> yā chí díí ní 'aama profeta chí 'ā 'naa<sup>n</sup> tiempo chí n'dii ní nduuchí yā ye<sup>n</sup>e nguaa<sup>n</sup> tina<sup>n</sup>ā.

<sup>20</sup>Jesús mii<sup>n</sup> ní ca<sup>n</sup>a yā: Ndís'tii, tuu'mi, ¿du'ú 'úú nga<sup>n</sup>a nī? Tuu'mi ní Simón Pedro nan'gueécúta<sup>n</sup>a yā ní ca<sup>n</sup>a yā: N'dii chí Cristo ye<sup>n</sup>e Ndyuūs.

<sup>21</sup>Jesús chii yā 'i<sup>n</sup>yā<sup>n</sup> s'ee<sup>n</sup> chí nguée<sup>n</sup> cuuvi yā chuū mar 'áámá 'i<sup>n</sup>yā<sup>n</sup>.

**Jesús nga<sup>n</sup>a yā ye<sup>n</sup>e chí taacā 'cuuvi yā**

(Mt. 16.20-28; Mr. 8.30-9.1)

<sup>22</sup>Tuu'mi ní Jesús ca<sup>n</sup>a yā: Cánée chí 'úú chí Sa<sup>n</sup>ā chí Daiyá Ndyuūs n'dee n'dái 'cuenú cuuvi ní 'íicú sa<sup>n</sup>ā ndiicúú chí nga<sup>n</sup>a nti<sup>n</sup>nyu<sup>n</sup> ye<sup>n</sup>e yaacū ndúú<sup>n</sup>cū chiiduú n'geete chí nga<sup>n</sup>a nti<sup>n</sup>nyú<sup>n</sup> yā ndúú<sup>n</sup>cū maestros ye<sup>n</sup>e ley ní nguée<sup>n</sup> ne<sup>n</sup>e yā snaa<sup>n</sup> yā 'úú chí Sa<sup>n</sup>ā chí Daiya Ndyuūs. Ní canée chí 'caa<sup>n</sup>nú<sup>n</sup> yā 'úú. Ní 'úú nduuchí ye<sup>n</sup>e nguaa<sup>n</sup> tiná<sup>n</sup>ā ndii 'cuífnú 'iinū nguuvi.

<sup>23</sup>Cuayiivi ní Jesús nga<sup>n</sup>a yā ngii yā nducyáácá 'i<sup>n</sup>yā<sup>n</sup>: Ndúú<sup>n</sup> chí 'áámá 'i<sup>n</sup>yā<sup>n</sup> ne<sup>n</sup>e yā ca<sup>n</sup>a yā nduucú, canée chí cu'née<sup>n</sup> maá<sup>n</sup> yā tanducué<sup>n</sup>e dendu'ú chí véé ye<sup>n</sup>e yā, ní nguuvi nguuvi cuta'á yā cruz ye<sup>n</sup>e yā chí tan'dúú<sup>n</sup>cā chí 'cueenu taaví yā cuuvi cucáávā 'úú ní ca<sup>n</sup>a yā nduucú. <sup>24</sup>Caati nducyaaca 'i<sup>n</sup>yā<sup>n</sup> chí ne<sup>n</sup>e cá yā nadanguá<sup>n</sup>ai yā vida ye<sup>n</sup>e maa<sup>n</sup> yā na i<sup>n</sup>yee<sup>n</sup>dí 'cūú dindaí yā táámá vida ye<sup>n</sup>e yā nanáá<sup>n</sup> Ndyuūs. Ní nducyaaca 'i<sup>n</sup>yā<sup>n</sup> chí dindaí yā vida ye<sup>n</sup>e yā cucáávā 'úú ndaāca yā táámá vida ye<sup>n</sup>e yā nanáá<sup>n</sup> Ndyuūs. <sup>25</sup>¿De'e dichí'vē sa<sup>n</sup>ā ndúú<sup>n</sup> chí dii<sup>n</sup> sa ganar nducué<sup>n</sup>e chí véé na i<sup>n</sup>yee<sup>n</sup>dí 'cūú ní dí<sup>n</sup> sa chí dindaí sa vida cue<sup>n</sup>e daā<sup>n</sup>ma<sup>n</sup> chí táámá vida ye<sup>n</sup>e yā ní idituuví sa maā<sup>n</sup> vida ye<sup>n</sup>e sa? <sup>26</sup>Ní 'i<sup>n</sup>yā<sup>n</sup> chí cuuvi 'cuinaá<sup>n</sup> yā ye<sup>n</sup>e 'úú nanáá<sup>n</sup> 'i<sup>n</sup>yā<sup>n</sup> ndúú<sup>n</sup>cū nduudu ye<sup>n</sup>e tuu'mi ní 'úú chí Sa<sup>n</sup>a chí Daiya Dendyuūs cuuví 'cuinaá<sup>n</sup> ye<sup>n</sup>e 'i<sup>n</sup>yā<sup>n</sup> 'cūú taachi 'úú ndaá taama vmné<sup>n</sup>eē tan'dúú<sup>n</sup>cā Rey ndúú<sup>n</sup>cū poder ye<sup>n</sup>e Chiidá ndúú<sup>n</sup>cū

poder ye<sup>n</sup>ē maá<sup>n</sup> ní ndúúcū ángeles.  
 27 'Úú nga<sup>n</sup>a cuaacú ndúúcū ndís'tií,  
 chí veε ná<sup>n</sup>a nī chí snee nī 'muu<sup>n</sup>  
 chí nguéé 'cuúvi nī taanduvéé ndíí  
 snaa<sup>n</sup> nī ye<sup>n</sup>e naachí Ndyuūs nga<sup>n</sup>a  
 ntii<sup>n</sup>nyú<sup>n</sup> yā.

**Jesús n̄'daa<sup>n</sup> yā cuerpo ye<sup>n</sup>e maá<sup>n</sup> yā**  
 (Mt. 17.1-8; Mr. 9.2-8)

28 Ch'íínú ní<sup>n</sup>nī<sup>n</sup> nguuví chí Jesús  
 ca<sup>n</sup>a yā nduudu 'cūū, Jesús cue<sup>n</sup>e  
 yā ndúúcū Pedro, ndúúcū Juan  
 ndúúcū Jacobo ní cheε yā na yīcū  
 chí caa<sup>n</sup>ma<sup>n</sup>ngua<sup>á</sup> yā. 29 Ní taachi  
 Jesús nga<sup>n</sup>angua<sup>á</sup> yā, n̄'dáá<sup>n</sup> naa<sup>n</sup>  
 yā ní catecai yā nduuví cuéē ní ngii  
 n'gai. 30 Ní tuu<sup>n</sup>mi nū<sup>n</sup> che'enaā<sup>n</sup>  
 na 'uuví sa<sup>n</sup>ā ndúúcū Jesús. Sa<sup>n</sup>ā  
 s'ee<sup>n</sup> chí<sup>n</sup> Moisés ndúúcū profeta  
 Elías chí 'āā 'naa<sup>n</sup> tiempo chí n'dií  
 yā. 31 Nduu 'iinú yā ní na chideεve  
 chí ngí n'gai ye<sup>n</sup>ē va'ai cheeti  
 nguuví snée yā. Ní nga<sup>n</sup>a yā ye<sup>n</sup>ē  
 chí 'cuúvī Jesús ní 'cueenu taaví yā  
 na yāā<sup>n</sup> Jerusalén. 32 N'dáá rá chí  
 cyaadu Pedro ndúúcū Juan ndúúcū  
 Jacobo nadacueé<sup>n</sup> yā ní n'diichi yā  
 chí ngí n'gai naa<sup>n</sup> Jesús ndúúcū  
 sa<sup>n</sup>ā s'ee<sup>n</sup> chí canee ndúúcū yā.  
 33 Ní taachi Elías ndúúcū Moisés  
 chiví yā ye<sup>n</sup>e Jesús ní 'āā cuéé ca<sup>n</sup>a  
 yā, tuu<sup>n</sup>mi ní Pedro mii<sup>n</sup> ní ca<sup>n</sup>a  
 yā chí yā Jesús: N'dií Maestro,  
 de'e chúúcā n̄'daācā ye<sup>n</sup>e yú chí  
 'cuεetinée yú 'muu<sup>n</sup>. Ní din'dái 'nū  
 'iinū va'ai n'gaiyā; 'áámá ye<sup>n</sup>e nī,  
 'áámá ye<sup>n</sup>ē Moisés, nī 'áámá ye<sup>n</sup>ē  
 Elías. Pedro mii<sup>n</sup> ní nguéé déenu  
 yā de'ē chí nga<sup>n</sup>a yā. 34 Ní ne<sup>n</sup>e chí  
 nga<sup>n</sup>a Pedro mii<sup>n</sup> ndaā 'áámá meēe<sup>n</sup>  
 ní sn'díí 'ii<sup>n</sup>yā<sup>n</sup> s'ee<sup>n</sup> ní 'va'a yā chí  
 ndaa meēe<sup>n</sup> vmnaa<sup>n</sup> yā. 35 Tuu<sup>n</sup>mi ní  
 chí'iindiveé<sup>n</sup> yā 'áámá nduudu chí

nga<sup>n</sup>ā nguaa<sup>n</sup> meēe<sup>n</sup>: Sá<sup>n</sup>a 'cūū ní  
 Daiyá chí ne<sup>n</sup>e taaví. Cu'nee<sup>n</sup> veé<sup>n</sup>  
 nī nducue<sup>n</sup>ē chí nga<sup>n</sup>a sa.

36 Ch'íínú chí'iindiveé<sup>n</sup> yā nduūdū  
 mii<sup>n</sup> ní discípulos n'diichi yā chí Jesús  
 mii<sup>n</sup> canee yā dámaa<sup>n</sup> yā nduucú yā.  
 Ní discípulos ch'εetinee 'diii<sup>n</sup> cheendí  
 yā nguuví s'ee<sup>n</sup> ní nguéé chí yā mar  
 'áámá 'ii<sup>n</sup>yā<sup>n</sup> ye<sup>n</sup>ē chí n'diichi yā.

**Jesús díí<sup>n</sup> yā chí nanduūvā ye<sup>n</sup>e**  
**'áámá sa<sup>n</sup>ā 'líí<sup>n</sup> ye<sup>n</sup>e espíritu ye<sup>n</sup>e**  
**yáá<sup>n</sup>n'guiinū<sup>n</sup>**

(Mt. 17.14-21; Mr. 9.14-29)

37 Táámá nguuví cuayiivi, 'ii<sup>n</sup>yā<sup>n</sup>  
 s'ee<sup>n</sup> ní nangua<sup>á</sup> yā ye<sup>n</sup>e yīcū  
 mii<sup>n</sup> ní nééné 'yaa<sup>n</sup> 'ii<sup>n</sup>yā<sup>n</sup> can'dáa  
 yā na yāā<sup>n</sup> ní cue<sup>n</sup>é yā chí ndaacá  
 yā Jesús. 38 Tuu<sup>n</sup>mi ní 'áámá sa<sup>n</sup>ā  
 chí canee ndúúcū 'ii<sup>n</sup>yā<sup>n</sup> s'ee<sup>n</sup> 'cái  
 sa: N'dií Maestro di'cuítū n'dií  
 chí snaa<sup>n</sup> nī daiyá tí 'áámá n'dyá<sup>n</sup>ā  
 daiyá. 39 Tí 'áámá espíritu ye<sup>n</sup>e  
 yáá<sup>n</sup>n'guiinū<sup>n</sup> ita' sa<sup>n</sup>ā ní ndáaca  
 naā<sup>n</sup> nn'gai sa ní 'caí diitú sa ní  
 n'dee n'dái tiempo chí nééné taa<sup>n</sup>  
 idii<sup>n</sup> espíritu ye<sup>n</sup>e yáá<sup>n</sup>n'guiinū<sup>n</sup>  
 ndúúcū sa ní nguéé ngii vii espíritu  
 ye<sup>n</sup>e yáá<sup>n</sup>n'guiinū<sup>n</sup> ye<sup>n</sup>e sa. 40 Ní  
 'āā díí<sup>n</sup> 'cuítūú discípulos ye<sup>n</sup>e nī  
 chí diví yā espíritu mii<sup>n</sup> ye<sup>n</sup>ē daiyá  
 naati nguéé cuuvi díí<sup>n</sup> yā.

41 Jesús nan'guεecúta<sup>n</sup>a yā:  
 Nds'tií, 'ii<sup>n</sup>yā<sup>n</sup> chí nguéé i'téenu  
 nī ndíí nguéé ndúú idii<sup>n</sup> n'daacá nī.  
 ¿'Áá 'naa<sup>n</sup> tiempo canee chí cuneé  
 ndúúcū ndis'tií? ¿'Áá 'naa<sup>n</sup> tiempo  
 ní canee chí cuheé ndúúcū ndis'tií?  
 Ní nga<sup>n</sup>a yā ngii yā sá<sup>n</sup>ā mii<sup>n</sup>:  
 Cuchí di nanaá<sup>n</sup> ndúúcū daiya di.

42 Taachi sa<sup>n</sup>ā 'díí<sup>n</sup> mii<sup>n</sup> ndaa  
 nii<sup>n</sup>nuú<sup>n</sup> sá nanáá<sup>n</sup> Jesús mii<sup>n</sup>,

espíritu ye<sup>n</sup>e yáá<sup>n</sup>n'guiinū<sup>n</sup>  
 mii<sup>n</sup> chindeēve sa<sup>n</sup>ā 'díí mii<sup>n</sup> ní  
 ch'ēcundáā sa<sup>n</sup>ā. Ní Jesús  
 yaa'vinée<sup>n</sup> yā espíritu ye<sup>n</sup>e  
 yáá<sup>n</sup>n'guiinū<sup>n</sup> chí divíi ye<sup>n</sup>e  
 sa<sup>n</sup>a 'díí<sup>n</sup> mii<sup>n</sup>, ní nanduūvā ye<sup>n</sup>e  
 sa. Tuu'mi ní Jesús nca'á yā sa<sup>n</sup>ā  
 'díí<sup>n</sup> mii<sup>n</sup> chiida sa. <sup>43</sup>Nducyáácá  
 'ii<sup>n</sup>yā<sup>n</sup> nge<sup>n</sup>e yiinu yā ye<sup>n</sup>e poder  
 ye<sup>n</sup>e Dendyuūs chí ch'ēete n'dai. Ní  
 taachi nducyaaca yā che<sup>n</sup>e yiinu yā  
 ye<sup>n</sup>e tanducue<sup>n</sup>ē chí dii<sup>n</sup> Jesús mii<sup>n</sup>,  
 Jesús ca<sup>n</sup>a yā.

**Jesús ca<sup>n</sup>a yā táámá cuuvi ye<sup>n</sup>e chí  
 'cuuvi yā**

(Mt. 17.22-23; Mr. 9.30-32)

<sup>44</sup>Ní chii yā discípulos ye<sup>n</sup>e  
 yā: 'Caandiveé<sup>n</sup> nī n'daācā ye<sup>n</sup>e  
 tanducue<sup>n</sup>ē nduudu chí caa<sup>n</sup>'má<sup>n</sup>  
 ní nguée<sup>n</sup> cuuvi naá<sup>n</sup> nī ye<sup>n</sup>e. 'Úú  
 Sa<sup>n</sup>ā chí Daiya Ndyuūs 'úú ní 'ii<sup>n</sup>yā<sup>n</sup>  
 canee chí naca'a yā 'úú ta'ā 'ii<sup>n</sup>yā<sup>n</sup>.

<sup>45</sup>Discípulos ní nguée<sup>n</sup>  
 tuumicádiinuu<sup>n</sup> yā nduudu chí  
 nga<sup>n</sup>'a Jesús. Canúú<sup>n</sup> n'de'ei  
 nduudú 'cūū ye<sup>n</sup>e yā. Ní nguée<sup>n</sup>  
 túúmícádiinuu<sup>n</sup> yā. Ní 'va'á yā chí  
 ntiinguunee<sup>n</sup> yā Jesús de'ē ne<sup>n</sup>e  
 caa<sup>n</sup>'ma<sup>n</sup> nduudú 'cūū.

**Nduudu ye<sup>n</sup>e du'ū chí ch'ēete ca**

(Mt. 18.1-5; Mr. 9.33-37)

<sup>46</sup>Tuu'mi ní discípulos ye<sup>n</sup>e yā  
 tucá'a yā ca<sup>n</sup>a yā ndúúcu vi'i: 'Du'ū  
 ca chí ch'ēete ca nguaa<sup>n</sup> s'uúú<sup>n</sup>?

<sup>47</sup>Jesús tuumicádiinuu<sup>n</sup> yā táácā  
 chí discípulos nadicádiinuu<sup>n</sup> yā na  
 staava ye<sup>n</sup>e yā ní sta'á yā 'áámá  
 sa<sup>n</sup>ā 'líí<sup>n</sup> ní s'nee<sup>n</sup> yā sa<sup>n</sup>ā nanáa<sup>n</sup>  
 yā. <sup>48</sup>Ní ca<sup>n</sup>a yā chii yā discípulos  
 ye<sup>n</sup>e yā: 'Āā du'ú nū<sup>n</sup> 'ii<sup>n</sup>yā<sup>n</sup> chí  
 'cuaa<sup>n</sup> yā sa<sup>n</sup>ā 'líí<sup>n</sup> 'cūū ndúúcu chí

duuchí 'cuaá<sup>n</sup> yā 'úú. 'Āā du'ú nū<sup>n</sup>  
 'ii<sup>n</sup>yā<sup>n</sup> chí 'cuaá<sup>n</sup> yā 'úú 'cuaá<sup>n</sup> yā  
 'ii<sup>n</sup>yā<sup>n</sup> chí dichó'o yā 'úú. 'Ii<sup>n</sup>yā<sup>n</sup> chí  
 ndiicuu<sup>n</sup> ca yā nguaa<sup>n</sup> ndis'tii ní  
 'ii<sup>n</sup>yā<sup>n</sup> 'cúú, ní ch'ēete ca yā nguaa<sup>n</sup>  
 ndis'tii.

**'Ii<sup>n</sup>yā<sup>n</sup> chí nguée<sup>n</sup> contra ye<sup>n</sup>e yú ní  
 snée yā favor ye<sup>n</sup>e yú**

(Mr. 9.38-40)

<sup>49</sup>Tuu'mi ní Juan ca<sup>n</sup>'a yā chii yā  
 Jesús: N'dií, Maestro, 'āā n'diichí  
 'nū 'áámá sa<sup>n</sup>ā chí divíi sa espíritus  
 ye<sup>n</sup>e yáá<sup>n</sup>n'guiinū<sup>n</sup> ye<sup>n</sup>e 'ii<sup>n</sup>yā<sup>n</sup>  
 ndúúcu chí duuchí ní; ní nguée<sup>n</sup> cuú<sup>n</sup>  
 'nū ti nguée<sup>n</sup> canee sa ndúúcu yú.

<sup>50</sup>Jesús ca<sup>n</sup>'a yā chii yā Juan:  
 'Cuaá<sup>n</sup> nī chí dii<sup>n</sup> sa 'túúca; ti 'ii<sup>n</sup>yā<sup>n</sup>  
 chí nguée<sup>n</sup> dií<sup>n</sup> yā contra ye<sup>n</sup>e s'uúú<sup>n</sup>,  
 'ii<sup>n</sup>yā<sup>n</sup> mii<sup>n</sup> snée yā favor ye<sup>n</sup>e yú.

**Jesús yaa'vinee<sup>n</sup> yā 'uūvi  
 discípulos ye<sup>n</sup>e yā**

<sup>51</sup>Taachi snuū ca'a nguuvi mii<sup>n</sup>  
 chí Jesús mii<sup>n</sup> canée chí ca<sup>n</sup>'á yā  
 na va'ai ch'ēeti nguuvi, Jesús 'āā  
 deenú yā de'ē chí dií<sup>n</sup> yā ní cue<sup>n</sup>e  
 yā ndúúcu valor na yāā<sup>n</sup> Jerusalén.

<sup>52</sup>Ní dichó'o yā na 'úúví sa<sup>n</sup>ā  
 vmnáá<sup>n</sup> ye<sup>n</sup>e yā. Sa<sup>n</sup>ā s'ee<sup>n</sup> ní  
 cue<sup>n</sup>ē sa ní sndaā sa na 'áámá yāā<sup>n</sup>  
 ye<sup>n</sup>e yá<sup>n</sup>āa Samaria chí in'nuu<sup>n</sup> sa  
 nááchí 'cuēetinée yā. <sup>53</sup>Ní 'ii<sup>n</sup>yā<sup>n</sup>  
 samaritanos nguée<sup>n</sup> 'cuu<sup>n</sup> yā Jesús  
 mii<sup>n</sup> ti chicádiinuu<sup>n</sup> yā chí Jesús  
 ca<sup>n</sup>'a yā yāā<sup>n</sup> Jerusalén. <sup>54</sup>Taachí  
 discípulos ye<sup>n</sup>e yā n'giindiveé<sup>n</sup> yā  
 chuū, Jacobo ndúúcu Juan ca<sup>n</sup>'a  
 yā: N'dií, Señor, 'áá ne<sup>n</sup>e nī chí  
 caa<sup>n</sup>'ma<sup>n</sup> n'tii<sup>n</sup>nyu<sup>n</sup> yú chí cun'geé<sup>n</sup>  
 ya<sup>n</sup>ā ye<sup>n</sup>e nanguuvi ní di'cuinú  
 yú 'ii<sup>n</sup>yā<sup>n</sup> 'muu<sup>n</sup> tan'dúúca chí dii<sup>n</sup>  
 profeta Elías mii<sup>n</sup> tiempo chí chó'o

caati 'ii<sup>n</sup>yā<sup>n</sup> s'ee<sup>n</sup> nguéé ne<sup>n</sup>é yā  
'cuaa<sup>n</sup> yā s'uúú<sup>n</sup>?

<sup>55</sup>Tuu'mi ní Jesús mi<sup>n</sup> yaa'vinee<sup>n</sup>  
yā Jacobo ndúúcu Juan ní ca<sup>n</sup>a yā  
chii yā sa<sup>n</sup>á s'ee<sup>n</sup>: Ndís'tii ní nguéé  
tuumicádiinuu<sup>n</sup> nī de'e espíritu ye<sup>n</sup>ē  
chi nga<sup>n</sup>a nī. <sup>56</sup>Úú, ní Sa<sup>n</sup>á chi  
Daiyá Ndyuūs. 'Úú ní nguéé cúchí  
chí dindaí vida ye<sup>n</sup>e 'ii<sup>n</sup>yā<sup>n</sup> s'ee<sup>n</sup>  
naati chí nadingua<sup>n</sup>ái vida ye<sup>n</sup>e  
'ii<sup>n</sup>yā<sup>n</sup> s'ee<sup>n</sup>. Tuu'mi ní cho'ó yā yáá<sup>n</sup>  
mii<sup>n</sup> ní cue<sup>n</sup>e yā táamá yáá<sup>n</sup>.

**Ye<sup>n</sup>e 'ii<sup>n</sup>yā<sup>n</sup> chi ne<sup>n</sup>e yā ca<sup>n</sup>a yā  
ndúúcu Jesús**

(Mt. 8.19-22)

<sup>57</sup>Taachi snúu<sup>n</sup> yā yúúni, 'áámá  
sa<sup>n</sup>á ní ca<sup>n</sup>a sa chii sa Jesús mi<sup>n</sup>:  
N'díí, Señor, ca<sup>n</sup>á nduucú nī 'āā tíí  
núu<sup>n</sup> naachi ca<sup>n</sup>a nī.

<sup>58</sup>Jesús ca<sup>n</sup>a yā chii yā sa<sup>n</sup>á mii<sup>n</sup>:  
'Yuunéé nī véé yiivi yáává ye<sup>n</sup>e tí  
ní 'yaada ní véé 'dééce tí; naati 'úú,  
Sa<sup>n</sup>á chi Daiya Dendyuūs, nguéé  
mar 'áámá cuaa<sup>n</sup> naachi cundiití tíí<sup>n</sup>.

<sup>59</sup>Ní ca<sup>n</sup>a yā chii yā 'áámá sa<sup>n</sup>á:  
Cuchí nī nduucú. Ní sa<sup>n</sup>á mii<sup>n</sup> ní  
ca<sup>n</sup>a sa: N'díí<sup>n</sup> Señor, téé nī lugar  
'úú tí ca<sup>n</sup>á 'cuúchí chiidá ní ca<sup>n</sup>á yú.

<sup>60</sup>Jesús ca<sup>n</sup>a yā: Cu'nee<sup>n</sup> dí 'ii<sup>n</sup>yā<sup>n</sup>  
chi nguéé i'téenu yā chi 'cuúchí yā  
tina<sup>n</sup>á ye<sup>n</sup>e yā tí 'ii<sup>n</sup>yā<sup>n</sup> s'ee<sup>n</sup> chi  
tan'dúúca tina<sup>n</sup>á mii<sup>n</sup>, 'tiicá yā. Dii  
ní cue<sup>n</sup>e di ní caa<sup>n</sup>ma<sup>n</sup> di nduudu  
ye<sup>n</sup>é Ndyuūs ye<sup>n</sup>e naachi Ndyuūs  
nga<sup>n</sup>a ntii<sup>n</sup>nyú<sup>n</sup> yā.

<sup>61</sup>Tuu'mi ní táámá sa<sup>n</sup>á ca<sup>n</sup>a sa chii  
sa Jesús mi<sup>n</sup>: N'díí, Señor, 'úú ne<sup>n</sup>é  
ca<sup>n</sup>á nduucú nī naati téé nī lugar  
'úú tí ca<sup>n</sup>á yaa'ví 'ii<sup>n</sup>yā<sup>n</sup> chi snúu<sup>n</sup> yā  
ndavaacú chi ca<sup>n</sup>á ndúúcu nī.

<sup>62</sup>Jesús ca<sup>n</sup>a yā chii yā sa<sup>n</sup>á  
mii<sup>n</sup>: 'Āā du'ú núu<sup>n</sup> sa<sup>n</sup>á chi cuúndū

tá'a sa na laatú ní 'cuúnu sa cuaa<sup>n</sup>  
dáámí sá, nguéé dichíí'vē sa chi  
cuuvi sa ca<sup>n</sup>a sa nduucú ní dii<sup>n</sup>  
sa ntii<sup>n</sup>nyu<sup>n</sup> ye<sup>n</sup>é naachi Ndyuūs  
nga<sup>n</sup>a ntii<sup>n</sup>nyú<sup>n</sup> yā.

**Jesús dichó'o yā 'iinū ngēecu  
ndiichí discípulos ye<sup>n</sup>e yā  
chí nga<sup>n</sup>á nduudu cuaacu**

**10** 'Cuiinú chúu ní Jesús  
nandēevē yā tá 'iinū ngēecu  
ndiichi discípulos ye<sup>n</sup>e yā ní dichó'o  
yā cá'uúvi ca'uuví yā. Ní cue<sup>n</sup>e  
yā cuáá<sup>n</sup> vmaaa<sup>n</sup> ye<sup>n</sup>e Jesús cuaa<sup>n</sup>  
nducyáácá yáá<sup>n</sup> ndúúcu nduu cuaa<sup>n</sup>  
naachi Jesús canéé chí cá<sup>n</sup>a yā.

<sup>2</sup>Ní Jesús nga<sup>n</sup>a yā ngii yā 'ii<sup>n</sup>yā<sup>n</sup>  
s'ee<sup>n</sup>: 'Cuaacu ní<sup>n</sup>nyú<sup>n</sup> chí nééné  
n'deē cosecha véé chí nééné n'deē  
'ii<sup>n</sup>yā<sup>n</sup> chí canéé chí 'caandivee<sup>n</sup> yā  
nduudu ye<sup>n</sup>é Ndyuūs naati sa<sup>n</sup>á chí  
idii<sup>n</sup> ntii<sup>n</sup>nyu<sup>n</sup> nguéé 'yaa<sup>n</sup> sa. Cáává  
chuú d'cuúftu nī 'iiví Ndyuūs chí  
dichó'o yā 'ii<sup>n</sup>yā<sup>n</sup> chí caa<sup>n</sup>ma<sup>n</sup> yā  
nduudu cuaacu ye<sup>n</sup>é Ndyuūs ní  
nadacuéé<sup>n</sup> yā cosecha ye<sup>n</sup>é Ndyuūs.  
Cosecha mii<sup>n</sup> ní tan'dúúca 'ii<sup>n</sup>yā<sup>n</sup>  
chí cu'téenu yā Ndyuūs. <sup>3</sup>Ndís'tii  
cue<sup>n</sup>e nī caati 'úú dichó'o ndís'tii  
chí ndís'tii ní ca<sup>n</sup>a nī tan'dúúca  
'iiti cuúchí ca<sup>n</sup>a tí nguaa<sup>n</sup> lobos.

<sup>4</sup>Nguéé candéé nī bolsa ndúúcu  
tuūmī, ndíí nguéé nduu morral,  
ndíí nguéé ndúú ndaacuú ye<sup>n</sup>e  
nī. Ní taachi díí<sup>n</sup> nī saludar 'ii<sup>n</sup>yā<sup>n</sup>  
cuaa<sup>n</sup> cyúúni, ní nguéé cuuvi 'naa<sup>n</sup>  
nī. <sup>5</sup>Ní tanducuéé<sup>n</sup> va'āi chí ndaa  
nī caa<sup>n</sup>má<sup>n</sup> nī vmaáá<sup>n</sup> vmaaa<sup>n</sup>  
'túúca: Cuneé 'ii<sup>n</sup>yā<sup>n</sup> ye<sup>n</sup>e va'ái cūū  
ndúúcu vaadi 'diií<sup>n</sup>. <sup>6</sup>Ní nduuti chí  
'ii<sup>n</sup>yā<sup>n</sup> ní ndiicúu<sup>n</sup> yā na va'ai mii<sup>n</sup>,  
tuu'mi ní vaadi 'diií<sup>n</sup> cunéé ndúúcu  
yā. Ní nduuti chí nguéé véé 'ii<sup>n</sup>yā<sup>n</sup>

ndiicúū<sup>n</sup> na va'ai mii<sup>n</sup>, vaadi 'diíí<sup>n</sup> nguéé cunéé ndúúcu yā. <sup>7</sup>Cuēetinée núú<sup>n</sup> nī va'āī naachí 'ii<sup>n</sup>'yā<sup>n</sup> 'cuaá<sup>n</sup> yā ndís'tiī. Che'é nī ní cu'u nī chi téé yā caati 'ii<sup>n</sup>'yā<sup>n</sup> chi idií<sup>n</sup> ntíí<sup>n</sup>'nyu<sup>n</sup> canéé chi nduuví 'íí'vé yā. Ndís'tiī nguéé ca<sup>n</sup>'a nī nduu va'āī nduu va'āī. <sup>8</sup>Āā tíí nūū<sup>n</sup> yāā<sup>n</sup> naachi cūndaa nī ní 'ii<sup>n</sup>'yā<sup>n</sup> míí<sup>n</sup> 'cuaá<sup>n</sup> yā, che'é nī 'āā de'é nūū<sup>n</sup> chi téé yā chi che'é nī. <sup>9</sup>Idií<sup>n</sup> nī chi índuūvā ye<sup>n</sup>'é 'ii<sup>n</sup>'yā<sup>n</sup> chi ngiitā chi sneé yā na yāā<sup>n</sup>. Ní cuuvi nī 'ii<sup>n</sup>'yā<sup>n</sup> ye<sup>n</sup>'ē naachi Ndyuūs nga<sup>n</sup>'a ntii<sup>n</sup>'nyú<sup>n</sup> yā ní 'āā ndāā nīi<sup>n</sup>'nuú<sup>n</sup> naachi snéé yā. <sup>10</sup>Naati 'āā tíí nūū<sup>n</sup> yāā<sup>n</sup> naachi ndāā nī ní 'ii<sup>n</sup>'yā<sup>n</sup> ní nguéé 'cuaá<sup>n</sup> yā ndís'tiī, tuu'mi ní can'daa nī cuaa<sup>n</sup> cyúúní ní caa<sup>n</sup>'ma<sup>n</sup> nī 'túúcā: <sup>11</sup>Ndíí yaācāā ye<sup>n</sup>'ē yāā<sup>n</sup> 'cūū chí caī na ca'á 'nū n'dáádi 'nū ti nguéé cu'teenu nī ye<sup>n</sup>'é 'nū. Naati cadíínuu<sup>n</sup> nī chuū chí ye<sup>n</sup>'ē naachi Ndyuūs nga<sup>n</sup>'a ntii<sup>n</sup>'nyú<sup>n</sup> yā ní 'āā ndāā nīi<sup>n</sup>'nuú<sup>n</sup> naachi snéé nī. <sup>12</sup>Úú, Jesús, nga<sup>n</sup>'á ngíí ndís'tiī chí nguuví taachi Ndyuūs caa<sup>n</sup>'má<sup>n</sup> yā nuu<sup>n</sup>'ndi ye<sup>n</sup>'e 'ii<sup>n</sup>'yā<sup>n</sup>, castigo ye<sup>n</sup>'e 'ii<sup>n</sup>'yā<sup>n</sup> ye<sup>n</sup>'e yāā<sup>n</sup> s'tiī ní diitu cá ní nguéé ti chí cuuvi ye<sup>n</sup>'e 'ii<sup>n</sup>'yā<sup>n</sup> chí nguéé dindaācā ye<sup>n</sup>'e yāā<sup>n</sup> Sodoma.

**Ye<sup>n</sup>'e yāā<sup>n</sup> s'ee<sup>n</sup> naachi 'ii<sup>n</sup>'yā<sup>n</sup> nguēē i'téenu yā Ndyuūs**

(Mt. 11.20-24)

<sup>13</sup>Ca<sup>n</sup>'a Jesús: De'ē chúúca ya'ai ye<sup>n</sup>'e 'ii<sup>n</sup>'yā<sup>n</sup> ye<sup>n</sup>'e yāā<sup>n</sup> Corazín. De'ē chúúca ya'ai ye<sup>n</sup>'e 'ii<sup>n</sup>'yā<sup>n</sup> ye<sup>n</sup>'e yāā<sup>n</sup> Betsaida. Ti ndúúti chí 'ii<sup>n</sup>'yā<sup>n</sup> na yá<sup>n</sup>'āa Tiro ndúúcu 'ii<sup>n</sup>'yā<sup>n</sup> na yá<sup>n</sup>'āa Sidón n'diichí yā vaadi n'giinu chí chíi nguaa<sup>n</sup> ndís'tiī, 'ii<sup>n</sup>'yā<sup>n</sup> ye<sup>n</sup>'e yá<sup>n</sup>'āa s'ee<sup>n</sup> 'āā 'naa<sup>n</sup> ndaācādaamí

yā ye<sup>n</sup>'ē nuu<sup>n</sup>'ndi ye<sup>n</sup>'e yā. Ní ch'ēetinúú<sup>n</sup> yā catecai yā tan'dúúca díínúú<sup>n</sup> ní ch'ēetē yā nguaa<sup>n</sup> yaiyāā tan'dúúca costumbre ye<sup>n</sup>'e 'ii<sup>n</sup>'yā<sup>n</sup> mii<sup>n</sup> ndíí vmnaa<sup>n</sup> taachi chí'i yā chí neené ya<sup>n</sup>'ai yā. <sup>14</sup>Cáāvā chuū ní 'ii<sup>n</sup>'yā<sup>n</sup> ye<sup>n</sup>'e yá<sup>n</sup>'āa Tiro ndúúcu 'ii<sup>n</sup>'yā<sup>n</sup> ye<sup>n</sup>'e yá<sup>n</sup>'āa Sidón 'duū'vī cá castigo ye<sup>n</sup>'é yā nguéé ti ye<sup>n</sup>'e ndís'tiī taachí ndāā nguuví chí Ndyuūs caa<sup>n</sup>'ma<sup>n</sup> yā nuu<sup>n</sup>'ndi ye<sup>n</sup>'e 'ii<sup>n</sup>'yā<sup>n</sup>. <sup>15</sup>Ndíí'tiī, 'ii<sup>n</sup>'yā<sup>n</sup> ye<sup>n</sup>'e yāā<sup>n</sup> Capernaum, ne<sup>n</sup>'é nī díí<sup>n</sup> nī chí maá<sup>n</sup> nī n'gēetē nī naati ca<sup>n</sup>'á nī na infierno.

<sup>16</sup>'Ii<sup>n</sup>'yā<sup>n</sup> chí n'giindiveé<sup>n</sup> yā nduudu ye<sup>n</sup>'ē ndís'tiī ní nduudu ye<sup>n</sup>'ē 'úú n'giindiveé<sup>n</sup> yā. 'Ii<sup>n</sup>'yā<sup>n</sup> chí nguéé ne<sup>n</sup>'e yā ndís'tiī, nguēē ne<sup>n</sup>'e yā 'úú. Ní nguéé ne<sup>n</sup>'e yā Ndyuūs ti 'ii<sup>n</sup>'yā<sup>n</sup> mii<sup>n</sup> dichólo yā 'úú.

**Nanguēēcuunéé 'iīnū ngeēcu ndííchí discípulos ye<sup>n</sup>'é Jesús**

<sup>17</sup>Nguēēcuunéé ndu'ū 'iīnū ngeēcu ndííchí discípulos ndúúcu vaadi yeenú. Ní ca<sup>n</sup>'a yā: N'díí, Señor, espíritus ye<sup>n</sup>'e yāā<sup>n</sup> n'guiniūū<sup>n</sup> n'giindiveé<sup>n</sup> sa ye<sup>n</sup>'e 'nū chí caa<sup>n</sup>'ma<sup>n</sup> ntii<sup>n</sup>'nyú<sup>n</sup> 'nū ndúúcu chiduuchí nī.

<sup>18</sup>Jesús ca<sup>n</sup>'a yā: Cuáácú 'úú ní inaá<sup>n</sup> yāā<sup>n</sup> n'guiniūū<sup>n</sup> tan'dúúca chí sn'daa sa ye<sup>n</sup>'ē nánguuví tan'dúúca 'cuai. <sup>19</sup>Ní Jesús ca<sup>n</sup>'a yā chíi yā discípulos ye<sup>n</sup>'e yā: 'Úú ní teé poder ndís'tiī chí cunca'á nī cúú ndúúcu 'iiti dá<sup>n</sup>'āi, níicu cuchéé nī ndúúcu 'ii<sup>n</sup>'yā<sup>n</sup> chí contra ye<sup>n</sup>'e nī. Ní nguéé du'ū vēē cuuvi cuchéé ye<sup>n</sup>'e ndís'tiī. Ní nguéé idií<sup>n</sup> daño ndís'tiī. <sup>20</sup>Ndíí'tiī nguéé ngíi yeenú nī taachi caa<sup>n</sup>'má<sup>n</sup> nī ntii<sup>n</sup>'nyu<sup>n</sup> ye<sup>n</sup>'ē espíritus ye<sup>n</sup>'e yāā<sup>n</sup> n'guiniūū<sup>n</sup> ní n'giindiveé<sup>n</sup>

ye<sup>ne</sup> nī naati yeenú nī chi canéé nguū<sup>n</sup> chí dúúchí nī na libro ye<sup>ne</sup>é Ndyuūs na va'ai cheeti nguuvi.

### Jesús chii yeenú yā

(Mt. 11.25-27; 13.16-17)

<sup>21</sup> Hora mí<sup>n</sup> nū<sup>n</sup> Jesús yeenú n'dai yā cáávā Espíritu N'dai ye<sup>ne</sup>é Ndyuūs ní ca<sup>n</sup>a yā: N'diī, Chiidá, 'úú ní teé gracia n'diī chí 'iiví nī ye<sup>ne</sup>e va'ai cheeti nguuvi ndúú<sup>cū</sup> yā<sup>ne</sup>ā 'cúu caati snu<sup>n</sup> n'dé'ei nī nduudú 'cūu ye<sup>ne</sup>e 'ii<sup>n</sup>'yā<sup>n</sup> chí déénu ca yā ndúú<sup>cū</sup> 'ii<sup>n</sup>'yā<sup>n</sup> chí n'deēe n'dái túúmícadíinu<sup>n</sup> yā. Ní ca'á nī chí cadíinū<sup>n</sup> 'ii<sup>n</sup>'yā<sup>n</sup> chí ndiicú<sup>n</sup> yā chí nguéé n'deēe cá déénu yā caati 'tíicā ne<sup>ne</sup>e nī dii<sup>n</sup> nī ti n'daācā.

<sup>22</sup> N'diī Chiidá, 'āā tee nī tanducué<sup>ne</sup> 'úú. Mar 'áámá 'ii<sup>n</sup>'yā<sup>n</sup> nguéé déénu yā du'ū chí 'aama n'dya<sup>ne</sup>ā Daiya Dendyuūs, dámaa<sup>n</sup> n'diī Chiidá. Mar 'aama 'ii<sup>n</sup>'yā<sup>n</sup> nguéé déénu yā du'ū chí n'diī Chiidá dámaa<sup>n</sup> 'áámá n'dya<sup>ne</sup>ā daiyá nī, ndúú<sup>cū</sup> 'āā du'ū nū<sup>n</sup> 'ii<sup>n</sup>'yā<sup>n</sup> chí Daiyá Dendyuūs ne<sup>ne</sup>é yā 'cuu<sup>n</sup>'mí<sup>n</sup> yā.

<sup>23</sup> Tuu'mi ní Jesús nga<sup>n</sup>a yā ngii yā discípulos ye<sup>ne</sup>e yā: D'e'c chúú<sup>cā</sup> n'dai ndís'tiī chí ngii naa<sup>n</sup> nī dendu'ū chí ndís'tiī n'gíinu nī. <sup>24</sup> 'Úú ní nga<sup>n</sup>á ngii ndís'tiī chí neené 'yaa<sup>n</sup> profetas ndúú<sup>cū</sup> reyes chí ye<sup>ne</sup>e ndiī cuáá<sup>n</sup> vmaaa<sup>n</sup> né<sup>ne</sup>e yā snaa<sup>n</sup> yā chí ndís'tiī ínaa<sup>n</sup> nī naati nguéé n'diichí yā. Ní ne<sup>ne</sup>é yā 'caandivee<sup>n</sup> yā chí ndís'tiī n'giindivee<sup>n</sup> nī naati nguéé chiindivee<sup>n</sup> yā.

### Sa<sup>n</sup>ā samaritano chí n'dai

<sup>25</sup> 'Áámá maestro ye<sup>ne</sup>e ley chí ne<sup>ne</sup>e sa n'diichinee<sup>n</sup> sa Jesús ndaa

sa nanáa<sup>n</sup> yā ní ntiinguunee<sup>n</sup> sa Jesús: N'diī, Maestro, ¿de'e chí canee chí dií<sup>n</sup> chí ndáácā vida cue<sup>ne</sup>e daā<sup>n</sup>ma<sup>n</sup>?

<sup>26</sup> Jesús nan'guεεcúta<sup>n</sup>a yā: ¿Taacā canéé nguū<sup>n</sup> na ley ye<sup>ne</sup>é chuū? ¿De'e túumicadiinu<sup>n</sup> di ye<sup>ne</sup>e ley ye<sup>ne</sup>e chuū?

<sup>27</sup> Maestro ye<sup>ne</sup>e ley mii<sup>n</sup> nan'guεεcúta<sup>n</sup>a sa: 'Túú<sup>cā</sup> canéé nguū<sup>n</sup>: Diné<sup>ne</sup>e di Señor Ndyuūs ye<sup>ne</sup>e di ndúú<sup>cū</sup> núú<sup>n</sup> má<sup>n</sup> staava ye<sup>ne</sup>e di, ndúú<sup>cū</sup> núú<sup>n</sup> má<sup>n</sup> alma ye<sup>ne</sup>e di, ndúú<sup>cū</sup> tanducué<sup>ne</sup> fuerzas ye<sup>ne</sup>e di, ndúú<sup>cū</sup> tanducué<sup>ne</sup> vaadi cadíinū<sup>n</sup> ye<sup>ne</sup>e di. Ní diné<sup>ne</sup>e di nducyaaca 'ii<sup>n</sup>'yā<sup>n</sup> na nii<sup>n</sup>nuú<sup>n</sup> va'āi ye<sup>ne</sup>e di tan'dúú<sup>cā</sup> chí ne<sup>ne</sup>e di maā<sup>n</sup> di.

<sup>28</sup> Jesús nan'guεεcúta<sup>n</sup>a yā: N'dáácā nan'guεεcúta<sup>n</sup>a di. Dii<sup>n</sup> di chuū, ní cunduūchi di cue<sup>ne</sup>e daā<sup>n</sup>ma<sup>n</sup>.

<sup>29</sup> Sa<sup>n</sup>ā mii<sup>n</sup> ne<sup>ne</sup>e sa cunéé n'daāca sa ní ca<sup>n</sup>a sa chii sa Jesús: ¿Dú'ū chí 'ii<sup>n</sup>'yā<sup>n</sup> chí canéé chí ne<sup>ne</sup>é chí nii<sup>n</sup>nuú<sup>n</sup> va'āi ye<sup>ne</sup>é?

<sup>30</sup> Tuu'mi ní Jesús mii<sup>n</sup> nán'guεεcúta<sup>n</sup>a ye<sup>ne</sup>e sa ndúú<sup>cū</sup> 'áámá cuento chí ejemplo chí 'tíicā: 'Áámá sa<sup>n</sup>ā ngua'āi sa ye<sup>ne</sup>e yáā<sup>n</sup> Jerusalén mii<sup>n</sup> ní cúna<sup>n</sup>a sa na yáā<sup>n</sup> Jericó. Taachi canúú<sup>n</sup> sá yúúni 'ii<sup>n</sup>'yā<sup>n</sup> duucu ní sta'á yā sa<sup>n</sup>ā mii<sup>n</sup> ní divíi yā ndiī catecai sa ní ch'e<sup>ne</sup>e yā sa<sup>n</sup>ā ndií chí ya'āi ca ye<sup>ne</sup>e sa ní 'te'e 'téé nguéé chíi sa ní cuna<sup>n</sup>a yā.

<sup>31</sup> Tuu'mi ní 'áámá chiiduú cho'ó yā yúúni mii<sup>n</sup> ní taachi n'diichi yā sa<sup>n</sup>ā mii<sup>n</sup>, divíi yā cuáá<sup>n</sup> 'diituú yúúni ní cho'ó yā ní cue<sup>ne</sup>é yā. <sup>32</sup> Tiicá ntúú<sup>n</sup> sa<sup>n</sup>ā levita chí chiiduú chí dii<sup>n</sup> nti<sup>n</sup>'nyu<sup>n</sup> ye<sup>ne</sup>e nátaí cho'ó yā

naachi candíítí sa<sup>n</sup>ā mii<sup>n</sup>. N'diichi yā sa<sup>n</sup>ā mii<sup>n</sup> ní divíi yā cuaa<sup>n</sup> 'diituú yúúní. Ní cho'ó yā ní cue<sup>n</sup>é yā. <sup>33</sup>Cuayiivi ní 'áámá sa<sup>n</sup>ā ye<sup>n</sup>e yá<sup>n</sup>āa Samaria cho'ō sa yúúní mii<sup>n</sup>. Taachí ndaa nii<sup>n</sup>nuú<sup>n</sup> sa naachi candíítí sa<sup>n</sup>ā mii<sup>n</sup>, n'diichi sa sa<sup>n</sup>ā nnee ya'āi 'iinu sa sa<sup>n</sup>ā. <sup>34</sup>Ní ndaā sa naachi candíítí sa<sup>n</sup>ā mii<sup>n</sup> ní idi<sup>n</sup> yiicú sá naachi ya'āi ndúúcu aceite ndúúcu vino ní ch'ēecu sa tínnū<sup>n</sup> naachí ya'āi ye<sup>n</sup>ē sa. Ní sn'duú sa sa<sup>n</sup>ā 'yúudū ye<sup>n</sup>e sa ní candēē sa sa<sup>n</sup>ā na yāā<sup>n</sup>. Ní 'nuú<sup>n</sup> sa 'áámá va'ai naachí cuuvi cu'nee<sup>n</sup> sa sa<sup>n</sup>ā mii<sup>n</sup> naachi 'ii<sup>n</sup>yā<sup>n</sup> dí<sup>n</sup> yā cuidado sa<sup>n</sup>ā mii<sup>n</sup>. <sup>35</sup>Chidēēve táámá nguuví, taachi ne<sup>n</sup>e ca<sup>n</sup>a sa tun'dáa sa na 'uūví caadi ye<sup>n</sup>e bolsa ní ca'á sa sa<sup>n</sup>ā vaacu mii<sup>n</sup>. Ní ca<sup>n</sup>a sa chii sa sa<sup>n</sup>ā: N'dií, dí<sup>n</sup> nī cuidado sa<sup>n</sup>ā, ti 'āā taa véé nū<sup>n</sup> chi dí<sup>n</sup> nī gastar ndúúcu sa, taachí nguēecuneé nadíí'vé ye<sup>n</sup>e nī. <sup>36</sup>Maa<sup>n</sup> ní Jesús ntiinguunée<sup>n</sup> yā sa<sup>n</sup>ā mii<sup>n</sup>: Naachi 'iinū sa<sup>n</sup>ā s'ee<sup>n</sup> 'chéē sá chi sa<sup>n</sup>ā chi ne<sup>n</sup>e sa sa<sup>n</sup>ā na nii<sup>n</sup>nuú<sup>n</sup> ya'āi chi 'nuū cá'ai chi duucu mii<sup>n</sup>?

<sup>37</sup>Sa<sup>n</sup>ā mii<sup>n</sup> ní ca<sup>n</sup>ā sa: Sa<sup>n</sup>ā chi nnee ya'āi 'iinu sa. Tuu'mi ní Jesús mii<sup>n</sup> ca<sup>n</sup>a yā: Díí, cue<sup>n</sup>e di, ní dii<sup>n</sup> ntúú<sup>n</sup> di 'túúca.

### Jesús canée yā na vaacu Marta ndúúcu María

<sup>38</sup>Cuayiivi ní cue<sup>n</sup>e Jesús na 'áámá yāā<sup>n</sup> 'líí<sup>n</sup> ní ndaa yā na vaacu 'áámá n'daataá chi nguuví tá Marta. Ní 'cuú<sup>n</sup> tá chi canee yā na vaacu tá. <sup>39</sup>Ní Marta mii<sup>n</sup> ní véé 'aama ví'i yā chi nguuví tá María. Ní María mii<sup>n</sup> ch'iindi tá ná ca'a Señor Jesús mii<sup>n</sup>, ní n'giindivee<sup>n</sup> tá nduudu chí

chi'cuee<sup>n</sup> yā. <sup>40</sup>Marta mii<sup>n</sup> ní nééné n'deēe ntii<sup>n</sup>nyu<sup>n</sup> idi<sup>n</sup> tá ní ndaā tá nanáá<sup>n</sup> Jesús ní ca<sup>n</sup>a tá: N'díí Señor, 'ááá nguéé inadicádinū<sup>n</sup> ye<sup>n</sup>é chi dámaaá<sup>n</sup> n'néé<sup>n</sup> ví'í 'úú chí dí<sup>n</sup> mandado? Cuuvi nī tá<sup>n</sup>ā ní cunnee tá 'úú.

<sup>41</sup>Jesús ca<sup>n</sup>a yā: Dii, Marta, Marta, nééné n'deēe dendu'ú chi nadicádinuu<sup>n</sup> di ye<sup>n</sup>ē dendu'ú chí idi'vaachíí. <sup>42</sup>Véé 'áámá nū<sup>n</sup> dendu'ú chi n'daacā ca. Tá María mii<sup>n</sup> ndeēve tá chí n'daacā ca. Ní chuū nguéé ndivíí 'ii<sup>n</sup>yā<sup>n</sup> ye<sup>n</sup>ē tá.

### Jesús ngi'cuee<sup>n</sup> yā táacā chi 'ii<sup>n</sup>yā<sup>n</sup> cuuvi caa<sup>n</sup>ma<sup>n</sup>ngua'á yā

(Mt. 6.9-15; 7.7-11)

**11** 'Áámá vmné<sup>n</sup>ēe ní Jesús nga<sup>n</sup>angua'á yā 'áámá cuaa<sup>n</sup>, ní taachí ch'iinu ca<sup>n</sup>angua'á yā, discípulos ye<sup>n</sup>e yā ca<sup>n</sup>a yā chii yā Jesús: N'díí Señor, ca'cuée<sup>n</sup> nī nús'uu taacá chi cuuvi caa<sup>n</sup>ma<sup>n</sup>ngua'á nū tan'dúúca chí Juan chí chēédínū<sup>n</sup>nī<sup>n</sup> chí'cuee<sup>n</sup> yā discípulos ye<sup>n</sup>e yā.

<sup>2</sup>Tuu'mi ní Jesús ca<sup>n</sup>a yā chí yā discípulos ye<sup>n</sup>e yā: Taachí ndís'tií caa<sup>n</sup>ma<sup>n</sup>ngua'á nī 'túúca caa<sup>n</sup>ma<sup>n</sup> nī:

N'dií, chí Chiidá 'nū chí canée na va'ai cheeti nguuví. N'daacā n'dai chí 'ii<sup>n</sup>yā<sup>n</sup> dich'eté yā n'dií. Cuchií tiempo chí nga<sup>n</sup>a ntii<sup>n</sup>nyú<sup>n</sup> nī ye<sup>n</sup>e tanducué<sup>n</sup>ē. Cúúví tan'dúúca chí n'dií ne<sup>n</sup>e nī tan'dúúca ná va'ai cheeti nguuví, 'tiicá ntuū<sup>n</sup> ná yá<sup>n</sup>āa 'cúú.

<sup>3</sup>Tée nī chí cuuvi che'é 'nū maa<sup>n</sup>nguuví.

<sup>4</sup> Nadich'εεcú nī nuu<sup>n</sup>ndi ye<sup>n</sup>é 'nū, tan'dúucā chi nús'ūū nadach'εεcú 'nū ye<sup>n</sup>e 'ii<sup>n</sup>yā<sup>n</sup> chi nguεε n'daācā dií<sup>n</sup> yā nduucú 'nū. Nguéé 'cuáá<sup>n</sup> nī chi ndaā nanaá<sup>n</sup> 'nū cosas chi chεεchi ca chi dii<sup>n</sup> chi dií<sup>n</sup> 'nū nuu<sup>n</sup>ndi naati cunneé nī nús'uu chi nguéé dií<sup>n</sup> 'nū nuu<sup>n</sup>ndi ní cuhéé 'nū.

<sup>5</sup> Tuu'mi ní Jesús ca<sup>n</sup>a yā 'áámá ejemplo. ¿Du'ú ndís'tií chi véé amigo ye<sup>n</sup>e nī ní ca<sup>n</sup>'á nī nduu vaacu amigo ná ma<sup>n</sup>'a yaaa<sup>n</sup> ní caa<sup>n</sup>'má<sup>n</sup> nī: N'dií amigo, teé nī 'iinū panes ye<sup>n</sup>e nī 'úú, <sup>6</sup> caati 'áámá amigo ye<sup>n</sup>é chi canuu<sup>n</sup> sa yúúni ndaā sa na vaacú ní nguéé dε'ε vεε chi ca'á chi che'e sa? <sup>7</sup> Ní 'ii<sup>n</sup>yā<sup>n</sup> chi canú<sup>n</sup> yā va'ai mii<sup>n</sup> nán'guεεcúta<sup>n</sup>'a yā: Nguéé dií<sup>n</sup> ndu'ú nī 'úú. 'Āā nduudí cheendi va'āi ní dácaiyāā ye<sup>n</sup>é ní candiití yā nduucú na cama. 'Úú nguéé cuuví nducueé<sup>n</sup> ní teé n'dií chii<sup>n</sup> chi ne<sup>n</sup>e nī. <sup>8</sup> Jesús nga<sup>n</sup>'á yā: 'Úú nga<sup>n</sup>'á ngií ndís'tií. 'Áará chi nguéé nducuee<sup>n</sup> amigo ye<sup>n</sup>é sa chi ca'a yā pan sa<sup>n</sup>'ā mii<sup>n</sup> cááva chi amigo ye<sup>n</sup>é sa, naati nducuee<sup>n</sup> yā ní ca'a yā amigo mii<sup>n</sup> ti amigo mii<sup>n</sup> nguéé 'cuinaa<sup>n</sup> sa chi ngiica sa n'deeε n'dái vueltas. <sup>9</sup> Ní 'úú ní nga<sup>n</sup>'á ngií ndís'tií: Cáácá nī ní Ndyuūs ní tee yā ye<sup>n</sup>é nī, in'nuú<sup>n</sup> nī ní ndaāca nī, 'yáávi nī cheendi va'āi ní nan'guaa<sup>n</sup> ye<sup>n</sup>é nī. <sup>10</sup> Nducyáácá 'ii<sup>n</sup>yā<sup>n</sup> chi ngiica yā Ndyuūs ní Ndyuūs ca'á yā ye<sup>n</sup>e yā. Ní nducyáácá 'ii<sup>n</sup>yā<sup>n</sup> chi in'nuú<sup>n</sup> yā ní ínndaaca yā. Ní nducyáácá 'ii<sup>n</sup>yā<sup>n</sup> chi yaa'vi yā cheendi va'ai, ní nan'guaa<sup>n</sup> ye<sup>n</sup>e yā. <sup>11</sup> Maa<sup>n</sup> ní chεé ndís'tií chi véé daiya nī, ndúúti chi daiya nī caaca pan, ¿áá ca'á nī lado ye<sup>n</sup>e pan

'áámá túūu? O ndúúti chi caaca daiyá nī 'aama 'yaācā, ¿áá ca'a nī lado ye<sup>n</sup>e 'yaācā mii<sup>n</sup> ní 'áámá cúú? <sup>12</sup> O ndúúti chi caaca 'áámá dūtu'u, ¿áá ca'á nī lado ye<sup>n</sup>e dūtu'u 'áámá 'iitida<sup>n</sup>'āi? <sup>13</sup> Ndúúti chi ndís'tií chi cúnnchee<sup>n</sup> nī déenu nī ca'a nī dendu'ú chi n'dáacā daiya nī, tuu'mi ní Chiidá nī chi canéé na va'ai chεeti nguuvu n'deéε cá cá'a yā caati cá'a yā Espíritu N'dai ye<sup>n</sup>é Ndyuūs 'ii<sup>n</sup>yā<sup>n</sup> chí caaca yā chiida yú.

**'Ii<sup>n</sup>yā<sup>n</sup> s'ee<sup>n</sup> nga<sup>n</sup>'a yā chi Jesús mii<sup>n</sup> véé poder ye<sup>n</sup>e yáá<sup>n</sup>'nguiinū<sup>n</sup> ndúúcu yā**

(Mt. 12.22-30; Mr. 3.19-27)

<sup>14</sup> Jesús mii<sup>n</sup> tun'daa yā ye<sup>n</sup>é 'áámá sa<sup>n</sup>'ā 'líí<sup>n</sup> 'áámá espíritu ye<sup>n</sup>e yáá<sup>n</sup>'nguiinū<sup>n</sup> chi dii<sup>n</sup> chi nguéé ngii nga<sup>n</sup>'ā sa. Ní taachí nan'daa espíritu ye<sup>n</sup>e yáá<sup>n</sup>'nguiinū<sup>n</sup> sa<sup>n</sup>'ā 'díf'mī mii<sup>n</sup>, ní ca<sup>n</sup>'a sa. Níicú 'ii<sup>n</sup>yā<sup>n</sup> s'ee<sup>n</sup> n'diichí yā chuū ní ché<sup>n</sup>éé yiinū yā ye<sup>n</sup>é. <sup>15</sup> Ná<sup>n</sup>'ā 'ii<sup>n</sup>yā<sup>n</sup> ní ca<sup>n</sup>'a yā: Sá<sup>n</sup>'a 'cūū ní nitun'daa sa espíritu ye<sup>n</sup>e yáá<sup>n</sup>'nguiinū<sup>n</sup> cáávā poder ye<sup>n</sup>é Beelzebú chi Satanas chí nga<sup>n</sup>'ā ntií<sup>n</sup>'nyu<sup>n</sup> sa ye<sup>n</sup>e espíritus ye<sup>n</sup>e yáá<sup>n</sup>'nguiinū<sup>n</sup>.

<sup>16</sup> Taná<sup>n</sup>'a yā ní ne<sup>n</sup>e n'diichinee<sup>n</sup> yā Jesús ní ngiica yā Jesús chi dií<sup>n</sup> yā 'áámá señal ye<sup>n</sup>é na va'ai chεeti nguuvu chi cuuvi n'diichí yā. <sup>17</sup> Jesús déenu yā chi nacádífnuu<sup>n</sup> 'ii<sup>n</sup>yā<sup>n</sup> s'ee<sup>n</sup> ní ca<sup>n</sup>'a yā chii yā 'ii<sup>n</sup>yā<sup>n</sup> s'ee<sup>n</sup>: 'Áámá gobernador chi nga<sup>n</sup>'ā ntií<sup>n</sup>'nyú<sup>n</sup> yā ye<sup>n</sup>e yáá<sup>n</sup>'ā naachi véé 'uuví partido yā chi ngu<sup>n</sup>'u 'aamá yā ndúúcu táámá yā, tuu'mi ní nguéé cuuvi 'naa<sup>n</sup> tiempo chi 'ii<sup>n</sup>ntyé<sup>n</sup>é yā. 'Tiicá ntúū<sup>n</sup> naachi 'áámá familia yā ndúúti chi n'deéε nadacadífnuu<sup>n</sup> yā chi

vée partido ye<sup>n</sup>e familia mii<sup>n</sup> nguεε cuuvi nduuvidaamá yā. <sup>18</sup>Tiicá ntúū<sup>n</sup> nduuti chi yáá<sup>n</sup>'nguiinū<sup>n</sup> 'cuu<sup>n</sup>'ma<sup>n</sup> sa ndúúcū maa<sup>n</sup> sa, ítáácā canee naachí nga<sup>n</sup>'ā ntii<sup>n</sup>'nyu<sup>n</sup> sa? Caa<sup>n</sup>'má<sup>n</sup> nī 'úú: ¿De'ē cáávā chi nga<sup>n</sup>'a ndís'tii chi caavā yáá<sup>n</sup>'nguiinū<sup>n</sup> chi duuchi Beelzebú chi Satanás itun'daá espíritus ye<sup>n</sup>e yáá<sup>n</sup>'nguiinū<sup>n</sup> ye<sup>n</sup>'é 'ii<sup>n</sup>'yā<sup>n</sup>? <sup>19</sup>Nduuti chi 'úú idivií espíritus ye<sup>n</sup>e yáá<sup>n</sup>'nguiinū<sup>n</sup> cáávā Beelzebú, tuu<sup>n</sup>'mi ní 'ii<sup>n</sup>'yā<sup>n</sup> ndúúcu nī ní 'du'ū poder itun'daa yā espíritus ye<sup>n</sup>e yáá<sup>n</sup>'nguiinū<sup>n</sup>? Chii<sup>n</sup> chi dii<sup>n</sup> 'ii<sup>n</sup>'yā<sup>n</sup> chi ndúúcu nī n'gi<sup>n</sup>'í yā chi nguεε 'tíicā chi nga<sup>n</sup>'a nī. <sup>20</sup>Ndúúti chi cáávā poder ye<sup>n</sup>'é Ndyuūs 'úú itun'daá espíritus ye<sup>n</sup>e yáá<sup>n</sup>'nguiinū<sup>n</sup> ye<sup>n</sup>'é 'ii<sup>n</sup>'yā<sup>n</sup>, tuu<sup>n</sup>'mi ní cuaacu ní<sup>n</sup>'nyú<sup>n</sup> chi naachi Ndyuūs nga<sup>n</sup>'a ntii<sup>n</sup>'nyú<sup>n</sup> yā nndaā nanáá<sup>n</sup> ndís'tii.

<sup>21</sup>Taachi sa<sup>n</sup>'ā dítiinú dii<sup>n</sup> cuidado sa ná vaacu sa ndúúcū íngaatu, tuu<sup>n</sup>'mi ní na vaacu sa canéé seguro. <sup>22</sup>Taachí ndaa táámá sa<sup>n</sup>'ā chí véé fuerzas ye<sup>n</sup>e sa ní ichεε sa nduucú yā ní idivií sa tanducué<sup>n</sup>'ē íngaatu ye<sup>n</sup>'é yā chi ngii chεetinú<sup>n</sup> yā ye<sup>n</sup>'e va'āi mii<sup>n</sup> tuu<sup>n</sup>'mi ní dii<sup>n</sup> sa repartir íngaatu s'ee<sup>n</sup> ndúúcū compañeros ye<sup>n</sup>'ē sa.

<sup>23</sup>'Ii<sup>n</sup>'yā<sup>n</sup> chi nguéé canéé yā lado ye<sup>n</sup>'é, 'ii<sup>n</sup>'yā<sup>n</sup> mii<sup>n</sup> ní canéé yā contra ye<sup>n</sup>'é. 'Ii<sup>n</sup>'yā<sup>n</sup> chi nguéé daama dí<sup>n</sup> cosechar nduucú tuu<sup>n</sup>'mi ní dí<sup>n</sup> yā tan'dúúcā chi ingéē tanducué<sup>n</sup>'ē cosecha.

**Espíritu ye<sup>n</sup>e yáá<sup>n</sup>'nguiinū<sup>n</sup> chi inguεεcunéé na sa<sup>n</sup>'ā**

(Mt. 12.43-45)

<sup>24</sup>Ca<sup>n</sup>'a Jesús: Taachí espíritu ye<sup>n</sup>e yáá<sup>n</sup>'nguiinū<sup>n</sup> nacan'daa

na 'áámá sa<sup>n</sup>'ā, cachiica na yá<sup>n</sup>'āa cuu<sup>n</sup>'ma<sup>n</sup> naachi nguéé ch'εetinee 'ii<sup>n</sup>'yā<sup>n</sup> ní in'nuū<sup>n</sup> naachi cuuvi ntaavi'tuunuu<sup>n</sup> ní nguéé ndaācā. Tuu<sup>n</sup>'mi espíritu mii<sup>n</sup> nadicádíínuu<sup>n</sup> ní nga<sup>n</sup>'a: Nanguεεcunéé na vaacu naachi chiicá. <sup>25</sup>Taachí nndaā na vaacu mii<sup>n</sup> ndaācā chi sa<sup>n</sup>'ā mii<sup>n</sup> tan'dúúcā 'áámá va'ai chi 'āā déévé n'dai ndúúcū nducué<sup>n</sup>'e na lugar ye<sup>n</sup>'ē. <sup>26</sup>Tuu<sup>n</sup>'mi ní espíritu mii<sup>n</sup> cue<sup>n</sup>'e ní in'nuū<sup>n</sup> tá ndéēchē espíritus chi cunncaā ca chí cuuví maā<sup>n</sup>. Ní ndaā espíritus ní ch'εetinee na sa<sup>n</sup>'ā mii<sup>n</sup>. Cuayiivi ní n'geenu sa ngii ca ní cunncaā ca canéé sá nguéé ti cuáá<sup>n</sup> vmnaa<sup>n</sup>.

**Vée vaadi yeenú ye<sup>n</sup>e 'ii<sup>n</sup>'yā<sup>n</sup> chi i'téenu yā Ndyuūs**

<sup>27</sup>Taachí Jesús nga<sup>n</sup>'a yā dendú<sup>n</sup>u 'cūū 'áámá n'daataá 'caí yuudu tá nguaa<sup>n</sup> 'ii<sup>n</sup>'yā<sup>n</sup> s'ee<sup>n</sup>: De'ē chúúcā n'dai n'daataá chi ch'iindiyáa<sup>n</sup> nī ní ntaavi tá n'dii.

<sup>28</sup>Jesús ní ca<sup>n</sup>'a yā: N'daacā ca ye<sup>n</sup>'e 'ii<sup>n</sup>'yā<sup>n</sup> chi n'giindiveé<sup>n</sup> yā nduudu ye<sup>n</sup>'é Ndyuūs, ní i'téenu yā nduudu mii<sup>n</sup>.

**'Ii<sup>n</sup>'yā<sup>n</sup> chi nguéé n'daāca yā ngiica yā 'áámá señal**

(Mt. 12.38-42; Mr. 8.12)

<sup>29</sup>Taachí nduuvidaama 'ii<sup>n</sup>'yā<sup>n</sup> ndúúcū Jesús, Jesús tuc'a yā ca<sup>n</sup>'a yā nduudu mii<sup>n</sup>: 'Ii<sup>n</sup>'yā<sup>n</sup> chí véé yā ngúúví 'cūū nééné cúnnchee<sup>n</sup> yā. In'nuú<sup>n</sup> yā señales naati nguéé ndaācā táámá señal caati dámaā<sup>n</sup> snaa<sup>n</sup> yā señal chi dii<sup>n</sup> Ndyuūs ndúúcū profeta Jonás tiempo chí 'āā chó'oo. <sup>30</sup>Tan'dúúcā Ndyuūs dí<sup>n</sup> yā señal ndúúcū profeta Jonás

ye<sup>ne</sup> 'ii<sup>n</sup>'yā<sup>n</sup> na yáā<sup>n</sup> Nínive, 'tiicá ntuū<sup>n</sup> Sa<sup>n</sup>'ā chi Daiya Ndyuūs cuuvi cunéé yā lado ye<sup>ne</sup> señal tiempo 'cūū. <sup>31</sup>Taachi ndaa nguuvi ye<sup>ne</sup> juicio chi Ndyuūs caa<sup>n</sup>'má<sup>n</sup> yā ye<sup>ne</sup> nuu<sup>n</sup>'ndi ye<sup>ne</sup> 'ii<sup>n</sup>'yā<sup>n</sup>, n'daataá reina chi tiempo chi chó'ōo nga<sup>n</sup>'a ntii<sup>n</sup>'nyu<sup>n</sup> tá ye<sup>ne</sup> lado ye<sup>ne</sup> sur chi ca<sup>n</sup>'a ta ní nducuee<sup>n</sup> tá contra ye<sup>ne</sup> 'ii<sup>n</sup>'yā<sup>n</sup> chi snée yā maa<sup>n</sup>'nguuví. Ní tá<sup>n</sup>'ā mii<sup>n</sup> ní dii<sup>n</sup> tá condenar 'ii<sup>n</sup>'yā<sup>n</sup> chi snée yā maa<sup>n</sup>'nguuvi caati tá<sup>n</sup>'ā mii<sup>n</sup> ya<sup>n</sup>'āi n'dai ngiica tá chi ne<sup>ne</sup> tá ch'iindivee tá ye<sup>ne</sup> vaadí deenu ye<sup>ne</sup> rey Salomón. Maa<sup>n</sup> ní 'muu<sup>n</sup> canéé 'áámá yā chi ch'εεε ca vaadí deenu ye<sup>ne</sup> yā nguéé ti rey Salomón. <sup>32</sup>'Ii<sup>n</sup>'yā<sup>n</sup> chi ch'εetinéé na yáā<sup>n</sup> Nínive ndii cuáá<sup>n</sup> vmnaa<sup>n</sup> nducuee<sup>n</sup> yā ní caa<sup>n</sup>'má<sup>n</sup> yā nuu<sup>n</sup>'ndi ye<sup>ne</sup> 'ii<sup>n</sup>'yā<sup>n</sup> chi snée yā maa<sup>n</sup>' caati 'ii<sup>n</sup>'yā<sup>n</sup> ye<sup>ne</sup> yáā<sup>n</sup> Nínive ndaacadaamí yā ye<sup>ne</sup> nuu<sup>n</sup>'ndi ye<sup>ne</sup> yā cáāvā nduudu ye<sup>ne</sup> Ndyuūs chi ca<sup>n</sup>'a profeta Jonás mii<sup>n</sup>. 'Tíicā ca<sup>n</sup>'á yā díí<sup>n</sup> yā nguuvi chi Jesús caa<sup>n</sup>'má<sup>n</sup> yā nuu<sup>n</sup>'ndi ye<sup>ne</sup> 'ii<sup>n</sup>'yā<sup>n</sup>. 'Caandiveé<sup>n</sup> nī. 'Múú<sup>n</sup> ní véé 'áámá sa<sup>n</sup>'ā chi ch'εεε ca sa nguéé ti profeta Jonás.

**'Áámá ejemplo chi tan'dúúicā 'áámá deeve ye<sup>ne</sup> e cuerpo ye<sup>ne</sup> e yú**

(Mt. 5.15; 6.22-23)

<sup>33</sup>Ca<sup>n</sup>'a Jesús: Mar 'áámá 'ii<sup>n</sup>'yā<sup>n</sup> nguéé cunuu<sup>n</sup> n'dé'ei yā 'aama lámpara chí ngiichi ní nguéé ndúú i'nuū<sup>n</sup> ra yā maa<sup>n</sup> 'aama caja naati s'nuú<sup>n</sup> yā na 'áámá mesa ní 'ii<sup>n</sup>'yā<sup>n</sup> chí cundaa yā ní snaa<sup>n</sup> yā deeve mii<sup>n</sup>. <sup>34</sup>Ndúútináa<sup>n</sup> yú chii<sup>n</sup> chí tan'dúúicā 'aama lámpara ye<sup>ne</sup> e cuerpo ye<sup>ne</sup> e yú. Taachí n'daí nduutináa<sup>n</sup> nī 'tiicá ntúū<sup>n</sup>

n'daí cuerpo ye<sup>ne</sup> é nī ní inaa<sup>n</sup> chí deeve. Naati taachí nguée n'daacā nduutináa<sup>n</sup> nī tan'dúúicā lámparas chí nguéé ngiichi ní 'tiicá ntúū<sup>n</sup> cuerpo ye<sup>ne</sup> e nī cunee ná maāi<sup>n</sup>. <sup>35</sup>N'diichi nī, cundéé nī cuidado nduutináa<sup>n</sup> nī chí deeve ye<sup>ne</sup> e cuerpo ye<sup>ne</sup> é nī chí nguéé canee nī na maāi<sup>n</sup>. <sup>36</sup>'Tiicá ntúū<sup>n</sup> inaa<sup>n</sup> n'dááca nī ní nguéé maāi<sup>n</sup> naachi canee nī nduuti chí candéé nī cuidado nduutinaa<sup>n</sup> nī. Ní véé deeve nanáa<sup>n</sup> nī tan'dúúicā 'áámá lámpara ngiichi ní naā<sup>n</sup> nī chí deeve ye<sup>ne</sup> e.

**Jesús nga<sup>n</sup>'a nuu<sup>n</sup>'ndi ye<sup>ne</sup> e maestros ye<sup>ne</sup> e ley ndúúicū 'ii<sup>n</sup>'yā<sup>n</sup> fariseos**

(Mt. 23.1-36; Mr. 12.38-40; Lc. 20.45-47)

<sup>37</sup>Taachí Jesús mii<sup>n</sup> chiinu cá<sup>n</sup>'a yā chuū, 'áámá sa<sup>n</sup>'ā fariseo ndaa sá nanáa<sup>n</sup> Jesús ní d'icúfítu sa Jesús chí ch'é yā ndúúicū sa. Ní cue<sup>ne</sup> e yā ndúúicū sa. Ní ndaa yā na vaacu sa ní ch'εé yā na mesa. <sup>38</sup>Taachí ndaa tiempo chí che'e yā ní sa<sup>n</sup>'a fariseo mii<sup>n</sup> n'diichi sa chí nguéé naā<sup>n</sup>'nū Jesús ta'á yā, (tan'dúúicā costumbre ye<sup>ne</sup> e 'ii<sup>n</sup>'yā<sup>n</sup> Israel) tuu<sup>n</sup>'mi ní cue<sup>ne</sup> e yiinu sa. <sup>39</sup>Ní Señor Jesús ca<sup>n</sup>'a yā chii yā sa<sup>n</sup>'a fariseo: Díí ndúúicū taná<sup>n</sup>'ā sa<sup>n</sup>'ā fariseos inadéévé nī cuāā<sup>n</sup> daami vaso ndúúicū cu' u chí tan'dúúicā cuerpo ye<sup>ne</sup> e nī naati cuáá<sup>n</sup> che'ēti chí tan'dúúicā staava ye<sup>ne</sup> é nī ndiitúú ndúúicū vaadi 'caa'va ndúúicū dendú'ū chí nguée n'daacā. <sup>40</sup>Ndís'tii chí ch'εechi tíí<sup>n</sup> nī, 'áá nguéé deenú nī chí Ndyuūs din'dái yā 'ii<sup>n</sup>'yā<sup>n</sup> ndúúicū staava ye<sup>ne</sup> é yā ndúúicū cuerpo ye<sup>ne</sup> e yā, ní ne<sup>ne</sup> e yā 'ii<sup>n</sup>'yā<sup>n</sup> chí nadéévé cuerpo ye<sup>ne</sup> é yā ndúúicū staava ye<sup>ne</sup> e yā ndúúicū taanduvéé chí véε che'ēti

cuerpo ye<sup>ne</sup>é yā? <sup>41</sup>Ndís'tiī canéé chi ca'á nī limosnas ye<sup>ne</sup>é nī ndúúcū nuu<sup>n</sup>ma<sup>n</sup> staava ye<sup>ne</sup>é nī caati chuū ní cosa chi n'daācā.

<sup>42</sup>De'ε chúúcā ya'āi ye<sup>n</sup>e ndís'tiī 'ii<sup>n</sup>yā<sup>n</sup> fariseos caati nadicádíinu<sup>n</sup> nī chi n'daāca nī chi díí<sup>n</sup> nī chi nga<sup>n</sup>ā ley ye<sup>ne</sup>é Ndyuūs ti ca'a nī Ndyuūs décima chi ndiichi parte ye<sup>n</sup>e nducué<sup>ne</sup>ē cosecha ye<sup>n</sup>e nī chi yiivíí ndúúcū 'iicudaá<sup>n</sup> ndúúcū tanducué<sup>ne</sup>ē yaātā ngaiyāā. Nguéé véé vaadī ne<sup>n</sup>e ye<sup>ne</sup>é Ndyuūs ndúúcu nī ndíí nguéé díí<sup>n</sup> nī dendu'ū chi cuaacu. Canéé chi díí<sup>n</sup> nī tanducué<sup>ne</sup>ē chi nga<sup>n</sup>ā ley ye<sup>ne</sup>é Ndyuūs ní diné<sup>n</sup>e nī nducyaaca 'ii<sup>n</sup>yā<sup>n</sup> ní ca'á nī décima dendu'ū.

<sup>43</sup>De'ε chúúcā ya'āi ye<sup>n</sup>e ndís'tiī chí ne<sup>n</sup>e nī 'cuéeté nī na silla ye<sup>n</sup>e 'ii<sup>n</sup>yā<sup>n</sup> chi nga<sup>n</sup>a ntií<sup>n</sup>nyu<sup>n</sup> ye<sup>n</sup>e yaācū sinagogas. Ní ndís'tiī ne<sup>n</sup>é nī chi 'ii<sup>n</sup>yā<sup>n</sup> díí<sup>n</sup> yā saludar ndís'tiī taachi snée nī na yúúní.

<sup>44</sup>De'ε chúúcā ya'āi ye<sup>n</sup>e ndís'tiī chi ngi'cuae<sup>n</sup> nī ley ndúúcū 'ii<sup>n</sup>yā<sup>n</sup> fariseos. Ndís'tiī nga<sup>n</sup>a nī chi n'daacā idií<sup>n</sup> nī ní nguéé n'daacā idií<sup>n</sup> nī. Ndís'tiī ní tan'dúúcā 'áámá yáinyā<sup>n</sup> chi 'ii<sup>n</sup>yā<sup>n</sup> nguéé inaa<sup>n</sup> yā ní nguéé déenu yā ye<sup>n</sup>ē ní chiicá yā vmnáá<sup>n</sup> ye<sup>n</sup>e yáinyā<sup>n</sup>, 'tiicá nī.

<sup>45</sup>Tuu'mi ní nan'guēecúta<sup>n</sup>a 'áámá abogado, chi maestros ye<sup>n</sup>e ley. N'diī, Maestro, taachí nga<sup>n</sup>a nī chuū, idií<sup>n</sup> nī chí induuvi táa<sup>n</sup> 'nū.

<sup>46</sup>Naati Jesús ca<sup>n</sup>a yā: De'ε chúúcā ya'āi ntúū<sup>n</sup> ye<sup>n</sup>e ndís'tiī, abogados, maestros ye<sup>n</sup>e ley. Ndís'tiī idií<sup>n</sup> nī n'dee cá leyes chí chēechi cá ní nga'a nī tan'dúúcā chi chēēdi chi sa<sup>n</sup>ā nguéé cuuvi candée sa. Ní ndís'tiī ní ndii mar 'áámá ta'a nī

ní nguéé ituu'ví nī chéédí mii<sup>n</sup>. Ní nguéé díí<sup>n</sup> nī, ní nguéé nginnee nī 'ii<sup>n</sup>yā<sup>n</sup>.

<sup>47</sup>De'ε chúúcā ya'āi ye<sup>n</sup>e ndís'tiī chi nadin'dái nī yaínyā<sup>n</sup> ye<sup>n</sup>e sa<sup>n</sup>ā profetas chi 'āā candée yā nduudu ye<sup>ne</sup>é Ndyuūs tiempo chi 'āā chó'ōo. Ní 'ii<sup>n</sup>yā<sup>n</sup> ye<sup>n</sup>e ndaata ye<sup>ne</sup>é nī ndii cuáá<sup>n</sup> vmnaa<sup>n</sup> ch'ii<sup>n</sup>nu<sup>n</sup> yā sa<sup>n</sup>ā profetas. <sup>48</sup>Cuaacu ní<sup>n</sup>nyu<sup>n</sup> chí ndís'tiī ní ngi<sup>n</sup>i nī chi yeenú nī ye<sup>n</sup>e chi 'ii<sup>n</sup>yā<sup>n</sup> ye<sup>n</sup>e nī ndii cuáá<sup>n</sup> vmnaa<sup>n</sup> ti cuaacu ní<sup>n</sup>nyu<sup>n</sup> 'ii<sup>n</sup>yā<sup>n</sup> ye<sup>n</sup>e ndaata ye<sup>n</sup>e nī ch'ii<sup>n</sup>nu<sup>n</sup> yā sa<sup>n</sup>ā profetas ní maa<sup>n</sup> ní ndís'tiī idin'dái nī yaínyā<sup>n</sup> ye<sup>n</sup>e profetas.

<sup>49</sup>Ní cáāvā chuū ní cáāvā chi Ndyuūs deenu yā tanducué<sup>ne</sup>ē, Ndyuūs ca<sup>n</sup>a yā 'tíicā: 'Úú dicho'ó profetas ndúúcū apóstoles ní nán'a yā 'caa<sup>n</sup>nú<sup>n</sup> yā 'ii<sup>n</sup>yā<sup>n</sup> ní taná<sup>n</sup>a yā can'dáa yā 'ii<sup>n</sup>yā<sup>n</sup> ní díí<sup>n</sup> yā chi 'ii<sup>n</sup>yā<sup>n</sup> s'ee<sup>n</sup> n'geenu yā ngii.

<sup>50</sup>Ndyuūs ca<sup>n</sup>á yā díí<sup>n</sup> yā castigar 'ii<sup>n</sup>yā<sup>n</sup> chi maa<sup>n</sup> snée i<sup>n</sup>'yee<sup>n</sup>dí 'cūū ti 'ii<sup>n</sup>yā<sup>n</sup> ye<sup>n</sup>e ndaata ye<sup>ne</sup>é yā ch'ii<sup>n</sup>nu<sup>n</sup> yā profetas ndíí tiempo taachí Ndyuūs din'dái yā í<sup>n</sup>'yee<sup>n</sup>dí.

<sup>51</sup>Ní ndii tiempo taachi ch'ii<sup>n</sup>nu<sup>n</sup> yā Abel ní chingēē yuuú<sup>n</sup> ye<sup>n</sup>e sa, ndíí taachi ch'ii<sup>n</sup>nu<sup>n</sup> yā Zacarías mii<sup>n</sup> naavta<sup>n</sup>ā ye<sup>n</sup>ē nátai ndúúcū ye<sup>ne</sup>é yaacu templo. Chuū ní nga<sup>n</sup>ā ngii ndís'tiī, caati Ndyuūs ca<sup>n</sup>á yā díí<sup>n</sup> yā castigar 'ii<sup>n</sup>yā<sup>n</sup> chi maa<sup>n</sup> snee i<sup>n</sup>'yee<sup>n</sup>dí 'cūū cáāvā yuuú<sup>n</sup> ye<sup>n</sup>ē 'ii<sup>n</sup>yā<sup>n</sup> s'ee<sup>n</sup>.

<sup>52</sup>De'ε chúúcā ya'āi ye<sup>n</sup>e ndís'tiī chi 'cuéé<sup>n</sup> nī ley ní nguéé ca'cuae<sup>n</sup> nī chi cadíínúú<sup>n</sup> 'ii<sup>n</sup>yā<sup>n</sup> vaadī deenu ye<sup>ne</sup>é Ndyuūs, ní nguéé díí<sup>n</sup> nī tan'dúúcā chi deenu nī chi canéé chi díí<sup>n</sup> nī.

<sup>53</sup>Taachí Jesús ch'iinu ca<sup>n</sup>a yā dendu'u cūū, tuu'mi ní maestros ye<sup>n</sup>e ley ndúúcū 'ii<sup>n</sup>'yā<sup>n</sup> fariseos nduuvu taá<sup>n</sup> yā ye<sup>n</sup>e Jesús ní tucá'a yā itiinguunée<sup>n</sup> yā n'dee n'dái ní ca<sup>n</sup>a yā chii yā Jesús.

<sup>54</sup>Ní n'diichinee<sup>n</sup> yā Jesús ndúúcū nduudu ye<sup>n</sup>e yā. Ní canéé ngiinu yā Jesús mii<sup>n</sup> chí cucáávā nduudu ye<sup>n</sup>e yā ní Jesús cásta'a yā vaanicadíínū<sup>n</sup> ye<sup>n</sup>e yā ní ca<sup>n</sup>a yā nduudu chí nguéé cuaacu. Ní 'íicú cuuvi caa<sup>n</sup>'má<sup>n</sup> yā nuu<sup>n</sup>'ndi ye<sup>n</sup>e Jesús.

### Levadura ye<sup>n</sup>e 'ii<sup>n</sup>'yā<sup>n</sup> fariseos

**12** Tuu'mi ní neené 'yaa<sup>n</sup> 'ii<sup>n</sup>'yā<sup>n</sup> nduuvudaama yā chí tá tīi n'dee 'ii<sup>n</sup>'yā<sup>n</sup> mii<sup>n</sup> chingúú<sup>n</sup>'ndai yā 'aamá yā taamá yā. Tuu'mi ní Jesús mii<sup>n</sup> tucá'a yā ca<sup>n</sup>a yā chii yā discípulos ye<sup>n</sup>e yā: Dí<sup>n</sup> ní cuidado ye<sup>n</sup>e chí ca'cuee<sup>n</sup> 'ii<sup>n</sup>'yā<sup>n</sup> fariseos ti tan'dúúcā levadura ye<sup>n</sup>e pan. Nguéé dii<sup>n</sup> n'daaca yā ye<sup>n</sup>e chí ngi'cuee<sup>n</sup> yā. <sup>2</sup>Ti nguéé de'ē vee chí nin'díi naa<sup>n</sup> chí nguéé cuuvi nánguāā<sup>n</sup> naa<sup>n</sup>. Ní nguéé 'áamá dendú'ū chí cánúū<sup>n</sup> n'de'ei chí nguéé cuuvi cadíínū<sup>n</sup> yā. <sup>3</sup>'Tiicá ntúū<sup>n</sup> dendu'ū chí nga<sup>n</sup>a n'de'ei ndís'tiī, tuu'mi ní 'ii<sup>n</sup>'yā<sup>n</sup> ní 'caandiveé<sup>n</sup> yā. Ní chíí<sup>n</sup> chí ndís'tiī nga<sup>n</sup>a ní ndúúcū 'ii<sup>n</sup>'yā<sup>n</sup> chæti va'āi tuu'mi ní 'ii<sup>n</sup>'yā<sup>n</sup> caa<sup>n</sup>'ma<sup>n</sup> yā cuuvi yā nducyáácá 'ii<sup>n</sup>'yā<sup>n</sup> ndíi na yaacū ye<sup>n</sup>e va'āi.

### Du'ū dí'va'a yú

(Mt. 10.28-31)

<sup>4</sup>Ca<sup>n</sup>a Jesús: Ndís'tiī chí n'dai nduucú, 'úú nga<sup>n</sup>'á ngíi ndís'tiī chí nguéé 'va'á ní 'ii<sup>n</sup>'yā<sup>n</sup> chí 'caa<sup>n</sup>'nu<sup>n</sup> yā cuerpo ye<sup>n</sup>e 'ii<sup>n</sup>'yā<sup>n</sup>, ti 'āā ntéé cuuvi dí<sup>n</sup> yā cosa chí nguéé n'daacā ca

ti chuū. <sup>5</sup>'Úú ní cuuví ndís'tiī du'ū chí dí<sup>n</sup> 'va'á ní: Ndís'tiī ní 'va'á ní Ndyuūs chí taachí 'āā ndíi 'ii<sup>n</sup>'yā<sup>n</sup>, Ndyuūs cuuvi dí<sup>n</sup> yā 'caanuú<sup>n</sup> yā 'ii<sup>n</sup>'yā<sup>n</sup> infierno. 'Túúcā nga<sup>n</sup>'á ngíi ndís'tiī 'ii<sup>n</sup>'yā<sup>n</sup> mii<sup>n</sup> chí dí'va'a ní.

<sup>6</sup>¿'Áá nguéé indíicuí yā na 'uūvī 'yáádā cáávā 'uūvī taa<sup>n</sup> tuūmī? Ndyuūs ní nguéé ngiinaá<sup>n</sup> yā mar 'áamá 'yáádá. <sup>7</sup>Níicú ndíi nducyaaca yuūdū tii<sup>n</sup> ndís'tiī ndii dúúché ndúúcū Ndyuūs. Cáávā chuū nguéé 'va'á ndís'tiī. ¿'Áá nguéé ya'ai ca chíí'vè ndís'tiī nguéé ti 'aama 'yáádá?

Ye<sup>n</sup>e 'ii<sup>n</sup>'yā<sup>n</sup> chí i'teenú yā Cristo ní nga<sup>n</sup>a yā ye<sup>n</sup>e chuū nanáá<sup>n</sup> 'ii<sup>n</sup>'yā<sup>n</sup>  
(Mt. 10.32-33; 12.32; 10.19-20)

<sup>8</sup>Ca<sup>n</sup>a Jesús: 'Úú nga<sup>n</sup>'á ngíi ndís'tiī chí nducyaaca 'ii<sup>n</sup>'yā<sup>n</sup> chí nga<sup>n</sup>a yā chí ye<sup>n</sup>e 'úú nguāā<sup>n</sup> 'ii<sup>n</sup>'yā<sup>n</sup> 'tiicá ntúū<sup>n</sup> 'úú Sá<sup>n</sup>'ā chí Daiya Ndyuūs caa<sup>n</sup>'má<sup>n</sup> nanáá<sup>n</sup> ángeles ye<sup>n</sup>e Ndyuūs chí 'ii<sup>n</sup>'yā<sup>n</sup> s'ee<sup>n</sup> ní ye<sup>n</sup>e 'úú. <sup>9</sup>Nducyaaca 'ii<sup>n</sup>'yā<sup>n</sup> chí nguéé nga<sup>n</sup>a yā chí ye<sup>n</sup>e 'úú nguāā<sup>n</sup> 'ii<sup>n</sup>'yā<sup>n</sup> 'tiicá ntúū<sup>n</sup> 'úú Sá<sup>n</sup>'ā chí Daiya Ndyuūs caa<sup>n</sup>'má<sup>n</sup> nanáá<sup>n</sup> ángeles ye<sup>n</sup>e Ndyuūs chí 'ii<sup>n</sup>'yā<sup>n</sup> s'ee<sup>n</sup> ní nguéé ye<sup>n</sup>e 'úú.

<sup>10</sup>Nducyáácá 'ii<sup>n</sup>'yā<sup>n</sup> chí ca<sup>n</sup>a yā nduudu taa<sup>n</sup> chí nguéé n'daacā chí contra ye<sup>n</sup>e 'úú chí Sá<sup>n</sup>'ā chí Daiya Dendyuūs, Ndyuūs nadach'æcú yā ye<sup>n</sup>e yā. Nducyáácá 'ii<sup>n</sup>'yā<sup>n</sup> chí ca<sup>n</sup>'á yā nduudu taa<sup>n</sup> chí nguéé n'daacā chí contra ye<sup>n</sup>e Espíritu N'dai ye<sup>n</sup>e Ndyuūs, Ndyuūs nguéé nadach'æcú yā ye<sup>n</sup>e yā. Ndíi nguéé ndúú i<sup>n</sup>'yee<sup>n</sup>'dí cūū, ndíi nguéé ndúú táámá i<sup>n</sup>'yee<sup>n</sup>'di chí cuchii.

<sup>11</sup>Taachí 'ii<sup>n</sup>'yā<sup>n</sup> ndéé yā ndís'tiī na yaacū sinagogas nanáá<sup>n</sup> 'ii<sup>n</sup>'ntyé<sup>n</sup>'è

ndúúcū jueces, nguéé nadicádíínuu<sup>n</sup> nī de'ē chí nan'gueecúta<sup>n</sup> a nī o de'ē chí caa<sup>n</sup> ma<sup>n</sup> nī. <sup>12</sup>Espíritu N'dai ye<sup>n</sup>e Ndyuūs cuuvi ndís'tiī hora míí<sup>n</sup> nūu<sup>n</sup> de'ē chí caa<sup>n</sup> ma<sup>n</sup> nī.

**Jesús ngi'cuee<sup>n</sup> yā ye<sup>n</sup>ē  
peligro ye<sup>n</sup>ē vaadī 'cuiica**

<sup>13</sup>Áámá sa<sup>n</sup>ā ca<sup>n</sup>a sa ngii sa Jesús: N'dií, Maestro, cuuví nī 'diinú chí ntée sa vaadī n'gua'aa ye<sup>n</sup>ē chiidá 'nū cuuvi ye<sup>n</sup>é.

<sup>14</sup>Jesús mii<sup>n</sup> ní ca<sup>n</sup>a yā chiī yā sa<sup>n</sup>ā: N'dii, sá<sup>n</sup>ā, ¿du'ú s'neē<sup>n</sup> 'úú vmnaa<sup>n</sup> ye<sup>n</sup>ē n'dii tan'dúúcā juez chí nca'á chí cuuvi ye<sup>n</sup>é nī ye<sup>n</sup>ē 'taa chí véé ye<sup>n</sup>ē chiidá nī?

<sup>15</sup>Úú ní nga<sup>n</sup>á ngii nducyáácá ndís'tiī: Cuin'diichí nī ní cundéé nī cuidado ye<sup>n</sup>e chí ne<sup>n</sup>é nī ye<sup>n</sup>e vaadī 'cuiica caati 'ii<sup>n</sup>yā<sup>n</sup> nguéé ndaaca yā vida cue<sup>n</sup>e daā<sup>n</sup>ma<sup>n</sup> cáávā chí véé n'dee n'dái ye<sup>n</sup>e yā.

<sup>16</sup>Tuu'mi ní Jesús mii<sup>n</sup> ca<sup>n</sup>a yā chiī yā ejemplo 'cūū 'ii<sup>n</sup>yā<sup>n</sup>: Áámá sa<sup>n</sup>ā 'cuiica véé yá<sup>n</sup>aa ye<sup>n</sup>ē sa chí neenē n'dee chiīnu sa. <sup>17</sup>Sá<sup>n</sup>ā mii<sup>n</sup> ní nadicádíínuu<sup>n</sup> sa ní ca<sup>n</sup>ā sa: ¿Táácā díí<sup>n</sup> ti nguéé cuescomate ch'ete naachi nadidaamá cosecha ye<sup>n</sup>é? <sup>18</sup>Ní ca<sup>n</sup>a sa: 'Túúcā díí<sup>n</sup>. Cúndeevé cuescomate ye<sup>n</sup>é ní ndii<sup>n</sup> taama chí ch'etē ca ní mii<sup>n</sup> nadaamá tanducué<sup>n</sup>ē cosecha ye<sup>n</sup>é ndúúcū dendú'ū ye<sup>n</sup>é. <sup>19</sup>Tuu'mi ní caa<sup>n</sup>má<sup>n</sup> mā<sup>n</sup> cuuví alma ye<sup>n</sup>é. Dii alma ye<sup>n</sup>é de'e chúúcā n'dai dii. Néénē n'dee vee ye<sup>n</sup>ē di chí nguáín'daí chí 'náá<sup>n</sup> n'dai cuchéé. Maa<sup>n</sup> ní ntaavi'tuunúū<sup>n</sup> cuchéé, cu'u, ní cuuvi yéénú. <sup>20</sup>Naatí Ndyuūs ca<sup>n</sup>a yā chiī yā sa<sup>n</sup>ā: Díí sa<sup>n</sup>ā chí cheechi tií<sup>n</sup> di. Maa<sup>n</sup>nguiinú<sup>n</sup> 'cūū

ca<sup>n</sup>a di 'cuūví di. Ní chíí<sup>n</sup> chí nguáín'daí di chí vaadī 'cuiica ye<sup>n</sup>ē di, ¿du'ū cuuvi ye<sup>n</sup>ē? <sup>21</sup>Ní Jesús nga<sup>n</sup>a yā: 'Tíicā 'ii<sup>n</sup>yā<sup>n</sup> chí nguain'dai yā chí véé ye<sup>n</sup>e maá<sup>n</sup> yā cáávā ma<sup>n</sup> yā naati 'ii<sup>n</sup>yā<sup>n</sup> s'ee<sup>n</sup> ní nguéé véé ye<sup>n</sup>é yā nanáá<sup>n</sup> Ndyuūs.

**Ndyuūs idií<sup>n</sup> yā cuidado nducyaaca  
'ii<sup>n</sup>yā<sup>n</sup> chí daiyá yā**

(Mt. 6.25-34)

<sup>22</sup>Jesús nga<sup>n</sup>a yā ngii yā discípulos ye<sup>n</sup>e yā: Cáávā chuū chí nga<sup>n</sup>á ngii ndís'tiī. Nguéé nadicádíínuu<sup>n</sup> nī ye<sup>n</sup>e vida ye<sup>n</sup>e ma<sup>n</sup> nī ye<sup>n</sup>ē chí nge'e nī cáávā vida ye<sup>n</sup>e nī ndii nguēe ndúú cáávā catecaí nī ye<sup>n</sup>ē cuerpo ye<sup>n</sup>é nī. <sup>23</sup>Vida ní ya'ai ca chíí'vē nguéé ti chí nge'é nī. Ní cuerpo ní ya'ai ca chíí'vē nguéé ti catecaí nī. <sup>24</sup>Nadicádíínuu<sup>n</sup> nī ye<sup>n</sup>e 'yaadā chí nguuvi ti cuervos. 'Yaada s'ee<sup>n</sup> ní nguéé ngiīnu tī ndaata; ndíí nguéé ndúú ingii cosecha ye<sup>n</sup>é tī chí che'e tī; ndíí nguéé ndúú véé ra vaacú tī chí nguain'dai tī; ndíí nguéé ndúú cuescomates ye<sup>n</sup>e tī. Ní Ndyuūs nga'a yā chí nge'e tī. ¿Áá ya<sup>n</sup>'ai ca chíí'vē ndís'tiī nguéé tí 'yaada s'ee<sup>n</sup>? <sup>25</sup>¿Du'u 'áámá chéé ndís'tiī cuuví cundéé nī cuidado ní n'dee n'dái nacadiinúú<sup>n</sup> nī ní ntiinee nī ma<sup>n</sup>a metro ye<sup>n</sup>ē chí yaacu nī? <sup>26</sup>Ndúúti chí nguēe cuuvi díí<sup>n</sup> nī chuū chí 'líí<sup>n</sup> ¿de'e cúví chí indeé nī cuidado ní n'dee n'dái nadicádíínuu<sup>n</sup> nī ye<sup>n</sup>e dendu'ū chí n'geete cá?

<sup>27</sup>Cuin'diichí nī naandā táácā n'giita. Nguéé din'dái tíínuu<sup>n</sup>, ndíí nguéé ndúú idin'dái hilo. 'Úú nga<sup>n</sup>á ngii ndís'tiī ti rey Salomón canú<sup>n</sup> yā catecaí yā chí n'deevé n'dai ye<sup>n</sup>e rey nguéé neenē

n'deevéé tan'dúucā 'áámá naāndā s'ee<sup>n</sup>. <sup>28</sup>Nduuti chi Ndyuūs nga'a yā catecai n'daacā naāndā chi maa<sup>n</sup> ní snéé cuēeti ní cavyaa<sup>n</sup> ní nti'i ní 'ii<sup>n</sup>yā<sup>n</sup> 'nee<sup>n</sup> yá<sup>n</sup>a yā, n'deēe cá Ndyuūs tée yā ndís'tiī ti Ndyuūs dii<sup>n</sup> yā cuidado ye<sup>n</sup>e ndís'tiī chi dúu'vii i'téenu nī Ndyuūs. <sup>29</sup>Ndís'tiī ní nguéé in'nuú<sup>n</sup> nī chi che'e nī o cu'ú nī. Nguéé nadicádíinu<sup>n</sup> nī ye<sup>n</sup>e ní 'cuēetinéé 'dii<sup>n</sup> nī. <sup>30</sup>Ti 'ii<sup>n</sup>yā<sup>n</sup> chi nguéé ye<sup>n</sup>e ndaata Israel o judíos in'nuú<sup>n</sup> yā tanducue<sup>n</sup>e dendu'ú 'cūū. Naati ndís'tiī ni véé 'aama Chiidá nī chi 'āā déenu yā ye<sup>n</sup>e tanducue<sup>n</sup>e dendu'ú chi necesidades ye<sup>n</sup>e ndís'tiī. <sup>31</sup>Vmnáá<sup>n</sup> vmnaa<sup>n</sup> ndís'tiī ní cánéé chí in'nuú<sup>n</sup> nī Ndyuūs ní ye<sup>n</sup>e nducué<sup>n</sup>e ye<sup>n</sup>e chi Ndyuūs nga<sup>n</sup>a nti<sup>n</sup>'nyú<sup>n</sup> yā, ní 'íicú Ndyuūs tée yā ndís'tiī tánducue<sup>n</sup>e déndu'ú.

**Vaadi 'cuiica chi véé na va'ai cheeti nguuvi**

(Mt. 6.19-21)

<sup>32</sup>Ca<sup>n</sup>a Jesús: Ndís'tiī chi tan'dúucā 'iiti cuūchī ye<sup>n</sup>e 'tiicá nī. Nguéé 'va'á nī ti Ndyuūs Chiida yú ne<sup>n</sup>e yā tée yā ndís'tiī dendu'ú ye<sup>n</sup>e naachí nga<sup>n</sup>a nti<sup>n</sup>'nyú<sup>n</sup> yā. <sup>33</sup>Cuin'díicui nī chi véé ye<sup>n</sup>e nī ní ca'á nī 'ii<sup>n</sup>yā<sup>n</sup> chi nguéé véé ye<sup>n</sup>e yā. Dii<sup>n</sup> n'daacá nī caati cuuvi ye<sup>n</sup>e nī vaadi 'cuiica ye<sup>n</sup>e va'ai cheeti nguuvi naachi 'ii<sup>n</sup>yā<sup>n</sup> duucu nguéé cuuvi cundaa yā, ndii nguēe nduu í'yéevē cuuvi di'tuuví ti. <sup>34</sup>Caati naachi canéé vaadi 'cuiica ye<sup>n</sup>e nī, mii<sup>n</sup> canee staava ye<sup>n</sup>e nī chí nadicadiinuú<sup>n</sup> nī ye<sup>n</sup>e nducué<sup>n</sup>e.

**Canéé chi candéé nī cuidado ye<sup>n</sup>e nducué<sup>n</sup>e**

<sup>35</sup>Cuēetinee chiichi n'daacā ndúúcu catecai nī. Cuēchiichí

nī paño cheēti nī 'íicú candéé nī lámparas ye<sup>n</sup>e nī chí ngiichi. <sup>36</sup>Cuēetinéé ndís'tiī tan'dúucā 'áámá sa<sup>n</sup>a chí snéé ngiinu sa chí ndaa patrón ye<sup>n</sup>e sa naachi n'giindivaacú 'ii<sup>n</sup>yā<sup>n</sup>. Ní maa<sup>n</sup> nda'ai sa cheendi va'ái ní taachi ndaa yā chi di'cuēecú yā tuu'mí nūu<sup>n</sup> nn'guaā<sup>n</sup> sa ye<sup>n</sup>e yā. <sup>37</sup>De'ē chúucā n'dai mozos chí dii<sup>n</sup> mandado ní taachi ndaa Señor mii<sup>n</sup> ní ndaaca yā mozos chí sндуuchí yā. Cuaacu ní<sup>n</sup>'nyú<sup>n</sup> nga<sup>n</sup>'á ngí ndís'tiī chí Señor mii<sup>n</sup> ní cuēchiichí n'daacá yā paño cheēti yā. Ní Señor mii<sup>n</sup> ní dii<sup>n</sup> yā chí mozos 'cuēete sa na mesa. Tuu'mi ní Señor mii<sup>n</sup> 'cuíi yā cu'u che'e mozos. <sup>38</sup>Áará chí Señor mii<sup>n</sup> ndaa yā ma<sup>n</sup>'a yaaa<sup>n</sup> o taachi 'āā cuéé chideēve nguuvi ní ndaacá yā mozos chí sндуuchi sa. De'e chúucā n'dai mozos ti sндуuchí yā. <sup>39</sup>Ndís'tiī ní cadíinu<sup>n</sup> nī chuū. Ndúúti chí 'ii<sup>n</sup>yā<sup>n</sup> vaacu déenu yā de'ē hora chí ndaa chí duucu, cuaacu ní<sup>n</sup>'nyú<sup>n</sup> 'cuēetí nduuchí yā ní nguéé 'cuaa<sup>n</sup> yā chí duucu na vaacú yā. <sup>40</sup>Tiicá ntúū<sup>n</sup> ndís'tiī 'cuēetinéé yaá<sup>n</sup> nī ti hora chí nguéé inacádiinu<sup>n</sup> nī 'úú chí Sa<sup>n</sup>'a chí Daiyá Dendyuūs ní ndaa taama vmné<sup>n</sup>e.

**Ye<sup>n</sup>e mozo chí din'daacā ndúucū mozo chí nguēe din'daacā**

(Mt. 24.45-51)

<sup>41</sup>Tuu'mi ní Pedro mii<sup>n</sup> ní ca<sup>n</sup>a yā chii yā Jesús: N'díi, Señor, ¿'áa ca<sup>n</sup>a nī ejemplo 'cūū caavā nús'uu o caavā nducyaaca 'ii<sup>n</sup>yā<sup>n</sup>?

<sup>42</sup>Jesús mii<sup>n</sup> ní ca<sup>n</sup>'a yā: ¿Du'ú dueño ca'a yā nti<sup>n</sup>'nyu<sup>n</sup> chí s'nee<sup>n</sup> yā vmnaa<sup>n</sup> ye<sup>n</sup>e va'ai ye<sup>n</sup>e yā 'áámá mayordomo nduuti chí

ngueε ca'a sa chi che'e mozos ye<sup>n</sup>é yā hora chi che'e sa? <sup>43</sup>De'ε chúucā n'dai mayordomo chi dii<sup>n</sup> sa ntii<sup>n</sup>nyu<sup>n</sup> taachí dueño mii<sup>n</sup> ní ndaa yā ní nandaaca yā mayordomo chi dii<sup>n</sup> sa tan'dúucā chi ne<sup>n</sup>e yā. <sup>44</sup>Cuaacu ní<sup>n</sup>nyú<sup>n</sup> nga<sup>n</sup>á ngíí ndís'tií chi dueño mii<sup>n</sup> ní cu'née<sup>n</sup> yā mayordomo mii<sup>n</sup> chi caa<sup>n</sup>ma<sup>n</sup> ntii<sup>n</sup>nyu<sup>n</sup> sa ye<sup>n</sup>ē tanduvéé chi vεε ye<sup>n</sup>e yā. <sup>45</sup>Ndúúti chi mayordomo mii<sup>n</sup> nadicádiinu<sup>n</sup> sa na staava ye<sup>n</sup>e sa chí dueño cuuvi 'náa<sup>n</sup> yā ndaa yā tuu'mi ní tuca'a sa 'cue<sup>n</sup>e sa mozo ndúúcū n'daataa chi snéé caadi 'iyyū ní nge'e sa ní ng'i' sa ndúúcū amigos ye<sup>n</sup>e sa ní cuu'vi sa. <sup>46</sup>Tuu'mi ní dueño mii<sup>n</sup> ní ndāa yā nguuvi chi mayordomo nguéé cānee ngíinu sa ní 'áámá hora chi nguéé déenu sa. Ní dueño mii<sup>n</sup> ca'á yā castigo ch'εεε ca mayordomo mii<sup>n</sup> tan'dúucā chi Ndyuūs ca'a yā castigo 'ii<sup>n</sup>yā<sup>n</sup> chi nguéé i'téenu yā yā. <sup>47</sup>Mayordomo chi deenu sa chí ne<sup>n</sup>e dueño ye<sup>n</sup>e sa naati nguéé véé yaa<sup>n</sup> sa ndíí nguéé ndúú dii<sup>n</sup> sa chi nga<sup>n</sup>a dueño ye<sup>n</sup>e sa cuuvi sa castigado ndúúcū neené n'deeε cuúví 'cue<sup>n</sup>é yā sa<sup>n</sup>ā. <sup>48</sup>Naati mayordomo chi nguéé déenu sa taacā ne<sup>n</sup>e dueño ye<sup>n</sup>e sa chí dii<sup>n</sup> sa, ní dii<sup>n</sup> sa chí nguéé n'daacā chí cuuví sa castigado, tuu'mi ní cuuvi sa castigado ndúúcū 'téé nūu<sup>n</sup> cuúví cue<sup>n</sup>é yā sa<sup>n</sup>ā. 'Āā du'ú nūu<sup>n</sup> sa<sup>n</sup>ā chí n'deeé nga'a dueño ye<sup>n</sup>e sa, dueño mii<sup>n</sup> ní n'deēε cá caaca yā cuenta ye<sup>n</sup>ē chí dii<sup>n</sup> sa. 'Ii<sup>n</sup>yā<sup>n</sup> chí nga'a n'deēε cá táámá yā, 'ii<sup>n</sup>yā<sup>n</sup> mii<sup>n</sup> n'deēε cá caaca yā cuenta ye<sup>n</sup>e chí dii<sup>n</sup> taamá yā.

Véé 'áámá 'uúví taa<sup>n</sup> 'ii<sup>n</sup>yā<sup>n</sup> cáávā Jesús mii<sup>n</sup>

(Mt. 10.34-36)

<sup>49</sup>'Úú Jesús ní ndāa chí cu'neé<sup>n</sup> ya<sup>n</sup>ā ná i<sup>n</sup>'yee<sup>n</sup>dí 'cūū. De'ε ca ne<sup>n</sup>é dií<sup>n</sup> nduuti chí 'āā ngiichi. <sup>50</sup>Canéé chí 'úú 'cueenú cuuvi n'deeε ndáí ní ne<sup>n</sup>é chí 'cueenú cuuvi ndíí taachi 'āā cuuví cuaacu tanducué<sup>n</sup>ē. <sup>51</sup>'Áá nadicadíinu<sup>n</sup> ní chí 'úú ndaa chí ndéε vaadi 'dií<sup>n</sup> 'ii<sup>n</sup>yā<sup>n</sup> ye<sup>n</sup>e i<sup>n</sup>'yee<sup>n</sup>dí 'cūū? 'Úú ní nga<sup>n</sup>á ngíí ndís'tií chí nguéé cuaacu caati ndéε vaadi 'caa'va, ní 'ii<sup>n</sup>yā<sup>n</sup> 'caa'vá yā ndúúcū táámá 'ii<sup>n</sup>yā<sup>n</sup>. <sup>52</sup>Ndíí tiempo mii<sup>n</sup> ndíí tiempo chí cuchii, nduuti chí nyu<sup>n</sup>'u 'ii<sup>n</sup>yā<sup>n</sup> na 'áámá va'āi ndúúcū vaadi 'caa'va 'cuetinéε yā, 'iinu yā ní ca<sup>n</sup>a yā contra ye<sup>n</sup>ē na 'uuvi yā ní 'uuvi yā ní ca<sup>n</sup>'a yā contra ye<sup>n</sup>ē ná 'iinú yā. <sup>53</sup>Sa<sup>n</sup>ā chí véé daiya sa ní 'caa'va sa ndúúcū daiya sa, 'íicú daiya sa ní 'caa'vá sa ndúúcū chiidá sa. Ní 'áámá n'daataa nguéé cuuvi n'diichi tá daiya tá, 'íicú daiya ntúū<sup>n</sup> tá nguéé cuuvi n'diichi tá cheεcu tá. Ní ta<sup>n</sup>ā indá'ā tá ní 'caa'vá yā ndúúcū dicuūnú ta, ní dicuūnú ta ní 'caa'vá yā ndúúcū tá<sup>n</sup>ā indá'a tá.

Señales ye<sup>n</sup>e tiempo 'cūū

(Mt. 16.1-4; Mr. 8.11-13)

<sup>54</sup>'Tiicá ntúū<sup>n</sup> nga<sup>n</sup>'a Jesús ngii yā 'ii<sup>n</sup>yā<sup>n</sup>: Taachí ndís'tií inaa<sup>n</sup> ní mééε chí ínee<sup>n</sup> naachí ngiia 'yá<sup>n</sup>ā, tuu'mi ní nga<sup>n</sup>'a ní chí 'cuee<sup>n</sup> cúúví. Ní 'tíicā ngii. <sup>55</sup>Ní taachí ngéenu 'yúúné cuáá<sup>n</sup> ndiia nga<sup>n</sup>'a ní chí cuuvi yāā<sup>n</sup> 'iicu ní ngii. <sup>56</sup>Ndís'tií chí 'uúví naa<sup>n</sup> 'uúví cheendi ní déenu ní taaca canéé nánguuví

ndúúcú na ya<sup>n</sup>á, taachi ndaā 'íí'nūu<sup>n</sup>  
ni taachi cuuvi 'cuee<sup>n</sup> cuuvi. ¿Dē'ē  
cúúví chí nguéé déenu nī ye<sup>n</sup>e  
señales chí inaa<sup>n</sup> nī ye<sup>n</sup>e tiempo  
'cūū?

**Dii<sup>n</sup>nú yii<sup>n</sup>nu di tun'dáá n'dai di  
ndúúcú 'ii<sup>n</sup>yā<sup>n</sup> chí táa<sup>n</sup> yā ye<sup>n</sup>e di**

(Mt. 5.25-26)

<sup>57</sup>Tuu'mi ní ca<sup>n</sup>a Jesús: ¿Dē'ē  
cúúví chí nguéé indéē ndís'tií  
cuidado chēē chí n'daācā chí díí<sup>n</sup> nī?  
<sup>58</sup>Taachi ca<sup>n</sup>á nī ndúúcú sá<sup>n</sup>ā chí  
táā<sup>n</sup> ndúúcú nī nanáá<sup>n</sup> juez, n'diichí  
nī chí indee nī ndúúcú vi'í cuaa<sup>n</sup>  
cyúúní ní díí<sup>n</sup> nī chí 'cuētinéé  
n'dáāca nī ndúúcú vi'í nī 'iicu  
nguéé ca<sup>n</sup>a nī nanáá<sup>n</sup> juez. Ní juez  
mii<sup>n</sup> nca'á yā ndís'tií taā policía, ní  
policía mii<sup>n</sup> ní cu'nuú<sup>n</sup> sá ndís'tií  
vácūū. <sup>59</sup>Úú nga<sup>n</sup>á ngíí ndís'tií ti  
nguéé nan'dáa nī vácūū ne<sup>n</sup>e chí  
nguéé 'cuiinu nadíí'vē tanducué<sup>n</sup>ē  
chí ndiicuú nī.

**N'dáācā n'dai chí ndaacadaamí  
nī ye<sup>n</sup>e nuu<sup>n</sup>ndi ye<sup>n</sup>e nī**

**13** Ndáa n'duuvi sa<sup>n</sup>ā nanáá<sup>n</sup>  
Jesús ní ca<sup>n</sup>a sa chíi sa  
Jesús tan'dúúca chí díí<sup>n</sup> gobernador  
Pilato. Ca'a yā orden chí ch'ii<sup>n</sup>nu<sup>n</sup>  
sa n'dúúví 'ii<sup>n</sup>yā<sup>n</sup> ye<sup>n</sup>e yá<sup>n</sup>āa  
Galilea ní sta<sup>n</sup>a yā yuuú<sup>n</sup> ye<sup>n</sup>e  
'ii<sup>n</sup>yā<sup>n</sup> s'ee<sup>n</sup> ndúúcú yuuú<sup>n</sup> ye<sup>n</sup>e 'iiti  
chí 'āā 'níf<sup>n</sup>nú<sup>n</sup> 'ii<sup>n</sup>yā<sup>n</sup> Israel s'ee<sup>n</sup>  
chí ca'a yā ofrenda ye<sup>n</sup>e Ndyuūs.  
<sup>2</sup>Jesús ní ca<sup>n</sup>a yā chíi yā 'ii<sup>n</sup>yā<sup>n</sup>  
s'ee<sup>n</sup>: ¿Áá nadicádíínuu<sup>n</sup> ndís'tií  
chí 'ii<sup>n</sup>yā<sup>n</sup> s'ee<sup>n</sup> ye<sup>n</sup>e yá<sup>n</sup>āa Galilea  
ch'eenu yā 'tíicā ti véé ca nuu<sup>n</sup>ndi  
ye<sup>n</sup>e yā nguéé ti taná<sup>n</sup>ā 'ii<sup>n</sup>yā<sup>n</sup>  
ye<sup>n</sup>e yá<sup>n</sup>āa Galilea? <sup>3</sup>Úú nga<sup>n</sup>á  
ngíí ndís'tií: Nguéé 'tíicā. Ndúúti

chí ndís'tií nguéé ndaacadaamí nī  
ye<sup>n</sup>e nuu<sup>n</sup>ndi ye<sup>n</sup>e nī, tuu'mi ní  
nducyaaca ndís'tií 'cuūvi ntúú<sup>n</sup> nī  
cue<sup>n</sup>e daā<sup>n</sup>ma<sup>n</sup>. <sup>4</sup>¿Dē'ē nadicádíínuu<sup>n</sup>  
ndís'tií ye<sup>n</sup>e ndu'ū ndítii<sup>n</sup>yu 'iinu  
'ii<sup>n</sup>yā<sup>n</sup> chí ndíí cuaa<sup>n</sup> vmaaa<sup>n</sup>  
sndaā nduūu torre na yáā<sup>n</sup> Siloé  
vmnáá<sup>n</sup> yā ní nducyáácá yā ch'ii  
yā? ¿Áá nadicádíínuu<sup>n</sup> ndís'tií chí  
'ii<sup>n</sup>yā<sup>n</sup> s'ee<sup>n</sup> véé ca nuu<sup>n</sup>ndi ye<sup>n</sup>e yā  
nguéé ti taná<sup>n</sup>ā yā chí snée yā na  
yáā<sup>n</sup> Jerusalén? <sup>5</sup>Úú ní nga<sup>n</sup>á ngíí  
ndís'tií chí nguéé 'tíicā. Nduuti chí  
ndís'tií ntúú<sup>n</sup> nguéé ndaacadaamí  
nī ye<sup>n</sup>e nuu<sup>n</sup>ndi ye<sup>n</sup>e nī, tuu'mi ní  
nducyaaca ndís'tií 'cuūvi nī cue<sup>n</sup>e  
daā<sup>n</sup>ma<sup>n</sup>.

**Ejemplo ye<sup>n</sup>e yá<sup>n</sup>á ye<sup>n</sup>e n'guíídií  
yaa<sup>n</sup> nguuvi chí nguéé n'guí'í ye<sup>n</sup>e**

<sup>6</sup>Tuu'mi ní Jesús ca<sup>n</sup>a yā ejemplo 'cūū:  
'Áámá sa<sup>n</sup>ā ní catá'āi 'áámá yá<sup>n</sup>á ye<sup>n</sup>e  
'nguíídií yaa<sup>n</sup> nguuvi ye<sup>n</sup>e sa naachi  
véé yá<sup>n</sup>āa chēeti chēé<sup>n</sup> ye<sup>n</sup>e sa. Chó'oo  
tiempo ní che<sup>n</sup>e sa in'nuu<sup>n</sup> sa n'guí'í ye<sup>n</sup>e  
yá<sup>n</sup>á ye<sup>n</sup>e sa ní nguéé ndaācā sa n'guí'í  
ye<sup>n</sup>e. <sup>7</sup>Tuu'mi ní ca<sup>n</sup>a sa chíi sa 'ii<sup>n</sup>yā<sup>n</sup>  
chí díí<sup>n</sup> yā ntií'nyu<sup>n</sup> ye<sup>n</sup>e yá<sup>n</sup>āa ye<sup>n</sup>e  
sa: 'Áā 'iinu nduūyū chí ichíí ní nguéé  
indaāca n'guí'í na yá<sup>n</sup>á 'cūū. 'Caaca nī  
yá<sup>n</sup>á. ¿Dē'ē cuuvi chí yá<sup>n</sup>á dí'vaachi na  
yá<sup>n</sup>āa naachi snée yá<sup>n</sup>á 'cūū? <sup>8</sup>Naati  
sa<sup>n</sup>ā chí idií<sup>n</sup> ntií'nyu<sup>n</sup> na ya<sup>n</sup>ā mii<sup>n</sup>  
nán'guēcúta<sup>n</sup>ā sa: N'díí, señor, 'āā  
canéé rá nduuyú 'cūū ní 'úú nadidēevé  
yá<sup>n</sup>á ye<sup>n</sup>e ní ca'á taavi abono ye<sup>n</sup>e. <sup>9</sup>Ní  
nduuti chí 'cuūndi n'guí'í ye<sup>n</sup>e ní n'daacā.  
Nduuti chí nguéé, ní 'caaca nī.

**Jesús díí<sup>n</sup> yā chí nduūvā ye<sup>n</sup>e  
'áámá n'daataá chí neené n'guutíí**  
<sup>10</sup>Nguuvi sábadu chí  
ntaavi'tuunúú<sup>n</sup> 'ii<sup>n</sup>yā<sup>n</sup> Israel s'ee<sup>n</sup>,

Jesús ngi'cuee<sup>n</sup> yā na 'áamá yaācū sinagoga. <sup>11</sup>Mii<sup>n</sup> ní canéé 'áamá n'daataá chí 'āā ndítii<sup>n</sup>yu iinu ndúuyū chí ndii n'guuti ta cáāvā chí dii<sup>n</sup> espírítu ye<sup>n</sup>e yáá'n'guiinū<sup>n</sup> 'tíicā ndúucū ta. Ndíí mar 'áamá naa<sup>n</sup> nguéé ngii ndaa cuaacū ta. <sup>12</sup>Taachí Jesús n'diichí yā n'daata mii<sup>n</sup> yaa'ví yā tá<sup>n</sup>ā ní ca<sup>n</sup>a yā chíi yā tá<sup>n</sup>ā: N'díí, n'daataá, 'áá ne<sup>n</sup>e nī chí nduuví cuaacū nī?

<sup>13</sup>Jesús sn'duú yā ta'a yā vmnaa<sup>n</sup> ye<sup>n</sup>e n'daātā mii<sup>n</sup>. Tuu'mí nū<sup>n</sup> ndaā cuaacu n'daataá mí<sup>n</sup> ní n'daataá mí<sup>n</sup> ní nga<sup>n</sup>a yā: De'ē chúúcā ch'εete Ndyuūs. <sup>14</sup>Ii<sup>n</sup>yā<sup>n</sup> chí nga<sup>n</sup>ā nti<sup>n</sup>nyú<sup>n</sup> yā ye<sup>n</sup>e yaacu sinagoga nduuví taá<sup>n</sup> yā ti Jesús mii<sup>n</sup> ní diyiicú yā n'daataá mí<sup>n</sup> nguuví chí 'ii<sup>n</sup>yā<sup>n</sup> ntaavi'tuunú<sup>n</sup> yā. Ní nga<sup>n</sup>a yā ngii yā nducyaaca 'ii<sup>n</sup>yā<sup>n</sup>: Jaā<sup>n</sup> nguuví nū<sup>n</sup> canee chí dii<sup>n</sup> 'ii<sup>n</sup>yā<sup>n</sup> nti<sup>n</sup>nyu<sup>n</sup> ní nguuví s'ee<sup>n</sup> 'ii<sup>n</sup>yā<sup>n</sup> cuuví chíi yā nanáá<sup>n</sup> Jesús mii<sup>n</sup> ní cuuví dii<sup>n</sup> yiicú yā 'ii<sup>n</sup>yā<sup>n</sup> s'ee<sup>n</sup>, naati nguéé cuuví dí<sup>n</sup> yā 'tíicā nguuví chí ntaavi'túúnū<sup>n</sup> 'ii<sup>n</sup>yā<sup>n</sup>.

<sup>15</sup>Tuu'mí ní Jesús nan'guεεcúta<sup>n</sup>a yā ye<sup>n</sup>e sa: Ndís'tii sa<sup>n</sup>ā 'uūví naa<sup>n</sup> 'uūví cheendí nī, 'áá nguéé in'daatí ndís'tii 'iiti ye<sup>n</sup>e nī naachi snéé 'ii<sup>n</sup>yu tī ní nge<sup>n</sup>é nī nga'a nī nuū<sup>n</sup>nī 'iiti nguuví chí ntaavi'tuunú<sup>n</sup> nī?

<sup>16</sup>N'daataa 'cūū ní ye<sup>n</sup>e ndaata ye<sup>n</sup>e Abraham. 'Āā ndítii<sup>n</sup>yu iinu nduūyū ncachiichí yáá'n'guiinū<sup>n</sup> tá<sup>n</sup>ā. 'áá nguéé canee chí n'daatí tá<sup>n</sup>ā mii<sup>n</sup> ye<sup>n</sup>e ca'ai nguuví chí ntaaví'tuunú<sup>n</sup> nī?

<sup>17</sup>Taachí Jesús mii<sup>n</sup> ca<sup>n</sup>a yā chuū, taanduvéε yā chí taa<sup>n</sup> yā ye<sup>n</sup>e yā ní 'cuináa<sup>n</sup> yā. Nducyáácá 'ii<sup>n</sup>yā<sup>n</sup> ye<sup>n</sup>e yāā<sup>n</sup> mii<sup>n</sup>ya yeenú n'dai yā ye<sup>n</sup>e

tanducué<sup>n</sup>e dendu'ū chí n'geete chí dii<sup>n</sup> Jesús mii<sup>n</sup>.

### Ejemplo ye<sup>n</sup>e nduuti ye<sup>n</sup>e yíivē ntí'yāa

(Mt. 13.31-32; Mr. 4.30-32)

<sup>18</sup>Jesús ca<sup>n</sup>a yā: 'De'ē tan'dúucā naachí Ndyuūs nga<sup>n</sup>a nti<sup>n</sup>nyú<sup>n</sup> yā? 'De'ē nadídaamá nduūcū?

<sup>19</sup>Tan'dúucā nduutií ye<sup>n</sup>e yíivē ntí'yāa chí 'áamá sa<sup>n</sup>ā ní staā sa ní chíinū sa na yá<sup>n</sup>ā ye<sup>n</sup>e sa. Yaāta mii<sup>n</sup> ní ch'iita tan'dúucā 'áamá yá<sup>n</sup>ā ch'εete. 'Yáádá ye<sup>n</sup>e nanguuvi din'dái tī 'deεé tī na dúu<sup>n</sup>nē.

### Ejemplo ye<sup>n</sup>e levadura ye<sup>n</sup>e pan

(Mt. 13.33)

<sup>20</sup>Jesús ní ca<sup>n</sup>a ntúū<sup>n</sup> yā: 'De'ē tan'dúucā naachí Ndyuūs nga<sup>n</sup>ā nti<sup>n</sup>nyú<sup>n</sup> yā? <sup>21</sup>Tan'dúucā 'aama táá<sup>n</sup> levadura ye<sup>n</sup>e pan chí 'áamá n'daataa chista<sup>n</sup>ā tá nguaa<sup>n</sup> 'iinū medidas harina ndíí chí nan'guiiita tanducué<sup>n</sup>e yaāchí yé<sup>n</sup>e.

### Cheendí va'āi 'tuucúú

(Mt. 7.13-14; 21-23)

<sup>22</sup>Taachi Jesús canú<sup>n</sup> yā yúúni chí cho'ó yā na yāā<sup>n</sup> Jerusalén cue<sup>n</sup>é yā taná<sup>n</sup>ā yāā<sup>n</sup> n'geete ndúucū yāā<sup>n</sup> n'gaiyāā ní ngi'cuee<sup>n</sup> yā 'ii<sup>n</sup>yā<sup>n</sup>. <sup>23</sup>Tuu'mí ní 'áamá sa<sup>n</sup>ā ndaā sa nanáa<sup>n</sup> yā ní ntiinguunee<sup>n</sup> sa: N'díí, Señor, 'áá du'ví 'ii<sup>n</sup>yā<sup>n</sup> chí nngua<sup>n</sup>ai yā? Jesús mii<sup>n</sup> ní ca<sup>n</sup>a yā chíi yā sa<sup>n</sup>ā mii<sup>n</sup>: <sup>24</sup>Díí<sup>n</sup> nī tanducué<sup>n</sup>e chí cuuví nī chí cundaá nī cheendi va'āi 'tuucúú caati nga<sup>n</sup>ā ngii ndís'tii chí nééne 'yaa<sup>n</sup> 'ii<sup>n</sup>yā<sup>n</sup> ne<sup>n</sup>e yā cundaá yā cheendi va'ai 'tuucúú chí candéε naachi Ndyuūs nadangua<sup>n</sup>ai

yā 'ii<sup>n</sup>yā<sup>n</sup> naati nguéé cuuvi díí<sup>n</sup> yā. <sup>25</sup>Taachi 'ii<sup>n</sup>yā<sup>n</sup> ye<sup>n</sup>e va'ai nducuee<sup>n</sup> yā ní n'gaadí yā cheendi va'āi ye<sup>n</sup>e ndís'tií, tuu'mi ní ndís'tií snee nī cuaa<sup>n</sup> chuva'āi. Ní dí'cuéecú nī cheendi va'āi ní caa<sup>n</sup>má<sup>n</sup> nī: Señor, Señor, nn'guaá<sup>n</sup> nī ye<sup>n</sup>e 'nū. 'Ii<sup>n</sup>yā<sup>n</sup> ye<sup>n</sup>e va'ai ní nan'gueecuta<sup>n</sup>a yā: Nguéé in'diichí ndís'tií ndii nguée deenú tií ndiicá nī. <sup>26</sup>Áará chí ndís'tií ní tucáa nī caa<sup>n</sup>ma<sup>n</sup> nī 'tíicā: Che'é 'nū ní chí'i 'nū ndúucu nī taachi n'dií ní chí'cuee<sup>n</sup> nī 'ii<sup>n</sup>yā<sup>n</sup> na yúúni ye<sup>n</sup>e yáá<sup>n</sup> vaacú 'nū. <sup>27</sup>'Ii<sup>n</sup>yā<sup>n</sup> ye<sup>n</sup>e va'ai mii<sup>n</sup> ní caa<sup>n</sup>ma<sup>n</sup> yā cuuvi yā 'ii<sup>n</sup>yā<sup>n</sup> s'ee<sup>n</sup>: 'Úú nga<sup>n</sup>'á ngí ndís'tií ti nguéé in'diichí ndís'tií ndíí nguéé deenú tíí ndiica nī. Cueevii nī ye<sup>n</sup>e nducyaaca ndís'tií ti nguéé n'daācā idíí<sup>n</sup> nī. <sup>28</sup>Cuaacu chí ndís'tií snaa<sup>n</sup> nī chiida yú s'ee<sup>n</sup> Abraham, ndúucū Isaac, ndúucū Jacob, ndúucū nducyaaca profetas chí ndii cuáá<sup>n</sup> vmnaa<sup>n</sup> snée yā naachí Ndyuūs nga<sup>n</sup>'a ntií<sup>n</sup>nyu<sup>n</sup>. Ní ndís'tií ní 'cuéetinée nī cuáá<sup>n</sup> chuva'āi. Mii<sup>n</sup> ní cuéecú nī ní che'é nī 'dii<sup>n</sup>yú<sup>n</sup> nī. <sup>29</sup>'Ii<sup>n</sup>yā<sup>n</sup> s'ee<sup>n</sup> chii yā ye<sup>n</sup>e nducué<sup>n</sup>e cuaa<sup>n</sup> ye<sup>n</sup>e i<sup>n</sup>'yee<sup>n</sup>dí 'cūū ní ndaa yā nanáá<sup>n</sup> Ndyuūs. Chii yā ndíí cuaa<sup>n</sup> na ican'dáá 'yá<sup>n</sup>ā, ndii cuaa<sup>n</sup> na ngiiya 'yá<sup>n</sup>ā, ndíí cuaa<sup>n</sup> 'níf<sup>n</sup>nú<sup>n</sup>, ndíí cuaa<sup>n</sup> ndiia, ní 'cuéeté yā na mesa ye<sup>n</sup>e banquete naachí Ndyuūs nga<sup>n</sup>'a ntií<sup>n</sup>nyú<sup>n</sup> yā. <sup>30</sup>Tuu'mi ní ná<sup>n</sup>ā 'ii<sup>n</sup>yā<sup>n</sup> chí n'geete chí nga<sup>n</sup>'a ntií<sup>n</sup>nyú<sup>n</sup> yā maa<sup>n</sup> na i<sup>n</sup>'yee<sup>n</sup>dí 'cūū ní cuuvi ndiicuu<sup>n</sup> cá yā naachi snée Ndyuūs ní na<sup>n</sup>a 'ii<sup>n</sup>yā<sup>n</sup> chí ndiicuu<sup>n</sup> cá maa<sup>n</sup> na i<sup>n</sup>'yee<sup>n</sup>dí 'cūū ní cuuvi n'geeté yā naachi snée Ndyuūs.

**Jesús cheécú yā cáávā 'ii<sup>n</sup>yā<sup>n</sup> ye<sup>n</sup>e yáá<sup>n</sup> Jerusalén**

(Mt. 23.37-39)

<sup>31</sup>Nguuví 'cuú nū<sup>n</sup> 'áámá chéé 'ii<sup>n</sup>yā<sup>n</sup> fariseos ndáa yā nanáá<sup>n</sup> Jesús ní ca<sup>n</sup>'a yā: N'dií, Jesús, cue<sup>n</sup>e nī ti rey Herodes ne<sup>n</sup>'é yā 'caa<sup>n</sup>nú<sup>n</sup> yā n'dií.

<sup>32</sup>Naati Jesús ca<sup>n</sup>'a yā chíí yā 'ii<sup>n</sup>yā<sup>n</sup> s'ee<sup>n</sup>: Cuna<sup>n</sup>'á nī nanáá<sup>n</sup> rey mii<sup>n</sup> ní caa<sup>n</sup>ma<sup>n</sup> nī cuuvi nī: N'dií rey, tan'dúucā 'yuūnéé, 'tiicá nī. Cuin'diichí nī, Jesús mii<sup>n</sup> nga<sup>n</sup>'á yā 'túucā: 'Úú itun'daá espíritu ye<sup>n</sup>e yáá<sup>n</sup>n'guinū<sup>n</sup> ye<sup>n</sup>e 'ii<sup>n</sup>yā<sup>n</sup> ní díí<sup>n</sup> chí nduūvā ye<sup>n</sup>e 'ii<sup>n</sup>yā<sup>n</sup> maa<sup>n</sup>nguuvii ndúucū cavyaa<sup>n</sup>, tuu'mi ní 'cuiinu ntií<sup>n</sup>nyu<sup>n</sup> ye<sup>n</sup>'é damáí<sup>n</sup>. 'Tíicā canee chí díí<sup>n</sup> ná 'iīnū nguuvii. <sup>33</sup>Naati 'úú ní canée chí caacá cuaa<sup>n</sup> cyúúni ní díí<sup>n</sup> ntií<sup>n</sup>nyu<sup>n</sup> ye<sup>n</sup>'é maa<sup>n</sup> ndúucū cavyaa<sup>n</sup> ndúucū damáí<sup>n</sup>, caati nguéé canée chí 'cuuví 'áámá sa<sup>n</sup>'ā profeta ch'ēete chí dii<sup>n</sup> ntií<sup>n</sup>nyu<sup>n</sup> ye<sup>n</sup>'é Ndyuūs 'áámá lado ye<sup>n</sup>e yáá<sup>n</sup> Jerusalén ti na yáá<sup>n</sup> Jerusalén chí 'caa<sup>n</sup>nú<sup>n</sup> yā sa<sup>n</sup>'ā profetas.

<sup>34</sup>Jesús ca<sup>n</sup>'a yā chíí yā 'ii<sup>n</sup>yā<sup>n</sup> ye<sup>n</sup>e yáá<sup>n</sup> Jerusalén: Ndís'tií chí 'muu<sup>n</sup> n'gii<sup>n</sup>'nu<sup>n</sup> nī 'ii<sup>n</sup>yā<sup>n</sup> profetas ní ngítuú nī 'ii<sup>n</sup>yā<sup>n</sup> chí Ndyuūs dicho'ó yā chí ndee yā nduudu ye<sup>n</sup>'é yā. Ní Jesús ca<sup>n</sup>'a yā: Neené n'deēe cuúví ne<sup>n</sup>'é nadaamá daiyá 'ii<sup>n</sup>yā<sup>n</sup> yáá<sup>n</sup> Jerusalén mii<sup>n</sup> tan'dúucā 'áámá tú'u nadaamá tí daiya tí máá<sup>n</sup> ngeēchi tí, ní nguéé 'cuú<sup>n</sup> nī. <sup>35</sup>Túucā ca<sup>n</sup>'a yā: N'diichí ndís'tií. Vaacú nī cu'née<sup>n</sup> maā<sup>n</sup>. Ní nga<sup>n</sup>'á ngí ndís'tií chí 'āā ntéé snaa<sup>n</sup> nī 'úú ndíí ndáá tiempo chí caa<sup>n</sup>ma<sup>n</sup> nī ye<sup>n</sup>'é: De'e chúicā n'dai 'ii<sup>n</sup>yā<sup>n</sup> chí

cuchii yā ndúucū chi duuchi Señor 'iivú Ndyuūs ti 'ii<sup>n</sup>'yā<sup>n</sup> ye<sup>n</sup>'é Ndyuūs.

**Jesús dii<sup>n</sup> yā chi nduūvā  
ye<sup>n</sup>'e 'áámá sa<sup>n</sup>'ā**

**14** 'Áámá sábadó, nguuvi chi ntaavi'túúnuu<sup>n</sup> 'ii<sup>n</sup>'yā<sup>n</sup>, Jesús sndaá yā ní che<sup>n</sup>'e yā 'áámá va'ai ye<sup>n</sup>'e 'áámá sa<sup>n</sup>'ā fariseo chi nga<sup>n</sup>'a nti<sup>n</sup>'nyu<sup>n</sup> sa. Ní taná<sup>n</sup>'ā sa<sup>n</sup>'ā fariseos canee ngiinu sa Jesús de'ē chi ca<sup>n</sup>'á yā chi dii<sup>n</sup> yā. <sup>2</sup>Tuu'mi ní ndaā nanáá<sup>n</sup> Jesús 'áámá sa<sup>n</sup>'ā chí ngiitā ní ndiitúú núú<sup>n</sup>'má<sup>n</sup> ch'ēete sa. <sup>3</sup>Jesús ca<sup>n</sup>'a yā chii yā maestros ye<sup>n</sup>'e ley ndúucū sa<sup>n</sup>'ā fariseos: 'Áá 'cuaa<sup>n</sup> ley mii<sup>n</sup> chí cuuví dii<sup>n</sup> chi nduūvā ye<sup>n</sup>'e 'ii<sup>n</sup>'yā<sup>n</sup> nguuvi chí ntaavi'tuunúú<sup>n</sup> yā?

<sup>4</sup>Sa<sup>n</sup>'ā s'ee<sup>n</sup> ní 'dii<sup>n</sup>' dii<sup>n</sup>' ch'ēetinee sa ní nguéé nan'guēecuta<sup>n</sup>'a sa. Tuu'mi ní Jesús sta'á yā ta'a sa<sup>n</sup>'ā chi ndiitúú ní dii<sup>n</sup> yā chi nduūvā ye<sup>n</sup>'e sa<sup>n</sup>'ā mii<sup>n</sup>. Ni yaa'vi yā sa<sup>n</sup>'ā chi cuna<sup>n</sup>'a sa. <sup>5</sup>Cuayiivi ní Jesús yaa'vi yā sa<sup>n</sup>'ā s'ee<sup>n</sup> ní ca<sup>n</sup>'a yā: 'Chēē ndís'tii ndúuti chi 'áámá burro o 'áámá itiindu ye<sup>n</sup>'e nī cun'dáá nuú<sup>n</sup> tī na 'áámá viini ní nguéé tuu'mí nūu<sup>n</sup> ntun'dáá nī 'iiti 'áará chí nguuvi chi ntaavi'tuunúú<sup>n</sup> 'ii<sup>n</sup>'yā<sup>n</sup>?

<sup>6</sup>Sa<sup>n</sup>'ā s'ee<sup>n</sup> nguéé chí nan'guēecúta<sup>n</sup>'a sa cucáávā nduudu chi nga<sup>n</sup>'a yā.

**'Ii<sup>n</sup>'yā<sup>n</sup> chi invitado yā naachi  
n'giindivaacu 'ii<sup>n</sup>'yā<sup>n</sup>**

<sup>7</sup>Taachí Jesús n'diichí yā táácā dii<sup>n</sup> 'ii<sup>n</sup>'yā<sup>n</sup> chi invitados chi ndēeve yā silla ye<sup>n</sup>'e mesa chi lugar chí n'daacā ca, tuu'mi ní ca<sup>n</sup>'a yā 'áámá ejemplo chi 'tēe nguēe dááma ndúucū 'ii<sup>n</sup>'yā<sup>n</sup> chi dii<sup>n</sup> yā invitados.

<sup>8</sup>Nga<sup>n</sup>'a yā 'tíicā. Taachi 'áámá 'ii<sup>n</sup>'yā<sup>n</sup> dii<sup>n</sup> yā invitar dii naachi n'giindivaacu 'ii<sup>n</sup>'yā<sup>n</sup> nguéé 'cuūndi di na silla vmnáá<sup>n</sup> vmnaa<sup>n</sup> caati cuuvi ndaa táámá 'ii<sup>n</sup>'yā<sup>n</sup> invitado chi ch'ēeté yā nguéé tī dii. Ní silla mii<sup>n</sup> ní caava 'ii<sup>n</sup>'yā<sup>n</sup> mii<sup>n</sup>. <sup>9</sup>Ní taachí ndaa 'ii<sup>n</sup>'yā<sup>n</sup> chi ch'ēete ca yā, tuu'mi ní 'ii<sup>n</sup>'yā<sup>n</sup> chi dii<sup>n</sup> yā invitar di ndaa yā nanáá<sup>n</sup> di ní caa<sup>n</sup>'má<sup>n</sup> yā cuuvi yā dii: Cu'nee<sup>n</sup> di lugar 'cūū ye<sup>n</sup>'e 'ii<sup>n</sup>'yā<sup>n</sup> 'cūū. Tuu'mi ní cuuví 'cuináá<sup>n</sup> di ní 'cuūndi di na silla n'díi naa<sup>n</sup> n'giinu. <sup>10</sup>Taachí 'ii<sup>n</sup>'yā<sup>n</sup> dii<sup>n</sup> yā invitar dii ca<sup>n</sup>'a di 'cuūndi di na silla ndíi naa<sup>n</sup> n'giinu. Ní taachi ndaa nanáá<sup>n</sup> dii 'ii<sup>n</sup>'yā<sup>n</sup> chi dii<sup>n</sup> yā invitar dii, tuu'mi ní caa<sup>n</sup>'má<sup>n</sup> yā cuuvi yā dii: Díi sá<sup>n</sup>'ā chi n'dai nduucú, caaca díi cuaa<sup>n</sup> n'ii<sup>n</sup>'nu<sup>n</sup>. Ní 'āā n'daacā cuuvi ye<sup>n</sup>'e di nanáá<sup>n</sup> 'ii<sup>n</sup>'yā<sup>n</sup> chi vēeté yā na mesa. <sup>11</sup>'Ii<sup>n</sup>'yā<sup>n</sup> chí dich'ēeté maá<sup>n</sup> yā táámá 'ii<sup>n</sup>'yā<sup>n</sup> ní dii<sup>n</sup> yā chí ndiicuu<sup>n</sup> yā. Ní 'ii<sup>n</sup>'yā<sup>n</sup> chí maa<sup>n</sup> yā dii<sup>n</sup> chí ndiicuu<sup>n</sup> yā tááma 'ii<sup>n</sup>'yā<sup>n</sup> ní dii<sup>n</sup> yā chí ch'ēeté yā.

<sup>12</sup>Tuu'mi ní Jesús nga<sup>n</sup>'á yā ngii yā sa<sup>n</sup>'ā chí dii<sup>n</sup> invitar 'ii<sup>n</sup>'yā<sup>n</sup> s'ee<sup>n</sup>: Dii taachí in'nuu<sup>n</sup> di chí che'e nguai<sup>n</sup> di o chí che'e nguínū di, nguéé 'cuai di 'ii<sup>n</sup>'yā<sup>n</sup> chí n'dai ndúucu di, ndíi nguéé ndúú v'íi rā di, ndíi nguéé ndúú 'ii<sup>n</sup>'yā<sup>n</sup> ye<sup>n</sup>'e di, ndíi nguéé ndúú 'ii<sup>n</sup>'yā<sup>n</sup> na n'ii<sup>n</sup>'nuú<sup>n</sup> va'āi ye<sup>n</sup>'e di chí 'cuíica yā caati 'ii<sup>n</sup>'yā<sup>n</sup> s'uu<sup>n</sup> ní dii<sup>n</sup> ntúu<sup>n</sup> yā invitar dii chí che'e di nduucú yā. 'Tíicā ní nadí'v'e yā dii<sup>n</sup> cáávā chí ca'a di chí che'e yā. <sup>13</sup>Naatí taachi idin'dái di 'aama comida n'dai, 'cuai díi 'ii<sup>n</sup>'yā<sup>n</sup> chí ndaachí snee yā, ndúucū 'ii<sup>n</sup>'yā<sup>n</sup> chí nguéé ngii ngiicá yā, ndúucū

chi ngai yó'o, ndúúcu 'ii<sup>n</sup>yā<sup>n</sup> chi ngeenaáa<sup>n</sup>. <sup>14</sup>Ní caa<sup>n</sup>ma<sup>n</sup> 'ii<sup>n</sup>yā<sup>n</sup> s'ee<sup>n</sup> ye<sup>n</sup>ē di: De'e chúúca n'dai di. Ti 'ii<sup>n</sup>yā<sup>n</sup> s'ee<sup>n</sup> nguéé nteé yā dii. Naati Ndyuūs nadí'vε yā dii taachí ndaa nguuvu chi 'ii<sup>n</sup>yā<sup>n</sup> chi n'dai nduuchí yā ye<sup>n</sup>ē nguua<sup>n</sup> tiná<sup>n</sup>ā.

**Ejemplo ye<sup>n</sup>e 'ii<sup>n</sup>yā<sup>n</sup> chi che'e yā cena chi ch'εete**

<sup>15</sup>Taachi 'áamá 'ii<sup>n</sup>yā<sup>n</sup> chi véε yā na mesa mii<sup>n</sup> ch'iindiveé<sup>n</sup> yā chuū, ca<sup>n</sup>a yā chii yā Jesús: De'e chúúca n'dai chi ca<sup>n</sup>á yā che'e yā pan naachí Ndyuūs nga<sup>n</sup>a nti<sup>n</sup>nyú<sup>n</sup> yā.

<sup>16</sup>Tuu'mi ní Jesús ca<sup>n</sup>a yā ejemplo 'cūū: 'Áamá sa<sup>n</sup>ā ca<sup>n</sup>ā sa chi din'dái yā 'áamá chi che'e nguínū 'yaa<sup>n</sup> 'ii<sup>n</sup>yā<sup>n</sup>, ní idi<sup>n</sup> sa invitar n'dee n'dái 'ii<sup>n</sup>yā<sup>n</sup>. <sup>17</sup>Ní taachi 'āā chaa che'e nguui<sup>n</sup>ū yā dicho'o yā 'áamá mozo chi ca<sup>n</sup>a sa cuuvi sa 'ii<sup>n</sup>yā<sup>n</sup> chi ndii yā invitado: Cuchí nī. 'Āā véé tanducué<sup>n</sup>ē chí che'e nguui<sup>n</sup>ū yū.

<sup>18</sup>Nducyaaca yā ní tucá'a yā ca<sup>n</sup>a yā 'tíicā: Ch'εetinú<sup>n</sup> nī ye<sup>n</sup>é. Ní 'áamá sa<sup>n</sup>ā ní ca<sup>n</sup>ā sa: Cáámá ch'iinū 'caí 'áamá finca ní cánéé chí ca<sup>n</sup>á n'diichí finca, chii<sup>n</sup> chi ch'εetinú<sup>n</sup> nī ye<sup>n</sup>é. <sup>19</sup>Táámá yā ní ca<sup>n</sup>a yā: 'Caí nyu<sup>n</sup>u yáandā itiindu ní ne<sup>n</sup>é dí<sup>n</sup> nti<sup>n</sup>nyu<sup>n</sup> ndúúcu ti. Ngicá favor. Ch'εetinú<sup>n</sup> nī ye<sup>n</sup>é. <sup>20</sup>Táámá yā ní ca<sup>n</sup>a yā: Cáámá ch'iinu ch'iindivaacú chi chii<sup>n</sup> nguéé cuuvi ca<sup>n</sup>á. <sup>21</sup>Taachí nguεcunéé mozo, ca<sup>n</sup>a sa chuū chii sa 'iivi sa. Tuu'mi ní 'iivi mii<sup>n</sup> nduuvi taá<sup>n</sup> yā ní ca<sup>n</sup>a yā chii yā mozo mii<sup>n</sup>: Cue<sup>n</sup>e di cuaa<sup>n</sup> ní'vεē ndúúcu cuaa<sup>n</sup> cyúúni ye<sup>n</sup>e yáá<sup>n</sup> ní candée di 'ii<sup>n</sup>yā<sup>n</sup> ndaachí, ndúúcu 'ii<sup>n</sup>yā<sup>n</sup> chi nguéé ngii ngiicá yā, ndúúcu 'ii<sup>n</sup>yā<sup>n</sup> chi ngai yó'o,

ndúúcu 'ii<sup>n</sup>yā<sup>n</sup> chi ngeenaáa<sup>n</sup>.

<sup>22</sup>Sá<sup>n</sup>ā mozo ní cue<sup>n</sup>ē sa. Cuayiivi ní ndaā sa ní ca<sup>n</sup>ā sa chii sa 'iivi sa: N'díi, señor, 'āā dí<sup>n</sup> tan'dúúca chí nga<sup>n</sup>a nī ní véé cá lugar chi 'cuεēteé 'ii<sup>n</sup>yā<sup>n</sup> na mesa. <sup>23</sup>Ca<sup>n</sup>a señor mii<sup>n</sup> chii yā sa<sup>n</sup>ā mozo mii<sup>n</sup>: Cue<sup>n</sup>e di cuaa<sup>n</sup> cyúúni n'geete ndúúcu yúúni chí véé chi neē<sup>n</sup> cuáá<sup>n</sup> 'diitū ní di'cuútu di 'ii<sup>n</sup>yā<sup>n</sup> chí chii yā na vaacú ní 'lícú cuuvi diituu<sup>n</sup> na vaacú. <sup>24</sup>Ti 'úú ní nga<sup>n</sup>á ngii ndís'tii chí mar 'áamá sa<sup>n</sup>ā chí dí<sup>n</sup> invitar sa<sup>n</sup>ā vmnaa<sup>n</sup> nguéé 'cuú<sup>n</sup> ndáa sa che'e nguui<sup>n</sup>ū sa nduucú na mesa ye<sup>n</sup>é.

**'Ii<sup>n</sup>yā<sup>n</sup> chi ca<sup>n</sup>a yā ndúúcu Jesús canee chi 'cuéenu yā cuuvi**

<sup>25</sup>Cuayiivi mí<sup>n</sup> néené n'dee 'ii<sup>n</sup>yā<sup>n</sup> cue<sup>n</sup>e yā ndúúcu Jesús. Ní Jesús mii<sup>n</sup> ní ca<sup>n</sup>a yā chii yā 'ii<sup>n</sup>yā<sup>n</sup> s'ee<sup>n</sup> 'áamá ejemplo: <sup>26</sup>Ndúúti chí 'áamá 'ii<sup>n</sup>yā<sup>n</sup> ne<sup>n</sup>e ca yā chiidá yā o chεεcú yā o n'daataa ye<sup>n</sup>e yā o daiya yā o 'dínu yā o vi'í yā o vida ye<sup>n</sup>ē maá<sup>n</sup> yā nguéé ti 'úú chí Jesús, nguéé cuuvi discípulo ye<sup>n</sup>é. <sup>27</sup>Āā du'ú nū<sup>n</sup> chí ca<sup>n</sup>a yā nduucú ní nguéé ndée yā cruz ye<sup>n</sup>e yā chí tan'dúúca nducué<sup>n</sup>ē chí 'cueenu taavi yā cuuvi cucáávā 'úú nguéé cuuvi discípulo ye<sup>n</sup>é. <sup>28</sup>¿Áá cheé nū<sup>n</sup> 'áamá ndís'tii taachí ne<sup>n</sup>e nī din'dái nī 'áamá torre, ¿áá nguéé n'geetē nī ní ididuuché nī? ¿Áá n'deē dí<sup>n</sup> nī gasto ndúúti chí tu'née chí'vεε ye<sup>n</sup>e nī chí 'cuiinu din'dái nī torre ye<sup>n</sup>e nī? <sup>29</sup>Ní nduuti chí cu'nuú<sup>n</sup> nī cimientos ye<sup>n</sup>ē torre ní cuayiivi nguéé cuuvi din'dái nī torre ye<sup>n</sup>e nī, tuu'mi ní nducyaaca yā chí snaa<sup>n</sup> yā 'cái<sup>n</sup>nyū<sup>n</sup>nee<sup>n</sup> yā ndís'tii. <sup>30</sup>Ii<sup>n</sup>yā<sup>n</sup> s'ee<sup>n</sup> ní caa<sup>n</sup>ma<sup>n</sup>

yā: Sá<sup>n</sup>a 'cūū tuc'a sa din'dái sa ní nguéé ch'iinu d'i'cuinú sa. <sup>31</sup>Ní Jesús nga<sup>n</sup>a yā 'tíficā: ¿Du'ú rey ndúúti chí canee chí díi<sup>n</sup> yā caandaá ndúúcu táámá rey, 'áá nguéé n'giindi yā ndúúcu táámá sa<sup>n</sup>ā ní ididuuché yā? Nduuti chí tunéé<sup>n</sup> ndiicu mil soldados ní 'iicu ndúúcu chuū nūu<sup>n</sup> cuuvi 'cuu<sup>n</sup>ma<sup>n</sup> yā ndúúcu soldados chí ndiichi mil ye<sup>n</sup>ē táámá rey. <sup>32</sup>Ní nduuti chí nguéé cuchee yā, taachi cuchíi yā táámá rey ndúúcu soldados ye<sup>n</sup>e yā chí díi<sup>n</sup> yā caandaá ní canéé ya<sup>n</sup>ai ca yā mii<sup>n</sup> tuu<sup>n</sup>mi ní rey mii<sup>n</sup> dicho'ó yā 'ii<sup>n</sup>yā<sup>n</sup> chí candéé nduudu mii<sup>n</sup>. Ní 'iicu caaca yā taama rey chí 'cuētínéé 'dii<sup>n</sup> yā. Ní nguéé díi<sup>n</sup> yā caandaá ndúúcu rey ye<sup>n</sup>e yā. <sup>33</sup>Tiicá ntúū<sup>n</sup>. 'Āā cheé nūu<sup>n</sup> ndís'tii nduuti chí nguéé cu'nee nī tanducué<sup>n</sup>ē chí véé ye<sup>n</sup>e nī, nguéé cuuví cuuvi ndís'tii discípulos ye<sup>n</sup>é.

**Jesús nga<sup>n</sup>a yā ye<sup>n</sup>é yiima chí nguéé n'daācā sabor ye<sup>n</sup>ē**

(Mt. 5.13; Mr. 9.50)

<sup>34</sup>Jesús nga<sup>n</sup>a yā: Yiima ní n'dai. Nduuti chí nguéé n'daācā sabor ye<sup>n</sup>ē, ¿deé ca'á sabor ye<sup>n</sup>ē? <sup>35</sup>Nguéé dichí'vē, ndii nguēe cáāvā yá<sup>n</sup>āa, ndii nguēe ndúú naachi véé abono, caati canangée yā yiima mii<sup>n</sup>. 'Ii<sup>n</sup>yā<sup>n</sup> chí véé veé<sup>n</sup> yā, 'caandiveé<sup>n</sup> yā ye<sup>n</sup>é.

**Ejemplo ye<sup>n</sup>ē 'ítii cuūchí chí nindai**

**15** Nducyáácá sa<sup>n</sup>ā chí ínn'guēe sa ye<sup>n</sup>e yá<sup>n</sup>āa ndúúcu 'ii<sup>n</sup>yā<sup>n</sup> nuu<sup>n</sup>ndi ndaá yā nanáá<sup>n</sup> Jesús chí 'caandiveé<sup>n</sup> yā nduudu ye<sup>n</sup>e yā. <sup>2</sup>Cáāvā chuū 'ii<sup>n</sup>yā<sup>n</sup> fariseos ndúúcu maestros chí ngi'cuee<sup>n</sup> ley nga<sup>n</sup>a yā n'de'ei yā

nguáá<sup>n</sup> maá<sup>n</sup> yā contra ye<sup>n</sup>e Jesús. 'Túuca nga<sup>n</sup>á yā: Jesús mii<sup>n</sup> n'gúu<sup>n</sup> yā chí ndaá nanáá<sup>n</sup> yā 'ii<sup>n</sup>yā<sup>n</sup> chí véé nuu<sup>n</sup>ndi ye<sup>n</sup>e yā. Ní 'ii<sup>n</sup>yā<sup>n</sup> mii<sup>n</sup> ngé<sup>e</sup> yā ndúúcu yā.

<sup>3</sup>Tuu<sup>n</sup>mi ní Jesús mii<sup>n</sup> ní ca<sup>n</sup>a yā 'aama chí 'téé nguēe daama ndúúcu 'ii<sup>n</sup>yā<sup>n</sup> mii<sup>n</sup>. <sup>4</sup>Cheé ndís'tii ndúúti chí véé 'áámá ciento 'iiti cuūchí ye<sup>n</sup>e nī ní nduuti chí 'áámá chee 'iiti s'uu<sup>n</sup> cuuví ndái tī, ¿'áá nguéé cu'nee nī ndu'u chí cuū<sup>n</sup> ngeecú nditii<sup>n</sup>yú cuuú<sup>n</sup> tī na 'cuéétí? Ní ca<sup>n</sup>á nī in'nuú<sup>n</sup> nī 'iiti chí nindái mí<sup>n</sup> ndíi taachí ndaacá nī 'iiti mii<sup>n</sup>. <sup>5</sup>Ní taachí ndaacá nī 'iiti mii<sup>n</sup> cun'duú nī 'iiti ná 'diimi nī ní candéé nī 'iiti cuūchí mii<sup>n</sup> naachi canéé taná<sup>n</sup>ā 'iiti cuūchí. Ní yeenú n'dai nī. <sup>6</sup>Ní taachi ndaa nī na vaacu nī, tuu<sup>n</sup>mi ní nadidaama nī 'ii<sup>n</sup>yā<sup>n</sup> chí n'dai ndúúcu nī ndúúcu 'ii<sup>n</sup>yā<sup>n</sup> na nii<sup>n</sup>nuú<sup>n</sup> na va'ai ye<sup>n</sup>e nī. Ní caa<sup>n</sup>ma<sup>n</sup> nī cuuvi nī, 'ii<sup>n</sup>yā<sup>n</sup> s'ee<sup>n</sup>: Ndís'tii cuuvi yeenú n'dai nī nduucú ní d'i'viicu yú ti 'āā n'daacá 'iiti cuūchí ye<sup>n</sup>é chí n'ndaí. <sup>7</sup>Tuu<sup>n</sup>mi ní Jesús nga<sup>n</sup>á ntúū<sup>n</sup> yā, 'úú nga<sup>n</sup>á ngii ndís'tii: 'Tíficā véé vaādi yeenú taavi na va'ai cheeti nguuví ye<sup>n</sup>ē 'áámá 'ii<sup>n</sup>yā<sup>n</sup> chí véé nuu<sup>n</sup>ndi ye<sup>n</sup>e yā ní ndaacadaami yā ye<sup>n</sup>ē nuu<sup>n</sup>ndi ye<sup>n</sup>e yā nguéé ti ye<sup>n</sup>ē cuū<sup>n</sup> ngeecú nditii<sup>n</sup>yú cuūu<sup>n</sup> 'ii<sup>n</sup>yā<sup>n</sup> chí n'dai chí nguéé canee cuumi chí ndaacadaami yā ye<sup>n</sup>ē nuu<sup>n</sup>ndi ye<sup>n</sup>e yā.

**Ejemplo ye<sup>n</sup>ē 'áámá cáádí chí n'ndaí**

<sup>8</sup>Ní ca<sup>n</sup>a Jesús: Du'u 'áámá n'daataá chí véé ndiichi cáádí ye<sup>n</sup>ē ta nduuti chí dindai tá 'áámá ¿'áá 'cuu<sup>n</sup>mi<sup>n</sup> tá lámpara ní n'daaca tá va'āi, ní in'nuu<sup>n</sup> tá ndúúcu cuidado

taanduvéé ndíi ndaācā ta tuūmī mii<sup>9</sup>? Taachí ndaācā tá nadaama tá 'ii<sup>n</sup>yā<sup>n</sup> chi n'dai ndúúcu ta ndúúcu 'ii<sup>n</sup>yā<sup>n</sup> na nii<sup>n</sup>nuu<sup>n</sup> va'ai ye<sup>n</sup>e ta ní ca<sup>n</sup>a tá: Cuuvi yeenú nī nduucú ní di'viicu yú ti 'āā ndaācā 'áámá cáádí ye<sup>n</sup>e chí chindāi mii<sup>n</sup>.  
<sup>10</sup>Úú nga<sup>n</sup>á ngíi ndís'tiī caati 'tiicá ntúū<sup>n</sup> véé vaadī yeenú nguuaa<sup>n</sup> ángeles ye<sup>n</sup>e Ndyuūs cucáāvā 'áámá 'ii<sup>n</sup>yā<sup>n</sup> nuu<sup>n</sup>ndi chí nandaacadaamí yā ye<sup>n</sup>e nuu<sup>n</sup>ndi ye<sup>n</sup>e yā.

**Ejemplo ye<sup>n</sup>e sa<sup>n</sup>ā n'gaiyāā  
 pródigo chí s'nee<sup>n</sup> sa chiida sa**

<sup>11</sup>Jesús nga<sup>n</sup>a ntúū<sup>n</sup> yā ejemplo 'cūū: 'Áámá sa<sup>n</sup>ā véé 'uūvī daiya sa.  
<sup>12</sup>Sa<sup>n</sup>ā n'gaiyāā daiya sa chí 'líf<sup>n</sup> ca mii<sup>n</sup> ca<sup>n</sup>a sá chii sá chiida sa: N'diī, chiidá, téé nī parte chí itunee<sup>n</sup> 'úú ye<sup>n</sup>e vaādī ngua'aá ye<sup>n</sup>e nī. Chiida sa ní naca<sup>n</sup>á yā ní nca'a yā sa<sup>n</sup>ā chí parte ye<sup>n</sup>e sa. <sup>13</sup>Nguéé chí 'naa<sup>n</sup>, sa<sup>n</sup>ā 'líf<sup>n</sup> ca mii<sup>n</sup> ní nadídaamá sá tanducué<sup>n</sup>e déndu'ū ye<sup>n</sup>e sa. Ní cue<sup>n</sup>e ya<sup>n</sup>ai sa táámá país. Míí<sup>n</sup> ch'iinu dii<sup>n</sup> sa gastar tanducué<sup>n</sup>e ti dii<sup>n</sup> sa nducué<sup>n</sup>e chí nguēē n'daācā.  
<sup>14</sup>Ní taachi ch'iinu tuūmī ye<sup>n</sup>e sa tanducué<sup>n</sup>e chí ca'a chiida sa, ndaā 'áámá cuiicu ch'ēete na país mii<sup>n</sup>. Sá<sup>n</sup>ā mii<sup>n</sup> ní ch'eenū n'dai sa chí caati nguéé chí che'e sa. <sup>15</sup>Sa<sup>n</sup>ā mii<sup>n</sup> ní ndaā sa nanáá<sup>n</sup> 'áámá 'ii<sup>n</sup>yā<sup>n</sup> ye<sup>n</sup>e país mii<sup>n</sup>. Ní ca<sup>n</sup>a sa chí ne<sup>n</sup>e sa dii<sup>n</sup> sa ntiī<sup>n</sup>nyu<sup>n</sup>. 'Ii<sup>n</sup>yā<sup>n</sup> mii<sup>n</sup> ní ca<sup>n</sup>a yā chí yā sa<sup>n</sup>a mii<sup>n</sup> chí cue<sup>n</sup>e sa tan'dúúcā mozo ye<sup>n</sup>e yā ní dii<sup>n</sup> sa cuidado cuūchí s'ee<sup>n</sup> ye<sup>n</sup>e yā.  
<sup>16</sup>Sa<sup>n</sup>ā mii<sup>n</sup> ní nacádiinuu<sup>n</sup> sa chí ne<sup>n</sup>e sa che'e sa chí ye<sup>n</sup>e cuuchí s'ee<sup>n</sup> caati mar 'áámá 'ii<sup>n</sup>yā<sup>n</sup> nguéé ca'a yā de'ē vee sa<sup>n</sup>ā. <sup>17</sup>Tuu'mi ní

n'gaācu sa ní ca<sup>n</sup>ā sa nguua<sup>n</sup> maa<sup>n</sup> sa: N'deeē n'dái mozos ye<sup>n</sup>e chíidá chí ng'e yā pan ní neenē n'deeē chí ng'e yā vee, 'iicu 'muu<sup>n</sup> 'úú ní idií<sup>n</sup> ntiī<sup>n</sup>nyu<sup>n</sup> ní ne<sup>n</sup>e 'cuūvi chí cuiicú. <sup>18</sup>N'daa cá 'muu<sup>n</sup>. Na<sup>n</sup>á n'diichí chíidá ní caa<sup>n</sup>má<sup>n</sup> cuuvi 'ii<sup>n</sup>yā<sup>n</sup>: N'diī chíidá véé nuū<sup>n</sup>ndi ye<sup>n</sup>e nanáá<sup>n</sup> Ndyuūs chí canéé na va'ai cheeti nguuvi ní nanáá<sup>n</sup> n'diī. <sup>19</sup>Áā ntéé n'dai ca 'úú chí tunee<sup>n</sup> 'úú chí caa<sup>n</sup>ma<sup>n</sup> nī chí daiya nī 'úú. Cu'neé<sup>n</sup> nī 'úú tan'dúúcā 'aama mozo ye<sup>n</sup>e nī. <sup>20</sup>Tuu'mi ní cuna<sup>n</sup>ā sa ndaā sa nanáá<sup>n</sup> chíidā sa. Taachi indái ca nndaa sa, tuu'mi ní chíida sa ní n'diichí yā sa<sup>n</sup>ā ní nnee ya'āi 'iinū yā sa<sup>n</sup>ā. Chíida sa ní cue<sup>n</sup>e yā ngeenu yā naachi canéé sá ní tuma<sup>n</sup>á yā daiyá yā ní tuu'vi yā cheendi sa.  
<sup>21</sup>Daiya yā mii<sup>n</sup> ní ca<sup>n</sup>a sa chí sa chíida sa: N'diī, chíidá, véé nuu<sup>n</sup>ndi ye<sup>n</sup>e nanáá<sup>n</sup> Ndyuūs chí canee na va'ai cheeti nguuvi ndúúcu nanáá<sup>n</sup> n'diī. 'Áā n'téé n'dai ca 'úú chí itunee<sup>n</sup> 'úú chí caa<sup>n</sup>má<sup>n</sup> nī chí daiya nī 'úú.  
<sup>22</sup>Naati chíida sa míí<sup>n</sup> ní ca<sup>n</sup>a yā chí yā mozos ye<sup>n</sup>e yā: Dii mozos, maa<sup>n</sup> nch'ēete nūu tun'dáa di tīnūu<sup>n</sup> chí n'dai ca ní cu'nuú<sup>n</sup> di sa<sup>n</sup>ā daiyá. Ní ca'a di chíinūta'āa cunuu<sup>n</sup> ta'ā sa ndúúcu ndaacuú chí cunuu<sup>n</sup> ca'ā sa. <sup>23</sup>Cué<sup>n</sup>e di canguai<sup>n</sup> di itiindu 'líf<sup>n</sup> chí 'viicheé. Ní caa<sup>n</sup>nu<sup>n</sup> di 'iiti chí che'e 'nū. Ní dií<sup>n</sup> 'nū 'viicu. <sup>24</sup>Ti sá<sup>n</sup>a 'cūū daiyá cue<sup>n</sup>e sa ya<sup>n</sup>ai ní 'āā tan'dúúcā chí n'díí sá. Maa<sup>n</sup> ní navaacunee sa ní nduuchi sa. Ní tan'dúúcā chí nindái sá ní ndaācā sa. Ní 'ii<sup>n</sup>yā<sup>n</sup> s'ee<sup>n</sup> ní yeenú taavi yā ní dií<sup>n</sup> yā 'áámá 'viicu.

<sup>25</sup>Ní sa<sup>n</sup>ā daiyá yā chí vmnaa<sup>n</sup> canee sa cueeti. Ní taachí ndaā

níí<sup>n</sup>nū<sup>n</sup> sa ná va'ai, ch'iindivee<sup>n</sup> sa chí itiivi sa<sup>n</sup>á flauta ní 'ii<sup>n</sup>yā<sup>n</sup> nde'ei yā. <sup>26</sup>Tuu'mi ní sa<sup>n</sup>á mii<sup>n</sup> ní 'cai sa 'aama mozo ní itinguuene<sup>n</sup> sa mozo mii<sup>n</sup> de'ē chí véé. <sup>27</sup>Mozo mii<sup>n</sup> ní ca<sup>n</sup>á sa chíi sa 'ii<sup>n</sup>yā<sup>n</sup>: 'Āā ndāā 'dīinu nī. Ní nguéé de'ē vee ye<sup>n</sup>ē sa. Ní chiidá nī ní ca<sup>n</sup>a ntii<sup>n</sup>nyu<sup>n</sup> yā chí ch'ii itiindu 'līí<sup>n</sup> chí 'viiche. <sup>28</sup>Sa<sup>n</sup>á mii<sup>n</sup> ní nduuví taa<sup>n</sup> sa. Nguéé 'cuu<sup>n</sup> sa ndaā sa va'āi. Tuu'mi ní chiida sa mii<sup>n</sup> ní cun'dáa yā va'āi ní d'icuútu yā daiya yā chí nuū<sup>n</sup> ndaā sa va'āi. <sup>29</sup>Naatí sa<sup>n</sup>á mii<sup>n</sup> ní nán'guēcúta<sup>n</sup>á sa ye<sup>n</sup>e chiida sa: 'Āā 'naa<sup>n</sup> ndáí idichíí'vē 'úú ndií, ní díí<sup>n</sup> tanducué<sup>n</sup>ē chí nga<sup>n</sup>a nī ní mar 'áámá vmné<sup>n</sup>ēe nguéé tee nī mar 'áámá 'iiti cuūchī 'līí<sup>n</sup> chí 'caa<sup>n</sup>nú<sup>n</sup> ní díí<sup>n</sup> 'viicu. Ní 'úú cuuvi yeenú ndúúcu amigos ye<sup>n</sup>é. <sup>30</sup>Naatí taachi ndaā daiya nī sá<sup>n</sup>a 'cuū, 'níf<sup>n</sup>nuú<sup>n</sup> 'tuū'vī sa tanducué<sup>n</sup>ē chí vaadí n'guá'āa ye<sup>n</sup>ē sa ndúúcu n'daataa s'ee<sup>n</sup> chí véé sa<sup>n</sup>á s'ee<sup>n</sup> ye<sup>n</sup>e. Ní nga<sup>n</sup>a ntii<sup>n</sup>nyú<sup>n</sup> nī chí mozos ch'ii<sup>n</sup>nú<sup>n</sup> yā itiindu 'līí<sup>n</sup> chí 'viicheé chí che'e sa. <sup>31</sup>Tuu'mi ní chiida sa mii<sup>n</sup> ca<sup>n</sup>a yā chíi yā sa<sup>n</sup>á: Díí, daiyá, 'áámá canee di nducú ní tanducué<sup>n</sup>ē dendu'ū chíi ye<sup>n</sup>é ní ye<sup>n</sup>ē di. <sup>32</sup>Canéé chí díí<sup>n</sup> yú 'viicu tí sa<sup>n</sup>á 'diinu di chí 'úú nacadiínú chí tan'duucā chí 'āā ndíí sá ní nduuchí sa. 'Āā nindáa sa na vaacu yú ní maa<sup>n</sup> ní ndaācā yú sa<sup>n</sup>á.

**Ejemplo ye<sup>n</sup>e 'áámá patrón  
chí nguéé n'daācā díí<sup>n</sup> yā  
ndúúcu mozos ye<sup>n</sup>e yā**

**16** Jesús ní ca<sup>n</sup>a ntúu<sup>n</sup> yā chíi yā discípulos ye<sup>n</sup>e yā: 'Áámá dueño 'cuiica s'néé<sup>n</sup> 'áámá

mayordomo ye<sup>n</sup>ē yá<sup>n</sup>āa ye<sup>n</sup>e yā. Ná<sup>n</sup>ā mozos ndaa sa nanáá<sup>n</sup> dueño ní tun'dáa nuu<sup>n</sup>ndi sa ye<sup>n</sup>ē mayordomo mii<sup>n</sup> ní nga<sup>n</sup>á sa de'ē chí díí<sup>n</sup> mayordomo chí nguēe n'daācā ndúúcu dendu'ū chí ye<sup>n</sup>ē dueño. <sup>2</sup>Tuu'mi ní dueño mii<sup>n</sup> ní yaa'vi yā mayordomo ye<sup>n</sup>e yá<sup>n</sup>āa ní ca<sup>n</sup>a yā chíi yā sá<sup>n</sup>á: N'dií, ¿de'e 'túúca n'giindiveé<sup>n</sup> ye<sup>n</sup>e nī? Teé nī cuenta 'úú ye<sup>n</sup>ē ntii<sup>n</sup>nyu<sup>n</sup> chí díí<sup>n</sup> nī tí 'āā ntéé cuuví nī mayordomo. <sup>3</sup>Sa<sup>n</sup>á mayordomo ye<sup>n</sup>e yá<sup>n</sup>āa mii<sup>n</sup> nadicádíinu<sup>n</sup> sa 'túúca: ¿Taācā díí<sup>n</sup> maa<sup>n</sup> caati dueño ye<sup>n</sup>e yá<sup>n</sup>āa ndivíi yā 'úú ye<sup>n</sup>e chí mayordomo 'úú ye<sup>n</sup>ē ntii<sup>n</sup>nyu<sup>n</sup>? Nguéé ditiínu 'úú chí díí<sup>n</sup> ntii<sup>n</sup>nyu<sup>n</sup> chí n'gii ní nduuti chí caācā limosnas, 'cuinaá<sup>n</sup>. <sup>4</sup>'Āā deenú de'ē chí díí<sup>n</sup> ní taachi 'āā ntéé nga<sup>n</sup>a ntii<sup>n</sup>nyú<sup>n</sup> ye<sup>n</sup>e mayordomo tuu'mi ní amigos ye<sup>n</sup>é 'cuaá<sup>n</sup> yā 'úú na vaacu yā. <sup>5</sup>Tuu'mi ní mayordomo mii<sup>n</sup> yaa'vi sa nducyáácá 'ii<sup>n</sup>yā<sup>n</sup> chí cándíícu yā ye<sup>n</sup>e dueño ye<sup>n</sup>e yá<sup>n</sup>āa ye<sup>n</sup>e yā ní ca<sup>n</sup>a sa chíi sa 'ii<sup>n</sup>yā<sup>n</sup> vmnáá<sup>n</sup> vmaaa<sup>n</sup>: ¿Áá n'deēe cándíícu di ye<sup>n</sup>e dueño? <sup>6</sup>Sa<sup>n</sup>á mii<sup>n</sup> ní ca<sup>n</sup>a sa: 'Úú candiicú 'áámá ciento toneles aceite. Tuu'mi ní mayordomo mii<sup>n</sup> ní ca<sup>n</sup>a sa sa<sup>n</sup>á: Cuta'a dí caaca naachi canéé nguū<sup>n</sup> ye<sup>n</sup>ē di. Cuundi dí ní n'nee nguū<sup>n</sup> di 'uūvī ngēecu ndiichí toneles aceite. <sup>7</sup>Ch'iinu maa<sup>n</sup> ní ca<sup>n</sup>a sa chíi sa taama sa<sup>n</sup>á: Díí, ¿áá n'deēe cándíícu di? Sa<sup>n</sup>á mii<sup>n</sup> ní ca<sup>n</sup>a sa: 'Úú candiicú 'áámá ciento maquilas ye<sup>n</sup>ē trigo. Tuu'mi ní mayordomo mii<sup>n</sup> ca<sup>n</sup>a sa: Cuta'a dí caaca naachi canéé nguū<sup>n</sup> ye<sup>n</sup>ē di ní 'nee<sup>n</sup> nguū<sup>n</sup> di cuūu<sup>n</sup> ngēcú maquilas. <sup>8</sup>Tuu'mi ní dueño mii<sup>n</sup> tuumicádíinu<sup>n</sup> yā

ye<sup>n</sup>ē mayordomo chi nguée n'daacā ní chuuné listo sa ndúucū asuntos ye<sup>n</sup>ē sa. Ní dueño mí<sup>n</sup> ca<sup>n</sup>a yā chíi yā sa<sup>n</sup>ā: Tiempo mii<sup>n</sup> sá<sup>n</sup>ā chí snée i<sup>n</sup>'yee<sup>n</sup>dí 'cūū nguée n'daacā sa ní neene listo ca sa ndúucū asuntos ye<sup>n</sup>ē sa ndúucū vaadi 'cuiica chí véé i<sup>n</sup>'yee<sup>n</sup>dí 'cūū nguée ti 'ii<sup>n</sup>'yā<sup>n</sup> chí díí<sup>n</sup> yā chíi<sup>n</sup> chí Ndyuūs ne<sup>n</sup>e yā chí snée yā na dεεve.

<sup>9</sup>Cáāvā chuū 'úú ní nga<sup>n</sup>á ngií ndís'tií: Ndúucū vicios ye<sup>n</sup>e vaadi 'cuiica chí véé i<sup>n</sup>'yee<sup>n</sup>dí 'cūū díí<sup>n</sup> nī n'daacā ndúucū 'ii<sup>n</sup>'yā<sup>n</sup> ti véé amigos ye<sup>n</sup>e nī caati taachi 'cuūvi nī 'ii<sup>n</sup>'yā<sup>n</sup> s'ee<sup>n</sup> chí nnee nī ní nga<sup>n</sup>á yā: N'dai ndís'tií 'áá cuuvi ndaa nī na va'ai cheeti nguuvi 'tíicā?

<sup>10</sup>'ii<sup>n</sup>'yā<sup>n</sup> chí n'daacā idií<sup>n</sup> yā ndúucū cosas chí 'líí<sup>n</sup> 'tiicā ntúū<sup>n</sup> n'daacā idií<sup>n</sup> yā ndúucū cosas chí n'dee n'dái ní n'geete. <sup>11</sup>Nduuti chí ndís'tií nguée n'daacā idií<sup>n</sup> nī ndúucū tuūmī chí véé i<sup>n</sup>'yee<sup>n</sup>dí 'cūū, 'du'ú 'ii<sup>n</sup>'yā<sup>n</sup> cuuvi teé yā ndís'tií ntií<sup>n</sup>'nyu<sup>n</sup> ye<sup>n</sup>é Ndyuūs chí ntií<sup>n</sup>'nyu<sup>n</sup> ye<sup>n</sup>ē vaadi 'cuiica chí véé chí ye<sup>n</sup>é Ndyuūs? <sup>12</sup>Ndúuti chí ndís'tií nguée n'daacā idií<sup>n</sup> nī ndúucū dendu'ū chí véé ye<sup>n</sup>e taamá yā, 'du'ú 'ii<sup>n</sup>'yā<sup>n</sup> téé yā chí véé ye<sup>n</sup>e nī?

<sup>13</sup>Mar 'áámá sa<sup>n</sup>ā nguée cuuvi dii<sup>n</sup> sa mandados ye<sup>n</sup>e 'uūvi 'iivi sa; ti ne<sup>n</sup>e ca sa 'aama yā nguée ti taama yā, o n'daacā ca dii<sup>n</sup> sa ntií<sup>n</sup>'nyu<sup>n</sup> ye<sup>n</sup>ē 'aama yā nguée ti taama yā. Ndís'tií ní nguée cuuvi dichí'vε Ndyuūs nduuti chí ne<sup>n</sup>e ca nī vaadi 'cuiica chí véé i<sup>n</sup>'yee<sup>n</sup>dí 'cūū.

<sup>14</sup>'ii<sup>n</sup>'yā<sup>n</sup> fariseos n'giindiveé<sup>n</sup> ntúū<sup>n</sup> yā dendu'ū chí 'túucā nga<sup>n</sup>a Jesús mii<sup>n</sup> ní 'ii<sup>n</sup>'yā<sup>n</sup> s'ee<sup>n</sup> diné<sup>n</sup>e n'dai yā tuūmī ní yaa'vi nee<sup>n</sup> yā

Jesús. <sup>15</sup>Jesús mii<sup>n</sup> ní ca<sup>n</sup>a yā chíi yā 'ii<sup>n</sup>'yā<sup>n</sup> fariseos: Ndís'tií ní nadicádiinuu<sup>n</sup> nī chí ndís'tií ní 'ii<sup>n</sup>'yā<sup>n</sup> n'dai ndís'tií nanáá<sup>n</sup> sa<sup>n</sup>ā i<sup>n</sup>'yee<sup>n</sup>dí 'cūū naati Ndyuūs ní n'diichí yā staava ye<sup>n</sup>e ndís'tií. Chíí<sup>n</sup> chí 'ii<sup>n</sup>'yā<sup>n</sup> nadicádiinuu<sup>n</sup> yā chí ch'εete ca, chíi<sup>n</sup> chí Ndyuūs díí<sup>n</sup> yā cuenta chí nguée de'ε véε.

**Jesús nga<sup>n</sup>a yā chí ley ní n'daacā**

<sup>16</sup>Ley ye<sup>n</sup>e Moisés ndúucū chíí<sup>n</sup> chí chí'cuee<sup>n</sup> profetas canee nanáá<sup>n</sup> ndís'tií ndíí taachi ndaā Juan chí cheedínuū<sup>n</sup>nī na i<sup>n</sup>'yee<sup>n</sup>dí 'cūū. Ndíí tiempo mii<sup>n</sup> 'ii<sup>n</sup>'yā<sup>n</sup> ca<sup>n</sup>a yā nduudú n'dai chí ngai ye<sup>n</sup>e naachí Ndyuūs nga<sup>n</sup>a ntií<sup>n</sup>'nyú<sup>n</sup> yā ní nducyáácá 'ii<sup>n</sup>'yā<sup>n</sup> ne<sup>n</sup>e yā cu'téenu yā nduudu mii<sup>n</sup>.

<sup>17</sup>Ngí<sup>n</sup>'ti ca chí 'cuiinu nanguuvi ndúucū na yá<sup>n</sup>'āa nguée ti 'cuiinū 'áámá letra 'líí<sup>n</sup> ye<sup>n</sup>e ley.

**Jesús ngí'cuee<sup>n</sup> yā ye<sup>n</sup>e divorcio**

(Mt. 19.1-12; Mr. 10.1-12)

<sup>18</sup>'Āā du'ú nūū<sup>n</sup> sá<sup>n</sup>ā chí cū'nee<sup>n</sup> sa n'daataá ye<sup>n</sup>ē sa ní 'caandivaacu sá ndúucū taama tá dii<sup>n</sup> nuu<sup>n</sup>ndí sa. Sá<sup>n</sup>ā chí cunee sá ndúucū n'daataá chí s'nee<sup>n</sup> tá isa<sup>n</sup>'ā ye<sup>n</sup>ē tá 'āā dinuu<sup>n</sup>ndí ntúū<sup>n</sup> sa.

**Ye<sup>n</sup>ē sá<sup>n</sup>'ā 'cuiica ndúucū sa<sup>n</sup>'ā chí nguuvi Lázaro**

<sup>19</sup>Ca<sup>n</sup>a Jesús: Tiempo chí chó'ōo canée 'áámá sa<sup>n</sup>'ā 'cuiica chí 'nuu<sup>n</sup> sa catecai n'dai sa ní dii<sup>n</sup> sá 'viicu. Ní nge'e sa cosas chí n'dai nguuvi nguuvi. <sup>20</sup>Canée ntúū<sup>n</sup> 'áámá sa<sup>n</sup>'ā chí nguuvi sa Lázaro chí ngiica limosnas. Ní diituú n'duu'vi núú<sup>n</sup>'má<sup>n</sup> cheete sa. Ní véε sa cheendi va'āi

ye<sup>n</sup>é sa<sup>n</sup>á 'cuiica mii<sup>n</sup>. <sup>21</sup> Sa<sup>n</sup>á mii<sup>n</sup> ní ne<sup>n</sup>e sa che'e sa cosas chi ingéé ye<sup>n</sup>e mesa ye<sup>n</sup>e sa<sup>n</sup>a 'cuiicá mii<sup>n</sup>. Ndaá 'yaānā s'ee<sup>n</sup> naachi véé sa ní yaā'vi née ti naachí yaāi ye<sup>n</sup>e Lázaro mii<sup>n</sup>. <sup>22</sup> Cuayiivi mii<sup>n</sup> ní ch'ii Lázaro. Ángeles ye<sup>n</sup>é Ndyuūs candéé yā Lázaro naachi canéé chiida yú Abraham na lugar paraíso chi ye<sup>n</sup>e 'ii<sup>n</sup>yā<sup>n</sup> chi n'dái. Ch'ii ntúū<sup>n</sup> sa<sup>n</sup>a 'cuiica mii<sup>n</sup> ní ch'iichi yā sa<sup>n</sup>á. <sup>23</sup> Taachi sa<sup>n</sup>á 'cuiica mii<sup>n</sup> ch'eenu sa chii na infierno n'diichi sa cuaa<sup>n</sup> 'nii<sup>n</sup>nu<sup>n</sup> ní n'diichi sa chiida yú Abraham ndúucū Lázaro mii<sup>n</sup>. <sup>24</sup> Tuu'mi ní 'cai sa<sup>n</sup>á 'cuiica mii<sup>n</sup>: N'dii, chiidá Abraham, inneé ya'ai 'iinú nī 'úú, ní dich'ó nī Lázaro chi di'caandá yā tii nduuti tá'ā nguaa<sup>n</sup> nuū<sup>n</sup>nī<sup>n</sup> ní cun'duú yā na ch'iiyá ní di'caanda ch'iiyá ti neené n'geenú ngii ná nguuchi ya<sup>n</sup>á 'cúú. <sup>25</sup> Abraham mii<sup>n</sup> ní ca<sup>n</sup>a yā chii yā sa<sup>n</sup>á: Díí, daiyá, n'gaacú di tí taachi canee dí i<sup>n</sup>yeē<sup>n</sup>dí mii<sup>n</sup> ch'iindí ndii n'deeé n'dái chi n'daācā ye<sup>n</sup>e di. Lázaro mii<sup>n</sup> nguéé véé ye<sup>n</sup>e sa naati maa<sup>n</sup> ní muu<sup>n</sup> ní véé 'viich'ēētífnū<sup>n</sup> ye<sup>n</sup>e sa ní díí ní 'cuéénú dí cuuvi mii<sup>n</sup>. <sup>26</sup> Míí<sup>n</sup> véé 'áámá yíí<sup>n</sup> yá<sup>n</sup>āa chi neene ch'eete nguaa<sup>n</sup> nús'uu ndúucū ndís'tii. 'Ii<sup>n</sup>yā<sup>n</sup> chí ne<sup>n</sup>e yā chó'o yā ndii 'muu<sup>n</sup> ndíí naachi snéé ndís'tii nguéé cúúví dí<sup>n</sup> yā. Ndíí nguéé ndúú 'ii<sup>n</sup>yā<sup>n</sup> chi snéé yā taa nguéé cuuví cho'o yā ní ndaá yā naachi snéé 'nū. <sup>27</sup> Tuu'mi ní sa<sup>n</sup>á 'cuiica míí<sup>n</sup> nga<sup>n</sup>á sa: N'dii, chiidá Abraham, idi'cuítú n'dii chí dich'ó nī Lázaro i<sup>n</sup>yeē<sup>n</sup>dí ndii vaacu chiidá, <sup>28</sup> ti véé nyu<sup>n</sup>u 'diinú chi sa<sup>n</sup>á mii<sup>n</sup> ní Lázaro cuuvi sa 'diinú chi nguéé ndaa yā lugar 'cúú

chí 'cueenu yā cuuvi. <sup>29</sup> Abraham mii<sup>n</sup> ní ca<sup>n</sup>a yā chii yā sa<sup>n</sup>a: Canee nguū<sup>n</sup> na libro ye<sup>n</sup>é Ndyuūs naachi canee nguū<sup>n</sup> ye<sup>n</sup>e Moisés mii<sup>n</sup> ndúucū profetas ní cuuvi yā 'ii<sup>n</sup>yā<sup>n</sup> chí 'caandiveé<sup>n</sup> yā ye<sup>n</sup>é 'ii<sup>n</sup>yā<sup>n</sup> s'ee<sup>n</sup>. <sup>30</sup> Tuu'mi ní sa<sup>n</sup>á 'cuiica mii<sup>n</sup> ní ca<sup>n</sup>á sa: N'dii, chiidá Abraham, nguéé n'giindiveé<sup>n</sup> yā ye<sup>n</sup>e yā. Ndúúti chí 'áámá 'ii<sup>n</sup>yā<sup>n</sup> chí 'āā n'dii ca<sup>n</sup>a yā nanáá<sup>n</sup> 'diinú, tuu'mi ní 'caandiveé<sup>n</sup> yā ye<sup>n</sup>é 'ii<sup>n</sup>yā<sup>n</sup> mii<sup>n</sup> ní ndaacadaamí yā ye<sup>n</sup>e nuu<sup>n</sup>ndi chí díí<sup>n</sup> yā. <sup>31</sup> Abraham mii<sup>n</sup> ní ca<sup>n</sup>a yā chii yā sa<sup>n</sup>a 'cuiica: Ndúúti chí nguéé cu'téenu yā chí canéé nguū<sup>n</sup> na libro ye<sup>n</sup>é Ndyuūs ye<sup>n</sup>e Moisés ndúucū 'ii<sup>n</sup>yā<sup>n</sup> profetas ndíí cuáá<sup>n</sup> vmnaa<sup>n</sup>, nguéé cu'téenu ntúu<sup>n</sup> yā ye<sup>n</sup>é 'ii<sup>n</sup>yā<sup>n</sup> 'cúú chí cuuvi yā 'ii<sup>n</sup>yā<sup>n</sup> s'ee<sup>n</sup> 'áará chí 'ii<sup>n</sup>yā<sup>n</sup> 'cúú ncuéé<sup>n</sup> yā ye<sup>n</sup>e nguaa<sup>n</sup> tina<sup>n</sup>á.

**Jesús ngi'cuee<sup>n</sup> yā chí nguéé canee chí díí<sup>n</sup> yú nuu<sup>n</sup>ndi**

(Mt. 18.6-7; 21-22; Mr. 9.42)

**17** Jesús ca<sup>n</sup>a yā chii yā discípulos ye<sup>n</sup>e yā: Cuaacu níí<sup>n</sup>nyú<sup>n</sup> chí véé de'e cáāvā chí díí<sup>n</sup> chí 'ii<sup>n</sup>yā<sup>n</sup> dinuu<sup>n</sup>ndi yā naati de'e chúúcā ya'ai ye<sup>n</sup>e 'ii<sup>n</sup>yā<sup>n</sup> chí díí<sup>n</sup> yā chí taama 'ii<sup>n</sup>yā<sup>n</sup> dinuu<sup>n</sup>ndi yā. <sup>2</sup> N'daacā ca chí cuuvi 'túúcā ndúucū 'ii<sup>n</sup>yā<sup>n</sup> mii<sup>n</sup>. 'Ii<sup>n</sup>yā<sup>n</sup> s'ee<sup>n</sup> caāchiichí yā 'áámá tuúu yúúú chí inguú<sup>n</sup> 'ii<sup>n</sup>yā<sup>n</sup> na daandu 'ii<sup>n</sup>yā<sup>n</sup> mii<sup>n</sup> ní 'caanuú yā 'ii<sup>n</sup>yā<sup>n</sup> mii<sup>n</sup> naachi yáānū<sup>n</sup> ye<sup>n</sup>e nuu<sup>n</sup>'ni'yá<sup>n</sup>á ní nguéé cuuvi díí<sup>n</sup> 'ii<sup>n</sup>yā<sup>n</sup> mii<sup>n</sup> chí taama da'cai'yāá idinuu<sup>n</sup>ndi yā.

<sup>3</sup> Cundéé ndís'tii cuidado. Ndúúti 'díí<sup>n</sup>u nī dinuu<sup>n</sup>ndí sa contra ye<sup>n</sup>e 'aama nī, yaa'vi neé<sup>n</sup> nī sa<sup>n</sup>á. Ndúúti

chi ndaacadaami sa ye<sup>n</sup>ē nuu<sup>n</sup>ndi ye<sup>n</sup>ē sa nadich'εεcú nī ye<sup>n</sup>ē sa. <sup>4</sup>Áará chí ndeēchē cuuvi idinuu<sup>n</sup>ndí sa contra ye<sup>n</sup>e nī 'áámá nguuvi ní ndeēchē cuuvi ndaa sa nanáá<sup>n</sup> ndís'tiī ní caa<sup>n</sup>ma<sup>n</sup> sa cuuvi sá ndís'tiī: Ndaacadaamí ye<sup>n</sup>ē nuu<sup>n</sup>ndi ye<sup>n</sup>é, tuu<sup>n</sup>mi ní nadich'εεcú nī ye<sup>n</sup>ē sa.

#### Poder ye<sup>n</sup>ē vaadí i'teenu

<sup>5</sup>Apóstoles ca<sup>n</sup>a yā chii yā Señor Jesús: N'dii, Señor, dí<sup>n</sup> nī chí nús'uu cuuvi cu'téenu cá 'nū.

<sup>6</sup>Tuu<sup>n</sup>mi Jesús ca<sup>n</sup>a yā chii yā apóstoles: Ndúútí chí ndís'tiī duu<sup>n</sup>vi i'téenu nī, tuu<sup>n</sup>mi ní vaadí i'teenu ye<sup>n</sup>é nī ní tan'dúúcā 'áámá nduutí ye<sup>n</sup>ē yīivē ntí'yaá. Ní cuuvi caa<sup>n</sup>ma<sup>n</sup> nī 'tíicā ndúúcū yá<sup>n</sup>á: Díí yá<sup>n</sup>á cuvíí dí 'muu<sup>n</sup> ní cue<sup>n</sup>e di ná nuū<sup>n</sup>nī<sup>n</sup>yá<sup>n</sup>á. Ní 'caandivee<sup>n</sup> yá<sup>n</sup>á mii<sup>n</sup> ye<sup>n</sup>e dii.

#### Ye<sup>n</sup>e táácā cuuvi dii<sup>n</sup> yú ntií<sup>n</sup>nyu<sup>n</sup> ndúúcū Ndyuūs 'iivu yú

<sup>7</sup>Nga<sup>n</sup>a Jesús: Du'u ndís'tiī ndúútí chí veε 'áámá mozo chí di'cuūndú 'iiti o dii<sup>n</sup> sa cuidado 'iiti cuūchī ye<sup>n</sup>e nī taachi nguεεcunée sa ye<sup>n</sup>e campo mii<sup>n</sup>, ¿'áá hora mí<sup>n</sup> nūu<sup>n</sup> caa<sup>n</sup>ma<sup>n</sup> nī cuuvi nī sa<sup>n</sup>á?: Cho'o di 'cuūndí di na mesa. <sup>8</sup>¿'Áá nguéé vmnáá<sup>n</sup> vmaa<sup>n</sup> caa<sup>n</sup>ma<sup>n</sup> nī cuuvi nī mozo mii<sup>n</sup> 'tíicā?: N'nuu<sup>n</sup> di chí che'e nguūnu yú. Ní 'cuiinduū di ye<sup>n</sup>é na mesa, 'cuii di ní 'úú cu'ú che'é. 'Cuiinu che'é 'cuiinu cu'ú tuu<sup>n</sup>mi ní dii cuuvi ch'é di cu'u di. <sup>9</sup>¿'Áá aama patrón nca'a yā gracias mozo mii<sup>n</sup> ti dii<sup>n</sup> sa mandados chí cā<sup>n</sup>a patrón ye<sup>n</sup>ē sa? Nguéé dí<sup>n</sup> yā 'tíicā. <sup>10</sup>Tiicā ntūū<sup>n</sup>, ndís'tiī, taachí

'cuiinu dí<sup>n</sup> nī tanducue<sup>n</sup>ē ntií<sup>n</sup>nyu<sup>n</sup> chí nga<sup>n</sup>á Ndyuūs ndís'tiī, tuu<sup>n</sup>mi ní caa<sup>n</sup>ma<sup>n</sup> nī 'tiicā: Ndyuūs, nús'uu ní mozos ye<sup>n</sup>e nī naati nús'uu ní dí<sup>n</sup> 'nū dámaā<sup>n</sup> chí canee chí dí<sup>n</sup> 'nū.

#### Jesús idií<sup>n</sup> yā chí nduūvā ye<sup>n</sup>e ndiichi 'ii<sup>n</sup>yā<sup>n</sup> ye<sup>n</sup>e ca'āi lepra chí ín'duuti yuūtē ye<sup>n</sup>e yā

<sup>11</sup>Taachí Jesús mii<sup>n</sup> canú<sup>n</sup> yā yúúní chí cue<sup>n</sup>e yā na yāā<sup>n</sup> Jerusalén, cho'ó yā naavta<sup>n</sup>ā ye<sup>n</sup>e na 'uuví yá<sup>n</sup>āa chí Samaria ndúúcū Galilea. <sup>12</sup>Ní taachí Jesús sndaā yā 'áámá yāā<sup>n</sup> 'líí<sup>n</sup> snéé ndiichi sa<sup>n</sup>ā chí induuti yuūtē ye<sup>n</sup>ē sa chí ndii sa ca'ai lepra. Ndaā sa nanáá<sup>n</sup> Jesús mii<sup>n</sup> ní ch'éétíndii ya<sup>n</sup>ai sa. <sup>13</sup>Ní 'cai sa: N'dii, 'iivú Jesús, nnéé ya'ai 'iinu nī nús'uu.

<sup>14</sup>Taachí Jesús n'diichi yā sa<sup>n</sup>ā s'ee<sup>n</sup>, tuu<sup>n</sup>mi ní yaa<sup>n</sup>vi yā: Ndís'tiī, cue<sup>n</sup>e nī ní 'cuu<sup>n</sup>mi<sup>n</sup> nī nanáá<sup>n</sup> chiiduú s'ee<sup>n</sup>. Ch'íínú ca<sup>n</sup>a Jesús ndúúdú 'cūū sa<sup>n</sup>ā s'ee<sup>n</sup> ní nduuvá ye<sup>n</sup>e sa. <sup>15</sup>Tuu<sup>n</sup>mi 'áámá ch'éé sa<sup>n</sup>ā s'ee<sup>n</sup> taachí n'diichi yā chí 'āā nduuvá ye<sup>n</sup>e yā, nguεεcunée yā ní che<sup>n</sup>e yā naachi canéé Jesús mii<sup>n</sup> ní ca<sup>n</sup>a yuudu yā: Dε'ē chúúcā ch'εete Ndyuūs. <sup>16</sup>Ní chiintii'yā yā nanáá<sup>n</sup> Jesús ní chí snaa<sup>n</sup> na yá<sup>n</sup>āa, ní ca'a yā gracias 'ii<sup>n</sup>yā<sup>n</sup>. Sa<sup>n</sup>ā mii<sup>n</sup> ní 'áámá sa<sup>n</sup>ā ye<sup>n</sup>e yá<sup>n</sup>āa Samaria. <sup>17</sup>Tuu<sup>n</sup>mi ní Jesús mii<sup>n</sup> ca<sup>n</sup>a yā: ¿'Áá nguεε ndiichi sa<sup>n</sup>ā chí nduūvā ye<sup>n</sup>ē sa? Ta nuu<sup>n</sup> sa, ¿tíi snéé sa? <sup>18</sup>¿'Áá nguεε táámá yā chí canéé chí caa<sup>n</sup>ma<sup>n</sup> yā chí ch'εete Dendyuūs? Dámaā<sup>n</sup> sa<sup>n</sup>ā mii<sup>n</sup> chí canuu<sup>n</sup> yúúní chí ca'a sa gracias.

<sup>19</sup>Tuu<sup>n</sup>mi ní Jesús ca<sup>n</sup>a yā chii yā sa<sup>n</sup>ā chí ngiita mii<sup>n</sup>: Nducuee<sup>n</sup> dí.

Cúna<sup>n</sup>ā di. 'Āā nanduuva ye<sup>n</sup>ē di caati i'téenu nī.

**Ye<sup>n</sup>e taaca Ndyuūs nga<sup>n</sup>a ntii<sup>n</sup>nyú<sup>n</sup> yā**

(Mt. 24.23-28, 36-41)

<sup>20</sup>Taachí 'ii<sup>n</sup>yā<sup>n</sup> fariseos intínguúnee<sup>n</sup> yā Jesús mii<sup>n</sup>: ¿Tíi cua'a ndáá naachí Ndyuūs nga<sup>n</sup>a ntii<sup>n</sup>nyú<sup>n</sup> yā? Jesús mii<sup>n</sup> ní nan'guεεcúta<sup>n</sup>a yā: Naachí Ndyuūs nga<sup>n</sup>a ntii<sup>n</sup>nyú<sup>n</sup> yā nguéé ndaa tan'dúúca 'áamá manera chi ndís'tiī cunee ngiinú nī ye<sup>n</sup>ē. <sup>21</sup>Ní nguéé ndúú 'ii<sup>n</sup>yā<sup>n</sup> caa<sup>n</sup>ma<sup>n</sup> ra yā 'tíicā: 'Muu<sup>n</sup> canee o mii<sup>n</sup> canee ti Ndyuūs 'āā nga<sup>n</sup>a ntii<sup>n</sup>nyú<sup>n</sup> yā nguaa<sup>n</sup> ndís'tiī.

<sup>22</sup>Tuu'mi ní Jesús ca<sup>n</sup>a yā chii yā discípulos ye<sup>n</sup>e yā: Tiempo mii<sup>n</sup> ndaa nguuvī taachi ndís'tiī ne<sup>n</sup>e nī snaa<sup>n</sup> nī taachi canéé Sa<sup>n</sup>ā chi Daiya Dendyuūs, naati nguéé snaa<sup>n</sup> nī sa<sup>n</sup>ā mii<sup>n</sup>. <sup>23</sup>Ní 'ii<sup>n</sup>yā<sup>n</sup> caa<sup>n</sup>ma<sup>n</sup> yā cuuvi yā nduudu yaadi ndís'tiī: 'Muu<sup>n</sup> canéé Sa<sup>n</sup>ā chi Daiya Dendyuūs, o mii<sup>n</sup> canee sa. Nguéé ca<sup>n</sup>a nī ndíi nguéé ndúú can'dáa nī 'ii<sup>n</sup>yā<sup>n</sup> cuayiivi. <sup>24</sup>Tan'dúúca chi inaa<sup>n</sup> yú chí ngé<sup>n</sup>é 'cuai maa<sup>n</sup> ncheeté nūu<sup>n</sup> ngiiyā, 'tiicá ntúū<sup>n</sup> cuuvi taachi 'úú chi Sa<sup>n</sup>ā chi Daiya Dendyuūs ndaa nguuvī mii<sup>n</sup>.

<sup>25</sup>Naati vmnáá<sup>n</sup> vmnaa<sup>n</sup> 'úú chi Sa<sup>n</sup>ā chi Daiya Ndyuūs ní neené 'cuenú cuuvi. Ní 'ii<sup>n</sup>yā<sup>n</sup> chi maa<sup>n</sup> snéé i<sup>n</sup>'yee<sup>n</sup>dí 'cūū díi<sup>n</sup> yā condenar 'úú. <sup>26</sup>Tan'dúúca chi canee tiempo chí 'āā chó'oo taachí canee sa<sup>n</sup>ā Noé i<sup>n</sup>'yéé<sup>n</sup>di 'cūū, 'tiicá ntúū<sup>n</sup> cuuvi tiempo ye<sup>n</sup>ē Sa<sup>n</sup>ā chi Daiyā Dendyuūs taachi ndaa sa. <sup>27</sup>Tiempo ye<sup>n</sup>e Noé 'ii<sup>n</sup>yā<sup>n</sup> s'ee<sup>n</sup> ngé'e yā ngi'i

yā ní ng'íindivaacu yā. Ní ca'a yā daiya yā chí ng'iindivaacu ndii nguuvī chí Noé sndaá yā na arca. Tuu'mi ní chee taa<sup>n</sup> cuūvi ní chiitu i<sup>n</sup>'yee<sup>n</sup>dí 'cūū ndúúcu nuū<sup>n</sup>nī<sup>n</sup> ní chíi nducyaaca 'ii<sup>n</sup>yā<sup>n</sup>. <sup>28</sup>'Tiicá ntúū<sup>n</sup> chíi tiempo chí 'āā chó'oo taachi canee sa<sup>n</sup>a Lot i<sup>n</sup>'yee<sup>n</sup>dí 'cūū. 'ii<sup>n</sup>yā<sup>n</sup> s'ee<sup>n</sup> nge'e yā ngi'i yā. Ngai yā ní n'diicui yā. Ní ngiinú yā ní idin'dái yā vaacu yā. <sup>29</sup>Taachi can'daā sa<sup>n</sup>ā Lot mii<sup>n</sup> ná yāā<sup>n</sup> Sodomā chí chee<sup>n</sup> nguuchi ya<sup>n</sup>ā ndúúcu azufre chí tuūú chí ngiichi chí ye<sup>n</sup>e nanguuvi. Cáávā chuū chíi nducyaaca 'ii<sup>n</sup>yā<sup>n</sup> na yāā<sup>n</sup> mii<sup>n</sup>. <sup>30</sup>'Tíicā cuuvi nguuvī mii<sup>n</sup> taachi 'úú Sa<sup>n</sup>ā chí Daiya Dendyuūs ndaa taama vmné<sup>n</sup>ēe.

<sup>31</sup>Ní nguūvi chí ndaa, taachí 'ii<sup>n</sup>yā<sup>n</sup> chí snée yā tíi<sup>n</sup> va'āi n'daacā ca chí 'ii<sup>n</sup>yā<sup>n</sup> mii<sup>n</sup> ní nguéé nch'ée<sup>n</sup> yā ní cuta'a yā dendu'ū chí véé ye<sup>n</sup>e yā cheetí va'āi. 'Tiicá ntúū<sup>n</sup> 'ii<sup>n</sup>yā<sup>n</sup> chí snée yā cuēeti n'daacā ca chí nguéé na<sup>n</sup>a yā nduvaacu yā.

<sup>32</sup>Nan'gáácú nī tan'dúúca chí chíi n'daataa yé<sup>n</sup>ē sa<sup>n</sup>ā Lot. <sup>33</sup>'Āā du'ú nūu<sup>n</sup> 'ii<sup>n</sup>yā<sup>n</sup> chí ne<sup>n</sup>e cá yā vida ye<sup>n</sup>e yā nguéé ti 'úú, dindaí yā táámá vida ye<sup>n</sup>e yā. 'Āā du'ú nūu<sup>n</sup> 'ii<sup>n</sup>yā<sup>n</sup> chí dichí've yā 'úú ní dindaí yā vida ye<sup>n</sup>e maá<sup>n</sup> yā cucáávā 'úú, ní nndaacá yā táámá vida ye<sup>n</sup>e yā.

<sup>34</sup>'Úú nga<sup>n</sup>á ngiī ndís'tiī chí nguūinū mii<sup>n</sup> 'uuvī yā chí ndiiti yā na 'áámá cama, 'aama yā ní ndaā naá<sup>n</sup> ní taama yā ní canee yā. <sup>35</sup>Nífcú naachí 'uuvī n'daataa daama snee ta ingúu tá, 'aama ta ní ndaā naá<sup>n</sup> tá ní taama tá ní canee ta. <sup>36</sup>Naachí 'uūvi yā snée yā cuēeti, 'áámá yā nī ndaā naá<sup>n</sup> yā, nífcú taama yā ní canee yā.

<sup>37</sup>Taachí 'ii<sup>n</sup>yā<sup>n</sup> s'ee<sup>n</sup> ch'iindiveé<sup>n</sup> yā chuū itinguuneé<sup>n</sup> Jesús: Señor, ¿tíí cuuví chuū? Jesús mii<sup>n</sup> ní ca<sup>n</sup>a yā ye<sup>n</sup>e tiempo mii<sup>n</sup>: Naachi candiití cuerpo ye<sup>n</sup>e tiná<sup>n</sup>ā, mii<sup>n</sup> ní nduuvidaamá luutí ní che'e tī, tuu<sup>n</sup>mi ní cuuví chuū.

**Ejemplo ye<sup>n</sup>e n'daataa nguá<sup>n</sup>ā  
chí cue<sup>n</sup>e tá nanaa<sup>n</sup> juez  
ndúúcu 'áámá asunto**

**18** Jesús ca<sup>n</sup>a yā 'aama ejemplo chí 'téé nguéé daama ye<sup>n</sup>e chí 'ii<sup>n</sup>yā<sup>n</sup> canéé chí caa<sup>n</sup>ma<sup>n</sup>ngua<sup>n</sup>á yā cué<sup>n</sup>é daā<sup>n</sup>ma<sup>n</sup> nguéé ndúúcu vaadí 'daandí. <sup>2</sup>Ní ca<sup>n</sup>a yā chí yā 'ii<sup>n</sup>yā<sup>n</sup> s'ee<sup>n</sup> ejemplo 'cūū: Canéé 'áámá juez na 'aama yāā<sup>n</sup> chí nguéé 'va'a sa Dendyuūs. Ní ndíí nguéé ndúú idii<sup>n</sup> rá yā respetar 'ii<sup>n</sup>yā<sup>n</sup> chí ch'iindiveé<sup>n</sup> yā asuntos ye<sup>n</sup>e yā. <sup>3</sup>Canéé ntúū<sup>n</sup> na yāā<sup>n</sup> mii<sup>n</sup> 'áámá n'daataa nguá<sup>n</sup>ā chí ndaa yā nguuví nguuví nanáá<sup>n</sup> juez mii<sup>n</sup> ní ngiica tá justicia juez ye<sup>n</sup>e 'ii<sup>n</sup>yā<sup>n</sup> chí taa<sup>n</sup> ndúúcu tá. <sup>4</sup>Juez mii<sup>n</sup> ní nguéé 'cuu<sup>n</sup> yā 'naa<sup>n</sup> tiempo naati cuayiivi nadicádiinu<sup>n</sup> yā: 'Áará chí nguéé 'va'á Dendyuūs ndíí nguéé ndúú idii<sup>n</sup> rá respetar 'ii<sup>n</sup>yā<sup>n</sup>, <sup>5</sup>naati n'daataa nguá<sup>n</sup>ā 'cūū néené ididú'ū ta 'úú ní maa<sup>n</sup> ní ca<sup>n</sup>á díí<sup>n</sup> n'daacā ndúúcu tá chí 'āā ntéé candii tá dindú'ū ta ti 'cuinu paciencia ye<sup>n</sup>e.

<sup>6</sup>Naati Señor mii<sup>n</sup> ca<sup>n</sup>a yā: 'Caandiveé<sup>n</sup> ní chí nga<sup>n</sup>ā juez chí nguéé n'daacā táácā idii<sup>n</sup> yā. <sup>7</sup>¿ÁÁ Ndyuūs nguεε nnee ntúū<sup>n</sup> yā 'ii<sup>n</sup>yā<sup>n</sup> chí ndεεve yā, 'ii<sup>n</sup>yā<sup>n</sup> chí caa<sup>n</sup>ma<sup>n</sup>ngua<sup>n</sup>á yā ndii nguuví ndíí n'gaa<sup>n</sup> ní Ndyuūs díí<sup>n</sup> yā castigar 'ii<sup>n</sup>yā<sup>n</sup> chí contra ye<sup>n</sup>e 'ii<sup>n</sup>yā<sup>n</sup> chí ndεεve yā? ¿ÁÁ cuuvi 'naa<sup>n</sup> Ndyuūs

chí cunnee yā 'ii<sup>n</sup>yā<sup>n</sup>? Nguéé 'tíicā. <sup>8</sup>Úú ní nga<sup>n</sup>á ngíí ndís'tii chí Ndyuūs maa<sup>n</sup> nch'εεté nadanguá<sup>n</sup>ai yā 'ii<sup>n</sup>yā<sup>n</sup>. Naati taachi 'úú chí Sa<sup>n</sup>ā chí Daiya Dendyuūs ndaa, ¿'áá nndaaca ntúú<sup>n</sup> 'ii<sup>n</sup>yā<sup>n</sup> chí i'téenu yā Ndyuūs ná i<sup>n</sup>yee<sup>n</sup>dí 'cūū?

**Sa<sup>n</sup>ā fariseo ndúúcu sa<sup>n</sup>ā  
chí inn'guεε ye<sup>n</sup>e yá<sup>n</sup>ā**

<sup>9</sup>Jesús ca<sup>n</sup>a yā ejemplo 'cūū chí 'téé nguéé dáámá caava n'dúúví 'ii<sup>n</sup>yā<sup>n</sup> chí idin'geeté maá<sup>n</sup> yā ní nguéé díí<sup>n</sup> yā respetar taná<sup>n</sup>ā 'ii<sup>n</sup>yā<sup>n</sup>. Ní ca<sup>n</sup>a yā: <sup>10</sup>Na 'úúví sa<sup>n</sup>ā che<sup>n</sup>e sa yáacū templo chí caa<sup>n</sup>ma<sup>n</sup>ngua<sup>n</sup>ā sa. 'Aama sa ní sa<sup>n</sup>ā fariseo, taama sa ní sa<sup>n</sup>ā chí inn'guεε ye<sup>n</sup>e yá<sup>n</sup>ā. <sup>11</sup>Sa<sup>n</sup>ā fariseo chí ndii sa ní 'túúicā ca<sup>n</sup>angua<sup>n</sup> sa: N'díí Señor, nteé gracias n'dii ti 'úú ní nguéé tan'dúúcā taná<sup>n</sup>ā sa<sup>n</sup>a 'cūū. 'Úú nguéé ididuucú, nguéé yáádí'yā 'úú, nguéé ca<sup>n</sup>á ndúúcu taama n'daataá chí nguεε n'daataá ye<sup>n</sup>e, nguéé idii<sup>n</sup> tan'dúúcā chí idii<sup>n</sup> sa<sup>n</sup>a 'cūū chí inn'guεε sa ye<sup>n</sup>e yá<sup>n</sup>ā. <sup>12</sup>Úú ní nguéé nga'dii<sup>n</sup>nú<sup>n</sup> 'uūví cuuvi 'áámá ndεεte taachi caa<sup>n</sup>ma<sup>n</sup>ngua<sup>n</sup>á. 'Úú ní teé décima ye<sup>n</sup>e tanducué<sup>n</sup>ē chí véé ye<sup>n</sup>e chí lado ye<sup>n</sup>e Ndyuūs chí chí tuné<sup>n</sup> Ndyuūs. <sup>13</sup>Naati sa<sup>n</sup>ā chí inn'guεε ye<sup>n</sup>e yá<sup>n</sup>ā ya<sup>n</sup>ai canee sa ní nguéé ne<sup>n</sup>e sa snaa<sup>n</sup> sa nánguuví. Dámaā<sup>n</sup> chí n'ge<sup>n</sup>e sá nii<sup>n</sup>nu<sup>n</sup> sa ní nga<sup>n</sup>ā sa: N'díí Ndyuūs, ya'ai 'iinu ní 'úú, ti 'úú 'ii<sup>n</sup>yā<sup>n</sup> nuū<sup>n</sup>ndí 'úú. <sup>14</sup>Úú nga<sup>n</sup>á ngíí ndís'tii: Sá<sup>n</sup>a 'cūū cūna<sup>n</sup>ā sá ndavaacu sa ní Ndyuūs nadich'εεcú yā nuū<sup>n</sup>ndí ye<sup>n</sup>e sa. Sa<sup>n</sup>ā fariseo mii<sup>n</sup> nguéé 'tíicā. 'Áā du'ú nuū<sup>n</sup> 'ii<sup>n</sup>yā<sup>n</sup> chí dich'εεté maā<sup>n</sup>, cuuví yā

ndicú<sup>n</sup> nanáá<sup>n</sup> Ndyuūs. Ní 'ii<sup>n</sup>'yā<sup>n</sup> chí nguéé dich'eteté maá<sup>n</sup> yā 'ii<sup>n</sup>'yā<sup>n</sup>, Ndyuūs dich'eteté yā 'ii<sup>n</sup>'yā<sup>n</sup> mii<sup>n</sup>.

**Jesús idi'viicú yā da'caiyāa**

(Mt. 19.13-15; Mr. 10.13-16)

<sup>15</sup>'Ii<sup>n</sup>'yā<sup>n</sup> ní candεε yā da'caiyāa nanáá<sup>n</sup> Jesús ní 'iicu Jesús tuu'ví yā da'caiyāa. Taachí discípulos ye<sup>n</sup>'e Jesús n'diichi yā chuū, yaa'vi née yā 'ii<sup>n</sup>'yā<sup>n</sup> s'ee<sup>n</sup> chí indáa yā ndúúcu dá'caiyāa. <sup>16</sup>Tuu'mi ní Jesús yaa'vi yā discípulos ye<sup>n</sup>'e yā ní ca<sup>n</sup>'a yā: 'Cuáá<sup>n</sup> nī chí dá'caiyāa chíi yā nanaá<sup>n</sup>. Nguéé 'caaca taa<sup>n</sup> nī caati naachí Ndyuūs nga<sup>n</sup>'a ntii<sup>n</sup>'nyú<sup>n</sup> yā ní ye<sup>n</sup>'e 'ii<sup>n</sup>'yā<sup>n</sup> chí ndiicuú<sup>n</sup> yā tan'dúúca dá'caiyāa. <sup>17</sup>Cuaacu níí<sup>n</sup>'nyú<sup>n</sup> nga<sup>n</sup>'á ngii ndís'tii: 'Ii<sup>n</sup>'yā<sup>n</sup> chí nguéé cu'téenu yā Ndyuūs tan'dúúca 'áamá dá'caiyāa i'téenu yā nguéé cuuví ndaa yā naachí nga<sup>n</sup>'a ntii<sup>n</sup>'nyu<sup>n</sup> yā.

**'Áamá sa<sup>n</sup>'ā chí 'cuiica ndeē sa ndúúcu Jesús**

(Mt. 19.16-30; Mr. 10.17-31)

<sup>18</sup>'Áamá sa<sup>n</sup>'ā chí nga<sup>n</sup>'ā ntii<sup>n</sup>'nyu<sup>n</sup> sa itínguunee<sup>n</sup> sa Jesús mii<sup>n</sup>: N'díí, Maestro chí n'dai, ¿de'ē cuuvi díí<sup>n</sup> ní ndaācā vida cue<sup>n</sup>'e daā<sup>n</sup>'ma<sup>n</sup> chí cuuvi ye<sup>n</sup>'é?

<sup>19</sup>Jesús ní ca<sup>n</sup>'a yā chíi yā sa<sup>n</sup>'ā: ¿De'ē cúví chí nga<sup>n</sup>'a di ngii di 'úú chí 'úú n'dai 'úú? Mar 'áamá 'ii<sup>n</sup>'yā<sup>n</sup> nguéé n'dai yā, dámaā<sup>n</sup> Dendyuūs. <sup>20</sup>Dii ní déenu di chí canéé nguū<sup>n</sup> na ley 'tíicā: Nguéé 'caā<sup>n</sup>'nū<sup>n</sup> di; nguéé ca<sup>n</sup>'a di ndúúcu táámá n'daataá chí nguεε ye<sup>n</sup>'ē di; nguεε diduucú di; nguéé caa<sup>n</sup>'ma<sup>n</sup> di nduudu yaadi ndúúcu mar 'áamá 'ii<sup>n</sup>'yā<sup>n</sup>; diné<sup>n</sup>'e di ch'εecu di ndúúcu chíida di.

<sup>21</sup>Sa<sup>n</sup>'ā mii<sup>n</sup> n'gueεcúta<sup>n</sup>'ā sa ní ca<sup>n</sup>'ā sa: Tanducue<sup>n</sup>'ē chuū 'āā idif<sup>n</sup> taachi sa<sup>n</sup>'ā 'líf<sup>n</sup>'úú.

<sup>22</sup>Taachí Jesús ch'iindivee<sup>n</sup> yā chuū, ca<sup>n</sup>'a yā chíi yā sa<sup>n</sup>'ā: Véé 'áamá cosa nūu<sup>n</sup> chí canéé chí dii<sup>n</sup> di. N'diicui dí tanducue<sup>n</sup>'ē chí véé ye<sup>n</sup>'ē di ní ca'a di 'ii<sup>n</sup>'yā<sup>n</sup> chí nguéé ye<sup>n</sup>'e yā, ní ndaācā chí véé vaadi 'cuiica na va'ai chεeti nguuvi chí cuuvi ye<sup>n</sup>'ē di. Ní cuchíi di ní ca<sup>n</sup>'a di nduucú.

<sup>23</sup>Taachí sa<sup>n</sup>'ā mii<sup>n</sup> ch'iindivee<sup>n</sup> sá chuū, neené s'nee<sup>n</sup> ndaachíi yiinú sa, ti neené 'cuiica sa. <sup>24</sup>Ní taachí Jesús n'diichi yā sa<sup>n</sup>'ā mii<sup>n</sup> chí neené s'nee<sup>n</sup> ndaachi yiinú sa, tuu'mi ní ca<sup>n</sup>'a yā: De'ē chúúca ngí<sup>n</sup>'ii chí cundaa 'ii<sup>n</sup>'yā<sup>n</sup> chí 'cuiica naachí Ndyuūs nga<sup>n</sup>'a ntii<sup>n</sup>'nyú<sup>n</sup> yā. <sup>25</sup>Ní tan'dúúca ejemplo 'cūū 'tíicā. Nguéé ngi<sup>n</sup>'ii cá ye<sup>n</sup>'e 'áamá 'iiti camello chí ch'εete cá ti 'yúúduu chí cho'ó tī nduutináá<sup>n</sup> 'iini chí cheendi va'ai 'líf<sup>n</sup>' nguéé ti 'aama sa<sup>n</sup>'ā chí 'cuiica i'téenu sa Ndyuūs ní cundáa sa na va'ai chεeti nguuvi.

<sup>26</sup>Taachi discípulos n'giindivee<sup>n</sup> yā chuū, ca<sup>n</sup>'a yā: ¿Du'ú cuuvi nángu<sup>n</sup>'āi?

<sup>27</sup>Ní Jesús ca<sup>n</sup>'a yā: Sa<sup>n</sup>'ā i<sup>n</sup>'yee<sup>n</sup>dí 'cūū nguéé ngí dii<sup>n</sup> sa chuū naati Ndyuūs cuuvi díí<sup>n</sup> yā tanducue<sup>n</sup>'ē.

<sup>28</sup>Tuu'mi ní Pedro mii<sup>n</sup> ní ca<sup>n</sup>'a yā: Señor, cuin'dííchí nī. Nús'uu ní s'nee<sup>n</sup> 'nū chí véé ye<sup>n</sup>'é 'nū, ní cuchíi 'nū ndúúcu nī.

<sup>29</sup>Jesús mii<sup>n</sup> ní ca<sup>n</sup>'a yā chíi yā 'ii<sup>n</sup>'yā<sup>n</sup> s'ee<sup>n</sup>: Cuaacu níí<sup>n</sup>'nyú<sup>n</sup> nga<sup>n</sup>'á ngii ndís'tii chí 'āā du'ú nūu<sup>n</sup> 'ii<sup>n</sup>'yā<sup>n</sup> chí cu'nee yā vaacu yā, o chíidá yā, o chεécú yā, o 'díínu yā, o n'daataá ye<sup>n</sup>'e yā, o daiya yā, cáávā chí díí<sup>n</sup> yā ntii<sup>n</sup>'nyu<sup>n</sup> ye<sup>n</sup>'é naachí

Ndyuūs nga<sup>n</sup>a nti<sup>n</sup>nyú<sup>n</sup> yā, <sup>30</sup>'i<sup>n</sup>yā<sup>n</sup> mii<sup>n</sup> n'deēe ca ndaācā ye<sup>n</sup>e yā ná i<sup>n</sup>'yee<sup>n</sup>dí 'cūū. Ní cuayiivi ní ndaacá yā vida cue<sup>n</sup>e daā<sup>n</sup>ma<sup>n</sup> ná va'ai cheeti nguuvi.

**Jesús nga<sup>n</sup>a yā chi 'cuūvi yā**

(Mt. 20.17-19; Mr. 10.32-34)

<sup>31</sup>Jesús cue<sup>n</sup>e yā 'áámá lado ndúúcū ndu'ū ndiichúví discípulos ye<sup>n</sup>e yā ní ca<sup>n</sup>a yā chii yā 'i<sup>n</sup>'yā<sup>n</sup> s'ee<sup>n</sup>: Maa<sup>n</sup> ní ca<sup>n</sup>'ā yú na yāā<sup>n</sup> Jerusalén ní mii<sup>n</sup> cúnuu<sup>n</sup> ca'a tanducué<sup>n</sup>ē chi profetas dingúu<sup>n</sup> yā ndíí cuáá<sup>n</sup> vmnaa<sup>n</sup> ye<sup>n</sup>e 'úú chi Sa<sup>n</sup>'ā chi Daiya Dendyuūs. <sup>32</sup>Ní 'i<sup>n</sup>'yā<sup>n</sup> s'ee<sup>n</sup> díí<sup>n</sup> yā entregar 'úú 'i<sup>n</sup>'yā<sup>n</sup> chi nguéé ye<sup>n</sup>e ndaata Israel. Ní 'i<sup>n</sup>'yā<sup>n</sup> s'uu<sup>n</sup> ní dūūchiné<sup>n</sup> yā 'úú ní díí<sup>n</sup> taa<sup>n</sup> yā nduucú níícu ca'a nee<sup>n</sup> daí<sup>n</sup> yā 'úú. <sup>33</sup>Cuífínú 'cue<sup>n</sup>'é yā 'úú ní caa<sup>n</sup>'nú<sup>n</sup> yā 'úú naati 'cuífnū 'iinū nguuvi ní nnduūchí ye<sup>n</sup>e nguaa<sup>n</sup> tiná<sup>n</sup>ā.

<sup>34</sup>Discípulos s'ee<sup>n</sup> nguéé tuumicádíínuu<sup>n</sup> yā ye<sup>n</sup>'é dendū'u 'cūū ti canúú<sup>n</sup> n'de'ei ye<sup>n</sup>'e 'i<sup>n</sup>'yā<sup>n</sup> s'ee<sup>n</sup>. Nguéé tuumicádíínuu<sup>n</sup> yā de'ē chi ca<sup>n</sup>'a Jesús.

**Jesús díí<sup>n</sup> yā chi nduūvā ye<sup>n</sup>'e 'áámá sa<sup>n</sup>'ā chi ngueenáá<sup>n</sup> ye<sup>n</sup>'e yāā<sup>n</sup> Jericó**

(Mt. 20.29-34; Mr. 10.46-52)

<sup>35</sup>Taachí Jesús ndaā nii<sup>n</sup>'nuú<sup>n</sup> yā na yāā<sup>n</sup> Jericó, 'áámá sa<sup>n</sup>'ā ngueenáá<sup>n</sup> véé sa nii<sup>n</sup>'nuú<sup>n</sup> cyúúní. Ngiica sá limosnas. <sup>36</sup>Sá<sup>n</sup>'a 'cūū tááchí ch'iindivee<sup>n</sup> sa chí cho'ó n'deēe n'dáí 'i<sup>n</sup>'yā<sup>n</sup>, itiinguuné<sup>n</sup> sá: ¿D'ē chí chii?

<sup>37</sup>Ní 'i<sup>n</sup>'yā<sup>n</sup> ca<sup>n</sup>'a yā chii yā sa<sup>n</sup>'ā chi ngueenáá<sup>n</sup> chí chó'oo Jesús chí ye<sup>n</sup>'ē yāā<sup>n</sup> Nazaret. <sup>38</sup>Tuu'mi ní sa<sup>n</sup>'ā

nguéénaa<sup>n</sup> mii<sup>n</sup> 'caí sa: N'díí Jesús, Daiya David, nneé ya'ai 'iinu ní 'úú.

<sup>39</sup>'i<sup>n</sup>'yā<sup>n</sup> chi cue<sup>n</sup>'e vmnaa<sup>n</sup> ye<sup>n</sup>'e Jesús nga<sup>n</sup>a yā ngii yā sa<sup>n</sup>'ā mii<sup>n</sup> chí 'āā ntéé 'cuai sa, naati sa<sup>n</sup>'ā mii<sup>n</sup> ní n'gai yiicu ca sa: N'díí, Daiya David, nneé ya'ai 'iinu ní 'úú.

<sup>40</sup>Tuu'mi ní Jesús mii<sup>n</sup> chééndii yā ní ca<sup>n</sup>'a yā chi canguai yā sa<sup>n</sup>'a chi nguéé inaa<sup>n</sup>. Taachí sa<sup>n</sup>'ā mii<sup>n</sup> ndaā sa nanáá<sup>n</sup> Jesús, Jesús mii<sup>n</sup> ní itiinguuné<sup>n</sup> yā sa<sup>n</sup>'ā: <sup>41</sup>¿De'ē ne<sup>n</sup>'e di chí díí<sup>n</sup> ndúúcū díí? Sa<sup>n</sup>'ā mii<sup>n</sup> ní ca<sup>n</sup>'ā sa: Señor, díí<sup>n</sup> ní chí snā<sup>n</sup>.

<sup>42</sup>Jesús ca<sup>n</sup>'a yā chii yā sa<sup>n</sup>'ā: Cáávā chi i'téenu di nduūvā ye<sup>n</sup>'ē di.

<sup>43</sup>Tuu'mí nūu<sup>n</sup> snaā<sup>n</sup> sa ní cué<sup>n</sup>'e sa ndúúcū Jesús. Ní nga<sup>n</sup>'a sa: De'ē chúúcā ch'ēete Ndyuūs. Ní nducyaaca 'i<sup>n</sup>'yā<sup>n</sup> ye<sup>n</sup>'e yāā<sup>n</sup> mii<sup>n</sup> chí n'diichí yā chuū ní ca<sup>n</sup>'a yā: De'ē chúúcā ch'ēete Dendyuūs.

**Jesús ndúúcū sa<sup>n</sup>'ā chi nguuvi Zaqueo**

**19** Taachí Jesús sndaa yā na yāā<sup>n</sup> Jericó, cánúu<sup>n</sup> yā yúúni ní cho'ó yā náávta<sup>n</sup>'ā yāā<sup>n</sup> Jericó mii<sup>n</sup>. <sup>2</sup>Na yāā<sup>n</sup> mii<sup>n</sup> canee 'áámá sa<sup>n</sup>'ā chí 'cuica sa chi nguuvi sa Zaqueo. Sa<sup>n</sup>'ā mii<sup>n</sup>, ní sa<sup>n</sup>'ā ndíí tii<sup>n</sup> ye<sup>n</sup>'é 'i<sup>n</sup>'yā<sup>n</sup> chí inn'guee ye<sup>n</sup>'e impuestos ye<sup>n</sup>'e yá<sup>n</sup>'āa. <sup>3</sup>Sa<sup>n</sup>'a mii<sup>n</sup> ní ne<sup>n</sup>'e sa snaa<sup>n</sup> sa cheé yā chi Jesús mii<sup>n</sup> naati nguéé ngii inaa<sup>n</sup> sa ti neené n'deēe 'i<sup>n</sup>'yā<sup>n</sup> ti nguéé yaacu sá. <sup>4</sup>Tuu'mi ní cue<sup>n</sup>'e sa ngéenu sa cuáá<sup>n</sup> vmnaa<sup>n</sup> ní cucheé sá 'áámá tii<sup>n</sup> yá<sup>n</sup>'á sicómoro caati cuuvi sa snaa<sup>n</sup> sa 'i<sup>n</sup>'yā<sup>n</sup>, ti Jesús mii<sup>n</sup> canee chí cho'ó yā mii<sup>n</sup>. <sup>5</sup>Taachí Jesús mii<sup>n</sup> ndaá yā mii<sup>n</sup>, n'diichí yā Zaqueo mii<sup>n</sup>, ní ca<sup>n</sup>'a

yā chii yā sa<sup>n</sup>ā: Díi, Zaqueo, maa<sup>n</sup> nch'eteté nūu<sup>n</sup> nch'éé<sup>n</sup> dí ti maa<sup>n</sup> ní ne<sup>n</sup>é cuneé na vaacu dí.

<sup>6</sup>Tuu'mí ní Zaqueo mii<sup>n</sup> maa<sup>n</sup> nch'eteté nūu<sup>n</sup> nch'eē<sup>n</sup> sa ní 'cuu<sup>n</sup> sa chí cue<sup>n</sup>e Jesús mii<sup>n</sup> ndúúcu sa na vaacu sa. Ní yeenú taavi sa. <sup>7</sup>Taachí 'ii<sup>n</sup>yā<sup>n</sup> n'diichí yā chuū, nducyaaca yā ní neené n'deēe ca<sup>n</sup>a yā. Ní ca<sup>n</sup>a yā chí Jesús mii<sup>n</sup> ní chinndaá yā chí cunee yā ndúúcu 'aama sa<sup>n</sup>ā chí véé nuu<sup>n</sup>ndí ye<sup>n</sup>é sa. <sup>8</sup>Tuu'mi ní taachi ch'iindivee<sup>n</sup> Zaqueo chuū, chéendii sa nanáá<sup>n</sup> Jesús mii<sup>n</sup> ní ca<sup>n</sup>a sá chii sa 'ii<sup>n</sup>yā<sup>n</sup>: Señor, 'caandiveé<sup>n</sup> nī ye<sup>n</sup>é. Ná ma<sup>n</sup>a chí véé ye<sup>n</sup>é caá 'ii<sup>n</sup>yā<sup>n</sup> chí nguéé ye<sup>n</sup>e yā. Ndúúti chí de'é ndivií ye<sup>n</sup>é 'áámá 'ii<sup>n</sup>yā<sup>n</sup>, tuu'mi ní n'guεεcunee cuūu<sup>n</sup> tanto ye<sup>n</sup>e yā.

<sup>9</sup>Jesús ca<sup>n</sup>a yā chíi yā sa<sup>n</sup>ā: Maa<sup>n</sup> ní nnguá'āi 'ii<sup>n</sup>yā<sup>n</sup> ye<sup>n</sup>e va'ai Zaqueo ye<sup>n</sup>e nuu<sup>n</sup>ndi ye<sup>n</sup>e yā ti Zaqueo mii<sup>n</sup> ní ye<sup>n</sup>e ndaata Abraham. <sup>10</sup>Ti 'úú chí Sa<sup>n</sup>ā chí Daiya Dendyuūs ní ndaá chí in'nuū<sup>n</sup> ní 'úú nadingua<sup>n</sup>'áí 'ii<sup>n</sup>yā<sup>n</sup> chí nindáí ndúúcu nuū<sup>n</sup>ndí ye<sup>n</sup>e yā.

**Ejemplo ye<sup>n</sup>e dueño chí ca'a tuumí mozos ye<sup>n</sup>é yā chí cuuvi díi<sup>n</sup> sa negocio**

<sup>11</sup>Taachí Jesús mii<sup>n</sup> 'āā cané nii<sup>n</sup>nú<sup>n</sup> yā na yāā<sup>n</sup> Jerusalén, 'ii<sup>n</sup>yā<sup>n</sup> chí ch'iindivee<sup>n</sup> yā chuū nadicádíínuu<sup>n</sup> yā chí 'āā maá<sup>n</sup> nūu<sup>n</sup> ndaá naachi Ndyuūs nga<sup>n</sup>a ntii<sup>n</sup>nyu<sup>n</sup> yā. Tuu'mi ní Jesús mii<sup>n</sup> ní ca<sup>n</sup>a yā 'áámá ejemplo. <sup>12</sup>'Áámá sa<sup>n</sup>ā chí n'dai chí ye<sup>n</sup>e familia chí nga<sup>n</sup>ā ntii<sup>n</sup>nyu<sup>n</sup> cue<sup>n</sup>e sa na 'aama país chí ya<sup>n</sup>ai chí cunee sa rey ye<sup>n</sup>é país mii<sup>n</sup>. Cue<sup>n</sup>e sa ní cuayiivi nguεεcunee sa. <sup>13</sup>Taachi

'āā cháá ca<sup>n</sup>ā sa, yaa'vi sa ndiichi sa<sup>n</sup>ā mozos ye<sup>n</sup>é sa ní ca'a sa 'áámá cáádí 'dii<sup>n</sup>nguāa<sup>n</sup> 'áámá 'áámá mozo ye<sup>n</sup>é sa. Ní ca<sup>n</sup>a sa chíi sa mozos: Díi<sup>n</sup> ní negocio ndúúcu tuumí 'cūū nuu<sup>n</sup>ma<sup>n</sup> ne<sup>n</sup>e chí ca<sup>n</sup>ā. <sup>14</sup>'Ii<sup>n</sup>yā<sup>n</sup> ye<sup>n</sup>e país chí ya<sup>n</sup>ai nguéé ne<sup>n</sup>e yā sa<sup>n</sup>a mii<sup>n</sup> ní nguéé ne<sup>n</sup>é yā chí cuuvi rey ye<sup>n</sup>é yā sa<sup>n</sup>ā. Dich'óo yā n'duuvi 'ii<sup>n</sup>yā<sup>n</sup> chí caa<sup>n</sup>ma<sup>n</sup> ya 'túúca: Nguéé ne<sup>n</sup>e 'nū chí sa<sup>n</sup>ā 'cūū ní cúuvi sá rey ye<sup>n</sup>é nús'uu. <sup>15</sup>Sa<sup>n</sup>ā mii<sup>n</sup> chí rey chí nga<sup>n</sup>a ntii<sup>n</sup>nyú<sup>n</sup> yā cue<sup>n</sup>e yā ní nguεεcunee yā ndāā yā na vaacu yā. Dich'óo sa 'ii<sup>n</sup>yā<sup>n</sup> chí yaa'ví yā mozos chí ca'a sa tuumí mii<sup>n</sup> chí ndaa sa nanáā<sup>n</sup> yā ní cuuvi cadíínuu<sup>n</sup> yā, 'áá n'deēe daiyā tuumi ndaacá 'aama 'aama yā? <sup>16</sup>Ndaa sa<sup>n</sup>ā chí vmnáá<sup>n</sup> vmnaa<sup>n</sup> ní ca<sup>n</sup>a sa chíi sa 'ii<sup>n</sup>yā<sup>n</sup>: N'dií, señor, ye<sup>n</sup>e 'aama caadi 'díí<sup>n</sup>nguāa<sup>n</sup> ye<sup>n</sup>e nī, daiya túumí mii<sup>n</sup> dii<sup>n</sup> ganar ndiichi caadi 'díí<sup>n</sup>nguāa<sup>n</sup>. <sup>17</sup>'Ii<sup>n</sup>yā<sup>n</sup> 'cuiica mii<sup>n</sup> ní ca<sup>n</sup>a yā chíi yā mozo mii<sup>n</sup>: Díi, n'daacā dii<sup>n</sup> di; ní díí 'áámá mozo chí n'dai. Tan'dúúca chí n'daacā chí dii<sup>n</sup> di ndúúcu chí 'téé chí teé dii maa<sup>n</sup> ní díí ní caa<sup>n</sup>ma<sup>n</sup> ntii<sup>n</sup>nyu<sup>n</sup> di ye<sup>n</sup>é ndiichi yāā<sup>n</sup>. <sup>18</sup>Cuayiivi ndaā táámá sá ní ca<sup>n</sup>ā sa: N'dií, señor, ye<sup>n</sup>e 'aama caadi 'díí<sup>n</sup>nguāa<sup>n</sup> ye<sup>n</sup>e nī, daiya tuūmí mii<sup>n</sup> dii<sup>n</sup> ganar nyu<sup>n</sup>u cáádí 'díí<sup>n</sup>nguāa<sup>n</sup>. <sup>19</sup>Tuu'mi ní ca<sup>n</sup>a 'ii<sup>n</sup>yā<sup>n</sup> 'cuiica mii<sup>n</sup> chíi yā mozo 'cūū: 'Tiicá ntuū<sup>n</sup> dii ní caa<sup>n</sup>ma<sup>n</sup> ntii<sup>n</sup>nyu<sup>n</sup> di ye<sup>n</sup>é nyu<sup>n</sup>u yāā<sup>n</sup>. <sup>20</sup>Ndaā táámá mozo ní ca<sup>n</sup>ā sa chíi sa 'ii<sup>n</sup>yā<sup>n</sup> 'cuiica mii<sup>n</sup>: N'dií, señor, ingāā tuumí ye<sup>n</sup>e nī chí cachiichí na pañuelo ní chí'nee<sup>n</sup> n'dai. <sup>21</sup>'Úú ní 'va'a n'dií ti neené cheechí n'dií chí nanguai nī cosas

naachi nguée idii<sup>n</sup> nī ntii<sup>n</sup>nyu<sup>n</sup>  
 ní ndúúcu tuūmī ye<sup>n</sup>é nī dii<sup>n</sup> nī  
 cosechar naachi nguée nii<sup>n</sup>nu<sup>n</sup> nī ti  
 ye<sup>n</sup>é nī. <sup>22</sup>Tuu'mi ní 'ii<sup>n</sup>yā<sup>n</sup> 'cuiica  
 mii<sup>n</sup> ca<sup>n</sup>a yā chii yā mozo mii<sup>n</sup>:  
 Díí, mozo chi nguée n'daacā idii<sup>n</sup>  
 di, cáávā nduudu chi nga<sup>n</sup>a di  
 canee di condenado. Dii ní déenu  
 di chi cheēchi 'úú ní nanangaá<sup>n</sup> chi  
 nguée ye<sup>n</sup>é ni idii<sup>n</sup> cosechar chi  
 nguée dii<sup>n</sup> ntii<sup>n</sup>nyu<sup>n</sup> ti ye<sup>n</sup>é. <sup>23</sup>¿De'ē  
 cúúví chí nguée s'nuū<sup>n</sup> di tuūmī  
 ye<sup>n</sup>é na banco? Maa<sup>n</sup> nícu taachi  
 nindaá ni cuta'á tuūmī ye<sup>n</sup>é ndúúcu  
 daiya. <sup>24</sup>Tuu'mi ní 'ii<sup>n</sup>yā<sup>n</sup> 'cuiica  
 ca<sup>n</sup>a yā chii yā 'ii<sup>n</sup>yā<sup>n</sup> s'ee<sup>n</sup> chi  
 snée yā mii<sup>n</sup>: Divíi nī tuūmī ye<sup>n</sup>é  
 sa ní ca'á nī sa<sup>n</sup>a chi véé n'diichí  
 caadi 'díí'nguā<sup>n</sup> ye<sup>n</sup>é sa. <sup>25</sup>'Ii<sup>n</sup>yā<sup>n</sup>  
 s'ee<sup>n</sup> ní ca<sup>n</sup>a yā: N'dií, señor, sa<sup>n</sup>a  
 mii<sup>n</sup> ní 'āā véé ndiichi cáádí  
 'díí'nguā<sup>n</sup> ye<sup>n</sup>é sa. <sup>26</sup>'Ii<sup>n</sup>yā<sup>n</sup> 'cuiica  
 nan'guēcúta<sup>n</sup>a yā ní ca<sup>n</sup>a yā: 'Úú  
 ní nga<sup>n</sup>á ngúí ndís'tií chi 'ii<sup>n</sup>yā<sup>n</sup> chi  
 véé ye<sup>n</sup>e yā cuta'a cá yā chi cuuvi  
 ye<sup>n</sup>e yā naati 'ii<sup>n</sup>yā<sup>n</sup> chi dúú'vī vee  
 ye<sup>n</sup>e yā 'téé chí véé ye<sup>n</sup>e yā ní 'ii<sup>n</sup>yā<sup>n</sup>  
 ndivíi yā ye<sup>n</sup>e yā. <sup>27</sup>'Tiicá ntúū<sup>n</sup>,  
 'ii<sup>n</sup>yā<sup>n</sup> chi nguée ne<sup>n</sup>e n'diichí yā chi  
 táa<sup>n</sup> yā nduucú, ní nguée ne<sup>n</sup>e yā  
 chí 'úú cuuvi rey ye<sup>n</sup>e yā, tuu'mi ní  
 candéé nī 'ii<sup>n</sup>yā<sup>n</sup> s'ee<sup>n</sup> nanaá<sup>n</sup> 'muu<sup>n</sup>  
 ní 'caa<sup>n</sup>nu<sup>n</sup> nī 'ii<sup>n</sup>yā<sup>n</sup> 'muu<sup>n</sup>.

### Jesús ndáa yā na yáā<sup>n</sup> Jerusalén

(Mt. 21.1-11; Mr. 11.1-11; Jn. 12.12-19)

<sup>28</sup>Ch'íínú ca<sup>n</sup>a yā chuū, Jesús  
 cue<sup>n</sup>e yā cuáá<sup>n</sup> vmnaa<sup>n</sup> ní cue<sup>n</sup>é  
 yā ní ndaa yā na yáā<sup>n</sup> Jerusalén.  
 Cuayiivi cue<sup>n</sup>e ntúū<sup>n</sup> discípulos  
 ye<sup>n</sup>e yā. <sup>29</sup>Taachí ndaa nii<sup>n</sup>nú<sup>n</sup> yā  
 ye<sup>n</sup>e yāā<sup>n</sup> Betfagé ndúúcu yāā<sup>n</sup>  
 Betania nii<sup>n</sup>nuú<sup>n</sup> naachi canee yiicū

chi nguuvi Olivos, tuu'mi ní Jesús  
 dichó'o yā ná 'uūvī discípulos ye<sup>n</sup>e  
 yā vmnaa<sup>n</sup> yā. <sup>30</sup>Ní Jesús ca<sup>n</sup>a  
 'túúcā: Cue<sup>n</sup>e nī na yáā<sup>n</sup> 'lír<sup>n</sup> chi  
 canée nii<sup>n</sup>nuú<sup>n</sup> ní taachí cundaá  
 nī yáā<sup>n</sup> mii<sup>n</sup> ndaacá nī 'áámá  
 burro 'lír<sup>n</sup> chí n'dééchiichí tī. Mar  
 'áámá 'ii<sup>n</sup>yā<sup>n</sup> 'āā cuée cunduú yā  
 'iiti. N'daatí nī 'iiti ní candéé nī 'iiti  
 'muu<sup>n</sup>. <sup>31</sup>Ní nduuti chí 'áámá 'ii<sup>n</sup>yā<sup>n</sup>  
 tiinguunee<sup>n</sup> yā 'túúcā: Ndís'tií, ¿de'ē  
 cúúví chí n'daatí nī 'iiti? 'Túúcā  
 nan'guēcúta<sup>n</sup>a nī chí Señor ye<sup>n</sup>e  
 yú ní ne<sup>n</sup>e yā 'iiti.

<sup>32</sup>Discípulos chí dicho'ó Jesús  
 cue<sup>n</sup>e yā ní ndaāca yā 'iiti tan'dúúca  
 chí Jesús mii<sup>n</sup> ca<sup>n</sup>a yā. <sup>33</sup>Taachí  
 n'daātí yā burro 'lír<sup>n</sup> mii<sup>n</sup>, 'iiví tī  
 ní ca<sup>n</sup>a yā chii yā 'ii<sup>n</sup>yā<sup>n</sup> s'ee<sup>n</sup>:  
 ¿De'ē cúúví chí n'daatí nī burro 'lír<sup>n</sup>  
 ye<sup>n</sup>é?

<sup>34</sup>Ní 'ii<sup>n</sup>yā<sup>n</sup> s'ee<sup>n</sup> ní ca<sup>n</sup>a yā: Señor  
 ye<sup>n</sup>e yú ní ne<sup>n</sup>e yā 'iiti.

<sup>35</sup>Tuu'mi ní candéé yā 'iiti nanáá<sup>n</sup>  
 Jesús. 'Ii<sup>n</sup>yā<sup>n</sup> s'ee<sup>n</sup> sn'dúu yā cotón  
 ye<sup>n</sup>e yā vmnáá<sup>n</sup> ye<sup>n</sup>e tī ní Jesús  
 canduú yā 'iiti mii<sup>n</sup>. <sup>36</sup>Ní taachí  
 Jesús cho'ó yā cyúúni mii<sup>n</sup>, 'ii<sup>n</sup>yā<sup>n</sup>  
 s'uū<sup>n</sup> ní ndoo yā cotón ye<sup>n</sup>e yā  
 cuaa<sup>n</sup> cyúúni mí<sup>n</sup>. <sup>37</sup>Taachí Jesús  
 ndaa nii<sup>n</sup>nú<sup>n</sup> yā naachi nga'ái yúúni  
 mí<sup>n</sup> ye<sup>n</sup>e yiicū chí nguuvi Olivos,  
 nducyáácá discípulos ye<sup>n</sup>e yā ní  
 yeenú taavi yā. Ní tuca'á yā ca<sup>n</sup>a  
 yā chí ch'ete n'dai Ndyuūs cucáávā  
 chí vaadi n'giinu chí n'diichí yā chí  
 Jesús dií<sup>n</sup> yā. Nícu diituu n'dai 'cai  
 yā ti yeenu taavi yā. <sup>38</sup>Ní 'cai yā:  
 De'ē chúúcā n'dai Rey chí cuchii yā  
 ndúúcu chí duuchi Señor Ndyuūs.  
 Ní cuneé vaadi 'diíi<sup>n</sup> ná va'ai cheeti  
 nguuvi. Ní ca<sup>n</sup>a yā ndúúcu vaadi  
 yeenú. De'ē ch'ete ca n'dai Ndyuūs

chi deevé n'daí yā ndúúcu poder ye<sup>n</sup>é yā.

<sup>39</sup>Tuu'mi ní n'duuvi 'ii<sup>n</sup>yā<sup>n</sup> fariseos chi snée yā nguaa<sup>n</sup> 'ii<sup>n</sup>yā<sup>n</sup> ca<sup>n</sup>a yā chii yā Jesús mii<sup>n</sup>: N'dií, Maestro, yaa<sup>n</sup>vi nee<sup>n</sup> 'ii<sup>n</sup>yā<sup>n</sup> s'ee<sup>n</sup> chi nguée caa<sup>n</sup>ma<sup>n</sup> yā tíicā.

<sup>40</sup>Jesús mii<sup>n</sup> ní nán'guεcúta<sup>n</sup>a yā ye<sup>n</sup>e fariseos ní ca<sup>n</sup>a yā: Ndúúti chi 'ii<sup>n</sup>yā<sup>n</sup> s'u<sup>n</sup> ní 'tíicā nguée caa<sup>n</sup>ma<sup>n</sup> yā, tuu'mi ní tuūu mii<sup>n</sup> ní caa<sup>n</sup>ma<sup>n</sup> 'tíicā.

<sup>41</sup>Taachí ndaa nii<sup>n</sup>nú<sup>n</sup> yā chí n'diichí yā yāā<sup>n</sup> Jerusalén mii<sup>n</sup>, tuu'mi ní Jesús cheεcú yā cucáávā 'ii<sup>n</sup>yā<sup>n</sup> ye<sup>n</sup>e yāā<sup>n</sup> mii<sup>n</sup> ti ya'ai iinu yā caavā 'ii<sup>n</sup>yā<sup>n</sup> s'ee<sup>n</sup>. <sup>42</sup>Ní ca<sup>n</sup>a yā 'túucā: Ndís'tií, 'ii<sup>n</sup>yā<sup>n</sup> ye<sup>n</sup>e yāā<sup>n</sup> Jerusalén, nduuti chi incheenaá<sup>n</sup> nī ye<sup>n</sup>e nguuví 'cūu chi cuuvi nangua<sup>n</sup>ai nī tuu'mi ní 'úu cuuví teé ndís'tií vaadi 'dií<sup>n</sup>. Naati maa<sup>n</sup> ní Ndyuūs canuu<sup>n</sup> n'de'í yā ye<sup>n</sup>e nī ní nguée cuuvi deenu nī. <sup>43</sup>Ti ndaa nguuvi taachí 'ii<sup>n</sup>yā<sup>n</sup> chi taa<sup>n</sup> ndúúcu nī chééndii yā núú<sup>n</sup>má<sup>n</sup> 'diituu yāā<sup>n</sup> ye<sup>n</sup>e nī ní nguée cuuví cáanu nī ye<sup>n</sup>e yā.

<sup>44</sup>Ní dí<sup>n</sup> yā chi cundεε nī ti nguεε cuchéé nī ndúúcu yā. Ní 'caa<sup>n</sup>nú<sup>n</sup> yā nducyaaca ndís'tií ndúúcu daiyá nī, ní dituuví yā yāā<sup>n</sup> Jerusalén ye<sup>n</sup>e nī ti 'ii<sup>n</sup>yā<sup>n</sup> nguée deenu yā chi tiempo maa<sup>n</sup> ní nguuvi chi Ndyuūs s'neé<sup>n</sup> yā chi cuuvi nangua<sup>n</sup>ai yā.

#### Jesús nadideevé yā yaācū templo

(Mt. 21.12-17; Mr. 11.15-19; Jn. 2.13-22)

<sup>45</sup>Tuu'mi ní Jesús sndaá yā na yaācū templo ní tucáa yā tun'dáa yā nducyaaca 'ii<sup>n</sup>yā<sup>n</sup> chi n'diicui yā ní ngái ntúu<sup>n</sup> yā mii<sup>n</sup>. <sup>46</sup>Jesús ca<sup>n</sup>a yā chii yā 'ii<sup>n</sup>yā<sup>n</sup> s'ee<sup>n</sup>: 'Túucā canée

nguū<sup>n</sup> na libro ye<sup>n</sup>é Ndyuūs: Yáacū ye<sup>n</sup>é ní naachi caa<sup>n</sup>ma<sup>n</sup>ngua'a 'ii<sup>n</sup>yā<sup>n</sup> naati ndís'tií ní dí<sup>n</sup> nī tan'dúucā chi yiive yaava ye<sup>n</sup>e 'ii<sup>n</sup>yā<sup>n</sup> chí diduucu.

<sup>47</sup>Jesús mii<sup>n</sup> nguuvi nguuvi ngí'cuee<sup>n</sup> yā ná yáacū templo; naati 'ii<sup>n</sup>yā<sup>n</sup> chiiduú n'gεεté, ndúúcu 'ii<sup>n</sup>yā<sup>n</sup> chi ngí'cuee<sup>n</sup> ley, ndúúcu 'ii<sup>n</sup>yā<sup>n</sup> chi nga<sup>n</sup>a ntií<sup>n</sup>nyu<sup>n</sup> ye<sup>n</sup>e yāā<sup>n</sup> mii<sup>n</sup> nduuvidaamá yā ti ne<sup>n</sup>é yā n'diichí yā táacā chi cuuvi 'caa<sup>n</sup>nú<sup>n</sup> yā Jesús mii<sup>n</sup>. <sup>48</sup>Nguée indaacá yā táacā chi 'caa<sup>n</sup>nú<sup>n</sup> yā Jesús, ti nducyáacá 'ii<sup>n</sup>yā<sup>n</sup> s'nee vee<sup>n</sup> n'daacá yā ye<sup>n</sup>e chi ngí'cuee<sup>n</sup> Jesús mii<sup>n</sup>.

#### Jesús nga<sup>n</sup>a ntií<sup>n</sup>nyú<sup>n</sup> yā

(Mt. 21.23-27; Mr. 11.27-33)

**20** 'Áámá nguuvi taachí Jesús mii<sup>n</sup> ngí'cuee<sup>n</sup> yā chεeti yaācū templo ní ngí'cuee<sup>n</sup> yā nduudu chí ngai ye<sup>n</sup>e Ndyuūs, ndaa nanáá<sup>n</sup> Jesús mii<sup>n</sup> chiiduú n'gεεté ndúúcu maestros ye<sup>n</sup>e ley, ndúúcu 'ii<sup>n</sup>yā<sup>n</sup> ndiicúu chí nga<sup>n</sup>a ntií<sup>n</sup>nyu<sup>n</sup> ye<sup>n</sup>e yaācū. <sup>2</sup>Ní ntiinguunée<sup>n</sup> yā Jesús: ¿Du'ú ca<sup>n</sup>a ntií<sup>n</sup>nyu<sup>n</sup> chi ca'cuee<sup>n</sup> nī dēndu'ū chi 'tuucā? O ¿du'ú 'ii<sup>n</sup>ntyé<sup>n</sup>e tee yā orden chi dí<sup>n</sup> ni 'tíicā?

<sup>3</sup>Tuu'mi ní Jesús mii<sup>n</sup> nan'guεcúta<sup>n</sup>a yā: 'Úu ntúu<sup>n</sup> ní ntiinguunee<sup>n</sup> 'áámá ndís'tií. Nan'guεcúta<sup>n</sup>a nī ye<sup>n</sup>e: <sup>4</sup>¿Dú'u ca'a orden Juan chi cheédínuū<sup>n</sup>ni<sup>n</sup> yā 'ii<sup>n</sup>yā<sup>n</sup>? ¿Áa ye<sup>n</sup>e Ndyuūs o sa<sup>n</sup>a i<sup>n</sup>'yee<sup>n</sup>dí 'cūu?

<sup>5</sup>'Ii<sup>n</sup>yā<sup>n</sup> s'ee<sup>n</sup> nduuvidaamá yā ní ca<sup>n</sup>a yā nguaa<sup>n</sup> maa<sup>n</sup> yā: Ndúúti chi caa<sup>n</sup>ma<sup>n</sup> yú chí ye<sup>n</sup>e Ndyuūs, Jesús mii<sup>n</sup> ní cuuvi yā s'uūú<sup>n</sup>: ¿De'ε cuuvi chi nguée chí'téenu nī? <sup>6</sup>Nduuti chí

caa<sup>n</sup>ma<sup>n</sup> yú chí ye<sup>n</sup>e sa<sup>n</sup>ā í<sup>n</sup>'yee<sup>n</sup>dí  
'cūū, nducyaaca 'ii<sup>n</sup>'yā<sup>n</sup> ní cuiitúú yā  
s'uūū<sup>n</sup> ti 'ii<sup>n</sup>'yā<sup>n</sup> s'ee<sup>n</sup> nadicádíinu<sup>n</sup>  
yā chí cuaacu ní<sup>n</sup>'nyú<sup>n</sup> Juan mii<sup>n</sup> ní  
'áámá profeta chí Ndyuūs dicho<sup>o</sup> yā.

<sup>7</sup>Tuu<sup>n</sup>'mi ní 'ii<sup>n</sup>'yā<sup>n</sup> s'ee<sup>n</sup>  
nan'güεεcúta<sup>n</sup>a yā ye<sup>n</sup>e Jesús chí  
nguéé déénu yā tíí ndiicá ye<sup>n</sup>e chí  
ngεεdínuū<sup>n</sup>'ni<sup>n</sup> Juan mii<sup>n</sup>. <sup>8</sup>Tuu<sup>n</sup>'mi  
ní Jesús ca<sup>n</sup>a yā chíi yā 'ii<sup>n</sup>'yā<sup>n</sup>  
s'ee<sup>n</sup>: Ndíí nguéé ndúú 'úú ra cuuvi  
ndís'tií du'u 'ii<sup>n</sup>'ntyé<sup>n</sup>'ē tee yā orden  
'úú chí idií<sup>n</sup> chuū.

### Yá<sup>n</sup>āa ye<sup>n</sup>e sa<sup>n</sup>ā chí dii<sup>n</sup> cuidado díí'yú uvas

(Mt. 21.33-44; Mr. 12.1-11)

<sup>9</sup>Jesús tucáa yā ca<sup>n</sup>a yā chíi yā  
'ii<sup>n</sup>'yā<sup>n</sup> s'ee<sup>n</sup> 'áámá ejemplo chí 'téé  
nguéé dáámá: 'Áámá sa<sup>n</sup>ā chíinu  
sa díí'yú uvas ná yá<sup>n</sup>'āa ye<sup>n</sup>'ē sa.  
Dueño mii<sup>n</sup> ca'a yā n'duuvi sa<sup>n</sup>ā chí  
idií<sup>n</sup> sa ntii<sup>n</sup>'nyu<sup>n</sup> ní nadíí'vε yā sa<sup>n</sup>'ā.  
Ní chíica yā yāā<sup>n</sup> vaacú yā ni cue<sup>n</sup>'e  
yā chí cuuvi 'náa<sup>n</sup> yā. <sup>10</sup>Taachí ndaā  
tiempo ye<sup>n</sup>e cosecha ye<sup>n</sup>e uvas mii<sup>n</sup>,  
dueño mii<sup>n</sup> dicho<sup>o</sup> yā 'aama mozo  
ye<sup>n</sup>'é yā chí cue<sup>n</sup>'e sa cuta'a sa parte  
ye<sup>n</sup>e cosecha chí tune<sup>n</sup> dueño  
mii<sup>n</sup>. 'Ii<sup>n</sup>'yā<sup>n</sup> chí idií<sup>n</sup> ntii<sup>n</sup>'nyu<sup>n</sup> ye<sup>n</sup>'e  
yá<sup>n</sup>'āa ch'e<sup>n</sup>'é yā mozo ní nadichó<sup>o</sup>  
yā mozo mii<sup>n</sup>. Ní nguéé de'ē vεε ca'a  
yā mozo mii<sup>n</sup>. <sup>11</sup>Dueño ngüεεcunée  
yā dicho<sup>o</sup> yā táámá mozo nanáá<sup>n</sup>  
sa<sup>n</sup>ā chí idií<sup>n</sup> ntii<sup>n</sup>'nyu<sup>n</sup> na yá<sup>n</sup>'āa  
ye<sup>n</sup>'e yā. 'Tiicá ntúū<sup>n</sup> nguéé n'daacā  
dii<sup>n</sup> sa ndúúcu mozo mii<sup>n</sup>. Ch'é<sup>n</sup>'é  
sa sa<sup>n</sup>'a ní nadicáánu sa sa<sup>n</sup>'ā mii<sup>n</sup>.  
Ní nguéé de'ē vεε ca'a sa sa<sup>n</sup>'ā mozo  
mii<sup>n</sup>. <sup>12</sup>Dueño ye<sup>n</sup>'e yá<sup>n</sup>'āa mii<sup>n</sup>  
ngüεεcunée ntúū<sup>n</sup> yā dicho<sup>o</sup> yā  
táámá mozo nanáá<sup>n</sup> 'ii<sup>n</sup>'yā<sup>n</sup> chí idií<sup>n</sup>  
ntii<sup>n</sup>'nyu<sup>n</sup> na yá<sup>n</sup>'āa ye<sup>n</sup>'e yā naati

'nuucá'a sa sa<sup>n</sup>'a ní nadicaanu sa  
sa<sup>n</sup>'ā.

<sup>13</sup>Tuu<sup>n</sup>'mī ní dueño ye<sup>n</sup>'e yá<sup>n</sup>'āa  
mii<sup>n</sup> ca<sup>n</sup>'a yā: ¿Táácā díí<sup>n</sup>? Dicho<sup>o</sup>  
sa<sup>n</sup>'ā daiyá chí ne<sup>n</sup>'e taaví. ¿Áá  
nguéé taachí snaa<sup>n</sup> sa sa<sup>n</sup>'ā dii<sup>n</sup> sa  
honrar sa<sup>n</sup>'ā daiyá? <sup>14</sup>'Ii<sup>n</sup>'yā<sup>n</sup> chí  
idií<sup>n</sup> ntii<sup>n</sup>'nyu<sup>n</sup> na yá<sup>n</sup>'āa mii<sup>n</sup> taachí  
n'diichi sa sa<sup>n</sup>'ā daiya dueño ye<sup>n</sup>'e  
yá<sup>n</sup>'āa mii<sup>n</sup> nadicádiiinu<sup>n</sup> sa ní ca<sup>n</sup>'a  
sa chíi sa vi'í: Sá<sup>n</sup>'a 'cuu chí cuuvi  
ye<sup>n</sup>'e sa yá<sup>n</sup>'āa 'cūū. 'Caā<sup>n</sup>'nu<sup>n</sup> yú  
sa<sup>n</sup>'ā ni yá<sup>n</sup>'āa ndúúcu chí véé naa<sup>n</sup>  
cuuvi ye<sup>n</sup>'e yú. <sup>15</sup>Tuu<sup>n</sup>'mí tun'dáa sa  
sa<sup>n</sup>'ā daiya dueño 'áámá lado ye<sup>n</sup>'e  
chéé<sup>n</sup> ye<sup>n</sup>'e díí'yú uvas ní ch'ii<sup>n</sup>'nu<sup>n</sup>  
sa sa<sup>n</sup>'ā. Jesús ca<sup>n</sup>'a yā: Maa<sup>n</sup> ní,  
¿de'ē díí<sup>n</sup> dueño ye<sup>n</sup>'e yá<sup>n</sup>'āa nduucú  
sa<sup>n</sup>'ā s'ee<sup>n</sup> chí dii<sup>n</sup> 'tíicā? <sup>16</sup>Dueño  
mii<sup>n</sup> taachi ndaa yā ni diví yā sa<sup>n</sup>'ā  
chí idií<sup>n</sup> ntii<sup>n</sup>'nyu<sup>n</sup> na yá<sup>n</sup>'āa ye<sup>n</sup>'é yā  
ní 'caa<sup>n</sup>'nú<sup>n</sup> yā sa<sup>n</sup>'ā s'ee<sup>n</sup>. Ní ca'á yā  
yá<sup>n</sup>'āa mii<sup>n</sup> ye<sup>n</sup>'e yā táámá 'ii<sup>n</sup>'yā<sup>n</sup>.  
Taachí 'ii<sup>n</sup>'yā<sup>n</sup> fariseos chíiindiveé<sup>n</sup>  
yā chuū, tuu<sup>n</sup>'mi ní ca<sup>n</sup>'a yā: N'daacā  
chí Ndyuūs nguéé 'cuaa<sup>n</sup> yā chí  
'tíicā.

<sup>17</sup>Jesús chíiinú yā 'ii<sup>n</sup>'yā<sup>n</sup> s'ee<sup>n</sup>,  
ní ca<sup>n</sup>'a yā: ¿De'ē ne<sup>n</sup>'e caa<sup>n</sup>'ma<sup>n</sup>  
nduudu chí canée nguū<sup>n</sup> na libro  
ye<sup>n</sup>'é Ndyuūs chí 'tuucā?

Tuūu ch'εεté chí 'ii<sup>n</sup>'yā<sup>n</sup> chí  
din'dái yā va'āi mii<sup>n</sup> ní sta'á  
yā ní ch'εεcú yā 'áámá lado,  
ní tuūu 'cúú chí tuūu ch'εεte  
mii<sup>n</sup> dichíí'vε ca ní canée tuūu  
ch'εεté ye<sup>n</sup>'e esquina ye<sup>n</sup>'e va'āi.

<sup>18</sup>Āā du'ú nūu<sup>n</sup> 'ii<sup>n</sup>'yā<sup>n</sup> chí cun'daa  
nduú yā vmnaa<sup>n</sup> na tuūu 'cúú ní  
caātú 'íiní ye<sup>n</sup>'e yā. Naati 'āā du'ú  
nūu<sup>n</sup> 'ii<sup>n</sup>'yā<sup>n</sup> chí cun'dáá nduūu tuūu  
'cúú vmnaa<sup>n</sup> ye<sup>n</sup>'e yā, 'cuíinú ndúúví  
yuūni yā.

**Ye<sup>n</sup>e tuumī chi ca'á yā emperador  
César**

(Mt. 21.45-46; 22.15-22; Mr. 12.12-17)

<sup>19</sup>Ii<sup>n</sup>yā<sup>n</sup> chiiduú n'geeté ndúúcū maestros ye<sup>n</sup>e ley ne<sup>n</sup>é yā cuta'á yā Jesús ní dí<sup>n</sup> yā chi preso yā naati dí'va'a yā 'ii<sup>n</sup>yā<sup>n</sup> ye<sup>n</sup>e yáā<sup>n</sup> mii<sup>n</sup>. Tuu'mí nūu<sup>n</sup> tuumicádiinuu<sup>n</sup> yā chi Jesús mii<sup>n</sup> ca<sup>n</sup>'a yā ejemplo 'cūū chi 'téé nguéé dáámá ní ye<sup>n</sup>e yā. <sup>20</sup>Tuu'mi ní dich'ó yā 'ii<sup>n</sup>yā<sup>n</sup> chí 'cueenuú<sup>n</sup> Jesús mii<sup>n</sup>. 'Ii<sup>n</sup>yā<sup>n</sup> s'ee<sup>n</sup> ní ndaacá yā táácā chi cásta<sup>n</sup>'a yā nduudu Jesús mii<sup>n</sup> chi Jesús cuuví caa<sup>n</sup>má<sup>n</sup> yā 'aama nduudu yaadi. 'Tíicā ní cuuvi dich'ó yā Jesús nanáá<sup>n</sup> gobernador. <sup>21</sup>Chii<sup>n</sup> chí 'ii<sup>n</sup>yā<sup>n</sup> s'ee<sup>n</sup> ní ntiinguunee<sup>n</sup> yā Jesús nduudú 'cūū: N'díí, maestro, déenu nū chí nga<sup>n</sup>'a nī ní ngi'cuee<sup>n</sup> nī chii<sup>n</sup> chi n'daacā. Ní nguéé dí<sup>n</sup> nī juzgar 'ii<sup>n</sup>yā<sup>n</sup> tan'dúúcā chi n'gee nī chí n'daacā o nguéé, naati ngi'cuee<sup>n</sup> nī yúúni ye<sup>n</sup>e Ndyuūs ndúúcū nduudu cuaacu. <sup>22</sup>Maa<sup>n</sup> ní cuuví nī chuū: ¿Áá n'daacā chí nadí'íve nū emperador César tuumī ye<sup>n</sup>e yá<sup>n</sup>'āa o nguéé?

<sup>23</sup>Jesús tuumicadínuu<sup>n</sup> yā chí 'ii<sup>n</sup>yā<sup>n</sup> s'ee<sup>n</sup> ní nguéé n'daacā chí dí<sup>n</sup> yā ní ca<sup>n</sup>'a yā chii yā 'ii<sup>n</sup>yā<sup>n</sup> s'ee<sup>n</sup>: ¿De'ē cúúví chí ne<sup>n</sup>e nī casta<sup>n</sup>'á nī nduudu ye<sup>n</sup>é? <sup>24</sup>Cuu<sup>n</sup>'mi<sup>n</sup> nī 'áámá tuumī. Jesús n'diichí yā tuumī ní ca<sup>n</sup>'a yā: ¿Du'ū naa<sup>n</sup> ndēē tuumī mii<sup>n</sup>? ¿Du'ū chí nguuví canee ngúū<sup>n</sup> naa<sup>n</sup>? Tuu'mi ní sa<sup>n</sup>'a s'uū<sup>n</sup> nan'guēcúta<sup>n</sup>'ā sa: Naa<sup>n</sup> emperador César cānee.

<sup>25</sup>Tuu'mi ní Jesús ca<sup>n</sup>'a yā chii yā 'ii<sup>n</sup>yā<sup>n</sup> s'ee<sup>n</sup>: Nca'a nī tuumī emperador César mii<sup>n</sup> chí<sup>n</sup> chi ye<sup>n</sup>é

yā ní ca'á nī Ndyuūs chí<sup>n</sup> chi ye<sup>n</sup>é yā.

<sup>26</sup>Nguéé cuuvi dí<sup>n</sup> yā chista<sup>n</sup>'a mar 'áámá nduudu ye<sup>n</sup>e Jesús mii<sup>n</sup> ní che<sup>n</sup>e yiinú yā ye<sup>n</sup>'ē chí nan'guēcúta<sup>n</sup>'ā Jesús. Ní 'āā ntéé ca<sup>n</sup>'a yā mar 'áámá.

**'Ii<sup>n</sup>yā<sup>n</sup> itinguunee<sup>n</sup> yā Jesús ye<sup>n</sup>'ē chí  
nduuchi tiná<sup>n</sup>'ā**

(Mt. 22.23-33; Mr. 12.18-27)

<sup>27</sup>Cuayiivi ní nduuví 'ii<sup>n</sup>yā<sup>n</sup> saduceos ndaa yā nanáá<sup>n</sup> Jesús. Saduceos nguéé s'téenu yā chí nduuchi tiná<sup>n</sup>'ā. Ní ca<sup>n</sup>'a yā chii yā Jesús: <sup>28</sup>N'díí, Maestro, Moisés dinguú<sup>n</sup> yā na ley 'tíicā: Ndúúti chí 'áámá sa<sup>n</sup>'ā 'cuuvi sa ní cu'nee<sup>n</sup> sa n'daataa ye<sup>n</sup>'ē sa ní nguéé daiya tá, tuu'mi ní dí<sup>n</sup>nu sa cuuvi 'caandavaacu sa ndúúcū n'daataa mii<sup>n</sup> ní 'cuundi daiya sa lado ye<sup>n</sup>'e 'dí<sup>n</sup>ū tiná<sup>n</sup>'ā. <sup>29</sup>Maa<sup>n</sup> ní véé ndēēchē 'dí<sup>n</sup>ū yā. Sa<sup>n</sup>'ā vmaaa<sup>n</sup> mí<sup>n</sup> canee sa ndúúcū n'daataa ye<sup>n</sup>'ē sa ní ch'ií sa. Nguéé ch'ēetinée daiya sa. <sup>30</sup>Sa<sup>n</sup>'ā 'dí<sup>n</sup>ū sa ndiichi ndii 'úúví canee sá ndúúcū n'daataa ye<sup>n</sup>'ē tiná<sup>n</sup>'ā. 'Diinu sa mii<sup>n</sup> ch'ií ntúū<sup>n</sup> sa<sup>n</sup>'ā mii<sup>n</sup>. Nguéé ch'ēetinée ntuū<sup>n</sup> daiya sa. <sup>31</sup>Sa<sup>n</sup>'ā 'diinū sa ndiichi ndii 'íínú canee ntúū<sup>n</sup> sa ndúúcū n'daataa mí<sup>n</sup>. 'Tiicá ntúū<sup>n</sup> ch'ií sa ní nguéé ch'ēetinée ntúū<sup>n</sup> daiya sa. Nduu ndēēche yā ch'ēetinée yā ndúúcū n'daataa mí<sup>n</sup> ní ca'áámá ca'áámá yā ch'ií yā ní nguéé ch'ēetinée mar 'áámá daiya yā. <sup>32</sup>Cuayiivi mii<sup>n</sup> ní ch'ií n'daataa mí<sup>n</sup>. <sup>33</sup>Taachí ndaa nguuvi chí nduuchi 'ii<sup>n</sup>yā<sup>n</sup> chí n'díí, ¿che'ē sa<sup>n</sup>'ā s'ee<sup>n</sup> n'daataa ye<sup>n</sup>'ē sa tá<sup>n</sup>'ā? Tí nduu ndēēche yā ch'ēetinée yā ndúúcū n'daataa mí<sup>n</sup>.

<sup>34</sup>Tuu'mi ní Jesús mii<sup>n</sup> nan'guéécúta<sup>n</sup>a yā ye<sup>n</sup>e 'ii<sup>n</sup>'yā<sup>n</sup> s'ee<sup>n</sup> ní ca<sup>n</sup>'a yā: 'Ii<sup>n</sup>'yā<sup>n</sup> chi snée yā i<sup>n</sup>'yee<sup>n</sup>dí 'cūū n'giindivaacu yā ní 'ii<sup>n</sup>'yā<sup>n</sup> ye<sup>n</sup>e yā nga'a yā chi n'giindivaacu yā. <sup>35</sup>'Ii<sup>n</sup>'yā<sup>n</sup> chi túnee<sup>n</sup> chi ndaá yā na táámá i<sup>n</sup>'yee<sup>n</sup>dī, taachi nduuchí yā ye<sup>n</sup>e nguaa<sup>n</sup> tiná<sup>n</sup>ā, na yá<sup>n</sup>āa mii<sup>n</sup>'ya ní nguεε 'caandavaacu yā, ndíí nguéé ndúú chi ca'a 'ii<sup>n</sup>'yā<sup>n</sup> ye<sup>n</sup>e yā chi 'caandavaacu yā. <sup>36</sup>Yá<sup>n</sup>āa mii<sup>n</sup>'ya 'āā ntéé 'cuūvi yā ti daama yā ndúúcū ángeles. 'Ii<sup>n</sup>'yā<sup>n</sup> s'ee<sup>n</sup> chi daiya Ndyuūs tí induuchi yā ye<sup>n</sup>e nguaa<sup>n</sup> tiná<sup>n</sup>ā. <sup>37</sup>Ndíí cuaa<sup>n</sup> vmnaa<sup>n</sup> ndíí taachi maa<sup>n</sup> Moisés mii<sup>n</sup> dingúu<sup>n</sup> yā ye<sup>n</sup>e yá<sup>n</sup>'á 'líí<sup>n</sup> chí ngiichi iteé cadíínuu<sup>n</sup> yú caati tiná<sup>n</sup>ā ninduuchi yā. Ní Moisés mii<sup>n</sup> nga<sup>n</sup>'á yā chi Señor Ndyuūs mii<sup>n</sup> ní Ndyuūs ye<sup>n</sup>e Abraham, ndúúcū Isaac, ndúúcū Jacob. <sup>38</sup>Ti Ndyuūs ní nguéé Ndyuūs ye<sup>n</sup>e tiná<sup>n</sup>ā ti ye<sup>n</sup>e 'ii<sup>n</sup>'yā<sup>n</sup> chí sндуuchí yā. Caati nanáá<sup>n</sup> Ndyuūs mii<sup>n</sup> nducyaaca 'ii<sup>n</sup>'yā<sup>n</sup> ní sндуuchí yā cue<sup>n</sup>e daā<sup>n</sup>ma<sup>n</sup>.

<sup>39</sup>Tuu'mi ní n'duuvi maestros chi ngi'cuee<sup>n</sup> ley ca<sup>n</sup>'a yā chii yā Jesús mii<sup>n</sup>: N'díí, Maestro, n'daacā nga<sup>n</sup>'a nī.

<sup>40</sup>'Ii<sup>n</sup>'yā<sup>n</sup> s'ee<sup>n</sup> 'āā ntéé ne<sup>n</sup>e yā ntiinguunee<sup>n</sup> ca yā.

### ¿Du'ū 'ii<sup>n</sup>'yā<sup>n</sup> chi Cristo?

(Mt. 22.41-46; Mr. 12.35-37)

<sup>41</sup>Jesús ca<sup>n</sup>'a yā chii yā 'ii<sup>n</sup>'yā<sup>n</sup> s'ee<sup>n</sup>: Ndís'tií, ítáácā chí nga<sup>n</sup>'a nī chi Cristo mii<sup>n</sup> ní daiya David? <sup>42</sup>Maā<sup>n</sup> David mii<sup>n</sup> ní nga<sup>n</sup>'a yā na libro ye<sup>n</sup>é Ndyuūs chi Salmos 'túúca:

Ca<sup>n</sup>'a Señor Ndyuūs chii yā  
Señor ye<sup>n</sup>é: 'Cuundi di lado

tá cuaācū ye<sup>n</sup>é chi lado ye<sup>n</sup>e honor,

<sup>43</sup>ndíí taachi 'úú cu'neé<sup>n</sup> 'ii<sup>n</sup>'yā<sup>n</sup> chi enemigos chi contra ye<sup>n</sup>e di cuaa<sup>n</sup> ndii yā ca'a di tan'dúúca chi 'aama banco 'líí<sup>n</sup>.

<sup>44</sup>Ndúúti chi David mii<sup>n</sup> ca<sup>n</sup>'a yā chi Cristo mii<sup>n</sup> ní Señor ye<sup>n</sup>e yā, ítáácā cuuvi chií chi Cristo mii<sup>n</sup> ní daiya David?

### Jesús ngíicá nuu<sup>n</sup>ndi ye<sup>n</sup>e maestros chi ngi'cuee<sup>n</sup> ley

(Mt. 23.1-36; Mr. 12.38-40; Lc. 11.37-54)

<sup>45</sup>Nducyáácá 'ii<sup>n</sup>'yā<sup>n</sup> n'giindiveé<sup>n</sup> yā taachi Jesús ca<sup>n</sup>'a yā ndúúcū discípulos ye<sup>n</sup>e yā ní tuca'á yā ca<sup>n</sup>'a yā chuū: <sup>46</sup>Díí<sup>n</sup> nī cuidado, ndís'tií, ye<sup>n</sup>é maestros chi ngi'cuee<sup>n</sup> ley. 'Ii<sup>n</sup>'yā<sup>n</sup> s'ee<sup>n</sup> ní ne<sup>n</sup>e yā 'cuεeti núu<sup>n</sup> yā catecai n'geēnúú yā, ní ne<sup>n</sup>e yā chi ndís'tií ní díí<sup>n</sup> nī saludar 'ii<sup>n</sup>'yā<sup>n</sup> s'ee<sup>n</sup> taachi snée yā nií'veε ní ne<sup>n</sup>é yā chí díí<sup>n</sup> nī respetar 'ii<sup>n</sup>'yā<sup>n</sup> s'ee<sup>n</sup>. Ní ne<sup>n</sup>e yā 'cuεeté yā na sillas vmnáá<sup>n</sup> vmnaa<sup>n</sup> ye<sup>n</sup>e honor ná yaacū sinagogas ní sillas ye<sup>n</sup>e honor ye<sup>n</sup>e 'viicu naachi ché'e yā. <sup>47</sup>'Ii<sup>n</sup>'yā<sup>n</sup> s'ee<sup>n</sup> ní ndivíi yā va'ai ye<sup>n</sup>e n'daataá nguá'āa. Ní neéne n'deēe nga<sup>n</sup>'angua'á yā ní ne<sup>n</sup>e yā chí snaa<sup>n</sup> taná<sup>n</sup>ā 'ii<sup>n</sup>'yā<sup>n</sup> chí dii<sup>n</sup> yā 'tíicā. 'Ii<sup>n</sup>'yā<sup>n</sup> s'ee<sup>n</sup> ní neene ch'εete ca castigo ye<sup>n</sup>e yā nguuvi ye<sup>n</sup>e juicio.

### Ofrenda ye<sup>n</sup>e n'daataá nguá'āa

(Mr. 12.41-44)

**21** Jesús snée yā na yaācu templo ní n'diichi yā chí 'ii<sup>n</sup>'yā<sup>n</sup> 'cuiica ngii yā ofrendas ye<sup>n</sup>e yā na cajas naachí inúū<sup>n</sup> ofrendas. <sup>2</sup>N'diichí ntúu<sup>n</sup> yā 'áámá n'daataá nguá'āa chí neene ndaachí cānee

tá. Tá<sup>n</sup>á mii<sup>n</sup> ní s'nuū<sup>n</sup> tá cheeti caja mii<sup>n</sup> 'uūví centavos chí cobre. <sup>3</sup>Jesús mii<sup>n</sup> ní nga<sup>n</sup>'a yā ngii yā 'ii<sup>n</sup>yā<sup>n</sup> s'ee<sup>n</sup>: Cuaacu ní<sup>n</sup>nyu<sup>n</sup> 'úú nga<sup>n</sup>'á ngíí ndís'tiī chí n'daataá nguá<sup>n</sup>áa 'cūū ch'ēete ca tuūmī chíi tá, nguéé ti taná<sup>n</sup>'ā 'ii<sup>n</sup>yā<sup>n</sup>. <sup>4</sup>Tí 'ii<sup>n</sup>yā<sup>n</sup> s'ee<sup>n</sup> ní nga<sup>n</sup>'a yā ye<sup>n</sup>'ē chí nngaāva ye<sup>n</sup>'e yā chí cuuvi ofrenda ye<sup>n</sup>'e Ndyuūs; naati n'daataá 'cūū chí neené ndaachíi canee tá ní ca'ā tá tanducué<sup>n</sup>'ē chí véé ye<sup>n</sup>'e ta chí che'e tá.

**Jesús nn'gee<sup>n</sup> yā táámá ejemplo chí ye<sup>n</sup>'e yaācá chí ntuvií**

(Mt. 24.1-2; Mr. 13.1-2)

<sup>5</sup>Ná<sup>n</sup>'ā 'ii<sup>n</sup>yā<sup>n</sup> ní nga<sup>n</sup>'a yā ye<sup>n</sup>'e yaācū templo mii<sup>n</sup> chí yaāva canéé ndúúcu tuūu n'dēē chee<sup>n</sup> ndúúcu adornos ye<sup>n</sup>'ē regalos chí lado ye<sup>n</sup>'e ofrenda. Jesús ca<sup>n</sup>'a yā chíi yā 'ii<sup>n</sup>yā<sup>n</sup> s'ee<sup>n</sup>: <sup>6</sup>Ndís'tiī ní inaa<sup>n</sup> nī dendú'ū chí 'túúcā. Ndáá nguuvi taachí nadituuví yā yaācū mii<sup>n</sup> ní 'āā ntéé cūnee tuūu cuaa<sup>n</sup> vmnáá<sup>n</sup> ye<sup>n</sup>'e vi'í chí nguéé ntuuvií.

**Ejemplo ye<sup>n</sup>'e tiempo taachi 'āā cuéé ndaa nguuvi chí 'cuiinū í<sup>n</sup>'yeē<sup>n</sup>dī**

(Mt. 24.3-28; Mr. 13.3-23)

<sup>7</sup>Tuu'mi ní 'ii<sup>n</sup>yā<sup>n</sup> s'ee<sup>n</sup> ntiinguunée<sup>n</sup> yā Jesús mii<sup>n</sup>: N'diī, Maestro, ítií cua<sup>n</sup>'ā cuuví chuū? ¿De'ē señal 'cuu<sup>n</sup>mí<sup>n</sup> nī taachi 'āā cuuvi chí 'tiicā?

<sup>8</sup>Jesús ca<sup>n</sup>'a yā: Cundéé nī cuidado chí 'ii<sup>n</sup>yā<sup>n</sup> nguéé canche'éí yā ndís'tiī caati neené n'deēé 'ii<sup>n</sup>yā<sup>n</sup> chíí yā caa<sup>n</sup>'má<sup>n</sup> yā ndúúcu chí duuchí 'tííca: 'Úú chí Cristo; ní 'āā snéé nguuvi chí 'cuiinū í<sup>n</sup>'yeē<sup>n</sup>dī. Naati ndís'tiī, nguéé ca<sup>n</sup>'á nī ndúúcu

yā. <sup>9</sup>Ní taachí 'caandiveé<sup>n</sup> nī chí véé caandaá ní 'ii<sup>n</sup>yā<sup>n</sup> 'cuu<sup>n</sup>'ma<sup>n</sup> yā contra ye<sup>n</sup>'e taama yā nguéé díí'yá nī cuuvi. Tanducué<sup>n</sup>'ē chuū canéé chí cuuvi vmnáá<sup>n</sup> vmnaa<sup>n</sup> naati 'āā cuéé 'cuiinū í<sup>n</sup>'yeē<sup>n</sup>dī.

<sup>10</sup>Tuu'mi ní Jesús ca<sup>n</sup>'a yā chíi yā 'ii<sup>n</sup>yā<sup>n</sup> s'ee<sup>n</sup>: 'Áámá nación ní 'cuu<sup>n</sup>'má<sup>n</sup> contra ye<sup>n</sup>'e taama nación ní 'ii<sup>n</sup>yā<sup>n</sup> ye<sup>n</sup>'e 'áámá país ní 'cuu<sup>n</sup>'má<sup>n</sup> yā contra ye<sup>n</sup>'e 'ii<sup>n</sup>yā<sup>n</sup> ye<sup>n</sup>'e taama país. <sup>11</sup>Ní n'deēé cuuvi nu<sup>n</sup>'u taa<sup>n</sup> yá<sup>n</sup>'āā, ndúúcu tiempos chí 'cuūndí cuuicu, ndúúcu ca'ai taa<sup>n</sup> n'deēé cuaa<sup>n</sup> n'dai, ní 'ii<sup>n</sup>yā<sup>n</sup> snaa<sup>n</sup> yā dendu'ū chí vaadi n'giinu ye<sup>n</sup>'e va'ai cheeti nguuvi ní díí'yá yā cuuvi.

<sup>12</sup>Ní taachi 'āā cuéé cuuvi tanducué<sup>n</sup>'ē dendu'ū chí 'túúca, 'ii<sup>n</sup>yā<sup>n</sup> ní cuiítuú yā ndís'tiī ní cuta'á yā ndís'tiī chí presos nī. Ní nca'á yā ndís'tiī 'ii<sup>n</sup>yā<sup>n</sup> chí nga<sup>n</sup>'a ntií<sup>n</sup>nyu<sup>n</sup> ye<sup>n</sup>'e yaācū sinagogas ní 'cuii yā ndís'tiī vácūū. Cuayiivi ní candéé yā ndís'tiī nanáá<sup>n</sup> 'ii<sup>n</sup>yā<sup>n</sup> reyes ndúúcu gobernadores cáāvā chí nga<sup>n</sup>'a nī chí duuchí. <sup>13</sup>Chuū 'cueenu ndís'tiī cuuvi ti cue<sup>n</sup>'é nī nduucú ní nanáá<sup>n</sup> 'ii<sup>n</sup>yā<sup>n</sup> s'ee<sup>n</sup> cuuvi caa<sup>n</sup>'má<sup>n</sup> nī nduudu cuaacu ye<sup>n</sup>'é. <sup>14</sup>Cundéé n'daaca nī cuidado ná staava ye<sup>n</sup>'e nī ní nguéé nadacádíínuu<sup>n</sup> nī vmnaa<sup>n</sup> ye<sup>n</sup>'e taacā nán'gueécúta<sup>n</sup>'a nī ye<sup>n</sup>'e 'ii<sup>n</sup>yā<sup>n</sup> s'ee<sup>n</sup>. <sup>15</sup>Ti hora míí<sup>n</sup> nūu<sup>n</sup> 'úú ní yaa'ví ndís'tiī nduudu chí caa<sup>n</sup>'má<sup>n</sup> nī. Ní teé ndís'tiī vaadi deenu ye<sup>n</sup>'é ní 'ii<sup>n</sup>yā<sup>n</sup> s'ee<sup>n</sup> nguéé cucheé yā ndúúcu ndís'tiī, ndíí nguéé ndúú cuuvi caa<sup>n</sup>'ma<sup>n</sup> yā contra ye<sup>n</sup>'e ndís'tiī. <sup>16</sup>Naati chíidá nī, ndúúcu 'díínu nī, ndúúcu 'ii<sup>n</sup>yā<sup>n</sup> ye<sup>n</sup>'e nī, ndúúcu amigos ye<sup>n</sup>'e nī

ní caa<sup>n</sup> má<sup>n</sup> yā contra ye<sup>n</sup>e ndís'tiī chí 'i<sup>n</sup>yā<sup>n</sup> 'caa<sup>n</sup> nú<sup>n</sup> yā ná<sup>n</sup>ā ndís'tiī. <sup>17</sup>Ní nducyaaca 'i<sup>n</sup>yā<sup>n</sup> nguéé cuuvi n'diichí yā ndís'tiī cucáāvā 'úú ti cue<sup>n</sup>é nī nduucú. <sup>18</sup>Naati mar 'áámá yuūdū tií<sup>n</sup> nī nguéé cuuví ndái. <sup>19</sup>Nduuti chí ndís'tiī ngiinū ngiinū cuchéé nī na staava ye<sup>n</sup>é nī ní 'cueetinéé n'daāca nī, tuu'mi ní ndáá nguuvi chí ndaaca nī vida cue<sup>n</sup>e daā<sup>n</sup>ma<sup>n</sup> ye<sup>n</sup>e nī.

<sup>20</sup>Taachi ndís'tiī snaa<sup>n</sup> nī soldados nuu<sup>n</sup>ma<sup>n</sup> ndííví yā yāā<sup>n</sup> Jerusalén, tuu'mi ní cadiiinu<sup>n</sup> nī chí yāā<sup>n</sup> Jerusalén mii<sup>n</sup> 'āā ntuví. <sup>21</sup>Tuu'mi ní n'daacā chí 'i<sup>n</sup>yā<sup>n</sup> chí snée yā na yá<sup>n</sup>āa Judea ca<sup>n</sup>á yā cáānu yā cuaá<sup>n</sup> yiicū. Ní 'i<sup>n</sup>yā<sup>n</sup> chí snée yā na yāā<sup>n</sup> Jerusalén mii<sup>n</sup> ní nan'dáa yā mii<sup>n</sup>. Ní 'i<sup>n</sup>yā<sup>n</sup> chí snée yā campo nguéé nguēcunee nndaa yā na yāā<sup>n</sup> Jerusalén. <sup>22</sup>Ti nguuvi s'ee<sup>n</sup> ní nguuví chí cuchii 'cueenú yā cuuvi cáāvā nuu<sup>n</sup>ndí yā. Níicú canéé chí cuuvi cuaacu tanducué<sup>n</sup>é chí canéé nguū<sup>n</sup> na libro ye<sup>n</sup>e Ndyuūs. <sup>23</sup>Naati de'ē chúicā ya'āi ye<sup>n</sup>e n'daataá chí véé daiya tá chēeti tá ndúucū n'daataá chí ngiicú da'cua'āa daiya tá nguuvi chí cáānu yā. Ní 'i<sup>n</sup>yā<sup>n</sup> mii<sup>n</sup> néené 'cueenu yā cuuvi na yá<sup>n</sup>āa 'cúū. <sup>24</sup>Ní 'yáā<sup>n</sup> 'i<sup>n</sup>yā<sup>n</sup> ní 'cuūvi yā ndúucū machete 'uūvi lados 'caāi<sup>n</sup> taachi díí<sup>n</sup> yā caandaá. Ní candēe yā 'yaa<sup>n</sup> 'i<sup>n</sup>yā<sup>n</sup> chí presos yā ní ca<sup>n</sup>á yā ndíí nducyaaca países. Níicú yāā<sup>n</sup> Jerusalén mii<sup>n</sup> cūnee ndúucū 'i<sup>n</sup>yā<sup>n</sup> gentiles chí 'i<sup>n</sup>yā<sup>n</sup> chí nguéé ye<sup>n</sup>e ndaata Israel ní 'i<sup>n</sup>yā<sup>n</sup> s'ee<sup>n</sup> canéé yā na yá<sup>n</sup>āa mii<sup>n</sup> ndíí tiempo chí Ndyuūs 'cuaa<sup>n</sup> yā 'i<sup>n</sup>yā<sup>n</sup> gentiles cuuvi ye<sup>n</sup>e yā.

### Táacā ndaá Sa<sup>n</sup>ā chí Daiya Dendyuūs

(Mt. 24.29-35, 42-44; Mr. 13.24-37)

<sup>25</sup>Tuu'mi ní Ndyuūs 'cuu<sup>n</sup>mii<sup>n</sup> yā ndúucū vaadī n'giinu señales ná yá<sup>n</sup>āa, ndúucū ná 'i<sup>n</sup>yu, ndúucū na 'íí<sup>n</sup>nyú<sup>n</sup>. Néené ya'āi 'cueenu 'i<sup>n</sup>yā<sup>n</sup> ye<sup>n</sup>e taná<sup>n</sup>ā naciones ní nducyaaca 'i<sup>n</sup>yā<sup>n</sup> dii'ya cá yā cuuvi. Ní nguéé déenu yā taacā chí idiin yā cucáāvā chí 'yuudu n'dai 'cueecu nuū<sup>n</sup>nī'yā<sup>n</sup>ā ní can'dái yaacu nuū<sup>n</sup>nī<sup>n</sup> mii<sup>n</sup>. <sup>26</sup>'i<sup>n</sup>yā<sup>n</sup> s'ee<sup>n</sup> cuuvi cúūnu yā chí 'va'á yā ndúucū dendu'ū chí ndaa vmnáá<sup>n</sup> yá<sup>n</sup>āa 'cúū ní cucáāvā nducué<sup>n</sup>é nanguuvi ní 'nu<sup>n</sup>u.

<sup>27</sup>Tuu'mi ní 'i<sup>n</sup>yā<sup>n</sup> snáá<sup>n</sup> yā 'úú chí Sa<sup>n</sup>ā chí Daiya Dendyuūs chí ndaá na 'áámá meē<sup>n</sup> ndúucū poder ch'ēete ye<sup>n</sup>é ndúucū chí dēvé<sup>n</sup> n'dai ye<sup>n</sup>e maá<sup>n</sup> cuerpo ye<sup>n</sup>é. <sup>28</sup>Taachí cunga'ā tanducué<sup>n</sup>é chuū cu'nee<sup>n</sup> diitú nī na staava ye<sup>n</sup>é nī tí ndaā nguuvi chí nngua<sup>n</sup>āi ndís'tiī ní canéé nii<sup>n</sup>nuú<sup>n</sup>.

<sup>29</sup>'Úú ní nga<sup>n</sup>á ngíí ndís'tiī 'áámá ejemplo: Cui<sup>n</sup>diichí nī yá<sup>n</sup>á ye<sup>n</sup>e n'guíídii yaa<sup>n</sup> nguuvi ndúucū nducyaaca yá<sup>n</sup>á. <sup>30</sup>Taachí snaa<sup>n</sup> nī chí 'āā ndaa tá'āa yá<sup>n</sup>á míí<sup>n</sup>, tuu'mi ní 'āā deenú nī tí 'āā snee nii<sup>n</sup>nuú<sup>n</sup> tiempo chí cuchii yāā<sup>n</sup>. <sup>31</sup>'Tiicá ntúū<sup>n</sup> cuuvi taachi snaa<sup>n</sup> nī dendu'ū chuū chí nga<sup>n</sup>á, 'āā deenú nī chí naachí Ndyuūs nga<sup>n</sup>a ntiinnyú<sup>n</sup> yā 'āā snee nii<sup>n</sup>nuú<sup>n</sup>.

<sup>32</sup>'Úú nga<sup>n</sup>á ngíí ndís'tiī, chí cuaacu ní<sup>n</sup>nyú<sup>n</sup> 'i<sup>n</sup>yā<sup>n</sup> chí snée yā maa<sup>n</sup> 'āā cuéé 'cuuví yā nen<sup>n</sup>e chí 'āā cuéé cuuví tanducué<sup>n</sup>é chuū.

<sup>33</sup>Nanguuvi ndúucū yá<sup>n</sup>āa ní chó'oo naati nduudu ye<sup>n</sup>é nguéé chó'oo.

<sup>34</sup>Ndís'tiī ní cundēe nī cuidado chí staava ye<sup>n</sup>e nī nguéé nduuví

cheechí ndúúcū vicios chi véé  
i<sup>n</sup>'yee<sup>n</sup>dí 'cūū. Nguéé nadicádiinú<sup>n</sup>  
ca nī ye<sup>n</sup>e chi che'é nī o cu'ú nī  
o ye<sup>n</sup>'ē n'dee ye<sup>n</sup>e vida ye<sup>n</sup>e nī  
ti nguuvī mii<sup>n</sup> ní dácanaā<sup>n</sup> ndaa  
nanáá<sup>n</sup> ye<sup>n</sup>e ndís'tiī. Ní canéé chi  
canéé listo nī. <sup>35</sup>Ti nguuvī s'ee<sup>n</sup>  
ní ndaa nanáá<sup>n</sup> ndís'tiī ndúúcū  
'ii<sup>n</sup>'yā<sup>n</sup> chi snée yā i<sup>n</sup>'yee<sup>n</sup>dí 'cūū ní  
nducyaacá yā ní 'cuenú yā cuuvi tí  
ndaa nguuvī s'ee<sup>n</sup> tan'dúúcā 'áámá  
tuūvī dácanaā<sup>n</sup> 'induudi. <sup>36</sup>Cuēeti  
nduuchí nī ní caa<sup>n</sup>'ma<sup>n</sup>'ngua'á nī  
nguuvī nguuvī chi cuuví nngua<sup>n</sup>'ai  
nī ye<sup>n</sup>'e dendu'ū vaadi ya'ai chi  
cuchiī. Ní cuuvi ndaa nī nanáá<sup>n</sup> 'úú,  
Sa<sup>n</sup>'ā chi Daiya Ndyuūs.

<sup>37</sup>Nguuvī nguuvī Jesús mii<sup>n</sup>  
ngí'cuee<sup>n</sup> yā na yáacū templo ní  
n'gaa<sup>n</sup> ní n'ndaa yā ná yīicū 'líí<sup>n</sup> chi  
nguuvī Olivos. <sup>38</sup>Ní nguuvī nguuvī  
cuaa<sup>n</sup> ná nguētiyaa<sup>n</sup> ní nducyaaca  
'ii<sup>n</sup>'yā<sup>n</sup> ndaa yā na yaacū templo  
nanáá<sup>n</sup> Jesús mii<sup>n</sup> chí 'caandiveé<sup>n</sup>  
yā nduudu ye<sup>n</sup>'e yā.

**'Ii<sup>n</sup>'yā<sup>n</sup> chi contra Jesús nga<sup>n</sup>'a yā  
táácā chi díí<sup>n</sup> yā chi cuuvi cuta'á yā  
Jesús**

(Mt. 26.1-5, 14-16; Mr. 14.1-  
2, 10-11; Jn. 11.45-53)

**22** 'Āā snee nīi<sup>n</sup>'nuú<sup>n</sup> nguuví  
ye<sup>n</sup>'e 'viicu ye<sup>n</sup>'e pascua  
chi 'viicu chi che'é yā pan chi nguéé  
levadura ye<sup>n</sup>'ē. <sup>2</sup>Ní 'ii<sup>n</sup>'yā<sup>n</sup> chiiduú  
n'gēeté ndúúcū maestros ye<sup>n</sup>'e ley  
nduuvidaamá yā ní nga<sup>n</sup>'á yā taacā  
chi cuuví 'caa<sup>n</sup>'nú<sup>n</sup> yā Jesús naati  
'va'á yā 'ii<sup>n</sup>'yā<sup>n</sup> ye<sup>n</sup>'e yáá<sup>n</sup> Jerusalén  
mii<sup>n</sup>.

<sup>3</sup>Espíritu ye<sup>n</sup>'e yáá<sup>n</sup>'nguuiinū<sup>n</sup>  
sndáa na staava ye<sup>n</sup>'e sa<sup>n</sup>'ā chi  
nguuvī Judas Iscariote chi 'aama

discípulo ye<sup>n</sup>'e Jesús naachi  
ndiichuuvī yā. <sup>4</sup>Judas mii<sup>n</sup> che<sup>n</sup>'e  
sa nanáá<sup>n</sup> chiiduú n'gēeté ndúúcū  
capitanes ní yaa'vi sá 'ii<sup>n</sup>'yā<sup>n</sup> táácā  
chi cuuví dii<sup>n</sup> sa chi naca'a sa Jesús  
mii<sup>n</sup> 'ii<sup>n</sup>'yā<sup>n</sup> s'ee<sup>n</sup>. <sup>5</sup>'Ii<sup>n</sup>'yā<sup>n</sup> s'ee<sup>n</sup> ní  
yeenú n'dai yā ní nduuvidaamá  
yā chí ca'a yā tuūmī Judas  
mii<sup>n</sup>. <sup>6</sup>Judas sta'a sa tuūmī ní  
ca<sup>n</sup>'a sa. Nadacádiinuu<sup>n</sup> sa táácā  
cuuvi nta'a sa Jesús mii<sup>n</sup> na ta'a  
'ii<sup>n</sup>'yā<sup>n</sup> s'ee<sup>n</sup> manera chi 'ii<sup>n</sup>'yā<sup>n</sup>  
ye<sup>n</sup>'e yáá<sup>n</sup> Jerusalén mii<sup>n</sup> nguéé  
ntuemicadiinú<sup>n</sup> yā ye<sup>n</sup>'ē.

**N'nuú<sup>n</sup> yā chi che'e yā cáāvā 'víícū  
ye<sup>n</sup>'e pascua**

(Mt. 26.17-29; Mr. 14.12-25;  
Jn. 13.21-30; I Co. 11.23-26)

<sup>7</sup>Ndaā nguuvī ye<sup>n</sup>'e pascua, 'viicu  
chi nducyaaca 'ii<sup>n</sup>'yā<sup>n</sup> che'e yā pan  
chi nguéé levadura ye<sup>n</sup>'ē. Nguuvī  
mii<sup>n</sup> ní 'ii<sup>n</sup>'yā<sup>n</sup> 'caa<sup>n</sup>'nú<sup>n</sup> yā 'áámá  
'iiti cuūchī 'líí<sup>n</sup> chí sacrificio ye<sup>n</sup>'e  
pascua. <sup>8</sup>Jesús dicho'ó yā Pedro  
mii<sup>n</sup> ndúúcū Juan ní ca<sup>n</sup>'a yā chii  
yā 'uuvī yā: Cué'é nī ní n'nuú<sup>n</sup> nī  
naachi che'e nguuiinū yú ye<sup>n</sup>'e 'viicu  
ye<sup>n</sup>'e pascua.

<sup>9</sup>'Ii<sup>n</sup>'yā<sup>n</sup> s'ee<sup>n</sup> ní ca<sup>n</sup>'a yā chii yā  
Jesús mii<sup>n</sup>: ¿Tíí ne<sup>n</sup>'e nī chi in'nuú<sup>n</sup>  
'nū chi che'e nguuiinū yú?

<sup>10</sup>Jesús n'gūeécúta<sup>n</sup>'a yā: Taachi  
cundaa nī na yáá<sup>n</sup> Jerusalén mii<sup>n</sup>  
ndaāca nī 'áámá sa<sup>n</sup>'ā chi ndéε sa  
'cuuti cuéé nuū<sup>n</sup>'nī. Ca<sup>n</sup>'á nī ndúúcū  
sa ndíí ná va'ai naachi ndaa sa. <sup>11</sup>Ní  
caa<sup>n</sup>'má<sup>n</sup> nī cuuvi nī sa<sup>n</sup>'ā chi va'ai  
ye<sup>n</sup>'ē mii<sup>n</sup>: N'diī, señor Maestro  
ye<sup>n</sup>'e yú nga<sup>n</sup>'á yā 'túúcā: ¿Tíí cánéé  
cuarto chi che'é nguuiinū ye<sup>n</sup>'e  
pascua ndúúcū discípulos ye<sup>n</sup>'é?

<sup>12</sup>Sa<sup>n</sup>'ā mii<sup>n</sup> ní 'cuu<sup>n</sup>'mí<sup>n</sup> sa ndís'tiī

'áámá cuarto ch'εete ye<sup>n</sup>e va'āi chí ndii 'uūví piso ní 'aa véé yaāa<sup>n</sup>. Mii<sup>n</sup> in'nuú<sup>n</sup> nī chí che'e yú ye<sup>n</sup>e pascua.

<sup>13</sup>Apóstoles ní cue<sup>n</sup>e yā ní ndaaca yā tanducué<sup>n</sup>ē tan'dúúccā chí Jesús nga<sup>n</sup>a yā ngii yā, ní n'nuú<sup>n</sup> yā chí che'e yā ye<sup>n</sup>e pascua.

<sup>14</sup>Taachí ndaā snuū ca'a hora chí che'e nguiinú yā, Jesús mii<sup>n</sup> ndúúccū apóstoles ye<sup>n</sup>e yā ch'εetē yā na mesa chí che'e nguiinú yā. <sup>15</sup>Jesús ca<sup>n</sup>a yā chíi yā 'ii<sup>n</sup>yā<sup>n</sup> s'ee<sup>n</sup>: De'ε chúúccā ne<sup>n</sup>é che'é ndúúccū ndís'tiī 'viicu ye<sup>n</sup>e pascua 'cūū ne<sup>n</sup>e chí 'āā 'cuéé 'cuūví. <sup>16</sup>Caati nga<sup>n</sup>a ngii ndís'tiī ti 'úú ní 'āā ntéé che'é ndúúccū nī táámá 'viicu pascua ndíi taachi cuuvi cuaacu chí ne<sup>n</sup>e caa<sup>n</sup>ma<sup>n</sup> ye<sup>n</sup>ē naachí Ndyuūs nga<sup>n</sup>a ntiī<sup>n</sup>nyú<sup>n</sup> yā.

<sup>17</sup>Tuu'mi ní Jesús sta'á yā taza ndúúccū vino ní ca'a yā gracias Ndyuūs. Ní ca<sup>n</sup>a yā chíi yā apóstoles ye<sup>n</sup>e yā: Cuta'á nī chuū ní cu'u nī nguua<sup>n</sup> nducyaaca nī. <sup>18</sup>Ti 'úú ní nga<sup>n</sup>a ngii ndís'tiī, chí 'āā ntéé cu'ú jugo ye<sup>n</sup>e uvas, ndii ndaā nguuvi ye<sup>n</sup>e naachí Ndyuūs nga<sup>n</sup>a ntiī<sup>n</sup>nyú<sup>n</sup> yā.

<sup>19</sup>Tuu'mi ní sta'a Jesús pan mii<sup>n</sup> ní ca'a yā gracias Ndyuūs. Ní n'deé yā ní ca'a yā apóstoles ní ca<sup>n</sup>a yā: Chuū chí tan'dúúccā cuerpo ye<sup>n</sup>é 'tíicā. Ní teé lugar 'ii<sup>n</sup>yā<sup>n</sup> chí 'caa<sup>n</sup>nú<sup>n</sup> yā 'úú cáāvā ndís'tiī. Díí<sup>n</sup> nī chuū taachi n'gaacú nī ye<sup>n</sup>e 'úú.

<sup>20</sup>Tiicá ntúū<sup>n</sup> díí<sup>n</sup> yā ndúúccū taza. Taachí ch'íinú che'e yā ní ca<sup>n</sup>a yā: Jugo ye<sup>n</sup>e uvas ye<sup>n</sup>e taza chí cuuvi cuaacu ní chuū tan'dúúccā chí yuūu<sup>n</sup> ye<sup>n</sup>é chí cungéē cáāvā ndís'tiī.

<sup>21</sup>Maa<sup>n</sup> ní sa<sup>n</sup>ā chí naca'ā 'úú vεε sa ndúúccū yú na mesa. <sup>22</sup>Sa<sup>n</sup>ā chí

Daiya Dendyuūs chí 'úú cuaacu níí<sup>n</sup>nyú<sup>n</sup> ca<sup>n</sup>a sa 'cuūví sa tan'dúúccā chí ne<sup>n</sup>e Dendyuūs. De'ε chúúccā ya'ai ye<sup>n</sup>ē sa<sup>n</sup>ā chí naca'ā sa 'úú.

<sup>23</sup>Tuu'mi ní apóstoles tuc'áa yā ntiingūūnee<sup>n</sup> vi'i yā: ¿Du'u ra chí dii<sup>n</sup> chuū?

**Nga<sup>n</sup>a yā nguua<sup>n</sup> maa<sup>n</sup> yā:  
¿Du'ū chí ch'εete ca?**

<sup>24</sup>Tuu'mi ní apóstoles tuca'a yā ca<sup>n</sup>a yā nguua<sup>n</sup> maa<sup>n</sup> yā cheé yā chí ch'εete ca yā. <sup>25</sup>Tuu'mi ní Jesús mii<sup>n</sup> ca<sup>n</sup>a yā chíi yā 'ii<sup>n</sup>yā<sup>n</sup> s'ee<sup>n</sup>: Reyes ye<sup>n</sup>e taná<sup>n</sup>ā naciones nga<sup>n</sup>a ntiī<sup>n</sup>nyu<sup>n</sup> yā tan'dúúccā chí 'liivi chεεchi ní 'ii<sup>n</sup>yā<sup>n</sup> ye<sup>n</sup>e naciones ní nga<sup>n</sup>a yā chí rey ye<sup>n</sup>e yā n'daacā idií<sup>n</sup> yā. <sup>26</sup>Naati nguua<sup>n</sup> ndís'tiī nguéé 'tíicā. 'Ii<sup>n</sup>yā<sup>n</sup> chí ch'εete ca nguua<sup>n</sup> ndís'tiī canéé chí díí<sup>n</sup> yā tan'dúúccā sa<sup>n</sup>ā da'caiyāa chí dii<sup>n</sup> mandados. 'Ii<sup>n</sup>yā<sup>n</sup> chí nga<sup>n</sup>a ntiī<sup>n</sup>nyú<sup>n</sup> yā nguua<sup>n</sup> ndís'tiī canee chí díí<sup>n</sup> yā tan'dúúccā 'áámá 'ii<sup>n</sup>yā<sup>n</sup> chí dichí'vεε 'ii<sup>n</sup>yā<sup>n</sup>. <sup>27</sup>Chεε cá yā chí ch'εetē yā. ¿Áá 'ii<sup>n</sup>yā<sup>n</sup> chí n'giindí yā na mesa o 'ii<sup>n</sup>yā<sup>n</sup> chí n'gii chí cho'o chí cu'u? ¿Áá nguéé 'ii<sup>n</sup>yā<sup>n</sup> chí n'giindi na mesa? N'diichi nī. 'Úú ní canee nguua<sup>n</sup> ndís'tiī tan'dúúccā 'ii<sup>n</sup>yā<sup>n</sup> ndíicūū<sup>n</sup> chí dichí'vεε.

<sup>28</sup>Ndís'tiī ní ch'εetinée nī nduucú nguuvi nguuvi taachi 'úú n'geenú ngii tanducué<sup>n</sup>ē. <sup>29</sup>Ní tan'dúúccā Chiidá tee yā 'úú naachí nga<sup>n</sup>ā ntiī<sup>n</sup>nyú<sup>n</sup> 'tiicá ntúū<sup>n</sup> 'úú ní teé ndís'tiī 'áámá chí caa<sup>n</sup>ma<sup>n</sup> ntiī<sup>n</sup>nyú<sup>n</sup> nī. <sup>30</sup>Ní ndís'tiī 'cuetē nī na mesa nduucú chí che'é nī ní cu'ú nī naachi 'úú nga<sup>n</sup>ā ntiī<sup>n</sup>nyu<sup>n</sup>. Ní 'cuetē nī na sillas ye<sup>n</sup>e juez ní

n'diichí nī nuu<sup>n</sup>ndi ye<sup>n</sup>ē ndichúúví ndaata ye<sup>n</sup>e 'ii<sup>n</sup>yā<sup>n</sup> Israel chi judíos.

**Jesús caa<sup>n</sup>ma<sup>n</sup> yā chi Pedro caa<sup>n</sup>ma<sup>n</sup>  
yā chi nguéé deenu sa Jesús**

(Mt. 26.31-35; Mr. 14.27-31; Jn. 13.36-38)

<sup>31</sup>Jesús yaa<sup>n</sup>ví yā Pedro ní ca<sup>n</sup>a yā: N'dii, Simón Pedro, Simón Pedro, cuin'diichí nī ti yáá<sup>n</sup>nguiinū<sup>n</sup> ngiicá sa ye<sup>n</sup>e ndís'tií chí cuuvi dii<sup>n</sup> sa. N'diichinee<sup>n</sup> sa ndís'tií tan'dúúccā 'ii<sup>n</sup>yā<sup>n</sup> ndáádi yā trigo 'tíicā dii<sup>n</sup> sa. Ní véé permiso ye<sup>n</sup>e sa. <sup>32</sup>Naati 'úú ní nga<sup>n</sup>angua<sup>n</sup>á cáávā dii, Pedro, chi cu'téenu ca di. Ní taachi ndaacadaamí di ye<sup>n</sup>ē nuu<sup>n</sup>ndi ye<sup>n</sup>e di ní cu'téenu ca di tuu<sup>n</sup>mi ní cunnee di taná<sup>n</sup>ā hermanos ye<sup>n</sup>e di chi cu'téenu cá yā.

<sup>33</sup>Simón ca<sup>n</sup>a yā chii yā Jesús mii<sup>n</sup>: Señor, 'āā véé yáá<sup>n</sup> chí ca<sup>n</sup>á nduucú nī ndíí vácūū; ní ndúúti chí 'cuuví nī, 'úú ní 'cuuví ndúúcu nī.

<sup>34</sup>Jesús ca<sup>n</sup>a yā chii yā Pedro: Nga<sup>n</sup>á ngií dii chí tusá<sup>n</sup>ā ní nguéé 'cuai tī ndíí taanduvéé cuee<sup>n</sup>diitú di 'iinū cuuvi ye<sup>n</sup>e 'úú chí nguéé in'diichi di 'úú.

**Jesús nga<sup>n</sup>a yā ye<sup>n</sup>e chí cuchii.**

<sup>35</sup>Tuu<sup>n</sup>mi ní Jesús itiinguunée<sup>n</sup> yā apóstoles: Taachí dicho'ó ndís'tií nguéé cándεε nī bolsa ye<sup>n</sup>e tuumi nī, ndíí nguéé ndúú morral ye<sup>n</sup>e nī, ndíí nguéé ndúú ndaacuú ye<sup>n</sup>e nī, ¿'áá véé de'ē vεε chí chii faltar ye<sup>n</sup>e nī? Apóstoles ní ca<sup>n</sup>a yā: Nguéé de'ē vεε.

<sup>36</sup>Ní Jesús ca<sup>n</sup>a yā: Maa<sup>n</sup> ní ndís'tií chí véé bolsa ye<sup>n</sup>e nī, candεε nī. 'Tiicá ntúū<sup>n</sup> ndís'tií chí véé morral ye<sup>n</sup>e nī, candεε nī. Nds'tií chí nguéé 'aama machete

'uúví lados 'caāi<sup>n</sup> ye<sup>n</sup>e nī, n'diicuí nī cotón ye<sup>n</sup>e nī ní cuái nī. <sup>37</sup>Ti nga<sup>n</sup>á ngií ndís'tií chí canéé chí cuuvi cuaacú tanducue<sup>n</sup>ē chí canéé nguū<sup>n</sup> ye<sup>n</sup>é: Ní 'ii<sup>n</sup>yā<sup>n</sup> ca<sup>n</sup>a yā chí véé nuū<sup>n</sup>ndi ye<sup>n</sup>e 'úú tan'dúúccā taná<sup>n</sup>ā 'ii<sup>n</sup>yā<sup>n</sup> chí véé nuu<sup>n</sup>ndi ye<sup>n</sup>e yā. Tí tanducue<sup>n</sup>ē chí canéé nguū<sup>n</sup> ye<sup>n</sup>e 'úú canéé chí cuuvi cuaacu.

<sup>38</sup>Tuu<sup>n</sup>mi ní discípulos ní ca<sup>n</sup>a yā: N'dii, Señor, íngāā na 'uuvi machete 'uúví lados 'caāi<sup>n</sup>. Jesús ní ca<sup>n</sup>a yā: Ndúúccū stíí 'āā véé.

**Jesús nga<sup>n</sup>angua<sup>n</sup>á yā na jardín chí  
nguuví Getsemaní**

(Mt. 26.36-46; Mr. 14.32-42)

<sup>39</sup>Cuayivi ní can'daā Jesús tan'dúúccā costumbre ye<sup>n</sup>e yā ní cue<sup>n</sup>é yā na yiicū ye<sup>n</sup>e Olivos. Ní discípulos ye<sup>n</sup>e yā cue<sup>n</sup>é yā ndúúcu yā. <sup>40</sup>Ní taachí ndaa yā na lugar mii<sup>n</sup>, tuu<sup>n</sup>mi ní Jesús mii<sup>n</sup> ní ca<sup>n</sup>a yā chí yā discípulos ye<sup>n</sup>e yā: Nds'tií caa<sup>n</sup>ma<sup>n</sup>ngua<sup>n</sup>á nī chí yáá<sup>n</sup>ngiinū<sup>n</sup> nguéé n'diichinee<sup>n</sup> sa ndís'tií chí díí<sup>n</sup> nī nuu<sup>n</sup>ndi.

<sup>41</sup>Jesús ní cue<sup>n</sup>e yā ye<sup>n</sup>e discípulos ye<sup>n</sup>e yā tanduu naa<sup>n</sup> chí naachi ndaá 'áámá tuūu chí ngii ya ní Jesús caantii'yá yā ní ca<sup>n</sup>angua<sup>n</sup>á yā. <sup>42</sup>Ní ca<sup>n</sup>a yā: N'dii, Chiidá, ndúúti chí ne<sup>n</sup>e nī ní diví nī ye<sup>n</sup>e chí canee chí 'cuenú cuuvi ye<sup>n</sup>e prueba 'cūū. Naati nguéé cuuví tan'dúúccā chí 'úú ne<sup>n</sup>é naati tan'dúúccā chí n'dii ne<sup>n</sup>e nī.

<sup>43</sup>Ní che'enaā<sup>n</sup> 'áámá ángel ye<sup>n</sup>ē nanguuvi ní ca'á yā fuerzas Jesús mii<sup>n</sup>. <sup>44</sup>Ti neené ya'ai Jesús mii<sup>n</sup> ní ndiituu n'dai ca ngá<sup>n</sup>angua<sup>n</sup>á yā. Ní nuu<sup>n</sup>ni'yaa<sup>n</sup> ye<sup>n</sup>e yā tan'dúúccā yuúú<sup>n</sup> chí ndii na yá<sup>n</sup>āa ingéé.

<sup>45</sup>Nducuee<sup>n</sup> yā naachí nga<sup>n</sup> angua'á yā ní ndaa yā nanáá<sup>n</sup> discípulos ye<sup>n</sup>e yā ní ndaaca yā chi styaadú yā, ti discípulos ní neené ndaachi núú<sup>n</sup> yā ti ya'ai yā cáávā Jesús mii<sup>n</sup>. <sup>46</sup>Tuu'mi ní Jesús ca<sup>n</sup>a yā chii yā discípulos: ¿De'ē cúuví chí styaadú ní? Nducuee<sup>n</sup> ní ní caa<sup>n</sup>ma'ngua'á ní ní yáá'n'guiinū<sup>n</sup> nguéé n'diichinee<sup>n</sup> sa ndís'tií chí dií<sup>n</sup> ní nuu<sup>n</sup>ndi.

**Sta'a yā Jesús mii<sup>n</sup> ní candéé yā preso**

(Mt. 26.47-56; Mr. 14.43-50; Jn. 18.2-11)

<sup>47</sup>Taachí Jesús indée yā neené n'dee' 'ii<sup>n</sup>yā<sup>n</sup> ndaa yā ní sa<sup>n</sup>ā chí nguuví Judas mii<sup>n</sup> chí 'áámá chéé naachí ndiichuuví discípulos ye<sup>n</sup>é yā cue<sup>n</sup>é yā vmnáá<sup>n</sup> ye<sup>n</sup>é 'ii<sup>n</sup>yā<sup>n</sup> s'ee<sup>n</sup> ní ndaa nii<sup>n</sup>nuú<sup>n</sup> yā Jesús mii<sup>n</sup> chí 'nee<sup>n</sup>cheendí yā. <sup>48</sup>Tuu'mi ní Jesús mii<sup>n</sup> ní ca<sup>n</sup>a yā chii yā sa<sup>n</sup>ā: Díí, Judas, ¿'áá ndúúcu 'áámá beso ínaca'a di 'úú chí Sa<sup>n</sup>ā chí Daiya Ndyuūs 'ii<sup>n</sup>yā<sup>n</sup>?

<sup>49</sup>Discípulos chí snée yā ndúúcu Jesús taachí snaa<sup>n</sup> yā chí cuuvi, tuu'mi ní ca<sup>n</sup>a yā chii yā Jesús: N'díí, Señor, ¿'áá 'caaca taa<sup>n</sup> 'nū ndúúcu machete 'uúví lados 'caāi<sup>n</sup> ye<sup>n</sup>é yú?

<sup>50</sup>Tuu'mi ní 'áámá chéé discípulos 'nuucá'ai yā 'áámá mozo ye<sup>n</sup>é chiiduú ch'ēeté ca ní ch'iica yā vee<sup>n</sup> sa lado tá cuaácú sa. <sup>51</sup>Ní Jesús ca<sup>n</sup>a yā: 'Āā ntéé 'cuu<sup>n</sup>mi<sup>n</sup> dí. 'Āā snée ra yā. Ní Jesús tuu'ví yā vee<sup>n</sup> sa ní nduūvā ye<sup>n</sup>é sa. <sup>52</sup>Cuayiivi ní Jesús ca<sup>n</sup>a yā chii yā chiiduú n'gēete ndúúcu soldados chí capitanes chí dií<sup>n</sup> sa cuidado yaācū templo ndúúcu 'ii<sup>n</sup>yā<sup>n</sup> ndicúú chí nga<sup>n</sup>ā

ntii<sup>n</sup>nyú<sup>n</sup> yā ye<sup>n</sup>e yaācū chí ndaa yā ndúúcu Judas mii<sup>n</sup>: ¿'Áá ndaa ndís'tií ndúúcu machetes 'uúví lados 'caāi<sup>n</sup> ndúúcu yá<sup>n</sup>á ye<sup>n</sup>e soldados tan'dúúca chí ca<sup>n</sup>a ní cutá'a ní 'áámá chí duūcū? <sup>53</sup>Taachí canee ndúúcu ndís'tií nguuví nguuví ná yaācū templo nguéé ne<sup>n</sup>é ní cuta'á ní 'úú. Naati maa<sup>n</sup> ní hora 'cūú chí ye<sup>n</sup>é ndís'tií ti hora taachí maāi<sup>n</sup> mii<sup>n</sup>, chíí<sup>n</sup> chí yáá'n'guiinū<sup>n</sup> nga<sup>n</sup>a ntii<sup>n</sup>nyu<sup>n</sup> sa.

**Pedro mii<sup>n</sup> ní nga<sup>n</sup>a sa chí nguéé in'diichi sa Jesús**

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup>Tuu'mi ní 'ii<sup>n</sup>yā<sup>n</sup> s'ee<sup>n</sup> sta'a yā Jesús mii<sup>n</sup> ní candéé yā Jesús va'ai ye<sup>n</sup>é chiiduú ch'ēeté ca. Pedro mii<sup>n</sup> ní ndáá ya<sup>n</sup>ai sa 'ii<sup>n</sup>yā<sup>n</sup>. <sup>55</sup>Ná<sup>n</sup>ā 'ii<sup>n</sup>yā<sup>n</sup> tiivií yā ya<sup>n</sup>ā náávta<sup>n</sup>ā ch'ēeté yā cuaa<sup>n</sup> 'diituú ya<sup>n</sup>ā mii<sup>n</sup> chí dicuutú yā. Pedro mii<sup>n</sup> ní ch'iīndi sa ntúu<sup>n</sup> sa ndúúcu 'ii<sup>n</sup>yā<sup>n</sup> s'ee<sup>n</sup>.

<sup>56</sup>Tuu'mi ní 'áámá tá<sup>n</sup>ā chí cánée caadi 'iīyū, n'diichi tá Pedro mii<sup>n</sup> chí vee sa 'diituú na ya<sup>n</sup>ā. Ní n'giinu n'dai tá sa<sup>n</sup>ā ní ca<sup>n</sup>a tá: Sá<sup>n</sup>a 'cūú ní canee sa ndúúcu 'ii<sup>n</sup>yā<sup>n</sup> chí preso yā.

<sup>57</sup>Pedro mii<sup>n</sup> ní ca<sup>n</sup>a sa chí sa n'daātā mii<sup>n</sup>: 'Úú nguéé in'diichi 'ii<sup>n</sup>yā<sup>n</sup> mii<sup>n</sup>.

<sup>58</sup>Cuayiivi mii<sup>n</sup> ní 'aama sa<sup>n</sup>ā n'diichi n'dai sa ní ca<sup>n</sup>a sa chí sa Pedro mii<sup>n</sup>: Dii, ní ndúúcu di nguaa<sup>n</sup> 'ii<sup>n</sup>yā<sup>n</sup> s'ee<sup>n</sup>. Pedro mii<sup>n</sup> ní ca<sup>n</sup>a sa chí sa sa<sup>n</sup>ā mii<sup>n</sup>: Nguēé 'úú.

<sup>59</sup>Cho'ōo 'áámá hora, ní táámá yā ní ca<sup>n</sup>a yā: Cuaacu ní<sup>n</sup>nyú<sup>n</sup> sá<sup>n</sup>a 'cūú ní cánée sa ndúúcu 'ii<sup>n</sup>yā<sup>n</sup> chí preso yā ti sá<sup>n</sup>a 'cūú ní ye<sup>n</sup>é yá<sup>n</sup>ā Galilea ntúu<sup>n</sup>.

<sup>60</sup>Pedro mii<sup>n</sup> ní ca<sup>n</sup>ā sa chii sa sa<sup>n</sup>ā mii<sup>n</sup>: Díí, sá<sup>n</sup>ā, nguéé deenú chi nga<sup>n</sup>ā di. Taachí Pedro mii<sup>n</sup> 'āā cuéé 'cuinu sa ca<sup>n</sup>a sa chúū, tusá<sup>n</sup>ā mii<sup>n</sup> ní 'cai tī. <sup>61</sup>Tuu'mi ní Jesús mii<sup>n</sup> nguεεcundíí yā ní n'diichi yā Pedro. Pedro mii<sup>n</sup> nán'gaācū sa nduudu chí ca<sup>n</sup>a Jesús mii<sup>n</sup> chii yā sa<sup>n</sup>ā 'túúcā: 'Áā 'iinu cúúví caa<sup>n</sup>ma<sup>n</sup> dí chi nguéé n'diichi di 'úú, taachi 'āā cuéé 'caí 'áámá vmné<sup>n</sup>ēe tusá<sup>n</sup>ā. <sup>62</sup>Tuu'mi ní Pedro mii<sup>n</sup> ní can'dáa sa cuaa<sup>n</sup> va'ai, ní chεecu taaví sa ti ya'ai staava ye<sup>n</sup>ē sa.

### Sa<sup>n</sup>ā s'ee<sup>n</sup> ch'e<sup>n</sup>e sa Jesús

(Mt. 26.67-68; Mr. 14.65)

<sup>63</sup>Sá<sup>n</sup>ā s'ee<sup>n</sup> chi dii<sup>n</sup> cuidado Jesús mii<sup>n</sup> chíí<sup>n</sup>nyu<sup>n</sup>nee<sup>n</sup> sa Jesús mii<sup>n</sup> ní ch'e<sup>n</sup>e sá 'ii<sup>n</sup>yā<sup>n</sup>. <sup>64</sup>Ní n'gaadi sa nduutináa<sup>n</sup> yā ndúúcū 'aama tíínuu<sup>n</sup>. Tuu'mi ní ch'e<sup>n</sup>e sá naa<sup>n</sup> Jesús ní nga<sup>n</sup>a sa ngii sa 'ii<sup>n</sup>yā<sup>n</sup>: Dii, caa<sup>n</sup>ma<sup>n</sup> di, ¿du'ú ch'e<sup>n</sup>ē dii?

<sup>65</sup>Ní neene cunncaā nduudu ngii sá Jesús.

### Jesús nanáá<sup>n</sup> 'ii<sup>n</sup>ntyé<sup>n</sup>ē ye<sup>n</sup>e yaācū templo

(Mt. 26.59-66; Mr. 14.55-64; Jn. 18.19-24)

<sup>66</sup>Taachí chidεeve táámá nguuvi, 'yaa<sup>n</sup> n'dái 'ii<sup>n</sup>yā<sup>n</sup> ndiicūú ye<sup>n</sup>e yāā<sup>n</sup> mii<sup>n</sup> chi nga<sup>n</sup>a ntiin<sup>n</sup>yu<sup>n</sup> yā ye<sup>n</sup>e yaācū, ndúúcū chiiduú n'gεεtē, ndúúcū maestros chi ngi'cueé<sup>n</sup> ley mii<sup>n</sup> candée yā Jesús nanáá<sup>n</sup> 'ii<sup>n</sup>ntyé<sup>n</sup>ē ye<sup>n</sup>e yaācū templo.

<sup>67</sup>Míí<sup>n</sup> íntiinguunéé<sup>n</sup> yā Jesús: ¿Áá díí chí Cristo? Jesús mii<sup>n</sup> nan'guεεcuta<sup>n</sup>a yā ye<sup>n</sup>e 'ii<sup>n</sup>yā<sup>n</sup> s'ee<sup>n</sup>: Ndúúti chi caa<sup>n</sup>ma<sup>n</sup> chí 'tíícā, ní nguéé cu'téenu nī ye<sup>n</sup>é. <sup>68</sup>Nduuti chí 'úú ntiinguunéé<sup>n</sup> ndís'tií,

nguéé n'guεεcuta<sup>n</sup>a nī ye<sup>n</sup>é, ndíí nguéé ndúú n'dεechi ra ní 'úú.

<sup>69</sup>Naati hora chi cuchii ní Sa<sup>n</sup>ā chí Daiya Ndyuūs ní 'cuūndi sa lado ye<sup>n</sup>e honor ye<sup>n</sup>é Ndyuūs chí véé tanducue<sup>n</sup>ē poder ye<sup>n</sup>e yā.

<sup>70</sup>Tanducue<sup>n</sup>ē 'ii<sup>n</sup>yā<sup>n</sup> s'ee<sup>n</sup> ca<sup>n</sup>a yā: ¿Áá dii Daiya Dendyuūs mii<sup>n</sup>? Ní Jesús ní ca<sup>n</sup>a yā: Nds'tií maá<sup>n</sup> nī nga<sup>n</sup>a nī chí 'úú ní 'tíícā.

<sup>71</sup>Tuu'mi ní 'ii<sup>n</sup>yā<sup>n</sup> s'ee<sup>n</sup> ní ca<sup>n</sup>a yā: ¿De'ē cá nduudu cuaacu ye<sup>n</sup>e 'ii<sup>n</sup>yā<sup>n</sup> chí ne<sup>n</sup>e yú? Tí maā<sup>n</sup> yú chíiindivee<sup>n</sup> cuaacú yú nduudu chí ca<sup>n</sup>a sa.

### Jesús nanáá<sup>n</sup> gobernador Pilato

(Mt. 27.1-2, 11-14; Mr. 15.1-5; Jn. 18.28-38)

**23** Tuu'mi ní nducyaaca 'ii<sup>n</sup>yā<sup>n</sup> ní candεε yā Jesús mii<sup>n</sup> nanáá<sup>n</sup> gobernador Pilato. <sup>2</sup>Ní tuc'a yā ca<sup>n</sup>a yā nuu<sup>n</sup>ndi ye<sup>n</sup>ē Jesús mii<sup>n</sup> ní ca<sup>n</sup>a yā: Inndaacá 'nū sá<sup>n</sup>a 'cūū chí dii<sup>n</sup> sa chí 'ii<sup>n</sup>yā<sup>n</sup> nguéé i'téenu yā chí nga<sup>n</sup>a ley ye<sup>n</sup>é 'nū. Ní nguéé ne<sup>n</sup>e sa chí nadí'vé 'nū ye<sup>n</sup>e yá<sup>n</sup>āa emperador César tan'dúúcā chí nga<sup>n</sup>a ley ye<sup>n</sup>é nī. Ní sá<sup>n</sup>a 'cūū ní nga<sup>n</sup>ā sa chí maā<sup>n</sup> sa chí Cristo, chí Rey ye<sup>n</sup>é 'nū.

<sup>3</sup>Tuu'mi ní sa<sup>n</sup>ā Pilato mii<sup>n</sup> ní itiinguunéé<sup>n</sup> sa Jesús: ¿Áá dii chí Rey ye<sup>n</sup>e 'ii<sup>n</sup>yā<sup>n</sup> Israel s'ee<sup>n</sup>? Jesús nan'guεεcuta<sup>n</sup>a yā: N'dií nga<sup>n</sup>ā cuaacú nī ti 'tíícā.

<sup>4</sup>Pilato mii<sup>n</sup> ní ca<sup>n</sup>a yā chíi yā chíiduú n'gεεtē ndúúcū 'ii<sup>n</sup>yā<sup>n</sup> s'ee<sup>n</sup>: 'Úú nguéé inndaacá mar 'áámá nuu<sup>n</sup>ndi ye<sup>n</sup>e sá<sup>n</sup>a 'cūū.

<sup>5</sup>'Ii<sup>n</sup>yā<sup>n</sup> s'ee<sup>n</sup> ní diitu n'dái 'cai yā: Sá<sup>n</sup>a 'cūū ní idií sa chí 'ii<sup>n</sup>yā<sup>n</sup> n'g'éécú cheendi yā nguaa<sup>n</sup> maa<sup>n</sup> yā ndúúcú chí ngi'cuee<sup>n</sup> yā nī

ngi'cuee<sup>n</sup> yā nuu<sup>n</sup> má<sup>n</sup> yá<sup>n</sup> āa Judea ndíi na yá<sup>n</sup> āa ye<sup>n</sup> ē Galilea ndii 'muu<sup>n</sup>.

### Jesús nanáá<sup>n</sup> rey Herodes

<sup>6</sup>Tuu'mi ní Pilato, taachi ch'iindiveé<sup>n</sup> yā chi Jesús che<sup>n</sup> e yā ndii yá<sup>n</sup> āa ye<sup>n</sup> e Galilea, ní ntiinguuneé<sup>n</sup> yā Jesús nduuti chi ye<sup>n</sup> e yá<sup>n</sup> āa ye<sup>n</sup> e Galilea. <sup>7</sup>Ní taachí Pilato ch'iindivee<sup>n</sup> sa chi Jesús mii<sup>n</sup> ní ye<sup>n</sup> ē yá<sup>n</sup> āa Galilea ye<sup>n</sup> e yá<sup>n</sup> āa naachi rey Herodes nga<sup>n</sup> a ntiinyú<sup>n</sup> yā, Pilato mii<sup>n</sup> nga<sup>n</sup> a ntiinyú<sup>n</sup> yā chi Jesús ca<sup>n</sup> a yā nanáá<sup>n</sup> rey Herodes tii canée yā na yāá<sup>n</sup> Jerusalén nguuví mii<sup>n</sup>.

<sup>8</sup>Taachí rey Herodes n'díichi sa Jesús mii<sup>n</sup>, neené yeenú sa ti 'āā náá<sup>n</sup> n'dai tiempo né<sup>n</sup> é sá snaa<sup>n</sup> sa Jesús. Tí néené n'deē 'náá<sup>n</sup> chí ch'iindivee<sup>n</sup> sa ye<sup>n</sup> ē yā ní canée ngíínú sá chí snaa<sup>n</sup> sa 'áámá vaadi n'giinu chi díí<sup>n</sup> Jesús mii<sup>n</sup>. <sup>9</sup>Néené n'deē 'naa<sup>n</sup> chí ntiingūūnee<sup>n</sup> sa Jesús mii<sup>n</sup>, naati nguéé de'ē vee nan'guuecúta<sup>n</sup> a Jesús. <sup>10</sup>Tuu'mi ní mii<sup>n</sup> canee ntuu<sup>n</sup> chiiduú n'geeté ndúúcu maestros chí ngi'cuéé<sup>n</sup> ley mii<sup>n</sup> chí n'deē 'náá<sup>n</sup> n'dai nga<sup>n</sup> a yā chí nuu<sup>n</sup> ndi ye<sup>n</sup> ē Jesús. <sup>11</sup>Tuu'mi ní Herodes ndúúcu soldados ye<sup>n</sup> e yā chi'nuu<sup>n</sup> yā 'áámá tiinū<sup>n</sup> n'dái tan'dúúca catecai rey Jesús mii<sup>n</sup> ní chii<sup>n</sup> nyu<sup>n</sup> nee<sup>n</sup> yā Jesús mii<sup>n</sup> ní cunncaā ca<sup>n</sup> a yā ye<sup>n</sup> e Jesús mii<sup>n</sup>. Cuayivi ní dicho'o ntúu<sup>n</sup> yā Jesús nanáá<sup>n</sup> Pilato mii<sup>n</sup>. <sup>12</sup>Ndíi nguuví mii<sup>n</sup> tuu'mi ní Pilato ndúúcu Herodes naa<sup>n</sup> n'daá n'dai yā ndúúcu vi'i ti cuáá<sup>n</sup> vmnaa<sup>n</sup> ní nguéé n'diichi yā vi'i.

### Pilato nca'a sa Jesús chí 'cuūvi

(Mt. 27.15-26; Mr. 15.6-15; Jn. 18.39-19.16)

<sup>13</sup>Tuu'mi ní Pilato nduuvidaamá yā chiiduú n'geeté ndúúcu 'ii<sup>n</sup>ntyé<sup>n</sup> e ndúúcu nducyaaca 'ii<sup>n</sup>yā<sup>n</sup> ye<sup>n</sup> ē yāá<sup>n</sup> Jerusalén mii<sup>n</sup>. <sup>14</sup>Ní ca<sup>n</sup> a yā chii yā 'ii<sup>n</sup>yā<sup>n</sup> s'ee<sup>n</sup>: Ndís'tii ní ndaá nī chí 'cúú<sup>n</sup> nī sá<sup>n</sup> a 'cūū chí dii<sup>n</sup> sa chí 'ii<sup>n</sup>yā<sup>n</sup> ní nguéé n'geetinéé 'dii<sup>n</sup> yā ndúúcu chí ngi'cuee<sup>n</sup> sa. Taachí intiinguuneé<sup>n</sup> sa<sup>n</sup> ā nanáá<sup>n</sup> ndís'tii nguéé nindaācá mar 'áámá nuu<sup>n</sup> ndi ye<sup>n</sup> ē sa chí nga<sup>n</sup> a ndís'tii ye<sup>n</sup> ē sa. <sup>15</sup>Ndíi nguéé ndúú rey Herodes mii<sup>n</sup> ndaāca yā nuu<sup>n</sup> ndi ye<sup>n</sup> ē sá<sup>n</sup> a 'cūū chí canée chí 'cuūvi sa ti Herodes 'āā dicho'ó yā sá<sup>n</sup> a 'cūū nanaá<sup>n</sup>. Sá<sup>n</sup> a 'cūū nguue dii<sup>n</sup> sa nuu<sup>n</sup> ndi ch'εεte chí 'cuūvi sa. <sup>16</sup>Maa<sup>n</sup> ní díí<sup>n</sup> 'cue<sup>n</sup> é sa<sup>n</sup> ā mii<sup>n</sup> ní cuáyíívi n'dεechí sa<sup>n</sup> ā.

<sup>17</sup>Canée 'áámá costumbre ye<sup>n</sup> é nī chí gobernador canee chí n'dεechi yā 'áámá preso 'viicu pascua ní gobernador Pilato mii<sup>n</sup> ní canée yā dii<sup>n</sup> yā 'tíicā. <sup>18</sup>Nducyáácá 'ii<sup>n</sup>yā<sup>n</sup> 'cai yā: N'dεechii nī sa<sup>n</sup> ā chí ngúúvi Barrabás. Ní 'āā 'cuuvi rá sá<sup>n</sup> a 'cūū.

<sup>19</sup>Barrabás mii<sup>n</sup> canúú<sup>n</sup> sá vácūū chí dii<sup>n</sup> sa chí 'ii<sup>n</sup>yā<sup>n</sup> ye<sup>n</sup> e yāá<sup>n</sup> Jerusalén mii<sup>n</sup> ní 'cuu<sup>n</sup> m'í<sup>n</sup> yā contra ye<sup>n</sup> e gobierno ní ch'ii<sup>n</sup> nu<sup>n</sup> sa 'áámá tiná<sup>n</sup> ā. <sup>20</sup>Gobernador Pilato mii<sup>n</sup> ní ne<sup>n</sup> e sa n'dεechi sa Jesús, ní ca<sup>n</sup> a sa chii sa 'ii<sup>n</sup>yā<sup>n</sup> s'ee<sup>n</sup> taama vmné<sup>n</sup> ēe chí n'dεechi sá Jesús. <sup>21</sup>Naati 'ii<sup>n</sup>yā<sup>n</sup> s'ee<sup>n</sup> 'cai ntúu<sup>n</sup> yā: Cu'née<sup>n</sup> nga'á nī sa<sup>n</sup> ā, cu'née<sup>n</sup> nga'á nī sa<sup>n</sup> ā.

<sup>22</sup>Gobernador Pilato mii<sup>n</sup> ní ca<sup>n</sup> a ntúu<sup>n</sup> yā ndii chii<sup>n</sup> ndii 'íínú cuuvi: ¿D'é'ē chí nguéé n'dáacā ndíí<sup>n</sup> sá<sup>n</sup> a 'cūū? 'Úú nguéé inndaācá mar 'áámá

núú<sup>n</sup>ndí ch'εεε ye<sup>n</sup>ē sa chi 'cuūvi sa. 'Úú ní ca'á orden chí ch'e<sup>n</sup>é yā sá<sup>n</sup>a 'cūū ní n'dεεchí sá<sup>n</sup>a 'cūū.

### S'néé<sup>n</sup>nga'á yā Jesús

<sup>23</sup>Ii<sup>n</sup>yā<sup>n</sup> s'ee<sup>n</sup> chí canndii cá yā 'cai yā chí chiica yā chí cu'nee<sup>n</sup>ngá'āa Jesús mii<sup>n</sup>. Ní 'ii<sup>n</sup>yā<sup>n</sup> s'ee<sup>n</sup> ndúúcu chiiduú n'geeté diituú n'dái ca 'cai yā. <sup>24</sup>Tuu'mi ní gobernador Pilato mii<sup>n</sup> ní ca'a yā orden chí dii<sup>n</sup> yā tan'dúúca chí ne<sup>n</sup>e 'ii<sup>n</sup>yā<sup>n</sup> s'ee<sup>n</sup>. <sup>25</sup>Ní n'dεεchi yā sa<sup>n</sup>ā chí nguuvi Barrabás mii<sup>n</sup> chí canúú<sup>n</sup> vácūū. Sá<sup>n</sup>ā mii<sup>n</sup> ní dii<sup>n</sup> sa chí 'cuu<sup>n</sup>mí<sup>n</sup> 'ii<sup>n</sup>yā<sup>n</sup> ye<sup>n</sup>e Israel contra ye<sup>n</sup>e gobierno ní 'nii<sup>n</sup>nu<sup>n</sup> sa 'áámá tiná<sup>n</sup>ā. Sá<sup>n</sup>a 'cūū chí chiica 'ii<sup>n</sup>yā<sup>n</sup> s'ee<sup>n</sup> chí n'dεεchí yā sa<sup>n</sup>ā. Ní nca'a yā Jesús mii<sup>n</sup> chí soldados cu'nee<sup>n</sup>nga'a sa tan'dúúca chí ne<sup>n</sup>e 'ii<sup>n</sup>yā<sup>n</sup> s'ee<sup>n</sup>.

### Ye<sup>n</sup>ē chí cu'nee<sup>n</sup>nga'á yā Jesús

(Mt. 27.32-44; Mr. 15.21-32; Jn. 19.17-27)

<sup>26</sup>Taachí cue<sup>n</sup>e yā cuaa<sup>n</sup> cyúúni mii<sup>n</sup> ndúúcu Jesús mii<sup>n</sup>, soldados sta'á yā 'áámá sa<sup>n</sup>ā ye<sup>n</sup>e yá<sup>n</sup>āa Cirene chí nguuvi sa Simón. Sa<sup>n</sup>ā mii<sup>n</sup> ní yúúni canuu<sup>n</sup> sa chí cue<sup>n</sup>e sa cuεeti. Soldados a fuerza di'cuúftu yā Simón mii<sup>n</sup> chí candée sa cruz ye<sup>n</sup>e Jesús mii<sup>n</sup> ní cue<sup>n</sup>e sa cuaa<sup>n</sup> daami Jesús mii<sup>n</sup>.

<sup>27</sup>Néé<sup>n</sup>e 'yaa<sup>n</sup> 'ii<sup>n</sup>yā<sup>n</sup> ye<sup>n</sup>e yáā<sup>n</sup> Jerusalén mii<sup>n</sup> cue<sup>n</sup>e yā n'dáa yā Jesús mii<sup>n</sup> ndúúcu n'daataá chí diituu ngeecu yā ní ya'ai yā cáávā Jesús mii<sup>n</sup>. <sup>28</sup>Jesús mii<sup>n</sup> ní ch'íínu yā n'daataá s'éé<sup>n</sup> ní ca<sup>n</sup>a yā chii yā tá<sup>n</sup>ā s'ee<sup>n</sup>: Ndís'tiī, daiya 'ii<sup>n</sup>yā<sup>n</sup> ye<sup>n</sup>e yáā<sup>n</sup> Jerusalén, nguéé cuεecu ní cáávā 'úú, naati cuεecu ní cáávā

maá<sup>n</sup> ní ní caavā daiya ní. <sup>29</sup>Ti ndaá nguuvi chí caa<sup>n</sup>ma<sup>n</sup> 'ii<sup>n</sup>yā<sup>n</sup>: ¿De'ē chúúca n'dai n'daataá chí nguéé ncuuvi daiya tá ní n'daataá chí nguéé ntaavi daiya tá ní n'daataá chí nguéé daiya tá chí ca'a ta daiya tá chí chiicu? <sup>30</sup>Tuu'mi ní 'ii<sup>n</sup>yā<sup>n</sup> s'ee<sup>n</sup> tucá'a yā ca<sup>n</sup>a yā 'tuuca: Díí yiicū cun'daá nduú ní vmnaa<sup>n</sup> ye<sup>n</sup>e 'nū. Ca<sup>n</sup>a ntúu<sup>n</sup> yā chii yā yiicū n'gaiyáa: Cun'díí nee<sup>n</sup> dí nús'uu. <sup>31</sup>Caati ndúúti chí 'ii<sup>n</sup>yā<sup>n</sup> chí taa<sup>n</sup> yā 'caaca yā yá<sup>n</sup>á cueé chí tan'dúúca 'úú, ¿áá nguéé caniicu cá yā 'caaca yā yá<sup>n</sup>á chí cuu<sup>n</sup>ma<sup>n</sup> chí tan'dúúca ndís'tiī? 'Tííca nga<sup>n</sup>a Jesús.

<sup>32</sup>Nguuvi mii<sup>n</sup> ní candée ntúu<sup>n</sup> yā na 'uuvi sa<sup>n</sup>ā chí n'gii<sup>n</sup>nu<sup>n</sup> 'ii<sup>n</sup>yā<sup>n</sup> chí cu'nee<sup>n</sup>nga'a yā sa<sup>n</sup>ā s'ee<sup>n</sup> dáámá ndúúcu Jesús mii<sup>n</sup>. <sup>33</sup>Taachí ndaa yā lugar ye<sup>n</sup>ē 'áámá yiicū 'líí<sup>n</sup> chí nguuvi Calavera, mii<sup>n</sup>ya chí'néé<sup>n</sup>nga'a yā Jesús mii<sup>n</sup> ndúúcu nduu 'uúvi sa<sup>n</sup>ā chí n'gii<sup>n</sup>nu<sup>n</sup> 'ii<sup>n</sup>yā<sup>n</sup>, 'áámá sa lado ta cuaacú Jesús mii<sup>n</sup>, ní táámá sá lado tá 'cueé yā. <sup>34</sup>Tuu'mi ní taachi snée yā i'nee<sup>n</sup>nga'á yā, Jesús mii<sup>n</sup> ca<sup>n</sup>a yā: N'dii, Chiidá, nadich'εecu ní ye<sup>n</sup>e sa<sup>n</sup>ā s'uu<sup>n</sup> caati nguεε déénu sá de'ē chí 'túúca idii<sup>n</sup> sa. Tuu'mi ní soldados tun'dáa sa suerte na catecai Jesús chí ca'ā sa 'áámá sá ndúúcu taama sa. <sup>35</sup>Ii<sup>n</sup>yā<sup>n</sup> ye<sup>n</sup>e yáā<sup>n</sup> Jerusalén mii<sup>n</sup> snée yā n'giinu yā níícu 'ii<sup>n</sup>ntyé<sup>n</sup>ē n'gii<sup>n</sup>nyu<sup>n</sup>neé<sup>n</sup> yā Jesús mii<sup>n</sup>. Ní nga<sup>n</sup>a yā ngii yā ye<sup>n</sup>e Jesús: Sá<sup>n</sup>a 'cūū ní nadanguá<sup>n</sup>ai sa taná<sup>n</sup>ā 'ii<sup>n</sup>yā<sup>n</sup>. ¿De'ē cuuvi chí nguéé nadinguá<sup>n</sup>ai maā<sup>n</sup> sa sa<sup>n</sup>ā nduuti chí sa<sup>n</sup>ā mii<sup>n</sup> chí Cristo chí Ndyuūs dicho'ó yā? <sup>36</sup>Tiicá ntúū<sup>n</sup> soldados n'gii<sup>n</sup>nyu<sup>n</sup>nee<sup>n</sup> sa Jesús mii<sup>n</sup>. Che<sup>n</sup>e

ni<sup>n</sup> nú<sup>n</sup> yā ní ca'a yā vinagre. <sup>37</sup>Ní ca<sup>n</sup>a yā chii yā Jesús mii<sup>n</sup>: Ndúúti chí díí chí Rey ye<sup>n</sup>e 'ii<sup>n</sup>'yā<sup>n</sup> Israel, nadanguá<sup>n</sup>'ai maā<sup>n</sup> di díí.

<sup>38</sup>Ní canéé nguū<sup>n</sup> na tii<sup>n</sup> cruz ye<sup>n</sup>e Jesús mii<sup>n</sup> nduudu griego ndúúcu nduudu latín ndúúcu nduudu hebreo, chí nga<sup>n</sup>a: Sá<sup>n</sup>a 'cūū Rey ye<sup>n</sup>e 'ii<sup>n</sup>'yā<sup>n</sup> ye<sup>n</sup>e ndaata Israel.

<sup>39</sup>Áámá chee sa<sup>n</sup>a chí véé nuu<sup>n</sup>ndi ye<sup>n</sup>e sa chí ca'néé<sup>n</sup>nga'a yā 'áámá lado ye<sup>n</sup>e Jesús cunncaā ca<sup>n</sup>a sa ní ca<sup>n</sup>a sa chí sa Jesús: Ndúúti chí dii chí Cristo mii<sup>n</sup> nadinguá<sup>n</sup>'ai di maa<sup>n</sup> di ní nadinguá<sup>n</sup>'ai ntuu<sup>n</sup> di nús'uu.

<sup>40</sup>Táámá sa<sup>n</sup>a chí cu'néé<sup>n</sup>nga'a yā táámá lado ye<sup>n</sup>e Jesús 'caa'va sa ndúúcu sá<sup>n</sup>a 'cūū ní ca<sup>n</sup>a sa chí sa sa<sup>n</sup>a: Díí 'ááá nguéé 'va'a di Ndyuūs? Dii ní dáámá condenado ndúúcu nús'uu. <sup>41</sup>S'uú<sup>n</sup> ní cuaacu ní<sup>n</sup>'nyú<sup>n</sup> n'geenu yú ngii ti véé nuu<sup>n</sup>ndi ye<sup>n</sup>e yú chí nadíí'vē yú nuu<sup>n</sup>ndi ye<sup>n</sup>e yú naati sá<sup>n</sup>a 'cūū nguéé dē'ē vee nuu<sup>n</sup>ndi díí<sup>n</sup> sa.

<sup>42</sup>Sa<sup>n</sup>a mii<sup>n</sup> ní ca<sup>n</sup>a sa chí sa Jesús mii<sup>n</sup>: N'diī, Jesús, n'gaacú nī ye<sup>n</sup>e 'úú taachí ndaá nī naachi caa<sup>n</sup>'ma<sup>n</sup> ntii<sup>n</sup>'nyu<sup>n</sup> ye<sup>n</sup>e.

<sup>43</sup>Tuu'mi ní Jesús mii<sup>n</sup> ca<sup>n</sup>a yā chí yā sa<sup>n</sup>a: Cuaacu ní<sup>n</sup>'nyú<sup>n</sup> nga<sup>n</sup>a ngíí dii, ti maa<sup>n</sup> ní cunee di nduucú na lugar chí nguuvi paraíso.

### Jesús ch'ii yā

(Mt. 27.45-56; Mr. 15.33-41; Jn. 19.28-30)

<sup>44</sup>Taachí chí ma<sup>n</sup>a nguuvi chí maāi<sup>n</sup> núú<sup>n</sup>'má<sup>n</sup> í<sup>n</sup>'yee<sup>n</sup>di ndíí taanduū n'gēecu 'íínú chíinū.

<sup>45</sup>Yá<sup>n</sup>a ní nduuvi maāi<sup>n</sup> ní cortina ye<sup>n</sup>e yaacū templo nda'ai náávtá<sup>n</sup>a.

<sup>46</sup>Tuu'mi ní Jesús mii<sup>n</sup> 'cai yā: N'diī, Chiidá, na ta'á nī cu'néé<sup>n</sup> espíritu

ye<sup>n</sup>e. Ch'íínú ca<sup>n</sup>a yā chuū, ní Jesús ch'ii yā.

<sup>47</sup>Taachí sa<sup>n</sup>a chí nga<sup>n</sup>a ntii<sup>n</sup>'nyu<sup>n</sup> ye<sup>n</sup>e soldados romanos n'diichi sa chí chí Jesús, tuu'mi ní ca<sup>n</sup>a sa: Dē'ē chúúca ch'ēete Ndyuūs. Cuaacu ní<sup>n</sup>'nyú<sup>n</sup> sá<sup>n</sup>a 'cūū sa<sup>n</sup>a chí nguéé nuu<sup>n</sup>ndi ye<sup>n</sup>e sa.

<sup>48</sup>Nducyáácá 'ii<sup>n</sup>'yā<sup>n</sup> chí che<sup>n</sup>e yā ní n'diichi yā chí chí, nguēcundíi yā che<sup>n</sup>e ni<sup>n</sup>'nu<sup>n</sup> yā taachi cue<sup>n</sup>e yā vaacu yā. <sup>49</sup>Ní nducyáácá 'ii<sup>n</sup>'yā<sup>n</sup> chí n'diichí yā Jesús mii<sup>n</sup>, ndúúcu n'daataá chí che<sup>n</sup>e ndúúcu Jesús mii<sup>n</sup> ndii yá'āa ye<sup>n</sup>e Galilea, ch'ēetinéé ya<sup>n</sup>'ai yā ch'íínú yā dendu'ū chí 'túúca.

### Ch'iiichi yā Jesús

(Mt. 27.57-61; Mr. 15.42-47; Jn. 19.38-42)

<sup>50</sup>Véé 'áámá sa<sup>n</sup>a chí n'dai ní n'daacā sa chí ngúúví sá José. Sá<sup>n</sup>a mii<sup>n</sup> ní sa<sup>n</sup>a ch'ēete ye<sup>n</sup>e 'ii<sup>n</sup>'ntyé<sup>n</sup>e ch'ēete ye<sup>n</sup>e 'ii<sup>n</sup>'yā<sup>n</sup> Israel. <sup>51</sup>Sa<sup>n</sup>a mii<sup>n</sup> ní ye<sup>n</sup>e yāā<sup>n</sup> Arimatea chí yá'āa ye<sup>n</sup>e 'ii<sup>n</sup>'yā<sup>n</sup> Israel. Ní sa<sup>n</sup>a nguéé ndúúvídaama sa ndúúcu taná<sup>n</sup>'a 'ii<sup>n</sup>'ntyé<sup>n</sup>e ti nguéé canee yiínú sa ndúúcu chí díí<sup>n</sup> yā. Tí sa<sup>n</sup>a mii<sup>n</sup> canee ngíínú sá tiempo chí Ndyuūs ndaa yā i<sup>n</sup>'yee<sup>n</sup>dí 'cūū ní nga<sup>n</sup>a ntii<sup>n</sup>'nyú<sup>n</sup> yā. <sup>52</sup>Ní cue<sup>n</sup>e sa ndaa sa nanáá<sup>n</sup> gobernador Pilato ní chiica sa cuerpo ye<sup>n</sup>e Jesús mii<sup>n</sup>. <sup>53</sup>Cuayiivi taachi José ndivíi sa cuerpo ye<sup>n</sup>e Jesús na cruz ní ch'ēecu sa áámá sámana na cuerpo ye<sup>n</sup>e yā tan'dúúca costumbre ye<sup>n</sup>e 'ii<sup>n</sup>'yā<sup>n</sup> Israel ní ch'iiichi sa na 'áámá yáinyā<sup>n</sup> ngai chí din'dái yā ch'ēeti yiivi yaava naachí mar 'áámá 'ii<sup>n</sup>'yā<sup>n</sup> nguéé nnú<sup>n</sup> yā. <sup>54</sup>Nguuvi mii<sup>n</sup> ní nguuvi viernes chí 'ii<sup>n</sup>'yā<sup>n</sup>

ch'iindiyaá<sup>n</sup> yā tanducue<sup>n</sup>ē cáávā 'viicu pascua ní cáávā nguuvi chi cuchií chi sábadu chi nguuvi chi ntaavi'tuunú<sup>n</sup> 'ii<sup>n</sup>yā<sup>n</sup> Israel.

<sup>55</sup>N'daata s'ee<sup>n</sup> chí can'daa Jesús ndii na yá<sup>n</sup>āa Galilea, cue<sup>n</sup>e tá ní n'diichi tá yáinyā<sup>n</sup> ní táácā canuú<sup>n</sup> cuerpo ye<sup>n</sup>e Jesús. <sup>56</sup>Ní taachí n'daataá s'ee<sup>n</sup> ndaa tá vaacu tá, n'nuu<sup>n</sup> tá perfumes ndúúcū pomadas chi n'deévé ngee<sup>n</sup>. Ní nguuvi cuayiivi, ní nguuvi sábadu chi ntaavi'tuunú<sup>n</sup> 'ii<sup>n</sup>yā<sup>n</sup> tan'dúúcū chi nga<sup>n</sup>a ley ye<sup>n</sup>e yā.

**Jesús nanduuchi yā ye<sup>n</sup>e nguua<sup>n</sup> tiná<sup>n</sup>ā**

(Mt. 28.1-10; Mr. 16.1-8; Jn. 20.1-10)

**24** Nguuvi domingo chi maa<sup>n</sup> ní nguuvi vmnáá<sup>n</sup> vmaaa<sup>n</sup> ye<sup>n</sup>e ndeete, tyaa<sup>n</sup> n'dái cue<sup>n</sup>e n'daataá s'éé<sup>n</sup> ní cue<sup>n</sup>e yā ndúúcū taná<sup>n</sup>ā n'daataá. Candéε yā especias chi deévé ngeé<sup>n</sup> chí 'āā véé yaá<sup>n</sup> yā. <sup>2</sup>Taachí ndāa yā na yáinyā<sup>n</sup> mii<sup>n</sup>, 'āā ntéé tuúu ch'εeté mii<sup>n</sup> na cheendi yáinyā<sup>n</sup> ti canee 'aama lado. <sup>3</sup>Tuu'mi ní taachí sndaá yā cheeti yáinyā<sup>n</sup> mii<sup>n</sup>, nguée ndaacá yā cuerpo ye<sup>n</sup>e Jesús. <sup>4</sup>Taachí n'diichi yā chuū, ní dii'yá yā chií, tuu'mi ní neéé<sup>n</sup> na 'uuvi sa<sup>n</sup>ā 'diituú yā ndúúcū catecai chi deévé ngii. <sup>5</sup>Ní n'daataá s'ee<sup>n</sup> dii'ya n'dai yā chií ní n'diichi yā ndii na yá<sup>n</sup>āa. Sa<sup>n</sup>ā s'ee<sup>n</sup> ní ca<sup>n</sup>a sa: ¿De'ε cuuví chí in'nuú<sup>n</sup> nī 'ii<sup>n</sup>yā<sup>n</sup> chi candúúchí yā ye<sup>n</sup>e nguua<sup>n</sup> tiná<sup>n</sup>ā? <sup>6</sup>Ii<sup>n</sup>yā<sup>n</sup> mii<sup>n</sup> ní 'āā ntéé canee yā 'muu<sup>n</sup>. 'Āā nduuchi yā nguua<sup>n</sup> tiná<sup>n</sup>ā. N'gáácū nī ye<sup>n</sup>e nduudu chí ca<sup>n</sup>a yā taachi canee yā ndúúcu nī na yá<sup>n</sup>āa Galilea taachí 'āā cuéé 'cuuvi yā. <sup>7</sup>Ní Jesús

mii<sup>n</sup> ní ca<sup>n</sup>a yā chií yā ndís'tií: 'Úú Sa<sup>n</sup>a chi Daiya Nduuūs ní 'ii<sup>n</sup>yā<sup>n</sup> canee chí nca'á yā 'úú ta'ā 'ii<sup>n</sup>yā<sup>n</sup> chí dinuu<sup>n</sup>ndí yā. Ní 'ii<sup>n</sup>yā<sup>n</sup> s'ee<sup>n</sup> cu'nee'nga'á yā 'úú; naati ndiichi ndii 'línú nguuvi 'úú nduuchi ye<sup>n</sup>e nguua<sup>n</sup> tina<sup>n</sup>ā.

<sup>8</sup>Tuu'mi ní n'daata s'ee<sup>n</sup> n'gaacu tá ye<sup>n</sup>e nduudu ye<sup>n</sup>e Jesús mii<sup>n</sup>. <sup>9</sup>Ní cue<sup>n</sup>e tá ye<sup>n</sup>e yáinyā<sup>n</sup> ní cuna<sup>n</sup>ā ta ní ca<sup>n</sup>ā tá chií tá ndu'u ndiicháámá apóstoles ndúúcū taná<sup>n</sup>ā 'ii<sup>n</sup>yā<sup>n</sup> chí snée yā mii<sup>n</sup>ya. <sup>10</sup>N'daata s'ee<sup>n</sup> chí ca<sup>n</sup>a ta chií tá apóstoles ní ta María ye<sup>n</sup>e yáā<sup>n</sup> Magdala, ndúúcū ta Juana, ndúúcū tá María chí cheecuú Jacobo, ndúúcū taná<sup>n</sup>ā n'daata s'ee<sup>n</sup>. <sup>11</sup>Apóstoles ní nadicadiinúú<sup>n</sup> yā chí tán'ā s'ee<sup>n</sup> ní loca tá cáávā chí nga<sup>n</sup>a tá. Ní nguée s't'éénu yā nduudu ye<sup>n</sup>e tá.

<sup>12</sup>Tuu'mi ní Pedro mii<sup>n</sup> ní ncuee<sup>n</sup> sa ní cue<sup>n</sup>e sa ngéenu sa na yáinyā<sup>n</sup>. Taachí ndaā sa, tuu'mi ní n'diichi núú<sup>n</sup> sa cheeti yainyā<sup>n</sup> ní 'āā dámaa<sup>n</sup> sábanas canee mii<sup>n</sup>. Sa<sup>n</sup>ā ní cue<sup>n</sup>e yiinu sá ye<sup>n</sup>e chí ch'óo ní cuna<sup>n</sup>ā sa na vaacu sa.

**Sa<sup>n</sup>ā s'ee<sup>n</sup> ní cue<sup>n</sup>e sa cuaa<sup>n</sup> cyúúni chí nge<sup>n</sup>e cuaa<sup>n</sup> na yāā<sup>n</sup> Emaús**

(Mr. 16.12-13)

<sup>13</sup>Nguuvi míí<sup>n</sup> nūu<sup>n</sup>, 'uuvi sa<sup>n</sup>ā s'ee<sup>n</sup> cue<sup>n</sup>e yā 'áámá yāā<sup>n</sup> 'lín' chí nguuvi Emaús chí canee taanduú ndiichúúví kilómetros ye<sup>n</sup>e yāā<sup>n</sup> Jerusalén. <sup>14</sup>Ní taachí cue<sup>n</sup>e yā cuaa<sup>n</sup> cyúúni ní índee yā ye<sup>n</sup>e tanducue<sup>n</sup>ē dendu'ū chí chií. <sup>15</sup>Náá<sup>n</sup> chí índee yā ní itiinguunee<sup>n</sup> vi'í yā, maa<sup>n</sup> Jesús mii<sup>n</sup> ndaa nii<sup>n</sup>nú<sup>n</sup> yā ní cue<sup>n</sup>e yā ndúúcū 'ii<sup>n</sup>yā<sup>n</sup> s'ee<sup>n</sup>. <sup>16</sup>Taachí n'diichi yā Jesús mii<sup>n</sup> nguée

iintiinaa<sup>n</sup> yā 'ii<sup>n</sup>'yā<sup>n</sup>. <sup>17</sup> Jesús ca<sup>n</sup>'a yā chii yā 'ii<sup>n</sup>'yā<sup>n</sup> s'ee<sup>n</sup>: ¿De'ē índee ndís'tii? ¿De'ē cuuvi tátií ndaachi yíinú ní?

<sup>18</sup> Sa<sup>n</sup>'ā chi nguuvi Cleofas nan'guεεcúta<sup>n</sup>'a yā. ¿Áá díí, 'áámá n'dyá<sup>n</sup>'ā dii chi canuu<sup>n</sup> di yúúni na yáá<sup>n</sup> Jerusalén chi nguéé déenu di de'é chií nguuvi s'ee<sup>n</sup> na yáá<sup>n</sup> Jerusalén mii<sup>n</sup>?

<sup>19</sup> Tuu'mi ní Jesús ca<sup>n</sup>'a yā chii yā 'ii<sup>n</sup>'yā<sup>n</sup> s'ee<sup>n</sup>: ¿De'é chií yáá<sup>n</sup> mii<sup>n</sup>'ya? 'Ii<sup>n</sup>'yā<sup>n</sup> s'ee<sup>n</sup> ní ca<sup>n</sup>'a yā: Jesús ye<sup>n</sup>'e yáá<sup>n</sup> Nazaret, chi 'áámá sa<sup>n</sup>'ā profeta ní díí<sup>n</sup> yā 'áámá ntií<sup>n</sup>'nyu<sup>n</sup> n'dai ndúúcu poder. Ní díí<sup>n</sup> yā n'dee n'dái vaadi n'giinu ní nga<sup>n</sup>'a yā nduudu ye<sup>n</sup>'é Ndyuūs nanáá<sup>n</sup> Ndyuūs ní nanáá<sup>n</sup> nducyaaca 'ii<sup>n</sup>'yā<sup>n</sup>. <sup>20</sup> Chiiduú n'gεeté ndúúcu 'ii<sup>n</sup>'ntyé<sup>n</sup>'ē ye<sup>n</sup>'ē yú tun'dáa nuu<sup>n</sup>'ndi ye<sup>n</sup>'e Jesús ní nca'a yā Jesús 'ii<sup>n</sup>'yā<sup>n</sup> ní ca<sup>n</sup>'a yā chí 'cuuvi yā. Nícu s'nee<sup>n</sup>'nga'á yā Jesús. <sup>21</sup> Nús'uu ní snéé yúúni 'nū ní cunee ngiinú 'nū chí sá<sup>n</sup>'a 'cūú ní nadinguá<sup>n</sup>'ai sa 'ii<sup>n</sup>'yā<sup>n</sup> ye<sup>n</sup>'é nación Israel chi nación ye<sup>n</sup>'é 'nū. Maa<sup>n</sup> ní 'iinū nguuvi chí chií chuú.

<sup>22</sup> Ní ná nduuvi n'daataá chí chiicá yā dáámá nduucú 'nū che<sup>n</sup>'é yā tyaa<sup>n</sup> na yáinyā<sup>n</sup> ní cue<sup>n</sup>'e yíínú 'nū. <sup>23</sup> Ní ndaá yā nanaá<sup>n</sup> 'nū ní ca<sup>n</sup>'a yā chi nguéé ndaaca yā cuerpo ye<sup>n</sup>'e Jesús mii<sup>n</sup>. Ní n'diichí yā nduuvi ángeles chí ca<sup>n</sup>'a yā chii yā 'ii<sup>n</sup>'yā<sup>n</sup> s'ee<sup>n</sup> chí Jesús mii<sup>n</sup> 'āá nduuchí yā ye<sup>n</sup>'e nguaa<sup>n</sup> tiná<sup>n</sup>'ā. <sup>24</sup> Ni che<sup>n</sup>'é n'duuvi sa<sup>n</sup>'ā chi chiicá nduucú 'nū na yáinyā<sup>n</sup> ní ndaāca sa tan'dúúca chí nga<sup>n</sup>'a n'daataá s'ee<sup>n</sup> naati nguéé n'diichi sa Jesús.

<sup>25</sup> Tuu'mi ní Jesús ca<sup>n</sup>'a yā chii yā sa<sup>n</sup>'ā s'ee<sup>n</sup>: De'ē chúúca vaadicadínūu<sup>n</sup> ye<sup>n</sup>'e ndís'tii ndúúcu staava ye<sup>n</sup>'e ní chí cheechi chí nguéé s'téenu ní

tanducue<sup>n</sup>'ē chí ca<sup>n</sup>'a sa<sup>n</sup>'ā profetas. <sup>26</sup> ¿Áá nguéé canee nguū<sup>n</sup> na libro ye<sup>n</sup>'é Ndyuūs chí Cristo mii<sup>n</sup> canéé chí 'cuenú yā cuuvi cosas chí 'túúca ní cuayiivi míí<sup>n</sup> cuna<sup>n</sup>'á yā ná va'ai cheeti nguuvi?

<sup>27</sup> Tucá'a Jesús ca<sup>n</sup>'a yā ye<sup>n</sup>'e tanducue<sup>n</sup>'ē chí canéé nguū<sup>n</sup> na libro ye<sup>n</sup>'é Ndyuūs ndíí taachí dinguu<sup>n</sup> Moisés ndúúcu chí dingúú<sup>n</sup> nducyaaca profetas. Ní nga<sup>n</sup>'a Jesús ye<sup>n</sup>'e chí dingúú<sup>n</sup> yā ye<sup>n</sup>'é Cristo ndíí cuáá<sup>n</sup> vmnaa<sup>n</sup> ye<sup>n</sup>'e chí canéé chí chó'oo ye<sup>n</sup>'é yā.

<sup>28</sup> Tuu'mi ní taachi ndaá yā na yáá<sup>n</sup> 'lín' chí cue<sup>n</sup>'e yā, Jesús mii<sup>n</sup> ní díí<sup>n</sup> yā chí candiicá ca yā. <sup>29</sup> Sa<sup>n</sup>'ā s'ee<sup>n</sup> di'cuútu sa Jesús chí canee yā ndúúcu sa, ní ca<sup>n</sup>'a sa chí sa Jesús: N'dii cunee ní nduucú 'nū, ti cuuvi chíínū ye<sup>n</sup>'e ní. 'Áá cuéé cuuvi 'da'ā. Tuu'mi ní Jesús cue<sup>n</sup>'e yā ndúúcu sa<sup>n</sup>'ā s'ee<sup>n</sup> cuaa<sup>n</sup> cheeti va'ái ní canee yā ndúúcu sa.

<sup>30</sup> Taachí Jesús mii<sup>n</sup> vee yā na mesa ní che'é yā ndúúcu 'ii<sup>n</sup>'yā<sup>n</sup> s'ee<sup>n</sup>, tuu'mi ní sta'á yā pan ní ca<sup>n</sup>'angua'á yā ní ca'a yā gracias Ndyuūs caavā pan mii<sup>n</sup>. Ní n'dee yā pan ní ca'a yā 'ii<sup>n</sup>'yā<sup>n</sup> s'ee<sup>n</sup>.

<sup>31</sup> Tuu'mi nūu<sup>n</sup> sa<sup>n</sup>'ā s'ee<sup>n</sup> iintiinaa<sup>n</sup> sa Jesús mii<sup>n</sup>, naati Jesús ndaanaá<sup>n</sup> yā ye<sup>n</sup>'e sa<sup>n</sup>'ā s'ee<sup>n</sup>. <sup>32</sup> Ní sa<sup>n</sup>'ā s'ee<sup>n</sup> nga<sup>n</sup>'a sa ngii sa vi'i: ¿Áá nguéé chicadiinuu<sup>n</sup> yú na staava ye<sup>n</sup>'e yú chí ya'ai taachi snúu<sup>n</sup> yú yúúni taachí índee yā ndúúcu yú, ní ngi'cueé<sup>n</sup> yā nduudu ye<sup>n</sup>'é Ndyuūs s'uuú<sup>n</sup>?

<sup>33</sup> Hora míí<sup>n</sup> nūu<sup>n</sup> nducuee<sup>n</sup> sa ní cuna<sup>n</sup>'á sa na yáá<sup>n</sup> Jerusalén. Ní ndaaca sa ndu'ū ndiicháámá apóstoles ndúúvidaama yā ndúúcu taná<sup>n</sup>'ā 'ii<sup>n</sup>'yā<sup>n</sup> chí snéé yā ndúúcu yā. <sup>34</sup> 'Ii<sup>n</sup>'yā<sup>n</sup> s'ee<sup>n</sup> ní nga<sup>n</sup>'a yā nguaa<sup>n</sup> máá<sup>n</sup> yā: Cuaacu ní<sup>n</sup>'nyú<sup>n</sup> Jesús nduuchi yā

nguaa<sup>n</sup> tiná<sup>n</sup>ā ní che'enaá<sup>n</sup> yā ye<sup>n</sup>e  
Simón.

<sup>35</sup>Tuu'mi ní 'uuvi sa<sup>n</sup>ā s'ee<sup>n</sup> ní ca<sup>n</sup>a  
yā táácā chií yúúni chí cue<sup>n</sup>e yā. Tii  
ní iintiinaá<sup>n</sup> Jesús mií<sup>n</sup> taachí n'deé  
yā pan.

**Jesús che'enaá<sup>n</sup> yā ye<sup>n</sup>e discípulos  
ye<sup>n</sup>e yā**

(Mt. 28.16-20; Mr. 16.14-18; Jn. 20.19-23)

<sup>36</sup>Taachí sa<sup>n</sup>a s'ee<sup>n</sup> nga<sup>n</sup>a sa chuū,  
Jesús mií<sup>n</sup> ní che<sup>n</sup>e naá<sup>n</sup> yā naavta<sup>n</sup>a  
'ii<sup>n</sup>yā<sup>n</sup> s'ee<sup>n</sup> ní ca<sup>n</sup>á yā chií yā 'ii<sup>n</sup>yā<sup>n</sup>  
s'ee<sup>n</sup>: Cuuví 'diií<sup>n</sup> ndúúcu ndís'tii.

<sup>37</sup>Tuu'mi ní 'ii<sup>n</sup>yā<sup>n</sup> s'ee<sup>n</sup> dii'yā yā  
chií ti nadicádíínuu<sup>n</sup> yā chí n'diichi  
yā 'aama espíritu. <sup>38</sup>Naati Jesús mii<sup>n</sup>  
ca<sup>n</sup>á yā chií yā 'ii<sup>n</sup>yā<sup>n</sup> s'ee<sup>n</sup>: ¿De'ē  
cúuví chí dii'yā nī chií? ¿De'ē cúuví  
chí 'tíicā nadacádíínuu<sup>n</sup> nī na staava  
ye<sup>n</sup>e nī? <sup>39</sup>Cuin'diichí nī ta'á ndúúcu  
ca'á. 'Úú maá<sup>n</sup> chuū. Cuituu'ví nī  
'úú. Cuin'diichí nī. 'Úú nguéé 'aama  
espíritu tan'dúúcā chí nadacádíínuu<sup>n</sup>  
nī. 'Áamá espíritu nguéé 'iini ní nguéé  
yuutē tan'dúúcā chí inaa<sup>n</sup> ndís'tii chí  
véé ye<sup>n</sup>e 'úú.

<sup>40</sup>Taachi Jesús ca<sup>n</sup>a yā nduudú  
'cūú, chí<sup>n</sup>i yā ta'a yā ndúúcu ca'a yā.

<sup>41</sup>Naati 'ii<sup>n</sup>yā<sup>n</sup> s'ee<sup>n</sup> ní nguéé s'téenu  
yā ti yeenú ndai yā ní nge<sup>n</sup>e yiinu yā.  
Ní cáávā chuū Jesús ca<sup>n</sup>a yā chií yā  
'ii<sup>n</sup>yā<sup>n</sup> s'ee<sup>n</sup>: ¿Áá nguéé de'ē vee 'muu<sup>n</sup>  
chí che'e yú?

<sup>42</sup>Tuu'mi ní ca'a yā 'áamá táá<sup>n</sup> 'yaācā  
ndúúcu 'aama taa<sup>n</sup> va'ai ndí'i. <sup>43</sup>Cristo  
mii<sup>n</sup> ní sta'a yā ní che'e yā nanáá<sup>n</sup>  
'ii<sup>n</sup>yā<sup>n</sup> s'ee<sup>n</sup>. <sup>44</sup>Ní ca<sup>n</sup>a yā chií yā 'ii<sup>n</sup>yā<sup>n</sup>  
s'ee<sup>n</sup>: Ndúúdu 'cūú ca<sup>n</sup>á taachi canéé  
ndúúcu ndís'tii. Canéé chí cúuví  
cuaacu tanducué<sup>n</sup>ē dendu'ū chí canéé  
nguū<sup>n</sup> ye<sup>n</sup>e 'úú na libro ye<sup>n</sup>e Ndyuūs  
chí canéé nguū<sup>n</sup> na ley ye<sup>n</sup>e Moisés

ndúúcu ye<sup>n</sup>e profetas ndúúcu ye<sup>n</sup>e  
salmos.

<sup>45</sup>Tuu'mi ní Jesucristo dii<sup>n</sup> yā chí  
tuumicadiinuu<sup>n</sup> 'ii<sup>n</sup>yā<sup>n</sup> s'ee<sup>n</sup> chí  
canéé nguū<sup>n</sup> na libro ye<sup>n</sup>e Ndyuūs.

<sup>46</sup>Ní ca<sup>n</sup>a yā chií yā 'ii<sup>n</sup>yā<sup>n</sup> s'ee<sup>n</sup>:

'Tíicā canéé ye<sup>n</sup>e 'úú chí Cristo  
'úú. 'Tíicā canee chí 'cuenú cuuvi  
ní 'cuúví. Ní nduuchí ye<sup>n</sup>e nguaa<sup>n</sup>  
tiná<sup>n</sup>ā ndii chí ndii 'íínú nguuvi.  
<sup>47</sup>Ní 'ii<sup>n</sup>yā<sup>n</sup> s'ee<sup>n</sup> canéé chí caa<sup>n</sup>ma<sup>n</sup>  
yā nduudu mii<sup>n</sup> chí ndaacadaami  
'ii<sup>n</sup>yā<sup>n</sup> ye<sup>n</sup>e nuu<sup>n</sup>ndi ye<sup>n</sup>e yā  
vmnaa<sup>n</sup> núú<sup>n</sup>má<sup>n</sup> na yāā<sup>n</sup> ní Ndyuūs  
nadach'εécú yā nuu<sup>n</sup>ndi ye<sup>n</sup>e yā  
cáávā chí duuchí. Ní vmnáá<sup>n</sup> vmnaa<sup>n</sup>  
nanáá<sup>n</sup> 'ii<sup>n</sup>yā<sup>n</sup> ye<sup>n</sup>e yāā<sup>n</sup> Jerusalén.  
Cuayiivi ye<sup>n</sup>e 'ii<sup>n</sup>yā<sup>n</sup> ye<sup>n</sup>e núú<sup>n</sup>má<sup>n</sup>  
naciones ye<sup>n</sup>e i<sup>n</sup>'yee<sup>n</sup>dí. <sup>48</sup>Ndís'tii  
ní cuuví nī testigos ye<sup>n</sup>e chuū ti  
n'diichí nī chuū ní canéé chí caa<sup>n</sup>má<sup>n</sup>  
nī 'ii<sup>n</sup>yā<sup>n</sup>. <sup>49</sup>Cuin'diichí nī. 'Úú  
dicho'ó Espíritu N'dai ye<sup>n</sup>e Ndyuūs  
chí ca<sup>n</sup>ā Chiidá chí ndaā nanáá<sup>n</sup>  
ndís'tii. 'Cuεetinéé nuú<sup>n</sup> nī na yāā<sup>n</sup>  
Jerusalén ndí chí ndaāca nī poder  
ye<sup>n</sup>e Ndyuūs, poder chí cuchii ye<sup>n</sup>e  
cuaa<sup>n</sup> 'níf<sup>n</sup>nú<sup>n</sup>.

**Jesús cuna<sup>n</sup>a yā va'ai cheeti nguuvi**

(Mr. 16.19-20)

<sup>50</sup>Che<sup>n</sup>e Jesús ndúúcu 'ii<sup>n</sup>yā<sup>n</sup>  
s'ee<sup>n</sup> na yāā<sup>n</sup> 'líí<sup>n</sup> Betania ní di'viicú  
yā 'ii<sup>n</sup>yā<sup>n</sup> s'ee<sup>n</sup>. <sup>51</sup>Taachí chíinu  
di'viicú yā 'ii<sup>n</sup>yā<sup>n</sup> s'ee<sup>n</sup>, cue<sup>n</sup>é yā  
ye<sup>n</sup>e 'ii<sup>n</sup>yā<sup>n</sup> s'ee<sup>n</sup> ní cundaa yā va'ai  
cheeti nguuvi. <sup>52</sup>Cuayiivi 'ii<sup>n</sup>yā<sup>n</sup>  
s'ee<sup>n</sup> dich'εetē yā Ndyuūs ní cuna<sup>n</sup>a  
ntuú<sup>n</sup> yā na yāā<sup>n</sup> Jerusalén. Ní neené  
yeenu taavi yā. <sup>53</sup>Ní 'áamá cheetinéé  
yā na yaācū templo ní nga<sup>n</sup>á yā chí  
ch'εete Ndyuūs. Ní i'téenu yā Ndyuūs.  
'Tíicā chíi.